

See discussions, stats, and author profiles for this publication at: <https://www.researchgate.net/publication/339712593>

Adabiyotshunoslik lug'ati

Book · January 2013

CITATIONS

0

READS

1,992

3 authors, including:



Dilmurod Quronov

Andijan State University

83 PUBLICATIONS 10 CITATIONS

[SEE PROFILE](#)



Mashkhura Sherlieva

Andijan State University

33 PUBLICATIONS 3 CITATIONS

[SEE PROFILE](#)

Some of the authors of this publication are also working on these related projects:



OT-A1-46 "Создание учебной литературы нового поколения по теоретическим курсам литературоведения" 2017-2018 годы [View project](#)



Грант № 35/89 Государственного Комитета по науке и технике Республики Узбекистан. Проект научно-практического исследования на тему "Чулпон: жизнь и творческое наследие" 1998-2000 [View project](#)

21.512
680 ТАСТИКА КОМПАРАТИВИЗМ САЕХАТНО
СИЦИЗМ РЕМАРКА ХАФИФ ФЕЛЬЕТОН ИРСОЛ УЛ
ИТАЛІЛ ПОСТМОДЕРНИЗМ ЮМОР ДРАМА
ШЕЪР МАЖОЗ ЭПОПЕЯ ҲАРФ
АЖАЗ БАДИЙЛИК ЭЗОП ТИЛИ ФАЗ
БАТ БАЙТ ПАКОНИЗМ
РАЖАК

Д.ҚУРОНОВ, З.МАМАЖОНОВ, М.ШЕРАЛИЕВА

АДАБИЁТШУНОСЛИК ЛУФАТИ



Д.ҚУРОНОВ, З.МАМАЖОНОВ, М.ШЕРАЛИЕВА

АДАБИЁТШУНОСЛИК ЛУҒАТИ

Қайта нашр

Тошкент
«Akademnashr»
2013

УДК: 821.512.133'374

КБК 83.3(5У)

К-80

К-80

Куронов Д.

Адабиётшунослик лугати / Д.Куронов, З.Мамажонов, М.Шералиева. – Тошкент: Akademnashr, 2013. – 408 б.


ISBN 978-9943-389-57-1

УДК: 821.512.133'374

КБК 83.3(5У)я2

Лугат-маълумотнома тарзида тартибланган ушбу китобда адабиётшуносликка оид терминлар изоҳланиб, уларнинг мазмун-моҳияти мисоллар ёрдамида ёритилган.

Лугат олий ўқув юртларининг бакалавриат ва магистратура босқичларида таҳсил олаётган талабалар, академик лицей ва касб-хунар коллежлари ўқувчилари, ўзбек тили ва адабиёти ўқитувчилари, абитуриентлар, шунингдек кенг китобхонлар оммасига мўлжалланган.



Заҳириддин Муҳаммад Бобур номидаги Андижон давлат университети Илмий кенгаши қарори (26.02.2010. 7-баённома) билан нашрга тавсия этилган.

© Д.Куронов, З.Мамажонов, М.Шералиева
«Адабиётшунослик лугати»
© «Akademnashr», 2013.

ISBN 978-9943-389-57-1

ФОЙДАЛАНУВЧИЛАРГА

Лугатдан ҳозирги ва мумтоз адабиётшунослик терминларини жамлаган ҳолда изохлаш ва бу билан фойдаланувчиларга қулайлик яратиш мақсади күзланган. Лугат анъанавий тарзда тартибланган бўлиб, уни тузишда фойдаланиш учун қулайлик дикқат марказига қўйилди. Ҳажмни эътиборда тутган ҳолда бир қатор шартли қисқартмалардан фойдаланилди:

- қ. – қаранг
- ар. – арабча
- лот. – лотинча
- юн. – юононча
- фр. – французча
- нем. – немисча
- ингл. – инглизча
- итал. – итальянча
- мас. – масалан
- ва б. – ва бошқалар
- ва ш.к. – ва шу каби
- ва ҳ. – ва ҳоказо

Изохланаётган термин изоҳ матни ичидаги бош ҳарфи билан (мас., Муболага – М.) берилди. Шунингдек, сўз биримаси шаклидаги терминлар ҳам матнда қисқарттириб ифодаланди: биримадаги сўзларнинг биринчи ҳарфлари олинниб, уларнинг дастлабкиси бош ҳарф, кейингилари эса кичик ҳарф шаклида берилди (мас., Адабиёт назарияси – А.н.). Сўз ўзгартирувчи қўшимчалар қисқартмаларга тўғридан-тўғри қўшилди (мас., А.н.га – адабиёт назариясига; Б.о.нинг – бадиий образнинг). Лугатнинг ўзига ҳаволалар терминдан сўнг (қ.) қисқартмасини бериш орқали ифодаланди.

Тузувчилар мутахассисларнинг лугат ҳақидаги холис фикр-мулоҳазаларини кутиб, уларни кейинги нашрларда эътиборга олиш ниятида қоладилар.



АБЖАД ҲИСОБИ – араб алифбосидаги ҳарфларнинг ҳар бири маълум сонга тенглиги асосида юритилувчи ҳисоб. Яъни араб ҳарфларининг ҳар бири алифбо тартибида маълум сонни ифодалайди. Осон эслаб қолиниши учун сонларни ифодалаётган ҳарфларни қатъий алифбо тартибида бириткириш орқали саккизта сунъий сўз ҳосил қилинган бўлиб, улар ҳеч қандай луғавий маънога эга эмас: абжад (أبجد), ҳавваз (هَوْز), ҳутти (حُطْيَ), каламан (كُلْمَن), саъфас (سَعْفَصَ), қарашат (خَرَشَاتَ), саххаз (سَخْخَازَ), зазағ (ضَظَّعَ). А.ҳ. атамаси мазкур сўзларнинг биринчиси номидан келиб чиқкан. Шу саккиз сўз таркибидаги қисқа унлилар истисно қилинса, қолган ҳарфлар 1 дан 1000 гача бўлган сонларни билдиради (бу ўринда ўзбек алифбосидаги «т», «с», «ҳ», «з» ҳарфларининг араб алифбосида турли кўринишлари мавжудлигини ҳисобга олиш керак):

Сунъий сўз	Ҳарф номи	Ҳарф шакли	Сон	Сунъий сўз	Ҳарф номи	Ҳарф шакли	Сон
Абжад	Алиф	ا	1	Саъфас	Син	س	60
	Бе	ب	2		Айн	ع	70
	Жим	ج	3		Фо	ف	80
	Дол	د	4		Се	ص	90
Ҳавваз	Ҳои ҳавваз	ه	5	Қарашат	Қоғ	ق	100
	Вов	و	6		Ре	ر	200
	Зайн	ز	7		Шин	ش	300
Ҳутти	Ҳои ҳутти	ح	8		Те	ت	400
	То	ط	9	Саххаз	Сод	ث	500
	Йой	ي	10		Хо	خ	600
Каламан	Қоғ	ک	20		Зол	ذ	700
	Лом	ل	30		Зод	ض	800
	Мим	م	40		Зе	ظ	900
	Нун	ن	50		Ғайн	غ	1000

Шарқ мумтоз шеъриятида А.ҳ.дан у ёки бу воқеа-ходисанинг юз бериш вақтини қайд этиш (қ. таърих), шеърда турли сўз ўйинларини юзага келтириш каби мақсадларда самарали фойдаланилган. Шунингдек, А.ҳ. имкониятлари чистон (қ.), муаммо (қ.) каби шеърий бошқотирма жанрларида ҳам кенг истифода этилган.

АВАНГАРДИЗМ (фр. avant-garde – олдинги отряд, илфор) – 1) шартли равища модернистик адабиётнинг бир қатор оқимларига хос бўлган хусусиятнинг умумий номи сифатида қўлланувчи термин. Яъни А. адабий жараёндаги муайян бир йўналиш ёки оқим эмас, балки бир қатор оқимларга хос хусусият, яна ҳам аниқроғи, модернизмнинг кескин, радикал қанотидир. А. адабиётнинг реаллик билан алоқасини инкор қилиш, адабиёт ва санъатни ижтимоий ҳаёт билан боғлиқ бўлмаган алоҳида соҳа деб билиш, адабий анъаналарни инкор қилиш ва бадиий шаклда мутлақ янгилик яратиш даъвосини олға суриш кабиларда намоён бўлади (қ. футуризм, дадаизм, сюрреализм); 2) модернизмнинг босқичларидан бири, ўз ичига Биринчи жаҳон уруши арафасидан бошлаб Иккинчи жаҳон уруши охиригача бўлган даврни қамраб олади. Модернизмни бу тарзда даврлаштирувчи мутахассислар унинг яна *неоавангардизм* (XX асрнинг 50 – 60-йиллари) ва *постмодернизм* (70-йиллардан) босқичларини ҳам ажратадилар. Лекин бу мавжуд қарашлардан биригина бўлиб, умумэътироф этилган эмас; 3) Фарб адабиётшунослигида модернизмнинг бир қатор оқимларига хос хусусият ёки унинг бир босқичи сифатида эмас, балки, умуман, *модернизм* маъносида ҳам қўлланади.

АВТОБИОГРАФИК АСАР (юн. autos – ўзим, bios – ҳаёт, grapho – ёзаман) – муаллифнинг ўз ҳаёти ҳақида изчил ҳикоя қилишига асосланган адабий жанр. А.а.ни ёзувчининг турли муносабат билан ёзилган автобиографияси (таржимаи ҳол)дан фарқлаш лозим. А.а. муаллифи ўз ҳаётини қайтадан яшаб кўради, уни бир бутун сифатида идрок этишга интилади. Яшаб ўтилган ҳаётни бир бутунликда идрок этиш эҳтиёжи туфайли А.а. муаллифи баъзан бадиий тўқималарга ҳам йўл қўйиши табиий, чунки у ҳаётини яхлит эстетик мушоҳада қиларкан, уни ижодий қайта яратади. Шунинг учун А.а.лар аксар ҳолларда муаллифларнинг ижодий етуклик паллаларида, умрлари ниҳоясида ёзилади (мас., Ойбекнинг «Болалик» қиссаси). Мутахассислар А.а.ни чегарадаги, яъни бошқа жанрлар билан кесишувчи жанр деб хисоблайдилар. Ҳақиқатан ҳам, А.а.нинг мемуарлар, кундаликлар, айрим саёҳатномалар билан ўхшаш томонлари бор. А.а.нинг мемуарлардан фарқи шуки, мемуар асарда муал-

лифни воқелик (ўзи учратган кишилар, гувоҳи бўлган ёки қатнашган воқеалар) қизиқтиурса, А.а. муаллифи диққат марказида ўзининг воқелик билан узвий алоқадаги шаклланиш тарихи, қалб ва онги тарихи туради. Ёки кундаликларда ҳам А.а.даги каби муаллифнинг бошдан ўтказган ва кўнгилдан кечиргандари акс этади. Фарқ шуки, кундаликларда тасвирланаётган воқеаларнинг юз бериш вақти билан улар ҳақида ёзиш вақти орасида даврий масофа йўқ, бу эса ўз ҳаётини бир бутунликда кўришга халал беради, яъни муаллиф босиб ўтган ҳаёт йўли унинг ўзи учун эстетик идрок обьектига айланмайди. А.а. билан автобиографик характердаги асарларни фарқлаш керак. Аввало шуни айтиш керакки, ҳар қандай адабий асарда автобиографиклик унсурлари мавжуд, чунки асар муаллифнинг ҳаётий тажрибаси асосида дунёга келади: ижодкор ҳаётида юз берган айрим воқеалар, у гувоҳ бўлган ҳолатлар, шулар таъсирида юзага келган ўй-кечинималар матнга сингиб кетиши табиий. Автобиографик характердаги асарда биографик унсурлар салмоқли ўрин тутгани ҳолда, бадиий тўқима ҳал қилувчи аҳамият касб этади (мас., F.Фуломнинг «Шум бола» қиссаси). Бошқача айтсак, худди реал прототипига эга асарлардаги каби автобиографик характердаги асар учун муаллиф – прототип, холос, унинг асосида бошқа бир шахс образи яратилади.

АВТОГРАФ (юн. *autos* – ўзим, *grapho* – ёзаман) – 1) муаллиф кўллэзмаси; адабий асарнинг муаллиф қўли билан ёзилган матни. А. матншунослик учун муҳим манба бўлиб, асарнинг асл (каноник) матнини белгилашда, ёзувчи ижодий лабораториясини тадқиқ этишда жуда катта аҳамиятга эга. А.лар, одатда, ёзувчи-шоирларнинг хонадонларида (уларнинг меросхўрлари қўлида), уй-музейларида, турли архив, кутубхона, илмий-тадқиқот муассасалари фондларида сақланади. Илм-фан ва техника тараққиёти А. тушунчасига маълум ўзгартиришлар киритди. XIX аср охирларидан бошлаб ёзувчилар орасида ўз асарларини ёзув машинкасида, XX аср охирларидан эса компьютерда ёзиш расм бўлди. Шунга кўра, эндиликда асарнинг муаллиф томонидан ёзув машинкаси ёки компьютерда терилган матни ҳам А. саналади; 2) китобни бирор шахс (ташкилот, муассаса ва ш.к.)га тақдим этиш чоғида унинг титул варагига муаллиф қўли билан битиладиган мўъжаз ёзув, дастхат. Унда, одатда, муаллифнинг китоб тақдим этилаётган кишига самимий тилаклари, миннатдорлиги ва ш.к.лар изҳор этилади.

АВТОИНТЕРПРЕТАЦИЯ (юн. *autos* – ўзим, лот. *interpretation* – тушунтириш) – муаллифнинг ўқувчига ўз асарини тушунтириш,

унга ўзи назарда туттан маънони англатишга қаратилган ҳаракати. А. турли шаклларда (сўзбоши, сарлавча, эпиграф, бағишлов, сўнгсўз, сатр ости изоҳлари ва ш.к.) амалга ошиши мумкин. Мас., Фахриёрнинг «Арафа» шеърида сарлавча мазмуннинг англанишида жуда муҳим:

*Деворда осиглиқ қилич
зангларини тўка бошлади,
яраклай бошлади тўсатдан
ярим ой шаклида...
Девор эса қизил эди.*

Шеър 1989 йили ёзилгани эътиборга олинса, шоир уни нима учун «Арафа» деб номлагани ҳам, шеърдаги рамзий образлар мазмуни ҳам англашилади. Ёки Х.Даврон «Дунё гўзал, – деди...» деб бошланувчи шеърига Рудакийдан «Кўзларимдан айрилиб кўрдим бутун дунёни» мисрасини эпиграф қилиб олади, шу эпиграф туфайлигина ўқувчи матнда «кекса шоир» деб аталган лирик персонаж Рудакий эканини англайди, шеърдаги ўткир драматизмни ҳис қиласиди, унинг фалсафий мазмунини тушунади. «Ўткан кунлар»нинг бир ўрнида А.Қодирий сатр ости изоҳи шаклида Мусулмонқулнинг қатл этилиши эпизодини беради, бу эса Мусулмонқул Отабек билан тўқнашган ҳолат моҳиятини, муаллифнинг инсон концепциясини тўғри тушуниш учун бир калитдир. Кўпинча А.нинг мазкур шаклларида қувлик, тагдор маънога ишора мавжудлиги кузатилади. Мас., Чўлпон «Кеч» романига М.Горькийнинг: «Маърифат чоғиштириб кўриш орқали ҳосил бўлади, бизнинг ёшлар эса ўз кўрганларини ҳеч нима билан чоғиштиrolмайдилар, улар кечмишни билмайдилар ва шу учун ҳозирги замоннинг нималигини етарли даражада очик англаёлмайдилар», – деган сўзларини эпиграф қилиб олади. Бу ўринда эпиграф маъносини икки ёқлама тушуниш имконияти бор: Чўлпон кечмишни ёшлар ҳозирги замоннинг қадрига етсинглар деган мақсадда тасвирлаётганини «совет ёзувчиси» мавқеидан туриб таъкидлайди, айни соҳда, соҳта тарих миясига сингдирилиб, манқуртга айлантирилаётган ёшлар «ҳозирги замоннинг нималигини етарли даражада очик англасинлар» учун асарни яратганини миллатнинг кўзи очик бир вакили мавқеида туриб айтади. Яъни эпиграф танлашдаёқ Чўлпон романнинг мазмун структураси моделини шакллантиради: ўзи айтмоқчи бўлган фикр тубда, юзадагиси эса фақатгина «ниқоб» – во-

сита, холос. Муаллиф ўз асари (айниңса, асар баҳс-мунозараларга сабаб бўлса) ҳақида матбуот орқали билдирган фикрлар (сұхбат, мақола, очиқ хат ва ш.к.) ҳам А.нинг кўринишларидан саналади.

АВТОПСИХОЛОГИК ЛИРИКА – лириканинг субъектив ташкилланишига кўра кўриниши, ижровий лирикага (қ.) зидлаган ҳолда фарқланувчи лирик кечинма бевосита шоир тилидан ифода этилган шеър. Мутахассислар лирика аксар ҳолларда автопсихологик бўлиши, айни чоғда, лирик қаҳрамон билан биографик шоир доим ҳам бир-бирига тенг эмаслигини таъкидлайдилар (қ. *лирик қаҳрамон*).

АВТОР (лот. autor – асосчи, ижодкор) – қаранг: **муаллиф**

АВТОР НУТҚИ – қаранг: **муаллиф нутқи**

АВТОР ОБРАЗИ – қаранг: **муаллиф образи**

АДАБИЁТ (ар. ublish адаб – гўзал хулқ) – кенг маънода инсон тафаккурининг маҳсули ўлароқ дунёга келган, ўқиш учун мўлжаллаб ёзилган асарлар жами. Тор маънода сўз санъати, бадиий адабиёт. Мумтоз адабиётшунослигимиизда сўз санъатини умумлаштириб А. деб аташ одати кузатилмайди, терминнинг бу маънода ишлатилиши кўпроқ кейинги даврларда, хусусан, XX асрда оммалашган. Фарбда антик даврлардан бошлаб то XVII – XVIII асрларга қадар бадиий адабиётни «поэзия» деб атаб, унга «проза»ни (қ. проза) қарши кўйишган. Шунга ўхшаш Шарқда мумтоз адабиётшунослиқда ҳам кўпроқ «шеър» ва «наср» атамалари ишлатилган. Ҳозирги даврга келиб сўзлашув амалиётида ҳам, илмий муоммалада ҳам А. терминининг тор маъноси фаолроқ кўлланилади, у бадиий адабиёт маъносига ишлатилади. Ҳолбуки, тор маънода кўлланганида ҳам терминнинг қамрови жуда кенг, чунки у *адабий-бадиий асарларнигина эмас, адабий асарларни ҳам тўла қамраб олади*. Яъни А.ни сўз санъати деб билган ҳолда унга санъат ҳодисаси бўлмаган асарлар (мас., мемуарлар, кундаликлар, сафарномалар, эсселар, афоризмлар ва б.) ҳам мансуб этилади. Мазкур ҳол муайян чигалликларни келтириб чиқаради, илмий аниқлик талаби билан баъзан «бадиий адабиёт», «адабий-бадиий асар» тарзидаги аниқловчили бирикмаларни ишлатишни тақозо этади. А. термини остида умумлаштирилган иккитурли ҳодисани фарқлаш учун бирини *бадиий адабиёт*, иккинчисини *беллестристика* деб юритиш ҳоллари ҳам мавжуд. Рус тилидаги манбаларда кўлланувчи «словесность» термини шу жиҳатдан анча кулаги ва аниқ: у сўз воситасига яратилган маънавий қадриятларнинг барини жам этса, унинг таркибидаги бадиий асарларни «художественная словесность» деб фарқлашади. Терминологик аниқликка

эришиш учун сўз воситасида яратилган маънавий қадриятларнинг жамиини А., унинг таркибидаги сўз санъатига дахлдор ҳодисаларни эса бадиий адабиёт деб юритиш мақсадга мувофиқдир.

АДАБИЁТШУНОСЛИК (ар. چاہ - адаб, форс. شناس - таниш, ўрганиш) – бадиий адабиётнинг көлиб чиқици, моҳияти, ривожланиш қонуниятлари, ижтимоий алоқаларини ўрганувчи фан. А.нинг обьекти бўлмиш бадиий адабиётга тааллуқли илмий муаммолар кўлами – предмети жуда кенг. Уларнинг бир қисми умумэстетик (яъни бадиий санъат соҳаларининг барчасига тааллуқли, мас., бадиий образ ва образлилик, бадиий образ ва реаллик муносабатлари, дунёқараш ва бадиий ижод, бадиий ижод жараёни хусусиятлари, бадиий асарни қабул қилиш жараёни хусусиятлари ва б.) муаммолар сирасига кирса, бошқа бир қисми соф А. муаммолари саналади. Санъатнинг барча турларига оид муаммоларни А. бадиий адабиёт нуқтаи назаридан, бадиий адабиёт билан боғлаган ҳолда ва унинг мисолида ўрганади. Бадиий адабиётнинг моҳияти, унинг ривожланиш омиллари ва қонуниятлари, бадиий (адабий) асар табиати, унинг тузилиши, бадиий (поэтик) тил хусусиятлари, адабий тур ва жанрлар каби қатор масалалар борки, улар соф А. муаммоларидир. Замонавий А. фани учта асосий соҳадан ташкил топади: *адабиёт тарихи, адабиёт назарияси ва адабий танқид*. Мазкур соҳаларнинг ҳар бири бадиий адабиёт билан боғлиқ муайян масалалар мажмуини ўз олдиға қўйилган мақсад ва вазифалардан келиб чиқсан ҳолда ўрганади. Айни чогда, бу соҳалар ўзаро мустаҳкам алоқада бўлиб, бир-бирини тўлдиради, бир-бирига манба яратади, асос бўлиб хизмат қиласиди ва шу тарзда ягона бир тизимга бирикади. Булардан ташқари, А.нинг матншунослик, манбашунослик, библиография сингари ёрдамчи соҳалари ҳам мавжуд.

Ўзининг обьекти, предмети ва тадқиқ усупларига эга бўлган мустақил фан сифатида А.нинг фанлар тизимида муқим ўрин олиши XVIII аср охири – XIX аср бошларига тўғри келади. Антик даврларда фанлар ўзаро ажралмаган, хусусан, А. ҳам фалсафа ичидаги бир бўлим эди. Кишилик жамиятининг тараққиёти, инсон тафаккурининг ривожи давомида бошқа фанлар қатори А. ҳам алоҳида фан сифатида ажралиб чиқди ва ривож топди. Бироқ буни маҳдудлашиш деб тушунмаслик лозим, чунки А. бошқа фанлар билан, айниқса, ижтимоий-гуманитар фанлар билан мустаҳкам алоқада яшайди. Жумладан, айрим фанлар (фалсафа, эстетика, герменевтика) А. учун методологик асос бўлиб хизмат қилса, бошқалари (фольк-

поршунослик, маданиятшунослик, санъатшунослик) билан у вазифалари ва тадқиқ предметининг кўп жиҳатдан яқинлиги туфайли алоқадордир. А.нинг предмети бадий адабиёт, бадий адабиётнинг предмети эса борлиқда, турфа ижтимоий муносабатлар ичida яшаётган инсондир. Шу жиҳатдан А. инсон ва жамиятни умумий йўналишда ўрганувчи фанлар (тарих, социология, психология каби) билан табиий алоқада бўлади. Филологик фан сифатида А.нинг тилшунослик билан алоқаси, айниқса, самарали ва муҳим. Бадий адабиётнинг материали сўз, адабий асар сўзлардан таркиб топувчи матнdir. Бадий матн тил қонуниятлари асосида таркиб топади. Шундай экан, тил қонуниятларини билиш матн қурилиши, унинг тагмаънолари, ишлатилган стилистик фигуralарнинг эстетик қисмати, функциялари каби қатор масалаларни ўрганишда жуда муҳим. Одатда, бадий матн тилини ўрганишга қаратилган ишларга А. ва тилшунослик чегарасидаги ишлар сифатида қаралади. Бироқ бунда чегарани аниқ олиш лозим. Гап шундаки, А. тилшунослик ютуқларига таянган ҳолда тасвир воситаларининг, умуман, матннинг эстетик томонларини ўрганса, тилшунослик тил қонуниятларини ўрганишни мақсад қилади. Яъни тилшунос учун бадий матн материал бўлса, адабиётшунос учун у асосий обьект саналади. Тилшунослик билан А. алоқалари шу билангина чекланмайди. Тилшунослик кишилар орасидаги мuloқot воситаси бўлган тилни ўрганса, А. ижодкор ва ўкувчи орасидаги бадий мuloқot воситаси бўлган бадий асарни ўрганади. Мuloқot қонуниятларининг муштараклиги эса А.нинг қатор муаммоларини тил қонуниятлари билан қиёсан ўрганиш имкониятини беради. А. фаолиятида бадий нутқ шакллари, ритми, интонация, шеър синтаксиси, экспрессивликни оширувчи воситалар каби қатор тушунчаларга дуч келинадики, буларнинг тилшуносликдаги талқинини билган адабиётшуноснинг изланишлари, албатта, самаралироқ бўлади. Кейинги давр А.ида пайдо бўлган «психологик мактаб», «структурал А.», «генератив поэтика», янги кириб келаётган «когнитив А.» каби йўналишлар бевосита тилшунослик ютуқлари асосида юзага келган.

АДАБИЁТ НАЗАРИЯСИ – адабиётшунослик фанининг асосий соҳаларидан бири. А.н. бадий адабиётнинг моҳияти, ривожланиш омиллари, жамият ҳаётидаги ўрни ва вазифалари, бадий асар табиати ҳамда унинг тузилиши, бадий тил хусусиятлари, адабий турва жанрлар каби масалаларни умумий тарзда ўрганади ва шу асосда умумий қонуниятларни очиб беради. Шунингдек, А.н. бадий образ

ва образлилик, бадиий образ ва реаллик муносабатлари, дунёқарашибадиий ижод, бадиий ижод жараёни хусусиятлари, бадиий асарни қабул қилиш жараёни хусусиятлари каби қатор умумэстетик масалаларни ҳам сўз санъатига татбиқан ўрганади. А.н. бадиий асарларни таҳлил қилиш тамойиллари, баҳолаш мезонлари, таҳлил методларини ишлаб чиқади, адабий-назарий тушунчалар тизимини яратади. А.н. адабиётшуносликнинг ядросини ташкил қиласди. А.н. адабиёт тарихи ва адабий танқид материалларини умумлаштиrsa, бу иккиси ўз фаолиятида А.н. очган қонуниятлар, у ишлаб чиқсан илмий тушунчалар тизимиға таянади. Шу тариқа адабиётшуносликнинг ҳар учала асосий соҳалари бир-бiri билан боғланади, яхлит бир тизим – адабиётшунослик илмини ташкил қиласди.

Шарқ мумтоз адабиётшунослигига, жумладан, ўзбек адабиётшунослигига А.н.нинг бир қатор масалалари анча кенг ўрганилган. Бундай масалалар сирасига *илми аруз* (Навоий, Бобур), *илми қоғия*, *илми бадиъ* (А.Хусайнӣ, Тарозий) кабиларни киритиш мумкин. Мазкур масалалар адабиётшуносликнинг бир қисми – поэтика доираси билан чекланган эди. Шарқда «муаллими соний» дея улугланувчи Форобий эса юонон файласуфи Арасту таъсирида ва бевосита унинг асарларини шарҳлаш жараённида бадиий адабиёт спецификаси (моҳияти), тур ва жанрлар каби масалаларга эътибор қаратган. Бироқ мумтоз адабиётшуносликда А.н. муайян бир тизим ҳолига келмаган, татбиқий характердаги ҳодиса эди. Ўзбек адабиётшунослигига А.н.нинг алоҳида тармоқ сифатида шаклланиши XX асрнинг дастлабки чорагига тўғри келади, соҳанинг қалдирғочлари сифатида Фитрат, Абдураҳмон Саъдийларни кўрсатиш мумкин. Адабиётшунослигимизнинг кейинги тараққиёти давомида И.Султон, Н.Шукуров, Б.Саримсоқов, Б.Назаров, Т.Бобоев каби қатор олимларнинг тадқиқотлари адабий-назарий тафаккур ривожига сезиларли ҳисса бўлиб қўшилди.

АДАБИЙ АНЪАНА – ўтмиш адабиёти тўплаган ижодий тажрибалар қаймоги, даврлар ўтиши билан аҳамияти ва долзарблигини йўқотмаган, бокий қадриятга айланиб, авлоддан-авлодга ўтиб келаётган қисми. Демак, А.а. доирасига ўтмиш адабиёти эришган ютуклар, тўплаган тажрибаларнинг ҳаммаси ҳам эмас, балки унинг муайян давр ижодкорлари томонидан долзарб деб топилган, бокий қадрият сифатида баҳоланганди ва ўз ижодий фаолиятларида намуна деб ҳисоблаган қисмигина киради. Ҳар бир авлод ўтмиш адабиётига сайлаб муносабатда бўлади, унга фаол ижодий ёндашади, са-

лафлар тажрибасини ўз даври қўйган бадиий-эстетик вазифаларни бажаришга хизмат қилдиради. Шунга кўра, А.а. ва янгилик (қ. новаторлик) ҳамқадамлиги қонуний ҳодиса бўлиб, бу иккиси диалектик алоқадаги бирликни ташкил этади ва адабиёт тараққиётининг муҳим ички омилига айланади. Ҳар бир давр ўзидан олдинги давр адабиётида мавжуд энг яхши жиҳатларни ўзига сингдиради ва унга нимадир қўшишга интилади, шу асосда тараққиёт жараёнининг узлуксизлиги таъминланади. Адабиётдаги ворисийлик, А.а.ларга содиклик миллий адабиётдаги ўзига хослик, миллий қиёфани йўқотмаслик кафолатидир. Табиийки, бой А.а.га таянган адабиётнинг ривожланиш имкониятлари бошқаларга нисбатан юқори бўлади. Мас., ҳалқимизнинг бой адабий-маданий анъаналари XX аср бошларида кузатилган янги ўзбек адабиётининг шаклланиш жараёни тез кечишини таъминлади: адабиётимиз жуда қисқа фурсат ичida жаҳон адабиётидаги ютуқларнинг кўпини ижодий ўзлаштириди, ўзининг бадиий арсеналини бойитди. Айтайлик, роман Farb адабиётига хос жанр эканлиги, унинг ўзбек адабиётида ўзлашиши 20-йилларга тўғри келиши маълум. Бироқ гарбона шакл миллий адабиётимизни бойитдигина эмас, балки адабий анъаналаримиз заминида унинг ўзи ҳам бойиди – ўзбек романчилиги дунёга келди. Миллий романчилигимизнинг ilk намунаси бўлмиш «Ўткан кунлар»дан бошлаб «Отамдан қолган далалар»гача бўлган намуналарида минг йилликлар билан ўлчанадиган адабий-маданий анъаналаримиз излари бор, шу туфайли ҳам у ўзининг қиёфасига эга «ўзбек романни»дир.

АДАБИЙ ЙЎНАЛИШ (русчадан калька: «литературное направление», «литературное течение») – адабий жараён билан боғлиқ категория. А.й. тушунчаси ҳаётни бадиий акс эттириш принциплари, метод ва услуб тушунчалари билан бевосита боғлиқ, у бадиий тафаккур тарзи, метод ва услуб кесишган нуқтада юзага келади. Муайян даврда яшаган бир қатор ижодкорлар яратган кўплаб асарларда типологик умумийлик мавжуд. Типологик умумийлик ҳаёт материалини танлаш, уни бадиий идроқ қилиш ва баҳолаш принципларида, асарларнинг бадиий шакл хусусиятлари, услубий жиҳатларида ўзини намоён этади. Узлуксиз адабий жараёнининг муайян босқичларида кузатилувчи бадиий ижоднинг ғоявий-эстетик тамойиллари асосидаги умумийлик А.й. ҳақида гапириш имконини беради. А.й. адабий жараёнининг, бадиий тафаккур тараққиётининг маълум бир босқичини назарий жиҳатдан умумлаштириш орқали унинг моҳиятини англаш имконини беради. Айни пайтда, адабиёт

тараққиёти, бадий тафаккурнинг ривожланиш тамойиллари А.й.лар алмашинуви, улар орасидаги курашда очиқ намоён бўладики, шу жиҳатдан А.й. адабий жараённи ўрганишдаги муҳим адабий-эстетик категория саналади. Мас., Европа адабиётида *классицизм* йўналишининг ғоявий-эстетик принциплари билан зиддият, бир томондан, барокко, иккинчи томондан, *маърифатпарварлик* реализмини майдонга чиқарди, ўз навбатида, кейинчалик худди шундай зиддиятлар асосида *романтизм* ва *танқидий реализм* йўналишлари юзага келди. Адабиёт тараққиётидаги *ворисийлик* қонуниятига кўра, ҳар бир А.й. куртаклари аввалгилари бағрида етилади. Дейлик, классицизм бағрида ҳам маърифатпарварлик реализмiga, ҳам сентиментализмга хос унсурлар мавжуд эди, кейинги йўналишга мансуб ижодкорлар улардан маъқулини олиб, маъқул келмаганини инкор қилган ҳолда ўз ғоявий-эстетик принципларини қарор топтиришга интилдиларки, бу бадий тафаккур ривожига (ундаги силжиш, ўзгаришга) асос бўлди.

Адабиётшуносликда А.й. истилоҳини қўллашда турличалик кузатилади: баъзан у адабий оқим атамасига, баъзан эса *метод* тушунчасига синоним сифатида ишлатилади. Мас., классицизмни метод, барокко ёки сентиментализмни оқим, романтизмни эса адабиёт тараққиётидаги босқич деб қарааш ҳоллари борки, моҳиятан бир хил адабий ҳодисаларнинг турли атамалар билан номланиши чалкашликлар келтириб чиқаради.

АДАБИЙ МАКТАБ (русчадан калька: «литературная школа») – адабий йўналиш ичидаги ҳодиса, муайян ғоявий-эстетик қараашлар, ижодий принципларни дастурий тарзда қабул қилган ижодкорлар грухи. Мас., француз романтизм адабиётидаги «Парнас» грухига шундай ижодкорларни бирлаштирган бўлиб, «парнас»чиларнинг ғоявий-эстетик қараашлари, ижод намуналари «Янги Парнас» номи билан чоп этилган тўпламларда ўз аксини топган. XX аср бошларида рус адабиётида майдонга чиқсан *модернистик* йўналиш ичida *символизм*, *акмеизм*, *футуризм* каби оқимлар, футуризм оқими ичida эса, мас., *кубофутуризм* деб юритилувчи адабий мактаб бўлган. В.Хлебников, В.Маяковский сингари истеъдодли ижодкорларни бирлаштирган кубофутуристларнинг «Гилея» грухига ўз адабий-эстетик қараашлари, ижодий принципларини «Жамият дидига тарсаки» номли манифестда эълон қилган.

АДАБИЙ ОҚИМ (русчадан калька: «литературное течение») – адабий жараён билан боғлиқ категория, муайян давр адабиёти-

даги адабий йўналишнинг бир кўриниши, ўзига хос бир варианти. Типологик умумийлик бир йўналишга мансуб ижодкорларнинг ҳам ғоявий ёки эстетик жиҳатдан ўзига хос томонлари бўлишини инкор қилмайди. Яъни бир йўналиш доирасидаги асарларда турлича идеаллар, дунёқараш акс этиши, бадиий-эстетик принципларда муайян фарқлар кузатилиши табиий ҳодисадир. Бу нарса бир йўналиш ичida алоҳида гурухни ташкил эттаётган ижодкорларга хос типологик умумийлик ҳақида, адабий йўналишнинг варианти сифатида бўй кўрсатувчи А.о. ҳақида гапиришга имкон беради. Мас., барокко йўналишнинг варианти сифатида испан адабиётидаги гонгоризм, итальян адабиётидаги маринизм ёки французларнинг прециоз адабиётини кўрсатиш мумкин. Дейлик, гонгоризм ғоявий-эстетик принциплари (уйғониш даври идеалларига зидлик, услубнинг жимжимадорлиги, образларнинг метафориклиги) жиҳатидан бароккога мансуб этилади, айни чоғда, унда араб шеърияти таъсирида бу хусусиятлар (мажозийликнинг ўта кучайиши, услубнинг мураккаблашуви, фикрни яширин ифодалаш, фикрни закийлик билан айтишга интилиш ва б.) ўзига хос тарзда намоён бўлади.

АДАБИЁТ ТАРИХИ – адабиётшунослик фанининг асосий соҳаларидан бири. А.т.нинг предмети ўтмиш адабиёти бўлиб, уни жараён ёки шу жараённинг бир бўлгаги (босқичи) сифатида тадқик этади. А.т.нинг асосида тарихийлик принципи ётади. Тарихийлик принципи адабий жараённи конкрет ижтимоий-тарихий шароит билан боғлиқ ҳодиса сифатида ўрганишни тақозо этади. Яъни А.т. ўтмишдаги адабий ҳодисаларни, яратилган асарларнинг ғоявий-мазмуний хусусиятларини белгилаган, бадиий тафаккур ривожи, поэтик усул ва воситаларнинг ўзгариши ва ш.к.ларга асос бўлган ижтимоий-иқтисодий, маданий-маърифий омилларни очиб беради. А.т. нуқтаи назаридан конкрет бадиий асар таҳлил қилинганида ҳам ўша асар яратилган давр шароити, давр адабий жараёни хусусиятларини назарда тутиш шарт. А.т.ни қизиқтирадиган масалалардан яна бири конкрет ижодкор фаолиятини ўрганишdir. Ижодкор фаолиятини ўргангандан, унинг ижодий ўсиш жараёнини кузатганда ҳам асосга қўйилган принцип тарихийлик бўлиши лозим. А.т. ўтмиш адабиёти хусусиятларини очиб бераркан, биринчидан, ўтмиш адабиёти тажрибаларини бугунги адабиёт хизматига сафарбар этади, иккинчидан, кенг кўламли назарий хуносалар чиқариш учун зарур материал ҳозирлайди. Шунга кўра, А.т. бадиий тафаккур тараққиётида ҳам, адабий-назарий тафаккур ривожида ҳам катта аҳамият касб этади.

Ўзбек адабиётшунослигида А.т. соҳасининг дастлабки куртаклари сифатида тазкираларни кўрсатиш мумкин. Шунингдек, қатор тарихий ва мемуар асарларда айрим адабий фактлар, муайян ижодкор ҳаёти ва фаолиятига доир маълумотлар ҳам қайд этилган. Бироқ ўзбек адабиётини тарихий аспектда кўламли ўрганиш, яъни ўзбек адабиётшунослигида А.т.нинг мустақил тармоқ сифатида шаклланиши ва ривожи XX асрга тўғри келади. Ўзбек адабиётшунослигида адабиёт тарихи соҳасининг шаклланишида Фитрат, А.Саъдий, О.Шарафуддинов, В.Зоҳидов, В.Абдуллаев, Ҳ.Сулаймонов, Ғ.Каримов, Н.Маллаев, А.Қаюмов, А.Ҳайитметов, А.Абдуғафуров сингари олимларнинг улкан хизматларини алоҳида қайд этмоқ лозим. Ўзбек адабиёти тарихини ўрганиш борасидаги изланишлар ҳозирги кунда ҳам давом эттирилаётir. Мавжуд ижтимоий воқелик ўтмиш меросимизга муносабатни ўзгартиришни, қатор, адабий ҳодисалар, фактлар, ижодкор шахслар тақдири ва фаолиятини янгича, илмий холис талқин қилиш заруратини кун тартибиغا қўйдики, бу А.т. зиммасига улкан вазифаларни юклайди.

АДАБИЙ ТАЪСИР (русчадан калька: «литературное влияние») – адабий жараёнда табиий равища ва қонуният мақомида мавжуд бўлган, бадиий тафаккур ривожида муҳим аҳамиятта молик ҳодиса. А.т. адабий-бадиий ҳодисаларнинг замон ва макондан қатъи назар ўзаро алоқада яшаши оқибати ўлароқ воқе бўлади. Демак, А.т. битта миллий адабиёт ёки адабиётлараро алоқалар, бир давр адабиёти ёки турли даврлар адабиёти доирасида ҳам кузатилади. Шунга кўра, А.т.нинг кўлами ва даражаси турлича (умумий ва шахсий) бўлиб, улар бир қатор омилларга боғлиқдир. Дейлик, турли ҳалқларнинг яашаш ҳудуди, турмуш тарзи, эътиқоди каби омиллардаги муштараклик (мас., форсий ва туркий адабиётлар) ёки муайян тарихий шароитда турли ҳалқлар орасидаги ўзаро иқтисодий, сиёсий ва маданий алоқаларнинг кучайиши (мас., рус адабиёти билан ўзбек адабиёти) бир миллий адабиёт тажрибаларининг бошқа бир миллий адабиёт томонидан ижодий ўзлаштирилишига олиб келади. Миллий адабиётлар доирасида кечувчи А.т. билан бир қаторда шахсий А.т. ҳам борки, аҳамияти жиҳатидан у аввалгисидан асло кам эмас. Ҳар қандай ижодкор фаолиятининг илк босқичида салафларнинг муайян таъсири мавжудки, бу ўша ижодкорнинг шаклланишида, унинг ўз ижодий индивидуаллигига эга бўлишида муҳим аҳамиятга эгадир. Маълумки, А.Қаҳҳор ижодида, айниқса, унинг илк ҳикояларида рус адаби А.П.Чехов асарларининг таъсири яқъол сезилади. Чинакам

истеъдод эгаси сифатида А.Қахҳор салафига ижодий эргашиш босқичидан у билан ижодий мусобақалашшиш даражасига күтарила олди, рус адиби қўллаган усул ва воситаларни миллий адабиёт анъаналари билан омихталаштириб, уларни миллий адабиётимиз заминида кўкартира билди, шу туфайли ҳам ўзбек ҳикоячилигининг тан олинган устаси мақомига эришди. Айни чоғда, А.Қахҳор ижодида Н.В.Гоголь, И.Тургенев, Ж.Лондон, О'Генри қаби адибларнинг ҳам турли даражадаги таъсири сезилади: Гоголь таъсири кўпроқ услубда, воқеликка кинояли муносабатда; И.Тургенев ва О'Генри таъсири айрим ҳикояларнинг, Ж.Лондон таъсири эса «Сароб» романнининг ички структурасида кўзга ташланади. Бундан аён бўладики, улкан истеъдод эгалари яратган асарларнинг таъсири кейинги авлодлар ижодида турли даражада намоён бўлади. Мас., Алишёр Навоий ижодининг таъсири мумтоз шеъриятимизнинг ундан кейин қалам тебратған деярли барча намояндалари ижодида сезилади. Дейлик, Мунис ва Оғаҳий ижодида бу таъсир бўртиб кўзга ташланса, бошқа ижодкорларда яққол кўринувчи таъсир аломатлари камроқ. Шу билан бирга, ўзбек шеъриятида Навоий даҳоси таъсиридан буткул холи ижодкорни кўрсатиш мушкул. Чунки Навоий сингари улкан даҳолар миллат руҳиятига, миллий бадиий тафаккурга батамом сингиб кетади – ўзига хос атмосферага айланадики, ўша атмосферадан нафас олганки ижодкор ундан нафланган бўлади. Демак, шундан келиб чиқсан ҳолда А.т.нинг бевосита ва билвосита кўринишлари хақида ҳам гапириш мумкин экан.

Умуман олганда, адабий алоқалар ва уларнинг ҳосиласи бўлмиш А.т. адабиёт тараққиётида ижобий ҳодиса саналади. Адабий алоқа ва А.т. туфайли у ёки бу миллий адабиёт тараққиётида сезиларли сифат ўзгаришлари, кескин силжишлар кузатилиши мумкин. Буни, мас., XX аср бошларидағи ўзбек адабиёти мисолида, янги ўзбек адабиётининг шаклпанишида кузатиш мумкин. Ўзбек адабиёти жаҳондаги илғор адабиётлар асрлар давомида етиб келган даражага қисқа вақт ичida кўтарила олди. Биргина ўзбек романчилиги мисолида қарасак ҳам, адабиётимизда XX асрнинг 1-чорагида қарор топган романчилик қисқа вақт ичida жаҳон романчилиги билан бўйлаша оладиган даражага етганини, бунда бой миллий анъаналар билан бирга адабий алоқалар ва А.т.нинг жуда катта ўрни борлигини кўриш мумкин. Чунки ўзбек романнавислари учун жаҳон романчилигининг тайёр тажриба мактаби мавжуд бўлиб, улар бундан миллий адабий анъаналаримиз заминида самарали фойдалана билдилар.

АДАБИЙ ТАНҚИД (ар. – **مۇھوكاما қилиش, сараплаш**) – адабиётшуносликнинг асосий соҳаларидан бири. А.т. ҳозирги адабий жараён муаммоларини ўрганиш, янги пайдо бўлган асарларни бугungi кун нуқтаи назаридан ғоявий-бадиий таҳлил ва талқин этиш, баҳолашни мақсад қилиб қўяди. А.т. адабиётшуносликнинг оператив, жорий адабий жараёнга бевосита аралашадиган соҳасидир. Айтиш керакки, А.т.ни адабиётшуносликнинг таркибий қисми сифатида тушуниш умумэътирофга молик қараш эмас. Айрим мутахассислар А.т.ни адабиётшунослик илмининг таркибий қисми эмас, балки адабий ёки публицистик ижоднинг бир тури деб ҳисоблайдилар. Бу нарса А.т.нинг ўзигагина хос, адабиётшуносликнинг бошқа соҳаларидан фарқланувчи хусусиятлари билан изоҳланади. А.т. ўзида адабиётшунослик илми, бадиий адабиёт ва публицистикага хос жиҳатларни уйғунлаштиради. Аввало, адабий-танқидий асар фақат илмий доираларга эмас, балки кенг аудиторияга мўлжаллаб ёзилади. Унда адабий асар баҳона куннинг долзарб ижтимоий-сиёсий, маънавий-маърифий масалаларидан ҳам баҳс этилади. Шунга кўра, унинг тили – илмий-оммабоп тил. Боз устига, бадиий асар ҳақида сўз бораркан, танқидчи фақат тушунчалар воситасида эмас, баъзан образли тафаккур унсурлари билан ҳам фикрлайди; мантиқийгина эмас, ҳиссий мушоҳадаларга ҳам таянади. Бадиий асар ҳақида фикр юритаётган, уни буғунги кун нуқтаи назаридан баҳолаётган танқидчи ўкувчи оммага бевосита таъсир қилишни ҳам кўзда тутади. Айни пайтда, бадиий асарни таҳлил қилаётган танқидчининг фикрлари адабиёт назариясига, адабиётшунослик илмининг ютуқларига асосланади. Буларнинг бари А.т.ни адабиётшунослик, бадиий адабиёт ва публицистика оралиғидаги ҳодисага айлантиради.

АДАБИЙ ТУР – адабий асарларнинг нутқий ташкилланиши, тасвир предмети, обьект ва субъект муносабати каби жиҳатлари билан умумийлик касб этувчи йирик гурӯҳи. Анъанавий равишда бадиий асарлар учта катта гурӯҳга: эпик, лирик ва драматик турларга ажратиб келинади. Адабий асарларни турларга ажратиш масаласи қадимдан дикқат марказида бўлган. Антик давр юонон файласуфи Афлотун ўзининг «Давлат» асарида шоир ўз тилидан (лирика), ўзгалирнинг гапларини мулоқот сифатида тасвирлаб (драма) ёки бу иккисини қоришиқ (эпос) кўллаган ҳолда тақлид қилиши мумкинлигини айтади. Санъатни табиатга «тақлид қилиш» деб билган Арасту зе табиатга уч хил йўсинда: 1) ўзидан ташқаридағи нарса тўғрисида ҳикоя қилаётгандек (эпос); 2) тақлидчи ўз ҳолича қорған, ғиёғасини

455582

үзгартирмаган ҳолда (лирика); 3) тасвирланаётган кишиларни фаол ҳаракатда тақдим этган ҳолда (драма) тақлид қилиш мумкин деб билган. Турларга ажратища тақлид усулини асосга қўйиш анъанаси XVIII асргача давом этди. XVIII асрга келиб немис файласуфи Гегель бадиий адабиётни турларга ажратища «объект» ва «субъект» муносабатини, шунингдек, тасвир предметини, яъни конкрет асарда нима тасвирланаётганини асос қилиб олди: эпос воқеани, лирика руҳий кечинмани, драма ҳаракатни тасвирлайди. Гегель анъанасини давом эттирган В.Г.Белинский объект (воқелик) ва субъект (ижодкор) муносабатига қўпроқ ургу берди: эпосда объективлик, лирикада субъективлик, драмада иккисининг қоришиклиги кузатилишини таъкидлади. Эпосни «объектив поэзия» деркан, Белинский эпик асар муаллифи ўзининг ихтиёридан ташқари «ўз-ўзича амалга ошган нарсанинг оддий ҳикоячиси» мақомида туришини, лирикани «субъектив поэзия» деганида эса «унда иждодкор шахсиятининг биринчи планда туриши ва барча нарса унинг шахсияти орқали қабул қилиниши ва англаниши»ни назарда тутади. Албатта, объективлик ва субъективлик тушунчаларини мутлақлаштирмаслик зарур. Зоро, эпос «объектив поэзия» дейилса ҳам, унинг «объективлиги» ўқувчи назиддаги иллюзия, холос, аслида, эпик асарда ҳам субъектив ибтидо мавжуд.

Гегель тасниф асосларидан бири қилиб олган адабий асарларни тасвир предметидан келиб чиқиб турларга ажратиш тамойили ҳозирда кенгроқ оммалашган. Бунда конкрет асарда нима тасвирлангани эътиборга олинади: драматик асарда ҳаракат, лирик асарда кечинмалар, эпик асарда воқелик (воқеалар) тасвирланади. Бунга қўшимча асос сифатида асарда ниманинг образи яратилганини олиш мумкинки, бу тасвир предмети асосидаги таснифни тўлдиради; лирикада субъектнинг нопластик образи, бунинг зидди ўлароқ драмада объектнинг пластик образи, эпосда эса объект ва субъектнинг қоришиқ образи яратилади. Лирик асарнинг етакчи образи – лирик қаҳрамон, лирик асар ўқилганда лирик қаҳрамон ҳолати, кайфияти, кечинмалар қандай ҳолатда юзага келгани, унинг ҳис-кечинмаларига туртки бўлган воқелик фрагментлари ҳис этилади. Бироқ лирик қаҳрамоннинг ўзи жонли инсон (яъни объективлаштирилган тасвир) сифатида намоён бўлмайди. Драмада эса қаҳрамонлар реал, жонли инсон сифатида хатти-ҳаракатда бўладилар, унда субъект образи йўқ. Эпосда сўз воситасида тасвирланган бадиий воқеликни тасаввурда пластик жонлантириш мумкин, шу билан бирга, унда муаллиф

образи ҳам мавжуд. Бундаги муаллиф образи ҳам лирикадаги каби нопластик образ: унинг воқеа-ҳодисаларга муносабати, кайфияти, ўй-қарашлари ва ш.к. ҳар вақт сезилиб туради, бироқ муаллиф образи бошқа персонажлар образи сингари жонли инсон сифатида гавдаланмайди (асарда унинг объективлаштирилган тасвири йўқ).

Мазкур белгиловчи хусусиятлар билан бирга ҳар бир А.т.га мансуб адабий асарларга кўпроқ хос (яъни белгиловчи бўлмаган) хусусиятлар ҳам кузатилади. Жумладан, улар ўзларининг нутқий шаклланиши жиҳатидан фарқланади: лирик асарлар, асосан, шеърий нутқ шаклида мавжуд, айни пайтда, насрый нутқ шаклида ёзилган лирик асарлар (мас., Фитрат, Чўлпон, Миртемир, И.Фафуровларнинг насрый шеърлари; Чўлпоннинг «Октябрь қизи», А.Аъзамнинг «Ўзим билан ўзим» лирик достонлари) ҳам бор. Эпик асарлар, асосан, насрда яратилади, лекин шеърий йўлда ёзилганлари ҳам кенг тарқалган (мас., Б.Бойқобиловнинг «Кун ва тун» шеърий қиссаси, Х.Шариповнинг «Бир савол», М.Алининг «Боқий дунё» шеърий романлари ва б.). Турли А.т.га мансуб асарлар ўзаро бадиий вақт ҳисси нутқати назаридан ҳам фарқланади. Мас., лирик асар «ҳозир кўнгилдан кечётган» ҳис-туйғуларни тасвирлайди, шоир билан у тасвирлаётган кечинма, шеърхон билан у танишаётган ва ўзига юқтираётган кечинма орасида ҳар вақт «мен – ҳозир» тарзидаги вақт ҳисси мавжуд бўлади. Аксинча, эпик асарда «ўтмишда бўлиб ўтган» воқеалар қаламга олинади, зеро, замонда кечиб бўлган воқеаларнигина ҳикоя қилиб бериш мумкин. Ҳатто олис келажак тасвирланган фантастик асарда ҳам бўлиб ўтган воқеалар ҳикоя қилинади: ўқувчи гўё бўлиб ўтган воқеалар билан танишади. Яъни эпик асарда ёзувчи билан у тасвирлаётган бадиий воқелик, ўқувчи билан у тасаввурида қайта тиклаётган бадиий воқелик ўртасида ҳамиша «мен – ўтмиш» тарзидаги вақт ҳисси мавжуддир. Бу жиҳатдан драматик асарлар ўзига хос: драмада тасвирланаётган воқеа, ўқилиши ёки саҳнадан томоша қилинишидан қатъи назар, гўё «ҳозир содир бўлаётган воқеа» каби таассурот қолдиради. Демак, драматик асар ўқувчиси (ёки томошабини) билан унда тасвирланган воқеа орасида ҳам «мен – ҳозир» тарзидаги вақт ҳисси мавжуд бўлади. Шунингдек, ҳар бир адабий турга мансуб асарда бадиий конфликтнинг муайян бир тури устувор: драмада характерлараро конфликт, лирикада ички конфликт (асардаги акси жиҳатидан), эпосда эса конфликтнинг ҳар учала тури қоришиқ намоён бўла олади. Айрим манбаларда мазкур хусусият ҳам турга ажратиш асоси, турга мансубликни белгиловчи хусусият

сифатида күрсатилади. Бироқ бу қарааш баҳспи, чунки ҳар қандай асарда, унинг турга мансублигидан қатъи назар, конфликтнинг ҳар учала нави мавжуд бўлаверади (фақат акс этиши турлича, баъзилари аниқ тасвирланса, бошқалари ҳис этилади); улар ўзаро алоқада бўлиб, бири иккинчисини келтириб чиқаради, бири орқали иккинчиси ифодаланади.

А.т.лар орасида қатъий чегара, «хитой девори» йўқ. Яъни турларга ажратишда маълум шартлилик сақланиб қолаверади, зоро, муайян асарда барча А.т.ларга хос хусусиятлар ҳам зухур қилаславеради. Иккинчи томондан, бадиий адабиёт ривожи давомида А.т.лар бир-бирини бойитади, улар орасида синтезлашув жараёнлари кечади. Мас., замонавий эпос ўзига драмага хос элементларни сингдиргани учун тасвир ва ифода имкониятларини кенгайтирди. Ҳозирги эпик асарларни улардаги диалоглар, бошқача айтсан, «саҳна-эпизод»ларсиз тасаввур қилиб бўлмайди. Яна, ҳозирги эпосда драмага хос сюжет қурилиши (сюжет вақтининг қисқариши, воҳеаларнинг драматик шиддат билан ривожланиши)нинг таъсири тобора кучайиб бораётгани кузатилади. Шунга ўхшаш драма ва лириканинг ўзига эпик унсурларни сингдириши уларнинг бадиий имкониятларини кенгайтиради. Мас., ҳозирги шеъриятда воҳеабанд шеърлар кенг оммалашгани, тавсифий лирикада эпик унсурлар салмоқли ўрин туваётгани ҳам турлараро синтезлашув натижасидир.

А.т.ларнинг муайян давр адабий жараёнида тутган ўрни, мавқеи ҳар вақт ҳам бир хил эмас, тараққиётнинг маълум босқичларида уларнинг айримлари етакчилик мавқенини эгаллайди. Бу эса турли омиллар (ижтимоий-сиёсий, маданий-маърифий шароит, адабий-маданий анъаналар ва х.) билан боғлиkdir. Мас., ўзбек адабиётида анъана билан боғлиқ ҳолда узоқ вақт лирика етакчилик қилған бўлса, XX аср бошларидан эпос етакчилик мавқенини эгаллай бошладики, бу ижтимоий-сиёсий, маданий-маърифий шароит (эпик турда бадиий концептуал функцияни амалга ошириш, дунёни англаш ва англатиш имкониятларининг кенглиги ва бунинг XX аср бошларида долзарблиқ касб этгани) билан изоҳланади. Ўтган асрнинг 60 – 70-йиллари ижтимоий-сиёсий шароити яна шеъриятни етакчи мавқега олиб чиқдикни, бу ижод эркинлиги бўғилган шароитда бадиий проза ўзининг энг муҳим функцияси – бадиий-концептуал функциясини тўлақонли бажаролмай қолгани билан изоҳланиши мумкин. 80-йилларга келиб эса эпос йўқотган мавқенини яна тиклай бошлади: М.М.Дўст, Э.Аъзам, А.Аъзам, Х.Султон каби ижодкорлар асарлари-

да жамиятни, замона кишилари руҳиятини ва бунинг воситасида жамиятнинг мавжуд ҳолатини чукур бадиий идрок этишга интилиш кучайди. Бироқ, таъкидлаш зарурки, А.т.ларнинг бирини иккинчисидан устун кўйишга интилиш номақбулдир. Зеро, ҳар бир А.т. ўзига хос устун жиҳатларга эга, бу эса уларнинг ҳар бирида дунёни англаш ва англатиш имкониятлари турлича эканлиги билан изоҳланади. Баъзан «фалон шоир ўзининг фалон рубоийсида катта романда ҳам айтиш қийин бўлган гапни айта олган» қабилидаги мақтovлар эшитиладики, бу хил қараш ўта жўн ва илмийликдан буткул йироқ, бадиий адабиёт ҳақида, бадиий асар ҳақида бу тарзда фикрлаш дилетантликдан бошқа нарса эмас. Негаки бадиий адабиётда айтишгина эмас, қандай айтиш ҳам муҳим. Зеро, ҳар бир адабий турга мансуб асарнинг қабул қилиниш механизмлари, ўқувчи руҳиятига таъсир ўtkазиш имкониятлари ва йўллари турличадир. Бу ўринда халқимизнинг «ўнта бўлса ўрни бошқа, қирқта бўлса – қилиғи» қабилидаги нақлига амал қилган тўғрироқ бўлади.

АДРЕСАТ (нем. *Adressat* – почта жўнатмасини олувчи) – бадиий ижод жараёни билан боғлиқ ҳолда ишлатилувчи термин, ижод онларида ёзувчи тасаввурида мавжуд бўлган, асар мўлжалланган ўқувчи. Адабиётшуносликда ушбу тушунча реал ўқувчига зидланган ҳолда яна *имплицит ўқувчи, тасаввурдаги ўқувчи, ички ўқувчи* каби терминлар билан ҳам юритилади. Адабий асар, аввало, нутқ ҳодисасидир. Нутқ жараёни эса икки томон – нутқ субъекти (нутқ эгаси) ва нутқ обьекти (нутқ йўналтирилган шахс)нинг мавжудлигини тақозо этади. Модомики, ижод жараёнида ёзувчи нутқ ирод этаётган экан, бу нутқ кимгадир (тасаввурдаги ўқувчига, А.га) қаратилган бўлади: ёзувчи ўша ўқувчига муайян бадиий информацияни етказиш, информацияга ўзининг гоявий-эмоционал муносабатини ифодалаш ва шулар орқали унга муайян таъсир ўtkазишни кўзлайди. Бу эса А.ни, унинг дунёкараши, ҳаётий тажрибаси, бадиий диди, ижтимоий-маънавий эҳтиёжлари каби омилларни ҳам эътиборда тутишни тақозо этади. Яъни А. маълум маънода асарнинг бадиий-композицион хусусиятлари, тили ва услуби, образлар тизимини белгилайди. Мазкур ҳол, мас., болалар адабиёти мисолида ёрқин кўринади: болалар учун ёзилган асарда А. хусусиятларини, бола психологияси, фикрлаш тарзи, идрок имкони кабиларни эътиборда тутиш зарур. Бироқ буни мутлақлаштирмаслик, яъни гўё ёзувчи ҳамиша юксакда-ю, А.га мос гапларни айтади, маъносида тушунмаслик керак. Аксинча, ёзувчи тасаввуридаги А. савияси кўп жиҳатдан унинг ижодий салоҳияти билан

боғлиқдир; санъаткор ижодий камоли билан баробар А. ҳам камол тоғиб боради. Мас., Чўлпоннинг илк ижодида А. бирмунча мавхум бўлиб, асарлари кенг оммага қаратилган, у кўпнинг гапини кўпга етказиш («Бизни халқ», «Қурбони жаҳолат», «Доктор Ҳуҳаммадиёр») билан машғул эди. Кейинчалик унинг А.и бирмунча конкретлашади: асарлари кўпроқ ўзининг ҳаммаслакларига (мас., «Халқ», «Бузилган ўлкага», «Пўртана») мўлжалланади. Айни чоғда, шоир ижодида А. янада конкретлашиб боради, энди у кўпроқ ўзини тушуна оладиган, ҳамдард бўла биладиган хос ўқувчига мурожаат этади («Кўнгил», «Йўл эсдалиги»). Шеърларидан бирида бу ҳақда шундай дейди:

Сўйларкан тилларим на ёмон сўзлар,
Ёзаркан қаламим на ҳазин оғлар,
Соддадил бунлардан не маъни онглар,
Билмаз-ку ўлдугин изҳор ишқи.

Яъни Чўлпон ўзининг «ишқ изҳори»ни ҳар ким ҳам англай олмаслигини билади, ҳаммага дардини тўkkани ҳолда чинакам ҳамдард бўла оладиганларнинг озлигини теран идрок этади. Бу эса шоирнинг аксар шеърларида хос ўқувчига мўжалланган рамзий қатлам мавжудлиги, унда юрт озодлиги мавзуси поэтик талқин қилинганига унинг ўзи берган гувоҳликдир. Кейинроқ, 30-йилларнинг бўғиқ мухитида, Чўлпоннинг А.и онгли тарзда иккиланади: у бир пайтнинг ўзида ҳам хос ўқувчисига, ҳам шўро тарбиясини олган оммавий ўқувчига мурожаат этади («Соз» тўпламидаги қатор шеърлар, «Кечা» романи).

Ижод онларида А.ни эътиборда тутиш талаби ўқувчи омма диidi, талаб-эҳтиёжларига мослашиш дегани эмас. Чинакам ижодкор А.нинг диidi, фаросатини юқори баҳолаши, унинг ижодий имкониятларига, асарни ўқиши пайти ўзига ҳаммуаллиф бўла олишига ишониши лозим. Бироқ кейинги даврда кенг урчиган оммавий адабиёт сўз санъатининг бу талабидан чекинади: унинг ўртамиёна савиядаги А.ни нишон қилиши, уни осонгина ўзига жалб этадиган йўллардан (интригага бойлик, ошкор эмоционаллик, сохта романтика, зўравонлик ва фахш сингари тубан инстинктларни уйғотиш ва ш.к.) бориши сўз санъати ичидаги бузгунчиликкина эмас, чуқурроқ қаралса, А.га хурматсизлик ҳамдир.

АЖУЗ (АРУЗ) (ар. عزو – ожиз, кучсиз) – қаранг: тақтиъ

АКМЕИЗМ (юн. асте – бирор нарсанинг камолот чўқиси) – XX асрнинг 10-йилларида рус шеъриятида вужудга келган ада-

бий оқим. А.нинг назарий асослари Н.С.Гумилев, С.М.Городецкий, М.А.Кузьмин томонидан ишлаб чиқилган. Жумладан, Н.С.Гумилев «Символизм мероси ва акмеизм» номли мақоласида символизм инсоннинг идрок имконидан ташқари нарсаларни англашга интилгани бекорлиги, уни англаб бўлмаслигини таъкидлайди. С.Городецкий эса символизм ва акмеизм орасидаги зиддиятни моддий оламга муносабатда кўради. Унга кўра, символистлар учун олам фақат ўзга оламлар сояси сифатидагина аҳамиятли бўлса, акмеистларга у бор ҳолича ҳам қадрли; символистлар учун атиргул илоҳий ишқ рамзи сифатидагина қадрли бўлса, акмеистлар учун у ўз ҳолича ҳам гўзал ва қадрлидир. С.Городецкий акмеистлар дунёни бутунича, бутун гўзалигу хунуклиги билан қабул қилганларини, дунёга муҳаббат унинг асосий тамойили эканини таъкидлайди. А. намояндларининг ижодий фаолияти табиий тарзда кечувчи ҳаётни, конкрет ҳис этиладиган дунёни куйлаш, сўзнинг рамзий маъноси ўрнига асл маъноси ни қайтариш шиорлари остида кечди. Айни чоғда, улардаги ҳаётга, моддий дунёга муҳаббат реализмга яқинлашиш деб тушунилмаслиги керак. Аксинча, уларнинг ҳаётни, дунёни поэтиклиштириши моҳияттан реалликдан, унинг муаммоларидан қочишнинг бир кўриниши эди. Чунки улар, Н.С.Гумилев айтмоқчи, нафақат идрокдан ташқаридаги нарса-ғояларни, балки шахс эволюциясини ҳам давр ва макон шарт-шароитлари билан боғлиқ англаш бўлмайди, бу «адабий усул»дан бошқа нарса эмас деб биладилар. А.нинг адабий оқим сифатидаги фаолияти узок давом этмади: 20-йилларнинг ўрталарига келиб тарқалиб кетди, унинг сафларида бўлган ижодкорларнинг кўпчилиги шўро даврида турли тазийкларга дучор қилиндилар. Ижодий фаолиятини А. мавқеида бошлаган С.Городецкий, А.Ахматова, О.Мандельштам каби иқтидорли шоирларнинг ижоди рус поэзиясига муносиб ҳисса бўлиб қўшилди.

АКРОСТИХ (юн. *acros* – чеккаси, *stichos* – мисра) – қаранг: мувашшаҳ

АКСИЛҚАХРАМОН (русчадан калька: «кантигерой») – адабий персонажлар (характерлар)ни таснифлашда шартли равища қўлланувчи термин. Терминнинг юзага келиши қаҳрамон соғ эстетик категория бўлмай, маълум даражада этик категория ҳам эканлиги билан боғлиқдир. Одатда, қаҳрамондан ўзининг хатти-харакати, ақл-заковати, характер хусусиятлари билан ўқувчини ҳайратга солиш кутилади (қаҳрамон терминини этимологияси «ярим худо», «илоҳий одам» маъноларини берувчи юонча *heros* сўзи билан

боғлиқ). Анъанага кўра, адабиётда қаҳрамон ҳайрату хурмат обьекти, маълум даражада, ибрат намунаси бўлиб келган. Бироқ адабиёт тараққиётининг кейинги даврларида, XIX асрдан бошлаб шундай асарлар кўпайдики, уларнинг марказидаги қаҳрамон бундай сифатлардан маҳрум, уни қаҳрамон деб аташнинг ўзи нокулай. Шунга кўра, асарда марказий ўрин тутиб, муаллиф концепциясини ифодалашда муҳим аҳамият касб этган, лекин ўзи қаҳрамонлик сифатларига эга бўлмаган қаҳрамон А. деб атала бошлаган. Термин илк бор рус ёзувчи Ф.Достоевский томонидан ишлатилган ва бу бежиз эмас: унинг Родион Раскольников, Иван Карамазов каби қаҳрамонлари том маънодаги А.лар эди. XX аср модернистик адабиётида, жумладан, А.Камю, Ф.Кафка асарларида бундай А.лар кенг ўрин тутади.

АЛОГИЗМ (юн. α – инкор юкламаси, logismos – ақл, мантиқ) – мантиқан бир-бирига зид тушунчаларни ўзаро боғлиқ ҳолда бериш, мантиқий алоқаларни онгли равишда бузишга асосланган усулларнинг умумий номи. А бадий асарнинг турли сатҳларида, сўз биримасидан тортиб сюжет-композицион қурилишигача кузатилиши мумкин. Мас., мазмунан бир-бирига мутлақ зид сўзларнинг синтактик бутунлик ҳосил қилиши (қ. оксиморон); тескари ўхшатишга асосланган кўчимлар (қ. киноя), диалоглардаги конкрет ҳаётиди ҳолат моҳиятига зид репликалар (қ. антифразис) А.нинг қўринишлари саналади.

АЛЛЕГОРИЯ (юн. allos – ўзгача, agoreuo – гапираман) – 1) мавҳум тушунча ёки ҳодисани конкрет нарса орқали ифодалашга асосланган кўчим тури. Бу ҳолда конкрет нарсани ифодаловчи сўз (мас., тулки) мавҳум тушунчани (тулки – айёрлик) ифодалаш учун кўчма маънода қўлланади. Мас., Ш.Раҳмон шеърларидан бирида лирик қаҳрамоннинг тоғдаги кечинмаларини тасвирлайди: «тоғларнинг мусаффо қорлари одам изларини сақлаб қолган, бу излар уни тобора юкорига олиб боради»:

Аммо тоғдан тушганим сари,
сезар эдим бадбўй исларни,
кўрар эдим тулки, қашқирлар,
тўнғизлару илон изларин...

Келтирилган парчадаги «тулки», «қашқир», «тўнғиз», «илон» сўзлари А.лар бўлиб, улар матнда инсонга хос хусусиятлар орқали маълум тоифадаги кишиларни билдиради; 2) образлилик типи.

Аллегорик образнинг тасвир плани билан мазмун плани бир-бирига мос келмайди. Яъни аллегорик образда тасвириланаётган нарса ўзини эмас, муаллиф кўзда тутган маънони ифодалайди. Mac.:

Бойўғли эса

*отаси сотган чалдеворлар пулига
хорижда ўқиб келган.*

Отаси энди унга

тунни хатлаб берган.

Бойўғли – тунлар султони.

Бироқ тунда ишланмайди. Савод керакмас.

Шунинг учун

унинг нима билишини тусмоллаб бўлмайди.

Фахриёрнинг «Кушлар саводхонлиги» шеъридан олинган ушбу парчадаги «бойўғли» – аллегорик образ, у асло асл маъносига тушунилмайди, шундай тушунмаслик лозимлиги матнданоқ аён бўлиб туради. Шеърда анъанавий А.лардан саналувчи «бойўғли»га янгича маъно юклайди, унинг воситасига иқтисодий ислоҳотлар жараёнида устомонлик билан ортирилган беҳисоб давлат (отаси сотган чалдеворлар) ҳисобига барча имконлардан фойдаланиб қолган (хорижда ўқиб келган), эндиликда тунги кафеларда айшини сураётган «бой ўғиллари» тасвириланади. Аллегорик образнинг бир қисми миллий маданият контекстида кўп такрорланганидан тургун маънога эга бўлганки, бу жиҳати билан улар эмблемага яқинлашади. Mac., миллий адабий анъаналаримизга кўра, Хотами Тойда сахийлик, Рустамда жасурлик, Исо Масихда жон бағиашлаш, Юсуфда гўзаллик, Марямда бокиралиқ, Намрудда кибр ва ҳ. маънолар муқимлашган. Аллегорик образларнинг бошқа бир қисми эса кўзда тутилган маънога ишора қилинишини тақозо этади (масаллардаги «қиссадан ҳисса» каби). Айни шу ишоранинг мавжудлиги A.ни рамз (символ)дан фарқловчи муҳим жиҳатдир. Mac., A.Ориповнинг «Тилла балиқча» шеъри ниҳоясидаги «Менга алам қилар тилла балиқча Бир кўлмак ҳовуз деб билар дунёни» сатрлари кўзда тутилган маънога очиқ ишора бўлиб, образнинг аллегориклигини белгилайди. Агар шу ишора бўлмай, аввалги сатрлардаги тасвир билан чекланилганда, образнинг тасвир ва ифода планларининг ҳар бири ўз ҳолиша мустақил бўлардиди, бу ҳолда образ *рамзий (символик)* саналарди.

АЛЛИТЕРАЦИЯ (лот. al – ёнида, litera – ҳарф) – шеърий нутқда (насрда нисбатан кам) бир хил ундош товушларнинг такрорланишига асосланган ифодавийликни кучайтирувчи восита, такрорнинг фонетик сатҳдаги хусусий кўриниши. А. шеърнинг алоҳида сатри ёки мисрадаги сўзлар гурухини фоник жиҳатдан ажратади, натижада уларнинг ифодавийлиги ортади, шеърнинг мусикийлиги, хулоҳанглиги кучаяди. Mac., «Сочилган сочингдек сочилса сиринг... (Чўлпон), «Қумдан қурған қўргоним қани... (Иқбол Мирзо). Ўзбек адабиётида барча мисралари ёки барча сўзлари бир хил ундош билан бошланган шеърлар ҳам машқ қилинганки, бу ҳам А.нинг бир кўринишидир (мас., Э.Воҳидов. «Қаро қошинг, қалам қошинг...»). Булардан фарқли ўлароқ, мисрадаги сўзлар таркибида бир хил ундошларни такрорлашга асосланган А. кўзга унчалик яққол ташланмайди, лекин улар яққол «эшитилади»: улар шеърнинг мусикийлигини оширади, хулоҳанглик орқали эстетик таъсири кучайтиради. Mac., Ш.Раҳмондан олинган қуйидаги парчада:

Корли уваларда қора қўтослар,
 темир ҳалқалар бор бурунларида.
 Бир жойда айланар буюк чўлларнинг
 дарага қамалган қуюнларидай.
 Қамчилар тарсиллар,
 ёрилар ҳаво,
 қий-чувлар,
 ҳуштаклар
 суронлар жўшар, ҳарсиллар,
 гулдирап ўжар қўтослар,
 жон кириб қутурган тоғларга ўхшаб, –

«р» товуши такрорига асосланган А. бўлиб, товуш такрори парчага шиддатли ҳаяжон руҳига мос жаранг ва оҳанг бахш этади. Аслида, энг муҳими, А.ни бадиий восита санаш асоси ҳам шу: товуш такрорининг эмоционалликни, муайян ҳис-туйғулар ифодасини кучайтиришга хизмат қиласига шарт қилинади. Мазкур шарт бажарилмаган ўринларда товуш такрори бадиий восита эмас, балки тилда мавжуд товушларнинг нутқдаги табиий такроридир.

АЛЛЮЗИЯ (лот. allusio – ишора, ҳазил) – барчага таниш деб ҳисобланган реал сиёсий, майний, тарихий ёки адабий фактга ишора қилишга асосланган стилистик усул. Моҳиятан шарқ мумтоз

шеъриятида кенг қўлланган *талмөх* (к.) санъатига яқин келади. Фарқли жиҳати шуки, *талмехда* кўпроқ машҳур тарихий ва бадиий фактларга ишора қилинса, А.да ижодкор ўз замонасидағи сиёсий, майший ёки бадиий фактларга ишора қилиши ҳам мумкин. Яъни А.да ишора объектиning доираси кенгроқ. Мас., Фахриёр:

*Дарвоқе, орзу.
Орзу милтиқ эмас,
Шеърнинг интиҳосида
Отилмайди, –*

деганида Чеховнинг «Саҳнада милтиқ осиғлиқ бўлса, у албатта отилиши керак» деган машҳур иборасига ишора қиласди.

Ш.Раҳмоннинг «Тұхмат» шеърида эса ишора объекти ўзгача:

*Кеча ўғри бўлди,
буғун ваҳшийдир
энди бутун дунё билар бу ҳақда.
Қандай мўмин эди,
қандай яхшийди
анқайиб жимгина төрганда пахта.*

Бу ўринда ишора 80-йиллар ижтимоий-сиёсий фактларига қаратилган: шоирнинг «кеча ўғри бўлди» деганида собиқ Иттифоқ марказий матбуоти сиёсий мақсадлар билан ногора қилиб чалган, янги тарихимизга «ўзбеклар иши», «пахта иши» деган номлар билан кирган мудҳиш воқеалар, «буғун ваҳшийдир» деганида эса Ўш, Фарғона воқеаларига ишора бор. Таъқидламоқ жоизки, публицистик руҳда ёзилган шеърлардаги А.лар вақт ўтиши билан изоҳга, шарҳга муҳтож бўлиб боради.

АЛЬМАНАХ (ар. المناح – тақдим қилиш) – адабий асарлар тўплами, нодаврий адабий нашр. Одатда, А.га тартиб беришда муайян белгилар (асарлар мавзуси, жанри, муаллифлар ёши, яшаш худуди ва б.) асос қилиб олинади. Мас., 70-йиллар охиrlарида н бошлаб чиқарилган «Ёшлиқ» А.и., шунингдек, қутлуғ тарихий сана муносабати билан (Ғалаба байрами, Мустақиллик байрами) ёки муаллифларни умумлаштирган бирор белги (жангчи шоирлар тўплами, ижодкор ўқитувчилар тўплами) асосида тартиб берилган А.лар ҳам мавжуд.

АМИК (ар. عميق – чуқур) – аруз баҳрларидан бири, фоилун (– v –) ва фоилотун (– v – –) аслларининг кетма-кет тақороридан ҳосил бўлали. А. баҳри илк бор Бобурнинг «Мухтасар» асарида тилга олинган ва унинг араб шеъриятига хос эмаслиги, асосан, форс шеъриятида мавжудлиги таъкидланган. «Мухтасар»да амиқи мусаммани солим (– v – / – v – – / – v – / – v – –) вазнига:

*Кел бері, эй париким, ҳажрдин хастадурман,
Лаълинга ташнадурман, зулфунга бастадурман, –*

байти мисол сифатида келтирилган.

АМР ВА НАҲИЙ (ар. أمر و نهي – буюриш ва ман қилиш) – иншо йўлларидан бири, фикрни ифодалаш усули, лирик қаҳрамон кечинмаларининг бирон-бир ҳаракатга ундаш ёки, аксинча, ундан қайтариш, ман қилиш тарзида баён этилиши. Ўқувчини яхши ишни қилиш ва ёмон ишдан сақланишга чорлов мазмунидаги байтларда моҳиятан А. ва н. билан каломи жомиъ (қ.) санъати қоришиқ қўлланади. А.ва н. ҳам деярли барча шоирлар ижодида учрайди. Мас., Навоийнинг:

*Нозанинлар, бенаволарға тараҳҳум айлангиз,
Лутф агар йўқтур, газаб бирла тақаллум айлангиз, –*

байтида амр, яъни ундаш бўлса, Ҳазинийнинг:

*Ажаб мотамсаро дунё экан поёни йўқ билсан
Ки, сен дунёға магрут ўлмагилким, ҳаргиз вафо қилмас, –*

байтида наҳий, яъни қайтариш мазмуни акс этган.

АНАЛИЗ (юн. analysis – қисмларга ажратиш) – қаранг: бадиий таҳлил

АНАЛОГИЯ (юн. analogia – ўхшашлик, муштараклик) – адабий асардаги образлар, сюжет мотивлари, айрим эпизодлар, характерлар ва ш.к.ларда кузатилувчи муштараклик, ўхшашликлар. А.лар битта асар доирасида ҳам, шу асар билан бошқа (турли давр ёки турли миллий адабиётларга мансуб) асарлар орасида ҳам кузатилиши мумкин. Мас., «Ўткан кунлар» романидаги Отабек ва уста Олим, «Кеча»даги Зеби ва Марям тақдирлари орасидаги А.лар ёзувчига қиёс воситасида муайян фикрларни ифодалаш, муаммони англаш ва англатишда муҳим ўрин тутади. Шунингдек, асарда ёзувчи то-

монидан онгли равишда ёки бошқа сабаблар билан воқе бўлувчи А.лар ҳам кузатилиши мумкин. Мас., «Ўткан кунлар» билан ҳалқ достонлари сюжет мотивларида А.лар кузатиладики, улар гарб адабиётига хос роман жанрининг миллий заминга ўтказилиши, миллий адабий анъаналар таъсири ўлароқ воқе бўлган. Чўлпоннинг «Кечा» романи билан А.Қодирийнинг «Ўткан кунлар» ва «Мехробдан чаён», Л.Толстойнинг «Тирилиш» ва «Анна Каренина» романлари орасида ҳам қатор А.лар мавжуд бўлиб, бирлари ижодий таъсирланиш, бошқалари ижодий мусобақа истаги натижасида юзага келган.

А.лар муайян миллий адабиёт тарихининг турли босқичлари орасида ҳам, турли миллий адабиётлар орасида ҳам кузатилиши мумкин. Мас., ўзбек жадид адабиёти билан 80-йиллар ўзбек шеърияти орасида қатор гоявий-тематик ва бадиий-услубий А.лар кузатилади; худди шу ҳол ўзбек жадид адабиёти билан Европа маърифатчилик адабиёти орасида ҳам мавжуд. Бу эса А.ни тарихий-қиёсий адабиётшуносликнинг марказий категорияларидан бирига айлантиради. Тарихий-қиёсий адабиётшунослик турли давр ёки турли миллий адабиётлардаги А.ларни аниқлаш, уларнинг омилларини ўрганиш асосида кўламли назарий умумлашмалар чиқариш, адабиёт тараққиётининг умумий қонуниятларини аниқлашни мақсад қиласди.

АНАФОРА (юн. *anaphora* – олдинга, юкорига чиқариш) – сўз ёки сўзлар гурухининг мисра ёки банд бошида тақорланиши, сўз такорининг хусусий кўриниши. А. маълум фикр, ҳис-туйғу, ҳолат ва ҳ.ни таъкидлаб кўрсатишга хизмат қиласди, табиий равишда, шеърнинг хулоҳанглигини ҳам оширади. Мас., У.Ҳамдамдан олинган қуидаги парчада:

Бир ҳолат...

*Ҳолатки, исмимни эслай олмайман,
Ҳолатки, қасдида ҳар нега шайман,
Ҳолатки, кўзимга кўринмас дунё,
Ҳолатки, ҳаётим энг ширин рўё, –*

тавсиф этилаётган ҳолат мазмунан кучайтириб борилади, А. эса таъкидлаш орқали маънони янада кучайтиради. А. энг кўп кўлланувчи стилистик усуллардан бири бўлиб, шеъриятда унинг турли кўринишлари мавжуд. Мас., А.Қутбиддиннинг қатор шеърларида («Сенсизман», «Ака», «Истардим») барча бандлар битта сўз билан бошланади. Ёки И.Отамуроднинг «Кун бўйи сукутга чўмди телефон»

шеърининг барча тоқ мисралари «кун бўйи» бирикмаси билан, бошқа бир шеърининг барча тоқ мисралари «ичкари», жуфт мисралари «ташқари» сўзи билан, «Канглум, ким ҳам сенинг ҳаддинг сифдирар» шеърида эса тўртлик бандларнинг биринчи икки мисраси «канглум», кейинги икки мисраси эса «биргина» сўзи билан бошланган. Мазкур шеърлар А. кўп ҳолларда нафакат стилистик восита, балки шеърнинг композицион асосини белгиловчи усул сифатида ҳам намоён бўлишини кўрсатади. А.нинг композицион-стилистик имконларидан И.Отамуроднинг «Ёбондаги ёлғиз дараҳт» достонида, айниқса, са-марали фойдаланилган.

АНАХРОНИЗМ (юн. *ана* – орқага, қарши; *chronos* – вақт) – ўтмишни бадиий акс эттириш жараёнида йўл қўйилувчи вақт билан боғлиқ ноаниқликлар, хатоларнинг умумий номи. А. тасвирланаётган даврга оид бўлмаган фактлар (воқеалар, шахслар, ишонч-эътиқодлар, ғоялар, маиший деталлар ва ш.к.), тамом ўзга замонга хос хусусиятларнинг кириб қолиши билан воқе бўлади. А.нинг юзага келиш сабаблари турлича. Фактларни етарли даражада ўрганмаслик ёки эътиборсизлик оқибатида юзага келган А. билан муайян ғоявий-бадиий мақсадни кўзлаб йўл қўйилган А.ни фарқлаш керак. Кейинги ҳолда А. тарихийлик ва замонавийлик муаммоси доирасига кириб кетади. Ўтмиш мавзусидаги асарда замона руҳи, замона хусусиятларнинг акс этиши табиий, шундай экан, муайян ғоявий-эстетик мақсад тақозоси билан воқе бўлган А.га бадиий шартлиликтининг бир кўриниши сифатида қараш мумкин.

АННОТАЦИЯ (лот. *annotatio* – изоҳ, шарҳ) – асар мазмунининг қисқача баёни. Ноширлик амалиётида китобларнинг ички муқобасида, илмий мақолаларнинг сарлавҳасидан кейин берилади. Бу хил А.ларни беришнинг тартиби шаклланган. Жумладан, китобларга берилувчи А.ларда муаллиф, китобнинг таркибланиши, мавзуси, аҳамияти ва ш.к.лар ҳақида; илмий мақолаларга ёзилган А.ларда эса қўйилган муаммо, уни тадқиқ этиш усуллари, олинган натижалар ва ш.к.лар ҳақида қисқача маълумот берилади. Шунингдек, библиографик кўрсаткичларда ҳам А.лар бериладики, бу уларнинг фойдаланишда қулай бўлишини таъминлаб, амалий аҳамиятини оширади. А. асарнинг ўзига хос «паспорти» бўлиб, у билан умумий тарзда таништиради, ўқувчининг инфомация оқимидан ўзига керакли материални танлашига ёрдам беради.

АНТИГЕРОЙ (юн. *anti* – зидлик маъносини берувчи олдкўшшимча, *heros* – илоҳий одам, яримхудо) – қаранг: аксиликхрамон

АНТИТЕЗА (юн. *antitheσis* – қаршилантириш) – 1) образ замырдаги нарса, ҳодиса, тушунчаларни кескин қаршилантиришга асосланған стилистик фигура, бу маңнода тазодға тұғри келади. А. услугбий безак сифатида антик даврдан бошлаб көнг құлланилади. А.да қаршилантириш, асосан, антоним сүзлар воситасида воғе бўлади, шу сабабли ҳам у доим очиқ кўзга ташланади. А. фикр-туйғуни аник-равшан, таъкидлаб, эмоционал тўйинтириб ифодалашга хизмат қилади. Мас., Оғаҳийнинг «Эй шоҳ, карам айлар чоғи тенг тут ямону яхшини» мисрасида «ямону яхши» А.си «ҳаммани, барчани» маъноларини беради. Лекин уни шу сўзлардан бири билан алмаштириб бўлмайди. Чунки «ямону яхши» А.сида айтилмоқчи бўлган фикр «яхши демай, ёмон демай – ҳаммани» тарзида таъкидланиб, конкретлаштириб ифода этилмоқда; агар «тенг тут ҳаммани» дейи-лишида эмоционал жиҳатдан нейтраллик бўлса, А.да эътибордан четда қолганликдан келган алам-изтироб ҳам акс этади; 2) ҳозирги адабиётшуносликда А. термини стилистик фигурагина эмас, умуман, контраст маъносида ҳам ишлатилиди. Бу ҳолда А.га бадиий усул деб қаралади ҳамда бадиий асаддаги унсурларининг бир-бирига қарама-қарши кўйилиши назарда тутилади.

АНТИФРАЗИС (юн. *anti* – зидлик қўшимчаси, *phrasis* – гап, жумла) – кинояning фаол қўлланувчи кўриниши, нутқ жараёнида сўз ёки жумланинг тескари маңнода ишлатилиши. А. контекстдан англашилиб турган конкрет ҳаётий ҳолатга, соғлом мантиққа ёхуд сўзловчининг мақсадига мувофиқ келмайдиган гап сифатида на-моён бўлади. А. тасвир предметига ёзувчи муносабатини ифодалашда, айниқса, қўл келади. М.М.Дўстнинг «Истеъфо» қиссасида бу усулдан көнг фойдаланилган. Мас., Бинафшаҳон қизини ҳимоя қилиб: «Қизимиз кимдан кам? Ўзи ҳусндор бўлса, дипломи яқин қолди, ақли-одоби жойида. Ўзбекча гапиришниям билади...» – дейди. Мантиқан қараганда, «ўз она тилида гаплаша олиш» фазилат эмас, бунинг мақтовга дўнгани персонаж маънавий қиёфасини очиб берувчи муҳим чизигига айланади. Айни чоғда, бу ўринда киноя субъекти Бинафшаҳон эмас, балки муаллифнинг ўзи. Ёзувчининг қаҳрамонига, у мансуб муҳитга муносабатини ифодалайди. Қиссадаги бошқа бир персонаж эса: «Ўзимиздаям дўхтир кўп, бариси ота қадрдон, пораям сўрамайди», – дейдики, бу ўринда персонаж ҳам, муаллиф ҳам бирдек киноя субъектидир. Ҳар қандай киноя сингари А.нинг мазмуни ҳам контекстда реаллашади. Мас., биринчи мисолдаги Бинафшаҳоннинг гали замира ки-

ноя борлигини англаш учун ўтган асрнинг 70 – 80-йиллари мұхити, жамиятда ўз тили, миллій урф-одатларыга белисанд қараб, ўзи-ча «маданийлаш»ған, аслида эса «манқурт»лашган қатлам пайдо бўлгани ҳақида тасаввурга эга бўлиш тақозо этилади.

АНТОЛОГИЯ (юн. *anthologіa* – гулдаста) – бирор миллій адабиёт, давр, адабий йўналиш ва ш.к.ларга мансублиги жиҳатидан танланган ижодкорлар асарларидан намуналарни жамловчи тўплам. А.лар тузиш анъанаси Қадимги Юнонистонда бошланган бўлиб, кейинги даврларда унинг турфа кўринишлари пайдо бўлган. Шарқ адабиётидаги тазкиралар ҳам моҳиятан А.га яқин туради. Шунингдек, Фитратнинг «Энг эски турк адабиёти намуналари» (1927) ва «Ўзбек адабиёти намуналари» (1928) номли хрестоматияларига ҳам А. принциплари асосида тартиб берилган. XX аср ўзбек адабиётида бир қатор А.лар тузилган. Жумладан, «Ўзбек ёш шоирлари» (1922), «Ўзбек поэзияси антологияси» (1949), «Антология узбекской поэзии» (1950), «Ўзбек мөдерн шеърияти» (2005), «XX аср ўзбек шеърияти антологияси» (2007) ва б.

АПЕЛЛЯТИВ ФУНКЦИЯ – нутқ функцияларидан бири, нутқ субъекти томонидан нутқ йўналтирилган шахсга муайян таъсир ўткалиши. Нутқ жараёнида тингловчига маълум бир информацийни етказиш (*репрезентатив* функция), етказилаётган информацияга ўз муносабатини ифодалаш (*экспрессив* функция) ва унга муайян таъсир ўтказиш (апеллятив функция) мақсадлари ҳамиша мавжуддир. Улар универсал характерга эга бўлиб, конкрет нутқ моментида улардан бири етакчилик, устуворлик қиласи, айни дамдаги нутқ бўлаги шунга мос (курилиши, сўз танлаш, интонация ва ш.к.) тарзда шакллантирилади. Бу нутқ ҳодисаси бўлмиш адабий асарга ҳам тўла тааллуқлидир.

АПОСТРОФА (юн. *apostrophe* – бир томон оғиши) – нарса ёки ҳодисага худди жонли мавжудотга каби мурожаат этиш асосида юзага келувчи стилистик фигура. Мас., «Эй сабо, ҳолим бориб сарви хиромонимга айт» (А.Навоий), «Ёруғ юлдуз, гўзал юлдуз, тез сўзла...» (Чўлпон), «Денгиз, тўлқинларинг урма қирғоққа...» (Э.Воҳидов). Адабиётимизда бошидан-охиригача шу усул асосига қурилган шеърлар ҳам кўплаб учрайди (Ш.Раҳмон. «Ғўза»). Шунингдек, шеърий асарларда кузатилувчи айни пайтда ўзи бўлмаган одамга гўё шу ерда ҳозирдек, вафот этган кишига гўё тириқдек мурожаат этиш ҳам А.нинг бир кўриниши саналади. Бунга мисол қилиб А.Ориповнинг «Баҳор» шеъридаги «Баҳор келаётир, бош кўтар, қара, О сурур

куйчиси, донгдор замондош» дея F.Гуломга ёки «Онажон, онажон, кечиргил, ахир, Шодланмасин дедим бирор ғамимдан» дея онасига қылган мурожаатини келтириш мүмкін.

АРГО (фр. argot – бегона, тушунарсиз тил; жаргон) – жамиятдаги ёпик ижтимоий гурухлар (ўғрилар, гадойлар, дайдилар, фохишалар ва ш.к.)га мансуб кишиларга хос нутқ күриниши; баъзан жаргон терминига синоним тарзида ҳам ишлатилади. А.ни жаргондан фарқловчи мухим бир хусусияти бор: қўлланиш доирасидан келиб чиқкан ҳолда А. «махфийлик» хусусиятига эга, яъни у фақат шу доира кишиларига тушунарли бўлиб, бевосита уларнинг фаолияти билан боғлиқ ва ўзгалардан сир тутилиши керак бўлган мулоқотни амалга ошириш учун хослангандир. А. миллий тил базасида воқе бўлади, унинг грамматик қоидаларига асосланади. Айни чоғда, у тор доирадаги мулоқот учун зарур тушунчаларни англатувчи маҳсус унсурларни ҳам ўз ичига олади. Булар миллий тил, шевалар ёки хорижий типлардан олиб мослаштирилган, шунингдек, сунъий ҳосил қилинган унсурлардан ташкил топади. А.лар бадиий адабиётда муҳит колоритини бериш, нутқий характеристика воситаси сифатида қўлланади.

АРИЗ (ар. عرض – энли, кенг) – аruz баҳрларидан бири. *Мафоийлун* (V ---) ва *фаувлун* (V --) аслларининг кетма-кет такоридан ҳосил бўлади. Бобургача яратилган илми арузга оид асалларда мазкур баҳр тилга олинмаган. «Мұхтасар»да мазкур баҳрни ажам ҳалқлари яратганлиги таъкидланган ва унинг тўрт вазнига бир байтдан мисол келтирилган. *Хусусан, Бобурнинг:*

Лабинг маржон, тишинг дур, ҳатинграйхон, ҳадинг гул,
Сочинг анбар, юзунг ҳур, менгинг мўлтон, юзунг мул, –

байти аризи мусаммани солим (V ---\ V --\ V ---\ V --) вазнида ёзилган.

АРУЗ (ар. عروض – чодирни ушлаб туриш учун ўртага қўйиладиган ёғоч) – 1) қисқа, чўзиқ ва ўта чўзиқ ҳижоларнинг муайян тартибда гурухланиб тақорланишига асосланган мётрик шеър тизими. Манбаларда арузга VIII асрда яшаган араб олимни Халил ибн Аҳмад томонидан асос солингани, бу атама олим яшаган водий номи билан боғлиқ эканлиги қайд этилади. А. минг йиллар давомида Шарқ адабиётидаги етакчи шеър тизими бўлиб келди, муттасил бойиш ва ривожланишда бўлди, мукаммал тизимга айланди, унинг қонуниятлари

билан шуғулланувчи соҳа – илми аруз (қ.) шаклланди. Дастрраб араб адабиётида майдонга келган А. шеър тизими IX асрдаёт форсий адабиётда ҳам қўлланила бошлаган. Туркий халқлар адабиётида, жумладан, ўзбек адабиётида ҳам А. қадимдан қўлланиб келинади деган фикр мавжуд: «Бизнинг Ўрта Осиё турклари томонидан қачон қабул этилгани аниқ эмас. Бироқ ҳижрий 462 да Қашқарда ёзилган машҳур «Кутадғу билиг» китобининг шу аруз вазнида ёзилгани эътибор этилса, жуда эскидан қабул этилгани маълум бўладур» (Фитрат). XI асрдан то XIX аср охири – XX аср бошларига қадар А. ўзбек мумтоз адабиётидаги асосий шеърий тизим бўлиб келди. Албатта, форсий ва туркий адабиётлар А.ни механик тарзда ўзлаштирган эмас, аксинча, у форс ва туркий тил хусусиятларига имкон қадар мослаштирилган. Табиийки, бу ҳол А.ни бойитган, араб А., форс А., туркий А. каби тушунчаларнинг юзага келишига асос бўлган.

Мумтоз арузшунослиқда А.нинг ритмик бирликлари сифатида ҳарф (қ.), жузв (қ.), рукн (қ.) ва баҳр (қ.) кўрсатилиб, бу кўпроқ араб А.ига хосдир. Ўзбек мумтоз адабиётшунослигида, жумладан, Навоийнинг «Мезон ул-авzon»«, Бобурнинг «Мұхтасар» асрларида туркий А. ҳам шу анъана йўлида ўрганилган. XX асрдан, хусусан, Фитратдан ўзбек арузшунослигида энг кичик ритмик бўлак сифатида ҳижо (қ.) кўрсатила бошландики, бу А. илмини ўзбек тили табиатига мослаш заруратининг ҳосиласидир. Натижада ўзбек арузшунослигида ҳарф ва жузв атамалари пассивлашди, яъни туркий (ўзбек) А.нинг ритмик бирликлари сифатида ҳижо, рукн ва баҳр эътироф этилди. Мазкур бирликларнинг кичиги каттасини ҳосил қилади (ҳарфларнинг маълум тартибда бирикишидан жузв, жузвларнинг маълум тартибда такрорланишидан рукн (асл), рукнларнинг маълум тартибда такрорланишидан эса баҳр), шунингдек, рукнлар сифат ёки миқдор жиҳатидан зиҳоф (қ.)га учрашидан қатор шоҳобчалар пайдо бўлади, бу эса А.нинг ритмик имкониятларини кенгайтиради, унга ритмик-интонацион ранг-баранглик беради. Натижада А. юзлаб вазнларни ўз ичига олган мукаммал тизимга айланадики, у қайсиdir жиҳатлари билан Менделеев жадвалини ёдга солади. Яъни назарий жиҳатдан барча вазнлар тақтөъсини чизиб кўрсатиш, шунга тушадиган шеър ёзиш мумкин; тизим таркиbidаги айрим вазнлар фаол бўлса, бошқалари жуда кам қўлланади; айрим вазнлар кўпроқ араб, бошқалари форс, баъзи бирлари эса туркий шеъриятда қўлланади ва ҳ.

XX асрнинг 20-йилларига келиб А. шеъриятимиздаги етакчилик мақомини йўқотди, ўз ўрнини тилимиз табиатига мувофиқроқ бўлган

бармоққа бўшатиб берди. Шунга қарамай, XX асрда яшаб ижод этган Ҳамид Олимжон, Ҳабибий, Собир Абдулла, Чустий, Чархий каби, шунингдек, ушбу анъанани муваффақиятли давом эттирган Эркин Воҳидов, Абдулла Орипов, Жамол Камол, Ойдин Ҳожиева, Мирзо Кенжабек каби замондош шоирларимиз ижодида ҳам А.да ёзилган шеърлар кўплаб учрайди.

2) қаранг: тақтиъ

АРХАИЗМ (юн. archaios – қадимги) – эскирган, истеъмолдан чиққан сўз (ёки грамматик шакллар). А.лардан тарихий мавзудаги асарларда давр колоритини бериш, қаҳрамонлар нутқини индивидуаллаштириш (замонасига мос ҳолда) каби мақсадларда фойдаланилади. Мас., М.Алининг «Сарбадорлар» романидаги илк жумла: «Ҳижрий 764 йил шаввол ойининг 18-куни ўттиз ҷоғли туялар карвони Самарқанднинг Кеш дарвозасига етиб келганида, вақт хуфтондан ошган эди». Дастрлабки жумлаёқ ўкувчи диққат-эътиборини ўзга вақтта созлайди, бунга жумлада қўлланган сўзлар асос бўлади. Ўтмиш руҳи юқтирилган ўкувчи романни ўқиш давомида Темур «даставвал ўзига хос лашкар тузишга уринди», «турли шаҳарларга тинчилар, қуловузлар юбора бошлади» тарзидаги жумлалар, «Нақоралар чалинди. Навкарлар қўлига киshan солинган, учовининг бўйинларига битта жела ташланган... дор тагига олиб бордилар» каби лавҳаларда қўлланган тарихий сўз ва шаклларни табиий қабул қиласи, айни шу тил унсурлари унда ўтмиш руҳини тутиб туради. Бундан ташқари, А.лардан баъзан услугба тантанаворлик бериш, баъзан эса дўстона ҳазил ё киноя учун ҳам фойдаланилади. Бунга F.Фуломнинг Чархий, Улфат, С.Абдулла, О.Валихонов каби дўстларига битган мактублари мисол бўла олади. Жумладан, Чархийга ёзилган мактуб:

«Дўсти муҳтарам мавлоно Асқарали Чархий Хўқандий.
Асьада каллоҳу фиддорайн.

Мактуби муҳаббат услублари соати саъдда қўлимизга тегди. Бошимиз авжи фалакдан ҳам ошиб кетди. Шайхи-шуюх, алломаи пири Киромиддин ҳазратларининг дебочаи қаламилари ҳақиндаги хабари суруроварларидан бисёр мамнун бўлдик. Тез фурсатда дастрас бўлмоғи умидидамиз, албатта.

Масалаи дуввумга келганда, фикримча, бу иш ўзим бормасдан, орқаворот – мактуб орқали ҳал бўлмоғи мушкул кўринур. Яқин ўрталарда Фарғона томонларга сафар ихтиёр қилсанмукун дөгандан

ниятим ҳам йўқ эмас. Балки шу муддатда жанобларининг илтиносларини ҳал қилиш учун арбоби шаҳри Хўқанди фирмавсмонандга мурожаат қилурман, иншооплоҳ.

Боқи: Ассалому алайкум.

Ғафур Ғуломи Шошийи Қоратоший».

F.Ғулом мактубида А. ва өвваризмлар кўллаш орқали эскича услубни тиклаш (*стилизация*)га интилади: мадраса кўрган зиёлилар услубига хос жумла қурилиши, арабча-форсча сўзлар, калималар ва синтактик қурилмаларнинг ишлатилгани шуни кўрсатади. Булар эса мактубга тантанавор руҳ бериш билан бирга шоирнинг дўстона ҳазил-мутойибага мойиллиги, эскича анъаналарга содик қолган Чархий домлага киноясини ҳам ифодалайди.

АРХЕОГРАФИЯ (юн. *archaios* – қадимги, *grapho* – ёзаман) – тарихий фанларнинг қадимги ёзма ёдгорликлар билан шуғулланувчи ёрдамчи соҳаси. А. кўхна қўллётмаларни чоп этишга тайёрлашнинг назарий асосларини, амалий тартиб-қонидалари ва методикасини ишлаб чиқади. А.нинг вазифалар доирасига қадимги битикларни ўқиш, ёши, муаллифи, ёзилган жойи ва вақтини аниқлаш кабилар ҳам киради.

АРХИВШУНОСЛИК, адабий-архившунослик (лот. *archivum* – ҳўжкат сақлаш жойи, форс. شناسی – ўрганиш) – адабиётшуносликнинг ёрдамчи соҳаларидан бири, аксарият ҳолларда манбашуносликнинг таркибий қисми сифатида ҳам қаралади. А. адабиёт тарихига оид манбаларни сақлаш, тартибга солиш, тавсифлаш каби вазифаларни бажаради. Адабиёт тарихига оид манбалар сақланадиган муассасалар (давлат архивларидағи турли ижодий уюшма, адабий нашрлар фондлари; адабиёт музейлари, адибларнинг уй-музейлари) кўпайиши билан адабиётшуносликда А.нинг роли ва аҳамияти ҳам ортиб борди, шу боис ҳозирда унга адабиётшунослик илмининг алоҳида бир ёрдамчи соҳаси сифатида қараш оммалашмоқда.

АРХИТЕКТОНИКА (юн. *architektonike* – қурилиш санъати, меморлик) – адабиётшуносликда адабий асарнинг ташқи қурилиши, унинг асосий қисмлари (боблар, фасллар; парда, кўриниш)ни бир бутунга бирлаштириш маъносида кўлланади; баъзан композиция терминига синоним тарзида ҳам ишлатилади, лекин бу маъносида термин оммалашган эмас. Чунки ҳозирда адабий асар турли сатҳлардан ташкил топишидан келиб чиқиб композициянинг турли аспектлари (матн композицияси, сюжет композицияси ва ш.к.)

ҳақида галирилади, шунга кўра, А.га мазкур аспектлардан бири сифатида қаралади. Яъни композиция термини А. тушунчасини ҳам қамраб олади.

АРХЕТИП (юн. archetypon – образнинг илк асоси, модель) – инсон тафаккури, ижодий тасаввуринг хос бўлган турғун «схема», фикрий конструкция ва қолиплар, мотивлар ва уларнинг турли комбинациялари. А. тушунчаси швейцариялик руҳшунос К.Юнг таълимоти билан боғлиқ ҳолда оммалашди. Унга кўра, А.лар кишилик жамиятининг энг қадимги давларида номинациялардан то ҳозирги адабиётгача кўриш мумкин. А. конструкция ва схемалардан ўзига хос «сюжет ва сюжет ҳолатлари» жамғармаси ҳосил бўладики, улар асардан-асарга, даврдан-даврга кўчиб юради. К.Юнгга кўра, А., аввало, шакл ҳодисаси бўлиб, муайян даврда яшаётган ижодкор онгидаги уйғонганидагина унинг ҳаётий тажрибаси билан бойитилади ва конкрет мазмун касб этади. Мас., ер юзидаги биринчи қотилликдан нақл қилувчи «Қобил ва Ҳобил» қиссасида ҳасад, кўролмаслик қотилликни келтириб чиқарган бўлса, худди шу мотив турли комбинациялар кўринишида жаҳон адабиётида қайта-қайта жонланаверади (Шекспир. «Отелло»; А.Пушкин. «Моцарт ва Сальери»). Шунга ўхшаш, хўжайн хотинининг хизматкорни яқинликка ундаши мотиви («Эзоп ҳаёти», «Юсуф қиссаси» ва б.) қадимги давлардаёқ кенг оммалашган бўлиб, у кейинги даврлар адабиётида, хусусан, ўзбек адабиётида ҳам турли комбинацияларда намоён бўлади (Чўлпон. «Кеча»; У.Ҳамдам. «Мувозанат»). Ёки «Шоҳ Эдип»даги инвест мотиви Ги де Мопассаннинг «Портда» ҳикояси, Т.Қайибергановнинг «Қорақалпоқ қиссаси», Ў.Ҳошимовнинг «Икки эшик ораси», М.Алининг «Сарбадорлар» романларида ўзгачароқ кўринишларда аксланади. Мисолга олинган ҳолларнинг бари қадимдан мавжуд бўлган илк асосга – А.ига эга бўлиб, бу илк асос конкрет давр хусусиятлари билан боғлиқ ҳолда турлича кўринишлар олади.

АССОНАНС (лот. assonare – уйғун жаранглаш; фр. assonance – оҳанѓдошлиқ) – 1) шеърий нутқда (насрда нисбатан кам) бир хил унлилар тақорорига асосланган ифодавийликни кучайтирувчи восита, тақорорнинг фонетик сатҳдаги хусусий кўриниши; шеърга хушоҳанглик баҳш этади, мусиқийликни кучайтиради. Мас., Э.Шукурдан олинган қуйидаги парчада «О» товушининг тақорори А.ни юзага келтиради:

Олтин ойга олма отар Ойбодом,
 Ойботарда иңглаб ётар Ойбодом.
 Ойқизларнинг ойпариси Ойбодом,
 Кунботардан куйиб ўтар Ойбодом.
 Олма юзли, бодомқовоқ Ойбодом,
 Ёниқ сочи ёнар байроқ Ойбодом.
 Йил ботарда чўкар қора сувларга,
 Бу дунёда ой каби тоқ Ойбодом;

2) рус адабиётшунослигида, хусусан, шеършунослигида фақат ургули унлиларигина ўзаро мос келувчи оч қофия, баъзан эса умуман оч қофия маъносида ҳам қўлланади.

АССОЦИАТИВ ОБРАЗ (лат. *associatio* – бирлаштиrmок, қўшмоқ) – нарса-ҳодиса ва тушунчалар орасидаги илғаб олиниши қийин бўлган алоқаларга асосланган, уларни кутилмаган тарзда бириктириш (қиёслаш, ҷоғиштириш, қаршилантириш) орқали воқе бўлувчи ва шу туфайли юксак даражадаги метафориклик, субъективлик касб этувчи образ. Аслида, ассоциативлик ҳар қандай образ табиатига хос хусусиятдир. Яъни А.о. бадиий образнинг алоҳида бир тури эмас, бу термин остида, умуман, бадиий образга хос ассоциативликни кучли намоён этувчи образ тушунилади. Демак, терминнинг қўлланишида муайян шартлилик мавжуд. А.о. ўкувчидан ижодий фаолликни, нарса-ҳодисалар орасидаги муаллиф таянган алоқаларни, алоқалар занжирини илғай олишни тақозо этади. Мас., З.Рўзиеванинг куйидаги мисраларини олайлик:

*Сезармисиз, мен бир гул, майса,
 Шабнамимда кулган қуёш бор...*

Маълумки, шеър ичидаги сўз, бир томондан, бошқа сўзлар билан мустаҳкам алоқада – у бошқа сўзга ё тенгланади, ё зидланади, ё тобеланади; иккинчи томондан, сўз ортида олам, у англатаётган нарса-ҳодиса ва тушунчалар ҳам борки, улар ҳам бир-бири билан алоқадор. Яъни маъно, сўз сўзга уриштирилганда, воқе бўлади. Зоро, сўзнинг сўзга урилиши – бамисоли бонг, унинг жаранги тасаввуримизда қандайдир тушунчалар, нарсалар, манзаралар, қиёсларни, бир сўз билан айтганда, ассоциацияларни, ассоциациялар занжирини уйғотади. Шоира «мен бир гул» дейди-да, ортиданоқ шошиб буни инкор қиласди – ўзини майсага қиёслайди. Яъни қулоқларимиз ўрга-

ниб кетган «аёл – гул» қиёси «аёл – майса» қиёси учун күпприк мисоли. Майса эса тасаввурда майнинлик, беозорлик, заифлик, синиқлик сингари аёлга хос тушунчаларни үйгөтади. Шу тушунчалар билан боғлиқ ҳолда «шабнам» аёл қалбини – ҳар не гарду ғубордан фориғ, ўзига олам ташвишини сиғдира олган митти-улкан маконни суратлантиради. Софлик эталони бўлмиш қатрада эса «кулган қуёш» бор. Аждодларимиз қуёшни «мехр» деб атаганлари ёдга олинса, аён бўладики, бу чизги билан аёл қалби таърифи бўртиб кўзга ташланади. Шу нуқтада муаллифнинг оригинал қарашини, бадий фалсафасини англаш мумкин бўлади. Аёлни гулга менгзаш асоси – гўзалик, гўзалик эса ўткинчи. Шоира топган қиёс «гул»дан кўра сиғимлироқ, зеро, у аёл зоти учун умумийроқ ва боқийроқ хусусиятни мужассам этмоқда. Парчада аёл қалби ҳақида умуман гап йўқ, лекин ассоциатив алоқалар туфайли у илғаб олинади. Дунёни метафорик идрок этишга интилаётган замонавий шеъриятда А.о.лар тобора кенг ўрин олиб бормоқдаки, бу каби мисолларни жуда кўплаб келтириш мумкин.

АТРИБУЦИЯ (лот. *attribution* – нисбат бермоқ) – матншунослик соҳаси олдида турувчи асосий илмий муаммо (вазифа)лардан бири, адабий асарнинг муаллифи, ёзилган вақти ёки жойини аниқлаш, эвристика. Бу муаммо турли манбалардан (мас., тазкиралар, тарихий асарлар, архив материаллари, хотиралар ва б.) ҳужжатли далиллар топиш; муаллифи номаълум асарнинг ғоявий-бадиий, тил ва услугуб хусусиятларини шак-шубҳасиз нисбат берилаётган ижодкор қаламига мансуб асар билан қиёсий ўрганиш; асарнинг ёзуви (котиби, хаттотлик мактаби, хат ва унинг оммалашган даври), китобат қилиниш хусусиятлари (қофоз, сиёҳ, муқова, безаклар ва б.)ни тадқиқ этиш каби йўллар билан ҳал қилинади. Шуларнинг барини эътиборда тутган ҳолда комплекс ёндашув асосида амалга оширилган А.гина илмий саналади.

АФОРИЗМ (юн. *aphorismos* – таъриф, ихчам ифода) – муаллифи маълум бўлган, ихчам шаклда ва таъсирли ифода этилган умумлашма фикр. А.га берилган таърифларда турличалик мавжуд: айrim манбаларда А. аниқ муаллифга эга бўлиши шарт ва шу нарса уни мақоллардан фарқловчи асосий жиҳат дейилса, бошқаларида бу шарт қўйилмайди (қ. афористика). А.лар пайдо бўлиши жиҳатидан турлича. Айrim ҳолларда А. маҳсус яратилади, бу ҳолда уни том маънода жанр деб ҳисоблаш мумкин (мас., А.Қаҳҳорнинг машҳур «Адабиёт атомдан қучли, лекин унинг кучини ўтин ёришга сарф

қилиш керак эмас» деган гапи). Зоро, бу ҳолда ижодкорнинг ҳаётий тажрибасига таянган ҳолда бирон-бир масала юзасидан умумлашма фикрини ифодалашга имкон берувчи шакл ҳодисаси ҳақида гап боради. Мас., А.Мухторнинг «Тундаликлар», Ў.Хошимовнинг «Дафтар ҳошиясидаги битиклар»идан шу жанрнинг кўпгина яхши намуналари жой олган. Бироқ кўп ҳолларда у ёки бу асардан олинган ихчам ибратли фикр ҳам А. сифатида оммалашади (мас., «Синчалак»дан: «Тўкилгандан томчилаган ёмон...» ёки «Чаласавод киши ўзидан паст, нима деса «ҳикмат» деб турадиган одамлар билан улфатчилик қилишга мойилроқ бўлади»).

АФОРИСТИКА – адабий ижоднинг бир тури, муайян ҳаётий тажрибага асосланган ибратга молик умумлашма фикрни ихчам бадиий шаклда (антитета, параллелизм, қиёс, парадокс ва ш.к. услубий воситалар ёрдамида) ифодалаш. А. воқеликнинг индивидуал-хусусий томонларига кўз юмган ҳолда умумий, типик томонларга эътибор қаратади: унинг асосида тасвирлаш ёки ҳис-туйғуларни ифодалаш мақсади эмас, муайян ҳукм-хулосани баён қилиш мақсади ётади. Яъни А. образ билан эмас, фикр билан иш кўради. Айни чогда, у илм эмас, А.даги фикр илмий тафаккурдан фарқ қиласди: илмий фикр муайян объективнинг атрофлича таҳлили асосида олинса, афористик фикр муаллифнинг шахсий (маънавий, руҳий, сиёсий, майший ва х.) тажрибасига таянади; илмий фикрнинг тўғрилиги далиллар силсиласи билан исботланса, афористик фикр объектив ҳақиқатлик даъвосини қилолмайди, чунки унинг тўғрилиги исбот қилинмайди, ҳис этилади. Агар А.ни адабий ижод тури сифатида тушунилса, унинг жанр кўринишлари деб ҳалқ оғзаки ижодидаги мақол, ёзма адабиётдаги гнома, хрия, сентенция, апофтеозма, максима кабиларни кўрсатиш мумкин.

АХЛОҚИЙ-ТАЪЛИМИЙ АДАБИЁТ – қаранг: дидактик адабиёт

Б

БАДИЙ АСАР – адабиёт ва санъатнинг воқе бўлиш ва яшаш шакли, яхлитлик касб этган образлар тизими, бадий муроқот во-ситаси. Кенг маънода Б.а. санъатнинг у ёки бу тури (мусиқа, рас-сомлик, ҳайкалтарошлиқ, кино, театр ва х.)га мансуб бўлган, ин-соннинг гўзаллик қонуниятлари асосидаги ижодий-рухий фаолияти маҳсули сифатида яралган янги мавжудликни англатади, яъни бу маънода алоҳида олинган мусиқа асари ҳам, ҳайкал ёки рангтасвир ҳам, фильм ёки спектакль ҳам – бари Б.а. саналади. Термин фаол қўлланувчи тор маъносида бадий адабиётга мансуб бўлган «адабий бадий асар»ни билдиради. Шу ўринда адабиётта мансуб эти-лувчи асарларнинг ҳаммаси ҳам Б.а. бўлавермаслигини, «адабий асар» билан «адабий-бадий асар» тушунчалари фарқланишини таъкидлаш лозим (қ. адабиёт, беллелтистика). Яъни «адабий асар» тушунчасининг қамров доираси кенг бўлиб, «адабий бадий асар» унинг таркибига киради. Мас., ҳикоя, қисса, роман, мемуар, саёҳатнома, эссе жанрларида битилган асарларнинг ҳаммаси – «адабий асар», бироқ саналганлар ичida ҳикоя, қисса ва романга нисбатангина «бадий асар» дейиш мумкин (қ. поэзия). Адабиётта мансуб Б.а. тил воситаларидан таркиб топувчи матн, у ҳам моҳият эътибори билан нутқ ҳодисасидир! Нутқ эса, маълумки, жараён бў-либ, бу жараённинг амалга ошиши учун адресант ва адресатнинг бўлиши талаб этилади. Яъни Б.а. муроқот асосида дунёга келади: ёзувчи ижод онларида тасаввуридаги ўқувчи билан муроқотда бўлади – унга муайян бадий информацияни етказади, ўзининг ўй-хислари билан ўртоқлашади, у билан баҳслашади, уни нималаргадир ишон-тиришга интилади ва х. Айни шу муроқот – ижод жараёни асар мат-нида муҳрланади. Асарни ўқиш жараёнида муроқот қайтадан жонла-нади: энди ёзувчи «тасаввурдаги сұхбатдош» мавқеига ўтса, ўқувчи реал сұхбатдошга айланади: Бадиият ҳодисаси фақат икки онг ту-ташган нутқада (М.Бахтин)гина, яъни ижод (ёзувчи ва тасаввурдаги

ўкувчи) ва ўқиши (ўкувчи ва тасаввурдаги ёзувчи) жараёнларидагина мавжуд. Бошқача айтсак, матн ўқиши (ҳамда ижод) жараёнидагина Б.а.га, бадиият ҳодисасига айланади, ўқилмаган пайтда эса у бир жисм – қофоз, муқова, рангдан иборат нарса, холос. Шунга кўра, Б.а. сўз санъатининг воқе бўлиш (моддийлашиш) шаклидир. Иккинчи томондан, ўзида мулоқот жараёнини акс эттирган бадиий матнда кейинги мулоқотлар потенциал ҳолда мавжуд: у ҳар гал ўқилганда, мулоқот (бадиият ҳодисаси) жонланаверади, шунга кўра, Б.а. сўз санъатининг яшаш шаклидир. Ижодкор ва ўкувчи орасидаги бадиий мулоқотни амалга оширишга хизмат қилгани учун ҳам Б.а. бадиий мулоқот воситаси деб тушунилади. Б.а.да ижод жараёни, санъаткор онгида кечган ижодий-рухий жараён аксланади. Санъаткорнинг ижод онларидағи ижодий-рухий ҳолати бетакрор бўлиб, битта дарёга икки бора шўнгигб бўлмаганидек, унинг худди шу ижодий-рухий ҳолатга қайта тушиши мумкин эмас. Демак, ўзида муайян ижодий-рухий ҳолатни акс эттирган бадиий асар ҳам бетакрор (феноменал) ҳодисадир. Иккинчи томондан, ўша ижодий-рухий ҳолатнинг ўзи том маънодаги бутунлик, ижод онларида реалликдан узилиб, Идеал ўлчовига ўтган санъаткорнинг маънавий-рухий бутунлиги. Б.а.даги ҳар бир унсур эса ўша бетакрор ва бутун ижодий-рухий ҳолат маҳсули, унда биронта ҳам ортиқча унсур мавжуд эмас. Зеро, асардаги барча унсурлар, ҳатто бизга ортиқчадек туюлганлари ҳам муаллифнинг ижод онларидағи руҳий ҳолатини, демакки, асарнинг мазмун-моҳиятини ўзида акс эттиради. Англашиладики, бадиий асар – бутунлик, бу бутунликдаги бирор-бир унсурни асар мазмун-моҳиятига путур етказмаган ҳолда олиб ташлаш мумкин эмас. Сабаби, бадиий асарни ташкил қилаётган унсурларнинг бари бир-бири билан мустаҳкам алоқада, айни шу алоқалар асосида бутунлик юзага келади, яъни бадиий асар – қисмлардан ташкил топаётган бутунлик, систем бутунликдир. Унинг қисмлари орасидаги алоқа шу қадар муҳимки, уларнинг етарлича англанмаслиги асарни чала, ўз моҳиятидан ўзгача тушунишга олиб келиши мумкин. Зеро, ҳар бир қисм бутун талабига мос киритилган, демак, қисмлар орқали бутун тушунилади, қисмнинг моҳияти бутун таркибидагина намоён бўлади. Демак, Б.а.ни ўқиётган одамдан унинг систем бутунлик эканини ҳамиша ёдда тутиш, ҳар бир қисмни алоҳида ва бошқа қисмлар билан алоқадорликда, шунингдек, уни бир бутун ҳолича ҳам тасаввур эта билиш талаб қилинади.

БАДИЙ ОБРАЗ – адабиёт ва санъатининг фикрлаш шакли, олам ва одамни бадиий идрок этиш воситаси, бадииятнинг умумий кате-

горияси. Луғавий маъносида ҳар қандай аксни билдирувчи «образ» сўзи турли фан соҳаларида (фалсафа, психология) муайян терминологик маънода кўлланади. Жумладан, эстетика ва адабиётшунослиқда у «бадиий образ» маъносида тушунилади. Б.о. деганда борлик (ундаги инсон, нарса, ҳодиса ва ҳ.)нинг санъаткор кўзи билан кўрилган ва идеал асосида ижодий қайта ишланган акси англанади. Албаттa, бу аксда борлиқнинг кўплаб таниш излари бор, бироқ энди у биз билган борлиқнинг айни ўзи эмас, балки ундан шартлилик асосида ажралган янги мавжудлик – бадиий борлиқдир. Худди шу ҳол Б.о.ни объектив ва субъектив ибтидолар бирлигига айлантиради. Яъни, бир томондан, борлиқнинг акси сифатида Б.о. макон ва замонда мавжуд бўлган конкрет нарсадек ҳис этилади. Иккинчи томондан, у тушунча, тасаввур, фараз ва ш.к. тафаккур унсурларига хос хусусиятларга эга: ижодкор Б.о. воситасида фикрлайди, борлиқни оддийгина акс эттирмасдан, уни ижодий қайта яратади. Шунга кўра, Б.о.нинг вужудга келишини қуидагича схемада кўрсатиш мумкин: борлиқнинг ҳислар орқали онга аксланиши – тафаккур кучи билан ўз маънавий-рухий эҳтиёжларига мос ижодий қайта ишлаш ва умумлаштириш – конкрет ҳис этиладиган тарзда (Б.о. шаклида) ифодалаш. Конкрет ҳис этиладиган тарзда ифодаланган Б.о. қатор специфик хусусиятларга эга. Аввало, Б.о. индивидуаллаштирилган умумлашма сифатида намоён бўлади. Воқеликдаги ҳар бир нарса-ҳодисада турга хос умумий хусусиятлар билан унинг ўзигагина хос хусусиятлар мужассамдир. Нарса-ҳодисанинг умумий хусусиятларига таянуви абстракт тафаккурдан фарқли ўлароқ, образли тафаккур унинг индивидуал хусусиятларига таянган ҳолда фикрлайди. Дейлик, фан, умуман, одам ҳақида (мас., биолог, умуман, одамнинг физиологик хусусиятлари ҳақида) сўз юритиши мумкин, бироқ санъат ҳеч вақт, умуман, одам образини яратолмайди. Шу маънода конкретлилик Б.о.нинг муҳим специфик хусусиятидир. Мисол учун, А.Ориповнинг «Аёл» шеъридаги аёл образи ўзида катта бадиий умумлашмани ташиди, шу билан бирга, у ўкувчи тасаввурида конкрет бир инсон сифатида гавдаланади. Санъат конкрет нарса-ҳодисанинг индивидуал хусусиятларини бўрттириш орқали умумлаштиришга эришади. Мас., А.Қаҳҳор «Ўгри» ҳикоясида амин ҳақида «оғзини очмасдан қаттиқ кекирди, кейин бақбақасини осилтириб кулди», «чинчалогини иккинчи бўгинигача бурнига тиқиб кулди» қабилидаги индивидуал белгиларни бўрттиради. Шу индивидуал белгиларни бўрттириш билан адид замона амалдорларига хос умумий хусусиятни – кўл остидаги

фуқаро тақдирига бефарқликни күрсатади. Яъни индивидуаллаштириш ҳисобига, бир томондан, амин образи кўз олдимиизда конкрет инсон сифатида гавдаланади, иккинчи томондан, образ бадий умумлашмалилик касб этади. Шу тариқа Б.о.да бир-бирига зид икки жиҳат (индивидуаллик ва умумийлик) уйғун бирикади. Шунга ўхашаш Б.о. ўзида ақл билан ҳисни ҳам бирлаштиради, шу боис уни *рационал* ва эмоционал бирлек сифатида тушунилади. Б.о.даги рационал жиҳат шуки, унинг ёрдамида ижодкор ўзини қийнаган муаммоларни бадий идрок этади. Мас., «Кеч» романидаги қатор образлар ёрдамида Чўлпон Туркистоннинг тарихий тараққиёти масалалари, юртинг эртаси билан боғлиқ муаммоларни бадий тадқик этади, образлар тизими воситасида бу борадаги фикр-қарашларини шакллантиради ва ўзи англаган ҳақиқатни бадий концепция (тугал бир қараш, тизим ҳолидаги бадий хулоса) тарзида ифода этади. Айни пайтда, асардаги образларда адабнинг ҳиссий муносабати ҳам ўз аксини топган. Ҳиссий муносабат бадий концепцияни шакллантиришда, асар мазмунининг ўкувчига етказилишида муҳим аҳамият касб этади. Ҳар бир конкрет образнинг ҳиссий тоналлиги турлича бўлиб, бу, биринчи галда, ижодий ният билан боғлиқдир. «Кеч»нинг бошланишида ёк Чўлпон Зебига бир турли, Рассоқ сўфиға яна бир турли, Акбаралига эса бошқа бир турли муносабатда бўлади. Воеалар ривожи давомида ҳиссий муносабатда ҳам маълум ўзгаришлар кузатилади. Жумладан, асар бошланишидаги Зебига шайдолик тўла меҳр сусайиб (адиб характер моҳиятини холис идрок этади), Рассоқ сўфи ёки Акбаралига нисбатан мазахли нафрат қисман ачинишга (адиб уларнинг тақдиридаги фожеликни кашф этади) айланиб боради. Яъни характер моҳиятига кирилгани сари, ҳиссий муносабатда ўзгариш юзага келади. Ҳиссий муносабатдаги ўзгариш ўқиш жараёнида китобхонга ҳам ўтади ва айни шу нарса уни асар мазмунини адаб истагандек тушунишига йўналтиради. Демак, Б.о.даги рационал ва эмоционал жиҳатлар уйғунлиги бадий концепциянинг шакллантирилишида ҳам, ифодаланишида ҳам бирдек муҳим экан.

Б.о.нинг муҳим хусусиятларидан яна бири унинг *кўп маънолилиги* бўлиб, бу унинг метафориклиги ва ассоциативлиги билан белгиланади. Б.о.га хос «метафориклик»ни «ўхашашлик» билангина боғлаб қўймаслик лозим. Яъни «метафориклик» деганда Б.о.нинг бир нарса моҳиятини бошқа бир нарса орқали очишга интилиши, санъатта хос фикрлаш йўсини тушунилади. Чинакам санъаткор нигоҳи моҳиятга қаратилади, у нарса-ҳодисалар орасидаги ташқи ўхашашликка эмас,

нигоҳимиздан яширин ички ўхшашлигига таяниб фикрлайди. У биз кутмаган ички ўхшашликни кашф этади, натижада ўша биз билган нарса-ҳодиса кўз олдимизда буткул янгича бир тарзда гавдалана-ди, ўзининг бизга ноаён қирраларини намоён қиласди. Мас., шоир (Х.Даврон) рангтасвир санъати ҳақида ёзади: «Мусаввир бўлмоқ эрсанг, Тилингни сугуриб ол Ва ярадан тўкилган қон рангига қулоқ сол». Албатта, рангтасвирда ранглар «гапириши» ҳаммага маълум, бироқ айни шу фикрни «гапираётган қон ранги» образи орқали берилгани – кашфиёт, метафорик фикрлаш натижаси ва худди шу нарса бизни ҳайратга солади, шууримизда муқим ўрнашади. Моҳиятга қараган санъаткор қобиғига ўралиб яшаётган одам билан сассиқ кўлмақдаги тилла балиқча ёхуд ўзида чексиз куч-кудрат сезгани ҳолда мақсадсиз яшаётган одам билан бемаксад учб юрган бургут орасида (А.Орипов), турғунликнинг биқиқ мұхитида яшаётган зиёли билан бир издан бетўхтов юраётган трамвай (А.Аъзам) ёки қатағон шароитида ижод қилаётган шоир билан ваҳший қоялар орасида қуёшга оппоқ гул узатганча нафис чайқалаётган наъматак (Ойбек) орасида ўхшашликлар топади, бирининг моҳиятини иккинчиси орқали очиб беради. Келтирилган мисоллар образли тафаккурда юксак даражадаги ассоциативлик бўлишини кўрсатади. Маълумки, ассоциативлик, умуман, инсон тафаккурига хос, ташқи олам таъсирида онгимиизда бирор нарсанинг акси пайдо бўлиши ҳамоно, у билан боғлиқ ассоциациялар ҳам уйғонади. Мас., «қиши» дейилиши билан, хаёлимизда ассоциатив тарзда «қор», «совуқ», «пўстин», «чана» каби у билан боғлиқ тушунчалар ҳам уйғонади. Образли тафаккур юксак даражада ассоциатив саналишига сабаб шуки, реаллиқда кўрилган бир нарса санъаткор хаёлида бутунлай бошқа бир нарсани, у билан мутлақо алоқаси бўлмаган нарсани уйғотиши мумкин. Шу боис санъаткор юқоридагича ўхшашликларни топади ва Б.о.да акс этирадики, натижада образ юксак даражадаги ассоциативлик касб этади, шу асосда у қўп маънолилик хусусиятига эга бўлади. Буни, айниқса, ассоциативлик даражаси юқори бўлган рамзий образлар мисолида яққол кўришимиз мумкин. Мас., Ойбекнинг «Наъматак» шеъридаги табиат манзарасини Б.о. деб олсак, табиийки, унинг биринчи маъноси табиат манзара-сининг ўзи. Ҳолбуки, ўз вақтида шоир ассоциатив равишда шу манзарада истибдод тузуми шароитидаги ижодкор тақдирини кўрган ва мазкур маънони ифодалаган. Айни дамда, образнинг маъно кўлами шулар билангина чекланмайди: ўқувчи ўз ҳаётий тажрибаси, шеърни ўқиш пайтидаги руҳий ҳолати билан боғлиқ равишда унда тамом

бошқа мазмунни, ўз мазмунини ҳам топиши мүмкін. Күп маңнолилик нафақат рамзий, балки том маңнодаги реалистик образларга ҳам хос, фақат бунда күп маңнолиликнинг юзага келиш механизми ўзгача, у Б.о.нинг яхши маңнодаги *нотугаллиги* билан боғлиқдир. Санъаткор ифодаламоқчи бўлган фикр Б.о.да тугал айтилмайди (яъни китобхон оғзига чайнаб солиб кўйилмайди), Б.о.нинг айрим чизгилари пунктир (узук-узук чизиқлар) билан тортилади. Яъни санъаткор Б.о.да маълум имкониятлар яратади-да, уларни рӯёбга чиқаришни ўқувчига қолдиради. Бу хил имкониятлар, айниқса, «объектив тасвир» йўсенидан борилган, ёзувчи холис кузатувчи мавқеида турган асарларда кучли намоён бўлади. Гарчи асарда тасвирланган нарса битта бўлса-да, ўқувчилар (ижодий тасаввур имконияти, характери, дунёкараши ва б.га кўра) турлича бўлгани учун, конкрет Б.о. уларнинг онгида турлича аксланади, турли хуносаларга олиб келади. Шу боис ўқувчилар тасаввурнида минглаб Отабегу Кумушлар, Қобил бобою Саидалар, Зебию Мирёқублар яшайди. Б.о.га хос шу хусусият туфайли ҳам асарни турли даврларда турлича тушуниш, унинг замиридан янги-янги маңноларни очиш имкони яратиладики, айни шу нарса чинакам санъат асарини боқийликка дахлдор этади.

БАДИЙ ОБРАЗ ТУРЛАРИ – адабиётшуносликда бадиий образлар турлича тасниф этилади, бу турличалик тасниф учун қайси жиҳат асос қилиб олингани билан боғлиқдир. Жумладан, ижодкор эстетик идеали билан муносабатига кўра *ижобий* ва *салбий* образлар, ижодий методга кўра *реалистик*, *романтик* ва б., яратилиш усулига кўра *фантастик*, *гротеск* ва б., характер хусусияти ва эстетик белгисига кўра *трагик*, *сатирик*, *юмористик* образлар фарқланаверади. Шунингдек, баъзан бадиий образнинг тасвир планидан келиб чиқиб *инсон* образи, *жоноворлар* образи, нарса-буюмлар образи тарзидаги атамалар ҳам қўлланади. Албатта, илмий муомалада бу каби таснифлар, атамалар ҳам ўрни билан керак. Бироқ мавжуд таснифларнинг ҳеч бири бадиий образларни тўла қамраб ололмайди. Қамров қўлами кенгрок таснифлардан бири бадиий образларни: 1) предметлилик даражаси; 2) умумлаштириш даражаси; 3) тасвир ва ифода қатламлари муносабати (структураси)га кўра гурухлашни (М.Эпштейн) кўзда тутади.

Предметлилик даражаси дейилганда бадиий образ тасвирлаётган нарсанинг қўлами назарда тутилиб, бу жиҳатдан бадиий реалистик тўртта сатҳдан-таркиб топади: 1) деталь образлар; 2) воқеа-ҳодисалар образи; 3) характер ва шароит; 4) дунё ва тақдир образи (бадиий реаллик). Деталь образлар (тафсилотлар, нарса-буюмлар,

портрет, пейзаж)дан бадиий реалликнинг иккинчи қатлами – ички ёки ташқи ҳаракатдан тарқиб топувчи воқеа-ходисалар образи ўсиб чиқади. Шу ҳаракат ортида туриб уни юргизётган «характер ва шароит» учинчи қатламни ташкил қиласди ва олдингиларини бирлаштирган ҳолда «дунё» ва «такдир» образини юзага келтиради. Яъни бадиий реаллик гиштчалардан – бутунни ташкил қилувчи унсурлардан ташкил топади, бу унсурлар ўзаро предметлилик даражаси, тасвир кўлами жиҳатидан фарқланади.

Умумлаштириш даражасига кўра бадиий образнинг қатор кўринишлари фарқланади. Жумладан, инсон образига татбиқан индивидуал образ, *характер* ва *тип* ажратилади. Бироқ уларнинг орасидағи фарқ доим ҳам яқол эмас, бу хил таснифда муайян шартлилик сақланиб қолади. Индивидуал образ деб ўзига хос феъл-автори, гап-сўзлари, бетакор ҳарактер хусусиятлари билан намоён бўлувчи образ тушуниллади (мас., «Ўтмишдан эртаклар»даги Бабар, «Менинг ўғригина болам» ҳикоясидаги Роқия биби). Ҳарактер эса муайян давр ва мұхит кишиларига хос энг мұхим, ҳарактерли умумий хусусиятлар билан алоҳида шахсга хос индивидуал хусусиятларни ўзида мужассам этган образдир. Муайян ижтимоий-тарихий шароит, давр ва мұхитта хос мұхим ҳарактерли хусусиятларни ўзида намоён этган образ эса тип деб юритилади. Умумлаштириш даражасига кўра бадиий образнинг яна адабий-маданий анъаналар доирасида муайян турғун шаклга айланиб, асардан-асарға кўчиб юриш хусусиятига эга бўлган *мотив*, *топос*, *архетип* деб юритилувчи кўринишлари ҳам ажратилади. Мотив (мотив образ) шаклий ва мазмуний жиҳатлардан муайян турғунлик касб этган, бир ёки бир неча ижодкорнинг асарларида қайтарилиб туриши билан уларнинг ижодий интилишларини намоён этувчи образдир. Мас., Чўлпон ижоди учун «йўл» образи мотив саналиши мумкин. Чунки бу образ унинг ҳам шеърий, ҳам насрый асарларида тез-тез такрорланади. Ёки «юлдуз», «йўлчи» мотивлари XX аср 20 – 30-йиллари шеъриятида, хусусан, А.Фитрат, Чўлпон, Ойбек ва У.Носир асарларида кўп учрайди. Топос мотивга нисбатан кенгроқ тушунча бўлиб, у миллий маданийтда катта бир адабий давр мобайнида такрорланувчи образ саналиди. Ўзбек мумтоз шеъриятидаги пайғамбарлар образлари, гул ва булбул, шам ва парвона каби такрорланувчи образлар топос саналиши мумкин. Архетип деганда эса инсон тафаккури, ижодий тасавvuрига хос бўлган турғун «схема»лар, конструкциялар, қолиплар тушунилиб, уларнинг изларини энг қадимги даврлардан бошлаб то-

ҳозирги адабиётгача кўриш мумкин. Архетип конструкция ва схемалардан ўзига хос «сюжет ва сюжет ҳолатлари» жамғармаси ҳосил бўладики, улар асардан-асарга, даврдан-даврга кўчиди юради. Мас., «булбул – гул – чақириканак».

Юқорида айтилганидек, бадий образ воқёлиқдаги нарса-ҳодисанинг ижодий қайта ишланган акси, шунга кўра, у ўша нарса-ҳодисани конкрет ҳис этиладиган тарзда тасвирлайди. Айни чоғда, тасвирланган нарса муайян мазмунни ифодалашга хизмат қиласди. Демак, структурасига кўра бадий образ тасвир ва ифода планларидан иборат экан. Бадий образнинг тасвир ва ифода планлари бир-бири билан турлича муносабатда бўлади, шундан келиб чиқсан ҳолда автологик, металогик ва суперлогик образлар ажратилади. Автологик образда тасвир ва ифода планлари бир-бирига мос тушади (мас., чинор тасвирланган ва чинор назарда тутилган). Металогик образда тасвирланётган нарса билан ифодаланаётган нарса мос бўлмаса-да, уларда кўчимлардаги каби муштарақ нуқта бор (мас., чинор тасвирланади – событилик, улуғворлик кабилар назарда тутилади), суперлогик образда эса тасвир билан ифода мос эмас, уларни боғловчи муштарақ нуқта ҳам йўқ: тасвир муайян шартлилик асосида ва контекст доирасидагина кўзланган мазмунни ифодалайди (чинор тасвирланади – бутун бир халқ назарда тутилади).

БАДИЙ ПСИХОЛОГИЗМ – бадий асарда тўлақонли инсон образини яратишнинг муҳим воситаларидан бири; персонаж руҳиятининг очиб берилиши, ҳатти-ҳаракатлари ва гап-сўзларининг психологик жиҳатдан асосланиши, шу мақсадларга хизмат қилувчи усул ва воситаларнинг жами. Ёзувчи персонаж руҳиятини бевосита ёки билвосита тасвирлаб бериши мумкин. Персонаж ўй-кечинмалари, ҳис-туйғуларининг «ички монолог», «онг оқими» тарзида ёки муаллиф тилидан (ўзиники бўлмаган муаллиф гапи) баён қилиниши психологик тасвирнинг бевосита шакли ҳисобланади. Асардаги персонаж руҳиятининг унинг ҳатти-ҳаракатлари, гап-сўзлари, юз-кўз ифодалари (мимикаси), ундаги физиологик ўзгаришларни кўрсатиш орқали очиб берилиши эса билвосита психологик тасвирдир. Руҳий тасвирнинг бу икки кўриниши бир-бирини тўлдиради, шу боис муайян персонаж руҳиятини тасвирлашда ёзувчи буларнинг иккисидан ҳам ўрни билан фойдаланади. Шунингдек, персонаж руҳиятини очища ёзувчи табиат тасвиридан ёки бошқа бирор нарса образидан фойдаланиши мумкин бўладики, бу ҳам билвосита психологизмнинг кўринишидир. Мас., «Ўткан кунлар» романидаги А.Қодирий Кумушнинг тур-

мушга берилиш хабарини эшитган Отабек руҳиятини «Хўжа Маъз» қабристони манзараси орқали акс эттиrsa, унинг Кумуш ҳижронида яшаган пайтлардаги руҳий ҳолатини «Наво» куйининг шарҳида умумлаштириб ифодалайди. Адабий асарда характер руҳиятини очиш, умуман, инсон образини яратишнинг муҳим воситаларидан яна бири персонаж нутқидир. Замонавий насрда диалог салмоғининг ортиши баробарида, персонаж нутқининг образ яратишдаги мавқеи ҳам кучайди. Персонаж нутқини индивидуаллаштириш орқали унинг шахсияти, дунёқараши, муайян ҳаётий ҳолатдаги руҳияти ҳақида ўқувчига кўп нарсаларни етказиш мумкин. Диалогларда персонаж нутқи муаллифнинг қисқа, лўнда шарҳлари билан таъминланади. Персонажнинг юз-кўз ифодаси, мимикаси, ундаги физиологик ўзгаришлар ҳақида маълумот берувчи бу шарҳлар жуда катта аҳамият касб этади. Улар ўқувчига персонаж нутқини «эшлиши», хатти-харакатларини «кўриб тўриш» ва шу асосда унинг айни пайтдаги руҳиятини ҳис қилиш имконини яратади. Адабиётшуносликка оид манбаларда Б.п.нинг динамик, типологик ва аналитик принциплари фарқлаб кўрсатилади. Динамик принципда персонаж руҳияти унинг муайян ҳаётий ситуацияларда ўзини тутиши, хатти-харакатлари ва гап-сўzlари орқали очилади, моҳиятан бу драматик асар персонажлари руҳиятини очиш усулига ўхшаш, шу боис динамик принцип баъзан психологик таҳлилнинг драматургик усули деб ҳам таърифланади. Б.п.нинг типологик принципи персонаж руҳиятини у шаклланган ва ҳаракатланаётган муҳит шарт-шароитлари билан боғлаган, шулардан келиб чиқсан ҳолда тасвирлашни назарда тутади. Аналитик принцип эса персонаж дилидаги ҳис-туйғулар, онгидаги ўй-фикрларнинг илдизлари, тадрижини жараён тарзида изчил ва атрофлича тасвирлашни тақозо этади. Бунда бир ҳисдан иккинчи ҳис, бир ўйдан бошқа бир фикр ўсиб чиқади, улар бир-бирини тўлдиради, сифат жиҳатидан ўзгартиради ва х. Бу эса персонаж тақдирни, қарашлари ва амалларидаги кескин бурилишларни тайёрлаш ва кўрсатишга имкон берадики, у баъзан Б.п.нинг «қалб диалектикаси» шакли деб ҳам юритилади. Айтиш керакки, муайян персонаж руҳияти тасвирида бу учала принцип ҳам қоришиқ ҳолда намоён бўлади, улардан бири етакчилик қилгани ҳолда, бошқалари уни тўлдириш, конкретлаштиришга хизмат қиласи.

БАДИЙ ТАСВИР ВА ИФОДА ВОСИТАЛАРИ – бадиий асарда нарса-ходисаларни жонли тасвирлаш, ҳис-туйғу ва кечинмаларни ёрқин ифодалашга хизмат қилувчи тил воситаларининг умумий

номи. Адабиётшуносликда ушбу тушунча турли номлар билан юритилади: *фигуралар, синтактик фигуралар, стилистик фигуралар, тилнинг поэтик воситалари, тилнинг бадиий-тасвирий воситалари, тасвирий воситалар, ифода-тасвирий воситалар* ва б. Аввало, тилнинг бадиийлиги Б.т. ва и.в:нинг ишлатилиши билан белгиланмайди, улар ишлатилмаган ҳолда ҳам, бадиий тилнинг бош специфик хусусиятлари – *образлилик (тасвирийлик)* ва эмоционаллик мавжуд бўла олади; Б.т. ва и.в. мазкур хусусиятларни кучайтириб намоён этишга хизмат қиласди. Иккинчидан, бадиий адабиёт сўз воситасида тасвирлайди (*образлилик*), айни пайтда, бадиий адабиётдаги тасвир қуруқ эмас, у ҳис-туйғуларга йўғрилган (*эмоционаллик*) дирки, шу тасвир орқали муайян ўй-фикр, ҳис-кечинма ҳам ифода этилади. Яъни битта воситанинг ўзи ҳам тасвир, ҳам ифодага хизмат қиласди. Демак, бу воситаларнинг униси тасвир, буниси ифода воситаси деб ажратиш тўғри бўлмайди. Шу билан бирга, мазкур воситаларни бадиий *тасвир воситалари* дебгина юритиш ҳам маъкул эмас: айрим воситалар (мас., *тақорлар, риторик сўроқ, риторик мурожаат, эллипсис, жим қолиш* ва б.) борки, улар ифодавийликни кучайтиришга хизмат қиласди. Яъни улар бадиий *тасвир воситалари* термини қамров доирасидан четда қолади. Шу сабабли ушбу тушунча Б.т. ва и.в. тарзида аталгани маъкулроқ.

Б.т. ва и.в. тилдан фойдаланишда муайян бадиий-эстетик мақсадни кўзлаб умумодатий нормадан оғиш (яъни тил унсурларини одатдагидан ўзга шакл, маъно, тартиб, муносабат ва ш.к.ларда қўллаш) натижасида юзага келади ва тасвирнинг жонли, ифоданинг таъсири бўлишига хизмат қиласди. Бу хил оғишлар тилнинг турли сатҳларида: фонетик (*аллитерация, ассонанс*), морфологик (*асин-дентон, полисиндентон*), лексик (*архаизм, диалектизм, жаргон*), семантик (*троплар*), синтактика (*инверсия, сўз тақорори, синтактик параллелизм, эллипсис, хиазм*) сатҳларда кузатилиши мумкин.

БАДИИЙ ТИЛ – бадиий асар тили, сўз санъатининг асосий қуроли, бадиий адабиётнинг образ яратиш воситаси; *поэтик тил, бадиий адабиёт тили* каби шаклларда ҳам ишлатилади. Яъни бадиий адабиёт бирламчи белгилар системаси саналувчи тил воситасида иккиласми белгилар системасини – бадиий воқеликни ташкил қилувчи образлар тизимини яратади. Адабиётшуносликда Б.т.ни алоҳида ҳодиса деб тушунувчилар ҳам, уни миллний тилнинг алоҳида вазифага (яъни бадиий муроқот учун) хосланган кўриниши сифатида билувчилар ҳам мавжуд. Агар Б.т. миллний тил негизида вужуд-

га келиши, миллий тил элементлари воситасида бадий образлар яратилиши ва айни шу образлар иккиламчи белги (яъни юқорироқ сатҳдаги ўзига хос тил бирлиги) сифатида бадий мулокотни амалга ошириши эътиборга олинса, иккинчи қараш ҳақиқатга яқинроқ кўринади. Шунга кўра, Б.т. атамасини кўллашда маълум шартлилик бор: алоҳида ҳодиса сифатида мавжуд бўлмагани ҳолда у бадий асар(лар) доираси (яъни амалга ошиб бўлган бадий нутқ)дагина мавжудки, аниқлик талаби билан тушунча баъзан бадий асар тили тарзида ифодаланиши шундан. Йирик рус филолог олим Г.Винокур Б.т.га таърифни: «Бадий тил деганда бадий асарлар ёзишда ишлатиладиган тил тушунилади», – дея бошлаганди. Маълумки, бадий асарлар ёзишда қандайдир алоҳида тилдан эмас, балки кундалик мулокотдаги каби миллий тил унсурларидан фойдаланилади. Аввало, кундалик мулокот тили ҳам, бадий тил ҳам информация етказиш ва информация олишга хизмат қиласди. Бироқ бу иккиси етказаётган информациянинг табиати турлича: кундалик мулокот тили оддий информация етказса, бадий тил бадий информацияни етказади. Б.т етказаётган информация – образли информация, зеро, унинг воситасида санъаткор тасаввурида яралган образ моддийлашади. Бадий образ эса воқеликнинг конкрет ҳис этиладиган, ўкувчи онгига қайта жонланадиган ижодий аксидир. Тилнинг илмий, расмий ва ҳ. функционал услубларида етказилган информация тушунча сифатида, бадий информация эса конкрет образ тарзида қабул қилинади; образ санъаткор қалбида ижодий қайта ишлангани боис ҳамиша ҳиссиётга йўғрилган. Шунга кўра, Б.т.нинг энг муҳим белгиловчи (специфик) хусусиятлари образлилик (тасвирийлик) ва эмоционалликдир. Бадий тафаккур тараққиёти давомида Б.т. имкониятлари кенгайиб боради, унинг анъаналари шаклланиб, ворисийлик асосида авлоддан-авлодга ўтади. Б.т.да анъанавий тарзда кўлланувчи тасвир ва ифода воситалари (қ. бадий тасвир ва ифода воситалари), бадий образ яратишда яримтайёр маҳсулот сифатида хизмат қилувчи унсурлар (қ. мотив, рамз, аллегория, эмблема) мажмуи шаклланади; матнлараро алоқадорлик асосида ишоранинг ўзи билан Б.т.нинг ифода имконларини кенгайтириш мумкин бўлади ва б. Бунинг натижасида Б.т. кундалик мулокот тилидан буткул фарқли алоҳида ҳодисадек, шундай мақомга эгадек кўринаверади. Шунга қарамай, у алоҳида ҳодиса эмас, балки миллий тил базасида воқе бўлиб, миллий тилдан бадий информацияни шакллантириш ва етказиш мақсадида фойдаланиш шаклидир.

БАДИЙ ТАХЛИЛ (ар. حـلـ – текшириш, ҳал қилиш) – адабий асарнинг мазмун-моҳиятини идрок этиш, унинг яхлит эстетик ҳодисаси сифатидаги мавжудлигини турли аспектларда ўрганиб, ўзига хослигини очиб бериш ва қимматини белгилашга қаратилган ҳиссий-интеллектуал фаолият. Таҳлил атамаси илмда кенг қўлланувчи анализ (юн. *analysis* – қисмларга ажратиш) терминининг синоними сифатида ишлатилади. Ҳар икки атама ҳам бутунни англаш учун уни қисмларга ажратишни, қисмнинг бутун таркибидаги моҳиятини, унинг бошқа қисмлар билан алоқаси ва бутунликнинг юзага чиқишидаги ўрнини ўрганишни кўзда тутади. Айримлар бадиий асарни тирик организмга қиёс этишади-да, «уни қисмларга ажратиш жонсиз танага айлантиришдан бошқа нарса эмас» деган қарашга таяниб таҳлилга қарши чиқадилар. Бироқ бу хил қараш асоссиздир. Зеро, биринчидан, адабиётшуносликдаги таҳлил ҳам ўқиш, фақат бунда бадиий асарни тадқиқотчи сифатида ўқиш тушунилади. Яъни тадқиқотчининг асарни қисмларга ажратиши мақсад эмас, бир восита – асарнинг бадиият ҳодисаси сифатидаги мавжудлигини, ундаги ўқувчи онги ва руҳиятига таъсир қилаётган, унинг у ёки бу тарзда тушунилишига асос бўлаётган омилларни ўрганиш воситасидир. Иккинчидан, Б.т. жараённида ҳар вақт талқин амали ҳам мажуд (бу ўринда талқин «интерпретация»нинг синоними). Кенг маънода «талқин» сўзи ўзга томонидан айтилган гап ёхуд ёзилган асар (илмий, фалсафий, диний, бадиий ва ҳ.) мазмунини англаш, уни маълум яхлитликда тушуниш ва тушунтириш (адабиётшуноснинг мақсади тушунишнинг ўзигина эмас, тушунтириш ҳамдир) маъноларини англатади. Бошқача айтганда, талқин бадиий асардаги «образлар тили»ни «мантиқ тили»га ўғирмоқ, образлар воситасида ифодаланган мазмунни тушуниш ва тушунтируммоқдир. Шундай экан, чинакам илмий бўлиши учун талқиннинг таҳлилга таяниши шарт қилинади. Зеро, агар талқин қилувчи шахс бадиий матнни чукур билмаса, асар қисмларини, уларнинг ўзаро алоқаларини етарли тасаввур қилолмаса, унинг талқини илмийликдан йироқ субъективлик касб этади. Бошқа томондан, бадиий адабиётнинг образлар орқали фикрлаши, образ эса ассоциатив тафаккур маҳсули эканлиги эътиборга олинса, талқин субъектсиз мавжуд эмаслиги ҳам аён. Чунки ижодкорнинг ассоциатив фикрлаши маҳсули ўлароқ яратилган ва асарда акс этган образнинг мазмун қирралари фақат субъект онгидагина (яъни унинг ҳам ассоциатив фикрлаши асосида) қайта тикланиши мумкин бўлади. Булар бадиий асарни тушуниш жараённида таҳлил ва талқин ҳар

вақт ҳозирлигига ёрқин далилдир. Оддий ўкувчидан фарқли ўлароқ, адабиётшунос бадий асарни талқин қилишда таҳлилга таянади, унинг талқини таҳлил асосида юзага кепгани учун ҳам илмий саналади. Шу маънода таҳлил талқиннинг илмий асоси, бадий асарни тадқиқотчи сифатида ўқиш ва уқиш демакдир.

БАДИЙ ТҮҚИМА (русчадан калька: «художественный вымысел») – ёзувчининг ижодий тасаввур ва тахайюли маҳсули, воқееликда реал асоси ёки тўлиқ ўхшиши мавжуд бўлмаган бадий образлар, ҳаётий ҳолатлар, воқеалар ва ш.к.ни яратишида намоён бўлувчи бадий ижоднинг муҳим компоненти. Муҳимлигидан, антик даврлардан бошлаб то XVII – XVIII асрларга қадар Б.т.га ижоднинг бирламчи шарти, поэзия (бадий адабиёт)нинг белгиловчи хусусияти деб қаралган, унга Б.т.дан мөсуво асарлар – проза қарши қўйилган. Ҳозирда ҳам Б.т. адабий асар (қ. бөллөтристика) билан адабий-бадий асарни фарқловчи белгилигича қолмоқда. Б.т.нинг моҳияти ва аҳамиятини тарихий мавзудаги асарлар мисолида тушуниш кулай. Ёзувчи тарихий манбаларни ўрганади, фактлар, воқеалар, уларнинг иштирокчилари ҳақида маълумотларни йигади. Унинг эндиғи вазифаси – ўргангандарини бадий қайта ишлаш: бадий воқееликда фактлар жонланиши, воқеалар юз бериши, шахслар яшши лозим. Худди шу нарса – бадий тасаввурни ишга соглан ҳолда ўтмиш ҳаётини қайта яратиш ижод бўлиб, унда Б.т.нинг роли бекиёсdir. Шундай ёндашилса, «тарихий шахс образи» билан «түқима образ»ни қарши қўйишимизда ҳам каттагина шартлилик борлиги аён бўлади. Мас., манбаларда Абдуллатифнинг падаркушлиги қайд этилган. Ҳаммага маълум фактни бадий мушоҳада этган О.Ёқубовни фожианинг илдизлари қизиқтиради: у фарзандни падаркуш этган омилларни – у вояга етган муҳитни, бу муҳитдаги муракқаб муносабатларни, фарзанднинг отага меҳрсиз бўлиб қолиши сабабларини, қаҳрамони руҳиятидаги зиддиятлар ва ш.к.ларни англашга интилади. «Улуғбек хазинаси» учун қуруққина сюжет схемасини бўрган фактлар Б.т. воситасида тўлдирилади, оқибатда ўкувчи кўз ўнгидаги жонли Абдуллатиф бутун мураккаблиги билан намоён бўлади. Демак, гарчи Абдуллатифни тарихий образ деб таърифласак-да, унинг яратилишида ҳам Б.т.нинг салмоги катта экан. Худди шу гапни ҳаётдаги реал воқеага, реал прототипларга асосланган замонавий мавзудаги асарларга нисбатан ҳам, умуман, ҳар қандай бадий асарга нисбатан ҳам тўла асос билан кўллаш мумкин. Зоро, бадий воқеелик унсурлари уйғун алоқадаги бутунлик ва унда жонли

характерлар ҳаракатланаркан, бу нарса фақат ижодкорнинг бадиий тасаввур кучи туфайлигина мумкин бўлади ва бунда Б.т. муҳим бутловчи ашё – «цемент» вазифасини ўтайди.

БАДИЙЛИК – ижодий-руҳий фаолият маҳсулни ўлароқ дунёга келган асарнинг санъатга мансублигини белгиловчи хусусиятлар мажмую. Образлилик Б.нинг бирламчи шарти саналиб, у воқеаликни бадиий образлар орқали идрок этиш, бадиий образлар воситасида фикрлаш демакдир. Образлилик санъатнинг ўзак хусусияти бўлиб, у йўқ жойда Б. ҳам мавжуд эмас. Б. тарихий категория саналади, унинг талаб ва мезонлари ҳар бир даврнинг мъянавий-эстетик эҳтиёжлари, бадиий диди билан боғлиқ ҳолда ўзгариб турди. Шунга қарамай, Б.нинг жавҳари бўлган барқарор шартлар ҳам мавжуд. Жумладан, Б.нинг муҳим шартларидан бири мазмун ва шаклнинг уйғун бирлиги, уларнинг ўзаро мувофиқлигидир. Б.нинг мазкур шарти инсон учун (инсоният учун) аҳамиятли мазмуннинг гўзал шаклда ифодаланиши, бадиий мукаммал асарнинг органик бутунликка айланиши демакдир. Бутунлик эса асада биронта ҳам ортиқча, тасодифий, аҳамиятсиз унсур мавжуд бўлмаслиги, ундаги барча шакл унсурлари мазмунни, эстетик объектни шакллантиришга қаратилишини тақозо этади. Шу шартга дош бероладиган бадиий жиҳатдан мукаммал асарнинг ортиғи ҳам, ками ҳам йўқ – унга бирон нарса кўшиб ҳам, олиб ҳам бўлмайди, иккала ҳолда ҳам бутунлика путур етади. Шундай бутунлик асосида ирреал олам – бадиий реаллик воқе бўлади. Бу воқеалик реалликка нечоғлик монанд бўлмасин, у барибир шартлилик хусусиятини саклаб қоладики, айни шу шартлилик Б.нинг яна бир муҳим талабидир. Бадиий воқеалик образлар воситасида яралган ирреал олам эканлигини, бадиий шартлиликни қабул қилган ҳолдагина унга эстетик объект сифатида ёндашиш мумкин бўлади. Яъни шу туфайлигина бадиий воқеалик реаллик билан чалкаштирилмайди, бадиий асар матн даражасида гина қолиб кетмасдан, эстетик объект сифатида тасаввурда қайта яралади. Қайта яратилишнинг асоси бадиий асарнинг ўқувчига ўйнаптирилганлигидирки, бу Б.нинг яна бир муҳим бўлгиси саналади. Бадиий асар аввалбошданоқ муайян ўқувчига мўлжаллаб ёзилади, унда ўша ўқувчи эгаллаши ва шундан туриб бадиий воқеаликни жонлантириши керак бўлган жой ҳозирланган. Бу эса ўқувчини эстетик субъектга айлантиради, уни эстетик объектни қайта яратишга ундейди. Яъни ўқиш – ижодий жараён, чунки ўқувчи ёзувчи етказаётган мазмуннинг оддий истеъмолчиси эмас, у белгилар асосида ба-

дий вөкөликтин қайта ярататын ижодкордир. Ижодкорлик ҳақида эса оригиналлик бор ҳолдагина гапириш мүмкінки, у Б.нинг муҳим шарти ҳисобланади. Зоро, чинакам бадий асар бетакрор, оригинал ҳодисадир. Үнда санъаткорнинг ижод онларидаги маънавий-рухий ҳолати, шу онларда аён бўлган МАЪНО аксланади. Ижод онларидаги маънавий-рухий ҳолат бетакрор бўлганидек, ўша МАЪНО ҳам бетакрордирки, у энди фақат ўқиш жараёнида – қайта яратиш жараёнида вое бўлади. Гарчи МАЪНО санъаткор – алоҳида бир шахс ҳаётий тажрибаси, маънавий-руҳоний изланишлари маҳсули ўлароқ вое бўлса-да, ижод онларида у реалликдан узилиб ИДЕАЛ бағрида, универсал инсон мақомида турган. Худди шу ҳол МАЪНОнинг универсаллигини таъминлайдики, универсаллик Б.нинг яна бир белгисидир. Шу универсаллик туфайли ҳам чинакам бадий асар ким ҳақда ёзилганидан, ҳамма ҳақида, қайси гўша ҳақида ёзилишидан қатъи назар, бутун олам ҳақида бўлади, башариятнинг маънавий мулки, қадриятига айланба олади.

БАДИЙЛИК МОДУСЛАРИ (русчадан калька: «модусы художественности») – бадийлик кўринишлари; бадийлик қонуниятлари (бадий бутунлик, шартлилик, ўкувчига йўналтирилганлик, оригиналлик, универсаллик)нинг намоён бўлиш усуллари. Модус тушунчаси адабиётшуносликка канадалик олим Нортроп Фрай томонидан киритилган, Фрай модусларни ажратишда муаллифнинг бадий асар қаҳрамонига нисбатан нуқтаи назарини асос қилиб олади ҳамда модусларнинг миф, ривоят, юксак-миметик, тубан-миметик, киноявий модус турларини ажратади. Н.Фрайга кўра, мифнинг қаҳрамони маъбудлар, ривоятники сеҳрли кучлар, юксак-миметик модусдаги асарлар (эпос ва трагедия)нинг қаҳрамони эса қаҳрамон-етакчидир. Мазкур модусларнинг қаҳрамони муаллиф ва китобхондан баландда туради. Тубан-миметик модус (комедия ва реалистик адабиёт)нинг персонажлари худди биз қатори одамлардир, киноявий модус персонажи ақл ва кучда биздан куйида туради, унинг эрксизлиги ва мавжудлигининг маънисизлигини гўё юқоридан туриб кузатамиз. Н.Фрай ўзининг модус назариясида бадийликнинг умум-эстетик кўринишлари – модуслар билан адабий жанрлар орасига чегара қўймайди. Үндан фарқли равишда рус олими В.Тюпа Б.м. тушунчаси остида қаҳрамонлик, трагизм, сатира, юмор, сарказм, идиллияявийлик, элғияявийлик, драматизм, киноя каби тушунчаларни бирлаштиради. Одатда, бадий мазмуннинг субъектив томони деб ҳисоблаб келинган юқоридаги тушунчаларга пафос (қ.),

гоявий-эмоционал баҳо, муаллиф эмоционаллиги типлари сифатидагина қаралиши мазкур ҳодисаларнинг моҳиятини торайтириш бўлади. Бадиийлик субъект – объект – адресат бутунлигидагина намоён бўлар экан, пафос тушунчаси бадиийликнинг фақат бир қиррасигина саналиши мумкин. Мас., трагиклик фақат гоявий-ҳиссий муносабат ёки муаллиф эмоционаллиги бўлибгина қолмай, ўз навбатида, қаҳрамонни типиклаштиришнинг ўзига хос кўриниши ҳамдир. Шу билан бирга, трагиклик китобхонда трагизмга хос катарсисни талаб қиласди, китобхонда трагик катарсис содир бўлсагина, бадиийлик рўёбга чиқкан деб ҳисоблаш мумкин. Демак, юқорида саналган трагизм, сатира, юмор, драматизм каби тушунчалар муаллифга нисбатан олинганда пафос, қаҳрамонга нисбатан олинганда типиклаштиришнинг алоҳида кўринишини, китобхонга нисбатан эса шу иккисига, яъни пафос ва типиклаштиришга мос катарсисни англатади. Мазкур уч ҳодисанинг бирлиги Б.м.нинг конкрет бир турини юзага чиқаради.

Бадиийлик марказида шахс ва унга қарама-қарши турган ташқи оламнинг ўзаро муносабати, «мен – оламда» концепцияси ётади. Б.м. эса шахс мавжудлигининг руҳий-амалий тажрибасига эстетик аналогия сифатида намоён бўлади. Яъни трагиклик, сатириклик, драматиклик, энг аввало, шахснинг ўз-ўзини англаши ва намоён этиши шакллари бўлиб, бадиий асарда улардан бири асосий ўрин тулади.

БАДИЙ ШАКЛ ВА МАЗМУН – воқеликдаги ҳар қандай нарса ўзининг ташқи кўриниши (шакли) ва шу шакл орқали англашилаётган моҳияти (мазмун)га эга. *Шакл ва мазмун* категориялари умум-фалсафий характерда бўлиб, улар воқеликни (нарсани) идрок қилишда муҳим илмий абстракциялардир. Зоро, шакл ва мазмун тарзида бўлиш шартли, негаки улар – яхлит бир нарсанинг ҳар вақт бирлиқда мавжуд бўлган ва бир-бирини тақозо этадиган икки томони. Шакл нарсанинг биз бевосита кўриб турган, ҳис қилаётган томони ва айнан у бизга ўша нарсанинг нималигини – мазмун-моҳиятини англатади. Мазмун муайян шаклдагина яшайди, шаклсиз мазмун бўлмаганидек, мазмунсиз шакл ҳам мавжуд эмас. Бошқа ҳар қандай нарса сингари бадиий асар ҳам шакл ва мазмуннинг яхлит бирлигидир. Шунинг учун бадиий шакл (Б.ш.), бадиий мазмун (Б.м.) тушунчаларининг атиги илмий абстракция эканини унутмаслик лозим. Яъни биз яхлит бутунлик – бадиий асарни атрофлича таҳлил қилиш, бу ишни осонлаштириш мақсадидагина шу хил шартли бўлишга йўл

күямыз. Аслида, Б.ш. мазмунсиз, Б.м. эса шаклсиз мавжуд эмас. Зеро, Б.ш. Б.м.нинг биз қабул қилаётган мавжудлиги, Б.м. эса унинг ички маъноси, мағзидир.

Бадиий асарда шакл ва мазмун ўзаро диалектик алоқада бўлиб, улар бир-бирини тақозо этади, бир-бирига таъсир қилади, бир-бирига ўтади. Б.ш. билан Б.м.нинг ўзаро муносабатида кейингиси етакчи мавқега эга, у шаклни ҳосил қилишда жуда фаолдир. Санъаткор ижодий ниятидан кеилиб чиқсан ҳолда бўлгуси асарнинг шаклини белгилайди, яна ҳам аникроғи, бўлгуси асарнинг мазмунини унинг шаклини белгилайди. Мас., жамиятнинг жорий ҳолатини бадиий идрок этиш, у ҳақдаги хукмини бадиий концепция тарзида шакллантириш ва ифодалаш мақсадини кўзлаган ижодкор роман шаклини танлайди. Чунки айни шу шакл ижодий ниятда кўзда тутилган мазмунга ҳар жиҳатдан мувофиқ келади ва ўша ният ижроси учун имкон беради. Шу билан бирга, Б.ш. нисбий мустақилликка эга ҳамдир. Ҳар бир давр адабиётида кенг кўлланиб келаётган, ўкувчи оммага тушунарли ва ўзининг нисбатан турғун кўрсаткичларига эга бўлган шакллар мавжуд. Шунга кўра, санъаткор ифодалашни кўзда тутган мазмунни ўша шакллар доирасига сифдиришга интилади. Мас., саҳна учун асар ёзаётган ижодкор уни пардаларга, кўринишларга бўлади, сюжет воқеаларини ижро вақтига сифдириади, диалогларни саҳна ижроси учун мос ҳолга келтиради, уларни ремаркалар билан таъминлайди ва ҳ. Шакл консервативроқ ҳодиса бўлганилигидан узоқ яшовчанлик хусусиятига эга. Мазмун эса ўзгарувчанликка мойил ҳодиса бўлиб, ҳар бир бадиий асар мазмунан ўзича оригиналдир. Сабаби, ўша асарни яратган ижодкор – индивид, у дунёни ўзича кўради ва баҳолайди. Шунга кўра, ҳатто ошкор тақлидий руҳдаги асар ҳам мазмунан оригинал саналиши мумкин. Мас., ҳикоя жанри ўзининг асосий шаклий хусусиятлари билан бадиий адабиётда узоқ вақтлардан бери мавжуд. Айни шу Б.ш.да минглаб ёзувчилар ифодалаган турфа Б.м.ларнинг саноғига етиб бўлмайди. Албатта, ҳар бир ҳикоянинг шаклида ҳам муайян ўзига хосликлар бўлади, бироқ ҳикояга хос асосий шаклий белгилар сақланиб қолаверади. Мазмуннинг шаклга ўтиш ҳодисаси, аввало, генетик асосга эгадир. Мас., ғазал жанри дастлаб мазмун ҳодисаси бўлиб, «аёлларга хушомад, муҳаббат» мазмунидаги шеърий асар ғазал дейилган. Кейинчалик, ғазал ўз мазмунига мос энг мувофиқ шаклга эга бўлгач, у шакл ҳодисасига – турғун шеърий жанрга айланди. Ёки итальянча «янгилик» сўзидан олинган ноөлла ҳам дастлаб мазмун ҳодисаси эди: *новелла* дейилганда

жонли қизиқишиң уйғотувчи янги воқеани ҳикоя қилувчи асар түшүнгилганды. Айни чогда, новелла-ўзига хос шакл хусусиятларига ҳам эга бўлган: қисқалик, сюжет ўткирлиги ва б. Кейинча новеллага хос шаклий хусусиятлар муқимлашиб, ўзига хос шакл – новелла жанри юзага келади. Шунингдек, шакл ва мазмуннинг бир-бирига ўтиши бир асар доирасида ҳам кузатилади. Бу бадий асарнинг система экани, ҳар қандай система қуйи ва юқори даражадаги структуравий бўлаклардан таркиб топиши билан боғлиқ. Мас., тил образга нисбатан шакл, образ тилга нисбатан мазмун; айни пайтда, образнинг ўзи бадий мазмунни ифодалаш шакли. Ёки бадий образнинг предметлилик даражасига кўра турлари (деталь – фабула – характер ва шароит – дунё образи) ҳам шаклнинг мазмунга, мазмуннинг шаклга ўтишига мисол бўла олади.

Бадий асар құмматини белгилашда мазмун ва шаклнинг ўзаро мувофиқлиги энг муҳим мезонлардан саналади. Бадийят гўзал шаклда ифодаланган актуал, умуминсоний қадриятларга мос мазмунни тақозо қилади. Шундай экан, шаклни бадийят, мазмунни ғоявийлик (бунда ҳам, албатта, шартлилик бор) ҳодисаси сифатида тушуниб, ҳар иккисига бирдек эътибор бериш зарур. Адабиётшуносликда мазкур қоидадан чекинилган ҳоллар ҳам бўлган, албатта. Шаклнинг нисбий мустакиллигини мутлақлаштириб, уни бадийятнинг бош мезони сифатида қараганлар формалистлар деб юритилади (қ. формализм, формал метод). Шунингдек, бадий асарнинг шаклига кўз юмиб, унинг құмматини мазмундан келиб чиқибгина баҳолашга уринишлар ҳам бўлган. Хусусан, 20-йиллар шўро адабиётшунослигига майдонга келган «вульгар социология» тарафдорлари фаолиятида бадий асарни фақат ғоявий мазмунидан, синфий моҳиятидан келиб чиқиб баҳолаш амалиёти кузатилади (қ. вульгар социология). Бадий адабиётга бундай ёндашув унинг санъат ҳодисаси эканлигини инкор қилиш, уни мафкура куролига айлантиришнинг кўпол кўриниши эди. Гарчи шўро адабиётшунослиги вульгар социологиямга ўз вақтида кескин зарба берган бўлса-да, унинг ўзи ҳам бир оёғи билан шу мавқеда турад, яъни моҳиятан бадий адабиётга шу хил ёндашувнинг «юмшоқ» варианти эди. Шўро даврида янги тузумни, коммунистлар партиясини, пролетариат дохийисини улуғлаган бадий жиҳатдан ночор асарларнинг рағбатлантирилиб, чинакам бадийят ҳодисаси саналадиган асарларнинг эътибордан четда қолгани, энг ёмони, тазийқ остига олингани бунинг ёрқин далилидир. Бундан бадий асарни унинг табиатидан келиб чиқкан ҳолда, шакл ва маз-

мунни бирликда олиб текшириш зарур экани аён бўлади. Табиийки, бадий асарни ўрганишда улардан бири дикқат марказига қўйилиши мумкин. Шунда ҳам, мас., асар шакли ҳақида фикр юритаётганда унинг мазмунни уюштириш ва ифодалаш, таъсирдорлигию бадий жозибасини оширишдаги аҳамиятини; мазмун ҳақида фикр юритганда эса унинг шаклга қай даражада мувофиқлигини назардан қочирмаслик тақозо этилади.

БАДИХА (ар. ғұз – ўйловсиз, бирданига айтилган чиройли сүз, топқырлық) – аввалдан маҳсус-тайёрланмасдан, дафъатан айтилган шеър; экспромт (қ.). Б. бирор воқеадан қаттиқ таъсирланиш, мушоираларда ўзга шоир айтган шеърга жавобан ёки қалтис вазиятдан ҳозиржавоблик билан чиқиш зарурати туфайли яратилади. Б. шеър шоирдан юксак даражадаги образли тафаккурни, шеър техникасини мукаммал эгаллаш, бадий санъатлардан ўринли ва моҳирона фойдалана олиш, конкрет нарса-ҳодиса, воқеа ёки ҳолатни зудлик билан ва закиёна баҳолаб, улардан бадий умумлашма чиқара билиш каби малакаларни талаб этади. Манбаларда жанр хусусиятлари жиҳатидан қулай бўлгани учун Б.нинг кўпроқ рубоий ёки қитъа кўринишида битилиши айтилади. Мас., Бобурнинг бир қатор рубоийлари Б. тарзида ёзилган: чоғир мажлисларида, қир-адирлар бағридаги сайдарларда, тоғларда сарсон юрган кезларида, узоқларда қолган яқинларидан мактуб ё бирор хабар көлтирилганда Б. тарзида яратилган рубоийлардан бир қанчаси «Бобурнома»да эслатиб ўтилган. Жумладан, Хожа Калоннинг Дехлидаги уйи шифтига битиб кетган «Агар соғу саломат Синд дарёсидан ўтиб олсан, юзим қаро бўлсин Ҳиндни яна орзу ҳавас қилсан» мазмунидаги байтига жавобан Бобур «Мен даги бадиҳада бир рубоий айтиб, битиб йибордим» дейди-да, куйидаги рубоийни көлтиради:

*Юз шуқр дә, Бобурки, Кариму Гаффор
Берди сенга Синду Ҳинду мулк бисёр.
Иссиклигига гар сенга йўқтур тоқам,
Совуқ юзин кўрай дөсанг Ғазни бор.*

Сўфизода ҳам «бадиҳагўй шоир» сифатида шуҳрат қозонган. Унинг турли муносабатлар билан кўча деворларига, дарвозаларнинг тегасига, чойхона эшикларига ёзил қолдирган Б.лари халқ орасида машхур бўлган.

БАЁЗ (ар. باز – оқ, оққа қўчирилган нусха) – XIX асрдан бошлаб кенг тарқалган шеърий тўплам бўлиб, анъанавий девонлардан фарқли қатор жиҳатларга эга. Жумладан, дөвон (к.) бир шоир қаламига мансуб шеърлардан тузилса, Б. бир муаллиф шеърларидан ҳам, бир неча шоир асарларидан ҳам таркибланиши мумкин. Яна бир фарқи – Б.да девондаги каби шеърларни жойлаштиришнинг қатъий тартиби белгиланмайди. Шунингдек, Б.га тартиб бериш принциплари ҳам турлича: муайян бир жанрда ёзилган (мас., «Баёзи мухаммасот») шеърлар ёки мухлислар эътиборига тушган алоҳида шоҳбайтлардан, баъзан муайян бир мавзудаги (мас., мұхабbat, ватан, табият ва ш.к.) ёки бирон-бир ҳофиз мусиқага солиб куйлаган шеърлардан тузилиши ҳам мумкин. Баёзчилик, айниқса, XIX асрда кенг равнақ топди. Жумладан, Мұхаммад Раҳимхон (Феруз) даврида Хоразмда турли принциплар асосида тартибланган бир қатор Б.лар чоп этилди (мас., «Баёзи мусадасот», «Баёзи мажмуаи ашъор», «Баёзи мухаммасот», «Баёзи ашъор» ва б.). Матбаа ишлари анча кенг йўлга кўйилган XX аср бошларида ҳам кўплаб Б.лар чоп этилган. Мас., ўз даврида кенг шуҳрат қозонган Ҳазиний шеърлари 1910 – 1913 йиллар давомида «Баёзи Ҳазиний» номи билан 7 маротаба чоп этилган. Аксар ҳолларда Б.ларга ноширлар тартиб беришган бўлиб, уларга турли худудларда яшаб ижод қилган шоирларнинг асарлари киритилгани, бу шеъриятнинг оммалашишида мұхим аҳамиятга эга бўлган. Мас., тошкентлик Каримбек Камий шеърлари Бухоро амирлиги худуди – Когонда чоп этилган баёзларда учрайди. Ёки ноширлик иши билан шуғулланган Ибратнинг ўғли Аббосхон томонидан 1910 йили тузилган баёзга Ибратнинг 17 шеъри билан бирга бошқа ижодкорларнинг шеърлари киритилган. Айрим Б.лар муаллифларнинг ўз қўли билан ҳам тартибланган. Мас., шоир Нодим ўз қўли билан тузган «Баёзи Нодим» қўлёзмаси бизгача етиб келган бўлиб, унга мумтоз шеъриятнинг деярли барча жанрларида ёзилган шеърлар киритилган. Баёзчилик анъанаси кейинги йилларда ҳам давом эттирилди. Жумладан, F.Гулом ташабуси билан 1938 йили Муқимий асарларидан таркибланган «Муқимий баёзи» нашр этилди. Шунингдек, ҳозирда турли принциплар асосида (мас., муайян худудда яшовчи шоирлар, ижодкор ўқитувчилар, жангчи шоирлар, талаба ёшлар тўпламлари ёки муайян мавзу бўйича) тартибланган шеърий мажмуаларга ҳам баёзчилик анъанасининг давоми сифатида қараш мумкин.

БАЙТ (ар. بیت – уй) – шарқ шеъриятидаги икки мисрали банд тури. Ҳар қандай икки мисра шеърнинг, гарчи амалиётда шундай ҳол кузатилса-да, Б. деб аталиши түгри эмас. Чунки Б. ритмик-интонацион ва мазмун жиҳатидан нисбий мустақиллик касб этиши, яъни банд мақомига эга бўлиши лозим. Шунга кўра, Б. атамасининг банд маъносида қасида, ғазал, қитъа жанрларига нисбатан ишлатилиши, Шарқ шеъриятидаги бошқа жанрларнинг икки мисрали бандларига нисбатан эса маснавий атамасини қўллаш түгрироқ бўлади (қ. банд).

БАЛЛАДА (фр. ballade – рақсбоп қўшиқ) – 1) ўрта асрлар француз адабиётидаги қатъий шеърий шакл, бир хил қофияланиш тартибидаги (ababbcbc) ҳар бири саккиз мисрадан ташкил топган учта банд, банднинг охирги мисраси таржеъ сифатида тақорланадиган, ўқувчига мурожаат қилинган ярим банд (тўрт мисралик – bcbc) билан якунланувчи шеър; 2) кейинги даврлар Европа адабиётларида кенг тарқалган Б. инглиз-шотланд ҳалқ шеъриятидан келиб чиқади. Агар француз Б.си қатъий шеърий шакл бўлса, инглиз Б.сида шаклий талаблар анча эркин (қофияланиш тартиби қатъий эмас, таржеънинг бўлиши шарт қилинмайди), у бир хил, одатда, тўрт мисрали бандлардан ташкил топади. Инглиз Б.сининг белгиловчи хусусиятлари сифатида тарихий, тарихий-афсонавий, баъзан эса маиший мавзуда ёзилиши, кичик воқеабанд сюжет асосига курилган эпик характеристдаги шеърий асарлигини кўрсатиш мумкин. Худди шу хусусиятлар ёзма адабиётдаги Б.ларга ҳам хосдир. Уруш йилларида ёзилган М.Шайхзоданинг «Капитан Гастелло», Ҳ.Олимжоннинг «Жангчи Турсун» каби асарлари Б.нинг ўзбек адабиётидаги яхши намуналари саналади.

БАНД – шеърнинг ритмик-интонацион ва мазмуний жиҳатдан нисбий мустақилликка эга бўлаги. Шеър ритмик курилишидаги Б.нинг роли ва аҳамияти гапнинг матнидаги роли ва аҳамиятига ўхшаш. Шунинг учун аксар ҳолларда банд синтактик жиҳатдан гапга тенг (кўп ҳолларда бандни битта гап шаклига солиш мумкин) келади. Б.нинг ниҳоясида туроқ (рун) ёки мисрадан кейинги паузага қараганда яқол сезиладиган ритмик паузанинг мавжудлиги, одатда, унинг бошланишида юксалувчи, охирида эса пасаювчи интонация бўлиши; шеърдаги ҳар бир бандни ажратиб турадиган тақорланувчи қофияланиш тартиби, баъзан эса таржеъ ёки радиф сингари кўшимча воситаларнинг борлиги – буларнинг бари Б.ни ритмик-интонацион жиҳатдан алоҳида бутунликка айлантиради. Изометрияга асосланган мумтоз шеъриятда (нафақат Шарқ, балки Ғарб шеъриятида ҳам) Б. шакллари

қатъий бўлиб, улар шеърий асарнинг композицион қурилишида ҳал қўйлувчи роль ўйнаган, кўп ҳолларда жанрни белгиловчи омил бўлиб хизмат қилган. Б. турлари кўпроқ ундаги мисралар сонидан келиб чиқиб белгиланган: иккилик (маснавий, байт, дистих), учлик (мусаллас, терцет), тўртлик (мурабба, катрен) ва ҳ. Айрим ҳолларда Б. турларини ажратишда мисра сонидан бошқа белгилар ҳам эътиборга олинган. Мас., икки мисрали банд тури бўлган байт (ab, cb, db, eb...) билан маснавий (aa, bb, cc, dd...) қофияланиш тартибига кўра, элегик дистих (биринчи мисраси гекзаметр, яъни 6 стопали, иккинчи - пентаметр - 5 стопали) билан александир дистихи (12 бўғинли, 6-бўғиндан сўнг цезура билан бўлинган, 6- ва 12-бўгини ургули) вазн хусусиятларига кўра фарқланади. Жаҳон шеъриятида ҳажм эътибори билан 2 тадан 16 тагача мисрани бирлаштирган Б. турлари мавжуд (қаранг: мусаммат) бўлса-да, ҳажми кичикроқ (айниқса, 2, 4, 5 мисрали) бандлар кенг истифода этилган.

Мумтоз шеъриятда изометрияга, жумладан, шеърий асарда Б.ларнинг бир хил (мисра сони, ўлчови, қофияланиш тартиби) бўлишига қатъий амал қилинган бўлса, кейинги давр шеъриятида (Фарбда романтизм давридан, ўзбек шеъриятида XX асрдан) бу қоидадан чекиниш одатий ҳолга айланди. Натижада астрофик (бандларидаги мисралар сони турлича) шеърлар, гетрометрик (ўлчови турлича мисралардан таркиб топган бандли) шеърлар ҳам оммалашди.

БАРМОҚ – туркий халқлар шеъриятида кенг тарқалган шеърий вазнлар тизими, сўзлашувда ва илмий муомала амалиётида «бармоқ», «бармоқ вазни», «бармоқ системаси», бармоқ тизими» каби шаклларда ҳам ишлатилади. Б. туркий тилларнинг табииати, фонетик хусусиятларига тўла мос келади. Шу сабабли ҳам Б. туркий шеъриятда қадимдан қўлланган: халқ оғзаки ижодидаги шеърий асарларнинг, асосан, Б.да яратилгани бунинг ёркин далилидир. Шуларни назарда тутган ҳолда Фитрат Б.ни «миллий вазн» деб атайди. Кўл ҳолларда Б. – миқдорий шеър тизими, унда изометрия мисралардаги бўғинлар сонининг тенглиги ҳисобига таъминланади дейиш билан чекланилади. Бироқ Б.да ёзилган шеърнинг ритмик хусусиятларини бўғинлар сонининг тенглигигина белгиламайди, бунда мисраларда бўғинларнинг қай тартибда турокланиши (гурухланиши) ҳам катта аҳамиятга эга. Дейлик, мисраларида бўғинлар 7+7 (Мен бу чўллар кўйнида / туғилиб топдим камол, // Кўхна сардобаларда / кўмшлиб қолди дардим. А.Орипов) билағ 3+4 / 4+3 (Куш бўлиб / қочар бўлсанг, // марлон бўлиб / қувгайман, // Тогларда / шар-

шарадек // губорингни / ювгайман. Миртемир) тарзида гурухланиб такрорланадиган иккита ўн тўрт бўғинли шеърнинг интонацияси бир хил эмас, чунки ўша интонацияга асос бўлаётган ўлчовни битта деб бўлмайди. Демак, Б. мисралардаги бўғинлар сонининг тенглиги ва бир хил тартибда гурухланиб такрорланишига асосланувчи шеър тизими экан. Бироқ амалиётда кўпинча буни эътиборга олмай, Б.да ёзилган конкрет шеър вазни «етти бўғинли бармоқ», «тўқиз бўғинли бармоқ», «ўн бир бўғинли бармоқ» тарзида аталадики, бу унчалик тўгри эмас. Негаки бу ҳолда шеър ўлчови чала белгиланган бўлади. Агар шу хил ёндашилса, Б. бор-йўғи 10 – 15 та шеърий вазндангина таркиб топган, ўта қашшоқ тизим бўлиши керак эди. Ҳолбуки, Б. юзлаб вазнларни ўз ичига олган шеър тизими бўлиб, унинг ритмик интонацион имкониятлари жуда кенгдир. Мас., биргина «ўн тўрт бўғинли» вазннинг ичидаги ўнлаб вариантлар (7+7; 5+5+4; 5+4+5; 4+5+5; 4+4+6; 4+6+4 ва х.) мавжудки, уларнинг ҳар бири шеърга ўзига хос оҳанг баҳш эта олади.

БАРОККО (итал. barocco – ғаройиб, ғалати) – XVI – XVIII асрлар Европа ҳалқлари адабиёти ва санъатида майдонга чиқкан (ҳар бирида пайдо бўлиш вақти, намоён бўлиши ва мавқеи турлича бўлган) бадиий йўналиш; манбаларда баъзан метод, баъзан эса услубий йўналиш деб ҳам кўрсатилади. Б.нинг юзага келиши Уйғониш даври ғояларининг инқирозға учраши билан изоҳлаб туширилади. Агар Уйғонишнинг бош омили Европада буржуазиянинг иқтисодий ва ижтимоий юксалиши бўлса, Б.нинг майдонга келиши XVI асрнинг иккинчи ярмидан кўзга ташланган тургунлик билан боғлиқдир. Мутахассислар Б.га хос айрим жиҳатлар Уйғониш даврининг Шекспир, Тассо, Монтењ сингари улуғ намояндалари асарларида ҳам кўзга ташланишини таъкидлайдилар. Албатта, бу ўринда кўпроқ Б. дунёқарашига хос жиҳатлар назарда тутилади: Уйғониш даври оптимизми ўрнини эгаллай бошлаган инсонга, унинг эртанги кунига ишончсизлик ва бунинг натижаси ўлароқ юзага келган тушкунлик, мунг оҳаңглари бевосита мавжуд ижтимоий эврилишлар натижаси эди. Агар Уйғониш даври ижодкорлари ҳаётни севиш, ундан завқланиш, ҳузурланиши тарғиб этган эпикурча фалсафага асосланган бўлсалар, Б. намояндалари онгини дунёнинг фонийлиги, жамики қадриятлар ўткинчилигини ўқтирувчи стоиклар фалсафаси эгаллайди. Бундай фалсафа лирика ривожига рағбат бермайди: шеъриятда ҳис-туйгулар ўрнига уларни бўғувчи фикрий мушоҳадалар устуворлик қиласи; фоний дунё гўё қимматга эга

эмас, у фақат рамзу мажозлар материали, кони, холос. Б. услуби кишини ҳайратга солишига, уни лол қилишга интилади: унга бирмунча жимжимадор, туманли ифода хосдир. Б. ифода воситалари орасида метафора ҳукмрон мавқени эгаллайди, метафориклик Б. услубининг белгиловчи хусусиятига айланади. Мутахассислар XVI аср охири – XVII аср бошларида майдонга қелган испан адабиётидаги культеранизм ва концептизм, инглизлардаги эвфуизм, итальян адабиётидаги маринизм, французлардаги прециоз адабиёт кабиларни Б. доирасидаги оқимлар сифатида кўрсатадилар.

Б. дастлаб испан ва итальян адабиётларида бўй кўрсатди. Жумладан, Б. хусусиятларини ижодида мужассам этган испан шоири Гонгора (1561 – 1627) фикрни гўё пардалаб, англанишини қийинлаштирувчи жимжимадор ва гўзал услубни урфга киритди. Бундай услубни асосларкан, Гонгора шоир маданиятли кишилар учунгина ёзиши керак дейди (Гонгора ва унинг давомчиларини бирлаштирган оқим «гонгоризм» билан бир қаторда «культеранизм» деб номланиши шундан). Бу билан «культеранист»лар классицистларга яқин: иккаласи ҳам маданиятли кишилар учун ёзиш керак деб билади. Фарқи шуки, классицистлар маданиятли кишилар деб антик адабиётни биладиган ва унинг қоидаларини қабул қилган кишиларни, гонгористлар эса ирреалликни, онгости қатламларини идрок этишга қобил кишиларни биладилар. Уларга кўра, фақат авомгина ўзининг тўпори моддиянлиги сабаб заминга боғлиқлигича қолади, чинакам шоир авомдан юксак туради ва ундан ҳазар қиласи, унинг қўшиклари оз сонли хослар, нозиктаъб кишиларга аталгандир. Шунга ўхшаш ҳолни Б. ичидаги яна бир оқим – «концептизм»да ҳам кўриш мумкин. Бу оқим намояндалари ўз асарларида сўз ўйинлари, тушуниш ўта қийин кўчимларни кўллаганларки, бу кўчимлар кутилмаган қиёслар, мураккаб ассоциацияларга таянади. Натижада улар ўзига хос топишмоқ, интеллектуал жумбоқقا айланади. Муҳими, уларни идрок этиш учун ҳиссий эмас, чукур ақлий мушоҳада юритиш талаб этилади. Яъни концептистларнинг асарлари ҳам хосларга – муайян тайёргарликка эга бўлган, зеҳни ўткир кишиларга мўлжалланади. Бошқача айтсан, концептистлар ўз асарларини ўқувчига ўткир зеҳнлилик машқи сифатида тақдим этишади, эстетик завқни жумбоқни ечишда деб билишади. Маринизм оқимининг асосчиси Жамбатиста Марино (1569 – 1625) ижодий-эстетик принциплари жиҳатидан Гонгорага яқин: шеърларидаги ҳиссий тўйинтирилганлик, дунёнинг фонийлиги ва шу билан боғлиқ пессимистик рух, услубдаги

жимжимадорлик, мураккаб ассоциацияларга асосланган күчимлар ва ш.к. Марино ижодда поэзияни санъатнинг бошқа турлари билан синтезлаштириш тарафдори. У барча санъатлар ўзаро боғлиқ, улар асли битта, факат ифода усулига кўра фарқланади деб билади. Марино рангтасвирида жим турган шеъриятни, шеъриятда сўзлаётган рангтасвири кўради. Уларнинг мақсади ҳам битта – одамларга хузур баҳш этиш, уларни маънан юксалтириш, қалбларини тозартиришдан иборат. Маринога кўра, рангтасвир санъати ҳаммага, ҳатто омиларга ҳам тушунарли, поэзияни англашга эса факат «ўқимишли, фозил кишилар» қобилдирлар. Марино санъатларнинг ўзаро таъсири, уларнинг бир-бирини бойитишини эътироф этгани ҳолда, уларнинг ичидаги поэзияни етакчи деб билади. Жумладан, у мусиқа ҳақида сўз юритаркан, «сўз ва фикрларни ифодаламаган ҳолда жаранглаётган нарса мусиқа деб аталишга лойиқ эмас» деб ҳисоблайди.

Юқоридаги оқимлар ўзларини «янги санъат», услубларини «зamonавий услугуб» (*stile moderno*) деб ҳисоблаганлар. Бадий ижод амалиётидаги ўзгаришлар табиий равишда уларни назарий идрок этиш эҳтиёжини туғдиради. Италия ва Испанияда Балътасар Грасиан, Эммануэль Тезауро, Маттео Перегрини каби Б. назарийётчилари майдонга чиқадилар. Жумладан, бадий ижодда янги услубни амалда қўллаб кўрган Б.Грасиан (1601 – 1658) назарий ишларидаги янги адабиётнинг қонуниятларини очишга интилади. Унга кўра, янги адабиёт «закийлик ёки тез идрок санъати»дир, унинг табиатини англатишга Уйғониш давридан бошлаб қатъий амал қилаётган Арасту «Поэтика»си оқиз, унинг учун файласуфнинг «Мантиқ» ёки «Поэтика»си эмас, «Риторика»си зарурроқ. Чунки, Грасианга кўра, эстетика мантиқдан тамом фарқли фан, Гўзаллик салтанати эса XVI аср назарийётчилари излаган жойдан тамом бошқа жойдадир. Грасиан «дид» (*gusto*) терминини илк бор мантиқий мушоҳададан тамом фарқланувчи эстетик мушоҳада маъносида қўллайди. У «дид» деганда ақлнинг танқидий фикрлаш қобилиятини назарда тутдики, кейинчалик бу тушунча эстетика фанида кенг ўрин эгаллади. Грасианнинг ижодий интуицияни, «тез идрок»нинг бир-биридан тамом йироқ ҳодисалар моҳиятини илғаш ва бир зумда уларни бирлаштира олиш қобилиятини назарий ўрганиш зарурати ҳақидаги фикрлари ҳам илм-фан учун қимматли ва қизиқарли эди. Грасиан «тез идрок» (*agudeza*) деганда номаълум нарсанинг ғоят тез ҳаракатга келувчи интуиция ёрдамида англанишини тушунади. Унга кўра, бадий билиш моҳиятан интуитив билиш бўлиб, у воқеликни идрок этиш

нинг янги имкониятларини очади. Шулардан келиб чиқиб Грасиан антик риторика санъатнинг барча ҳодисаларини, дунёни эстетик идрок этиш хусусиятларини тұлақамраб ололмаслигини таъкидлайди. Зоро, қадимгилар мантиқий билиш қонунларини қашф этгандар, силлогизмлар тизимини ишлаб чиққанлар, бирок улар «ұтқир зеҳн» учун яроқли эмас. Қадимгилар «ұтқир зеҳн» фақат даҳоларгагина хос деб ҳисоблаб, шу хусусият намоён бүлғанда ҳайратланишнегина билғанлар, у амал қылувчи қонунларни белгиламаганлар. Ҳолбуки, агар мантиқий фикрлаш қонуниятларини ишлаб чиқиш мүмкін бүлған экан, «ұтқир зеҳн» қонуниятларини ишлаб чиқиш ҳам мүмкіндей. Э.Тезауро (1591 – 1675) ҳам янги санъат учун «Поэтика» эмас, «Риторика» мұхымроқ деб билади. Үнга күра, «тез идрок санъати» мантиқ ва мантиқий күрилмаларга боғлиқ эмас, тахайюл асосига күрилған поэтик олам үзигагина хос, тафаккур қонуниятларидан тамом фарқлы қонуниятларға таянади. У «тез идрок», Закийлик ҳақида анча изчил таълимот яратади. Тезауро «янги санъат»ни вужудға келтирған Закийлик Онгнинг күринишиларидан бири деб билади. Закийликнинг иккита асосий қырраси бор – Зеҳн ва Донолик. Зеҳн нарса-ходисалар ботинидаги моҳияттаға кириб боради, донолик эса бир-биридан йироқ нарса-ходисалар моҳиятидаги үхшащликтар, алоқаларни тез илғаб олади-да, биридан иккінчисини келтириб чиқаради, бирининг ўрнига иккінчисини құяди. Бу ўринде гап образ – Метафоранинг юзага келиши ҳақида боради. Үмуман, Тезауро поэтикаси метафорага асосланади, үнга күра, метафора «поэзиянинг онасидир». Метафора табиатини, уннинг хил ва турларини үрганиш учун Тезауро меъморлық, рассомлық, ҳайкалтарошлық каби санъатларга ҳам мурожаат этади. Жүмладан, у меъморлықдаги ташқи безаклар инсонни рамзий метафорани англашга етаклайди деб билади. Үмуман, күзға ташланиб турған ҳар қандай тасвир қалбнинг түрли ҳолатларини ифодалашға хизмат қилиши, онға эса янги мұаммоларни очиши лозим. Шунга биноан, у инсон сәзгиларига таъсир қилиш учун санъат безакдор, ёрқин, күтилмаганликтарга бой бўлиши керак деб уқтиради. Тезауро оламий рамз, Илоҳий Метафорани англашға олиб келадиган санъат назариясини ишлаб чиқышга интилади. Закийликни, иқтидорни у Худонинг яратувчилик құдратига монанд ҳодиса деб тушунади. Зоро, санъаткор йўқ нарсадан янги мавжудликни яратади, Холиқнинг ўзи каби образлар ва ирреал оламни яратади. Яратувчилик даҳоси инсонгагина берилған эмас, у табиатнинг ўзида-да мавжуд. Асрорга етган хослар ундаги белги-

ларда табиатнинг закий ниятини англай олади. Худонинг ўзи метафоралар, аналогиялар оламини яратганки, омиларга улар оддийгина бозак бўлиб тувлади, ҳолбуки, гап оламнинг яратилиши ҳақида бораркан, уларнинг ҳеч бири бежиз, бемаъни эмас. Тезауро фикрни мажозий ифодалаш закийликнинг муҳим белгиси деб билади, зеро, закийлик фикрни тўғридан-тўғри эмас, балки мажозий йўл билан, кутилмаган йўсинда ифодалашда намоён бўлади. Бундай ифода санъатта хос бўлиб, у ҳақиқат эмас, бироқ ҳақиқатга тақлид қиласди. Шунингдек, Тезауро ҳамамиятли ва қизиқарли, кулгили ва қайгули жиҳатларни бирлаштира олишни ҳам закийлик белгиларидан деб хисоблайди. Унинг уқтиришича, «шу даражадаги жиддий ё шу дараҷадаги қайгули ва ё шу даражадаги улуғвор ҳодиса йўқки, уни ҳам шаклан ва ҳам мазмунан ҳазилга айлантириб бўлмаса». Маълумки, антик қоидаларга асосланган классицистлар бунга қарши турганига қарамай, ижод амалиётида у мавжуд эди, Тезауро эса биринчилардан бўлиб бунинг қонунийлигини асослашга жазм этади. Тезауро битта фикрни услубий жиҳатдан турфа шаклларда ифодалаш мумкинлигини жонли мисолларда кўрсатаркан, бу хил турфалик фикрни закийлик билан шаклга солиц, метафорик йўлда айтиш имкони туфайлигина мавжудлигини таъкидлайди. Айни чоғда, у ифода шакли билан мазмун бир-бирига узвий боғлиқлигини, улардан бири ўзгарса, иккинчисининг ҳам муқаррар ўзгариши тақозо этилишини уқтиради. Демак, ёзувчи ифода йўсинини танлар экан, унинг ўзи етказмоқчи бўлган мазмун, ҳиссий тоналликка қай даражада мослиги ҳақида жиддий бош қотириши лозим. Кўринадики, гарчи барокко адабиёти вакиллари услубидаги жимжимадорлик, ўринсиз мураккабликлар ўз вақтида (ва кейин ҳам) кўплаб эътиrozлар тугдирған бўлса-да, унинг етук намояндлари, хусусан, Тезауро синвари назариётчилари шаклбозлиқдан, «шакл шакл учун» ақидасидан йироқ бўлганлар.

БАСИТ (ар. بَاسِط – ёйик) – аруз баҳрларидан бири, мустафъилун (– – v –) ва фоилун (– v –) аслларининг тақоридан ҳосил бўлади, мустафъилун руҳни бошида икки сабаб (мус ва таф) ёйилиб тургани учун шу номни олган. Бундан ташқари, Б. баҳри вазнларининг аруз ва зарбida ҳаракатлар, яъни қисқа унлилар ёйилгани учун шундай номланган деган фикрлар ҳам бор. Б. баҳри араб шеъриятига хос бўлиб, ўзбек шеъриятида кўлланмайди. Навоийнинг «Мезон ул-авзон» асарида Б. баҳрининг бир вазни, Бобурнинг «Мухтасар» асарида саккиз вазни туркий тилда битилган маҳсус мисоллар билан келтирилган. Хусусан, Навоий:

*Ишқинг мөни туну кун мажнуну зор айламиш,
Кўнглумни зору ҳазин, жисмим низор айламиш, –*

байтини мисол қилган бўлиб, у басити мусаммани солим (– – v – / – v – / – – v – / – v –) вазнида ёзилган.

БАГИШЛОВ (рус. посвящение – багишлов) – 1) асарнинг бирон-бир шахсга багишиланганини ифода этувчи қисми, дебоча; меценатликнинг пайдо бўлиши билан боғлиқ ҳолда антик Римда урфга кирган, кейинчалик Европа адабиётларида анъанага айланган. Б. шеърий ёки насрый йўлда битилиб, асарнинг бошланиш қисмидан жой олган. Б.да ҳомийлик қилган меценат мадҳ этилган, миннатдорлик изҳори билан бирга уни янада кўпроқ ийдириш, ўз ижод маҳсули учун рағбат олиш мақсади кўзда тутилган. Шунга кўра, бундай Б.ларнинг услуби ҳам тантанавор, баландпарвоз бўлган (Шарқ адабиётида ҳам шунга ўхшаш анъана бўлган: «Қутадғу билиг»даги Буғрохон мадҳи, Хоразмий «Мұхаббатнома»сидаги Мұхаммадхожабек мадҳи моҳият эътибори билан Б.га яқин туради). Бироқ кейинчалик Б.дан кўзда тутилган мақсадлар доираси ва шунга мос ҳолда унинг мазмун-мундарижаси ҳам кенгаяди. Mac., Мольер мутаассиб диндорлардан ҳимоя излаб «Тартюоф» комедиясини қирол Людовик XIV га Б. билан бошлайди; Вольтер «Брут» трагедиясига ёзган Б.да ўзининг маърифатчилик театри ҳақидаги мулоҳазаларини баён қиласи ва ш.к.; 2) замонавий адабиётда Б. – асарнинг муаллиф ҳурмати, эъзози, миннатдорлиги, муҳаббати ва ҳ. туйғулар ифодаси сифатида бирон-бир шахс, унинг хотираси, муайян бир жой, муассаса, воқеа-ходиса ва ш.к.ларга багишиланishi, шу ҳақдаги қайд. Одатда, Б. асар сарлавҳасидан кейиноқ қайд этиб кўйилади. Mac., А.Ориповнинг «Арслон чорлаганди...» шеърига «Э.Воҳидовга», «Қозогистон» шеърига «Ўлжасга», «Отелло» шеърига «Аброр Ҳидоятов хотирасига багишилайман», «Маконда ломаконимсан, энди қайдан излагайдурман» мисраси билан бошланувчи шеърига «Онам вафотига» тарзида, Т.Муроднинг «Отамдан қолган далалар» романига эса «Бирлашган Миллатлар Ташкилоти аъзоси – озод Ўзбекистон учун ёздим» тарзида Б. ёзилган; 3) лирик жанр, бирон-бир щахс (нарса, жой ва ш.к.)га мурожаат шаклида ёзилиб, кўпроқ уни таърифлаш, унга муносабатни ифодалашга қаратилган шеърий асар. А.Ориповнинг «Курсдошларимга», «Сергей Есенинга», «Денгизга», «Ҳамид Олимжон хотирасига», «Муножот»ни тинглаб», «Номаълум аёл» суратига» каби шеърлари Б. жанрининг сара намуналари сифатида кўрсатилиши мумкин.

БАХР (ар. بحر – денгиз) – арузда ёзилган шеърда руқнларнинг тақорланиш тартиби, конкрет шеърдаги ўлчов асоси. Арузда ҳижо, руқн, мисра ва байт (араб арузида ҳарф, жуз, руқн, баҳр, байт) шеърнинг ўлчов бирликлари бўлиб, бунда байт конкрет шеърнинг ритмик жиҳатдан тугал бирлиги, бошқалари эса унинг таркибий қисмлари саналади. Б. мисра доирасида воқе бўлади, чунки илк мисрадаги руқнлар тартиби кейинги мисраларда айнан тақорлана-ди. Яъни арузда 8 та руқн (асл)нинг муайян тартибдаги тақоридан Б.лар ҳосил бўлади ва уларнинг ҳар бири ўз номига эга. А.Навоий «Мезон ул-авzon»да кўрсатишича, арузда 19 та баҳр мавжуд, Бобур эса «Мухтасар»да 21 та баҳрни кўрсатади. Б.ларнинг еттитаси (мутақориб, мутадорик, ҳазаж, рамал, ражаз, комил ва воғир) битта руқн тақоридан (мас., мағоийлун / мағоийлун... – ҳазаж; фоилотун / фоилотун... – рамал) ҳосил бўлади, биргина мағъулоту асли ўзи мустакил ҳолда Б. ҳосил қўлмайди. Биттадан олинган иккита асл тақоридан яна 8 та Б. (музориъ, ҳафиғ, мужтасс, мунсарих, муқтазаб, тавил, мадид ва басит) ҳосил бўлади (мас., мағоийлун / фоилотун... – музориъ; фоилотун / мустағъилун... – ҳафиғ). Иккита бир хил ва битта бошқа асл тақоридан эса қолган 4 та Б. (қариб, мушокил, ғарив ва сарив) ҳосил бўлади (мас., фоилотун / фоилотун / мустағъилун – қариб; фоилотун / фоилотун / мағоийлун – мушокил). Ўзбек тили хусусиятлари билан боғлиқ ҳолда шеъриятимизда Б.лар қўлланишдаги фаоллик даражасига кўра фарқланади: агар ҳазаж, рамал, ражаз, музориъ, ҳафиғ, мужтасс, мунсарих, сарив, мутақориб Б.лари фаол қўлланган бўлса, мутадорик, комил тавил Б.лари жуда кам учрайди; воғир, муқтазаб, мадид, басит, қариб, мушокил, ғарив, ариз, амиқ Б.лари эса шеъриятимизда ишлатилмаган.

БЕЛЛЕТРИСТИКА (фр. belles letters – сўз санъати, нафис сўз) – кенг маънода, умуман, сўз санъати, бадиий адабиёт маъносини берса-да, термин турлича маъноларда ишлатилади. 1) насрый йўлда ёзилган адабий асарларни билдиради; 2) сўз санъати маъносидаги адабиётга тааллуқли асарларни бадиий қимматига кўра даражалаш мақсадида классика билан оммавий адабиёт орасидаги ҳодиса маъносида қўлланади. Бу маънода Б. бадиий жиҳатдан мукаммал классик асарларга ҳам, бадиий ночор оммавий адабиёт намуналарига ҳам қарши қўйилади. Шунга кўра, мавжуд адабий асарларнинг аксарияти (жумладан: саргузашт, детектив, фантастика кабилар) Б.га мансуб этилади. Мутахассислар Б.нинг пайдо бўлишини ёзувчиликнинг профессионал фаолият турига, касбга айланиши билан

боғлайдилар; 3) адабиёт тушунчаси қамраб олувчи асарларни табиатига кўра фарқлаш мақсадида ишлатилади. Бунда *адабий асарларни* Б. деб атаб, улар *адабий-бадиий асарларга* қарши қўйилади. Яъни бу маънода Б. бадиий образ воситасида фикрламайдиган адабий асарларни билдиради ва бир қатор адабий жанрларни қамраб олади: очерк, сафарнома, эссе, мемуарлар, мактублар, афористика ва б.; 4) адабиётнинг яхши намуналарига қарши қўйилувчи «енгил адабиёт» маъносида қўлланади. Бу маънода Б. дейилганда ҳозирги кунда матбуотда тижорий мақсадни кўзлаб чоп этилаётган енгил-елпи битиклар, *оммаевий адабиёт* тушунилади.

БЕСТСЕЛЛЕР (ингл. best – энг яхши, sell – сотилмоқ) – ноширлик-нинг тижорий томони билан боғлиқ ҳолда юзага келган термин, катта тиражда чоп этилган ва тез тарқалиб кетган, тижорий нуқтаи назардан муваффақият қозонган китоб. Шундан келиб чиқиб Б. термини китобхонлар томонидан қизғин кутиб олинган ва кўлма-кўл бўлиб кетган асарларга нисбатан ҳам қўлланади. Бироқ муайян асарнинг Б.га айланиши унинг бадиий мукаммаллик даражасини белгилай олмайди, чунки асар бадииятга алоқаси бўлмаган турли омиллар (қизғин реклама, айни ўз вақтида ёзилганлик, көнг омманинг дид ва талабларига мослик ва б.) натижасида Б.га айланиши мумкин. Албатта, чинакам сўз санъатига дахлдор асарлар ҳам Б.га айланиши мумкин (мас., Г.Маркес, П.Козльо асарлари), бироқ амалда бу кўпроқ оммавий адабиёт намуналари (детектив, саргузашт, фантастика, жангари асарлар ва ш.к.)га насиб этади. Бу ўринда усталик билан, омманинг қизиқишлири ва руҳиятини ҳисобга олган ҳолда амалга оширилган реклама, турли тақдимотлар муҳим аҳамият касб этади. Шунингдек, ноширлик ишлари тижорий асосга қўйилган Farb мамлакатларида чоп этилган асарларнинг тиражи, сотилиши каби кўрсаткичлар бўйича рейтинглари ҳам мунтазам эълон қилиб борилади. ·

БИБЛИОГРАФИЯ (юн. biblion – китоб, grapho – ёзмок) – 1) китоблар, вақтли нашрларда эълон қилинган асарлар рўйхатини тузиш, уларни тематик ёки бошқа (фан соҳалари бўйича, муаллифлар исм-шарифи бўйича ва ҳ.) жиҳатларга кўра таснифлаш, қисқача аннотациялар ёзиш каби вазифаларни ўз олдига қўювчи илмий-амалий соҳа; 2) адабиётшуносликнинг ёрдамчи соҳаси. Адабиётшунослик Б.си адабиётшунослик бўйича тадқиқот ишлари олиб бориш учун зарур маълумотларни – бадиий асарлар, адабиётшуносликка оид китоблар, мақолалар, илмий тадқиқотлар рўйхатларини тузиш, муайян тематик йўналишдаги ёки хронологик асосдаги библиографик кўр-

сағатчилар тайёрлаш билан шуғулланади. Бундай күрсаткичлар бирон-бир мавзу бүйича изланаётган тадқиқотчининг вақтини тежайди, илмий фаолияти самарасини оширади, шу билан бирга, мавзу бүйича амалга оширилган ишлар билан тўлиқ танишиш имконини беради, демак, илмий холосаларнинг объектив ва аҳамиятли бўлишига ҳам замин ҳозирлайди. Ўзбек адабиётшунослигига Б. соҳасида ҳам бирмунча ишлар амалга оширилган. Жумладан, УзРФА Бош кутубхонаси ходимлари томонидан тайёрланган «Адабий ҳаёт» билиографик күрсаткичи; Фитрат, А.Қодирий, Чўлпон, F.Гулом, А.Қаҳҳор каби ижодкорлар, М.Қўшжонов, О.Шарафиддинов, У.Норматов, Н.Каримов каби қатор олимлар фаолиятини ёритувчи билиографик күрсаткичларни бунга мисол қилиб келтириш мумкин.

БИОГРАФИК МЕТОД (юн. bios – ҳаёт, grapho – ёзмоқ) – адабиётшунослиқдаги контекстуал таҳлил методларидан бири. Ушбу метод XIX асрнинг иккинчи ярмида шаклланган бўлиб, асосчиси сифатида француз олими Ш.Сент-Бёв эътироф этилади. Б.м. бадиий асарни муаллифининг ҳаёт йўли контекстида ўрганишни назарда тутади. Зеро, бадиий асарда ижодкор шахсияти аксланади, шундай экан, унинг кўп қирралари муаллиф биографияси контекстида англашилади. Бошқача айтганда, Б.м. асарга муаллиф юклаган мазмунни англашда етакчи аҳамият касб этади. Mac., А.Қаҳҳорнинг «Даҳшат» (1960) ҳикояси ўтмишдан баҳс юритади, бироқ уни биографик контекстда олинса, ҳикояда адаб асар яратилган давр муаммоларини бадиий идрок этаркан, ўз руҳиятида ва қарашларида рўй берган бурилишни акс эттирганини кўриш мумкин. Б.м.нинг қанчалик самарали бўлиши кўп жихатдан тадқиқотчи қўл остидаги биографик материалга боғлиқдир. Тадқиқотчи ихтиёридаги биографик материал асар генезиси (яратилишига турткি бўлган омиллар, образлар ва сюжет чизиқларининг реал илдизлари, унда ифодаланган ғоялар моҳияти ва ш.к.)ни ўрганиш имконини беради. Биографик материал (ёзувчи ҳаёти ва фаолияти билан боғлиқ ҳужоатлар, у ҳаракат қилган муҳит ва шу муҳит кишилари билан ўзаро алоқалари ҳақидаги маълумотлар, унинг ёзишмалари, у ҳақдаги хотиралар ва б.) қанча бой бўлса, методни қўллаш шунча самарали натижалар беради. Албатта, биографик материал мутлақ тўлиқ бўлмайди, яъни ёзувчининг ҳаётини кунма-кун ҳужоатли асосда тикилаш маҳол. Шунинг учун Б.м. муаллиф ҳаётига оид фактларни жонлантириш, етишмаган ўринларни тўлдиришни ҳам тақозо этадики, бу ҳол унга гипотетик унсурларни ҳам олиб киради. Mac., Чўлпоннинг «Қаландар ишқи» шеъри био-

график контекстда олиб қаралса, унинг янги-янги мазмун қирралари очилади. Шеър 1920 йили ёзилган. Чўлпон ўсмир пайтидан бошлаб февраль инқилоби юзага келтирган шароитда «юртим учун демократик йўл билан озодликка эришиш имкони туғилди» деган ишонч билан қайноқ ижтимоий фаолиятга шўнгиган бўлса, кейинроқ бу йўлдаги ҳаракатлари зое кетиб, умидлари чилпарчин бўлди. Яъни шеър Чўлпон «асрлик тош янглиғ бу хатарли йўлда қотган», умидсизликка тушган даврда ёзилган. Шоир кайфияти «Карашма денгизин кўрдим на нозлик тўлқини бордир, Ҳалокат бўлгусин билмай қулочни катта отдим-ку», «Қаландардек юриб дунёни кездим топмайин ёрни, Яна кулбамга қайгулар, аламлар бирла қайтдим-ку» каби сатрларда ўз ифодасини топади. Шеърдаги «Бу дунё деб у дунёни баҳосиз пулга сотдим-ку» мисраси шоир изтиробларининг чўққисини ифода эта-дики, унинг мазмунини биографик контекстдан ташқарида англаш қийин. Аввало, ўзбек тили учун ғализоқ «баҳосиз пул» бирикмаси-га эътибор қилиш керак. Шеър ёзилган давр кишиларига «баҳосиз пул» деганда Керенский ҳукумати муомалага киритган ва тезда ўта қадрсизланган пул назарда тутилгани аниқ бўлган. Шундан келиб чиқсан, Чўлпон бу билан февраль инқилобига ишониб «у дунёни баҳосиз пулга сотдим-ку» дея изтироб чекаётгани англашилади.

- Изтиробнинг асоси шуки, таҳликали замонда шоирнинг отасини ўғлининг сиёсий фаоллиги ташвишлантирган, табиийки, у ёлғиз ўғлининг ўз ёнида, хавф-хатардан йироқ бўлишини истайди. Бироқ «карашма денгизи»га ошуфта ўғил отани ташвишга кўйиб, норози-лантириб бўлса-да ўз билганидан қолмайди. Яъни миллый руҳда тарбия топган Чўлпон энди отасини норозилантирганига ўқинади, бу ҳолни «у дунёни баҳосиз пулга сотмоқ» деб билади.

Адабий асар таҳлилида Б.м. нечоғлик мухим бўлмасин, уни мутлақлаштириш тўғри эмас. Бу ҳол адабиётшунослик тарихида кузатилган. Жумладан, XX аср бошларида Б.м.ни соғ ҳолда (яъни ёзувчи биографиясини даврнинг ижтимоий, маданий, маърифий шарт-шароитларидан узид) қўллаш, ижодкор қалбининг суратини яратишга интилиш (француз олимни Р.де Гурмон, рус олимни Ю.Айхенвальд) кузатилади. Табиийки, бу бадиий ижод табиатини жўнлаштириш бўлиб, муқаррар равишда бир ёқламаликка олиб келади. Адабий асар таҳлилига комплекс ёндашиш, Б.м.ни бошқа методлар билан алоқада қўллаш илмий жиҳатдан тўғрироқ бўлиши ва яхшироқ самара беришини унутмаслик лозим.



ВАЗН (ар. فَن – ўлчов) – конкрет шеърда юзага чиқувчи ритмик ҳодиса, метр, ўлчов. Сўзлашув амалиётида «аруз вазни», «бармоқ вазни» тарзида ишлатиш кузатиладики, назарий жиҳатдан бу тўғри эмас. Чунки, аслида, аруз ҳам, бармоқ ҳам кўплаб вазнларни ўз ичига олган шеър тизимларидир. В. шеър тизими қонуниятига асосланган ҳолда аниқ бир шеърнинг ўлчовини билдиради. Mac., аруз тизими қисқа ва чўзиқ ҳижоларнинг муайян тартибда тақорланишига асосланади, В. эса тақорланишнинг конкрет шеърдаги тартибини белгилайдиган ўлчовни билдиради. Агар «ғазал рамали мусаддаси солим вазнида ёзилган» дейилса, унинг бир байтида 6 та, ҳар бир мисра сида учтадан рукн, ҳар бир рукнда 4 тадан ҳижо борлиги, ҳижолар «чўзиқ-қисқа-чўзиқ-чўзиқ» тартибда гурухлангани англашилади. Яъни бу ғазал ритми шу ўлчов асосида тартибга солинган, унинг барча мисра ва байтлари ритмик жиҳатдан мазкур ўлчовга мосдир.

ВАРВАРИЗМ (лот. barbaris – ўзга юртники) – ўзга тилдан ўзлаштирилган сўз ёки жумла. Бадий асар матнига кўпроқ қаҳрамонлар нутқини индивидуаллаштириш, давр ёки мухит колоритини акс этириш каби мақсадларда киритилади. Ўзлаштириш қайси тилдан амалга ошганига қараб баъзан В.нинг грэцизм, латинизм, германизм, галлицизм, полонизм, азианизм каби кўринишлари ҳам ажратилади. Ўзбек адабиётида В.нинг араб, форс, рус тилларидан олинган кўринишлари кўпроқ учрайди. Хусусан, мактаб ва мадраса таълимида араб ва форс тилларининг ўрни катта бўлгани сабабли, XX аср бошларигача улардан олинган сўзлар жуда кўп кўлланган. Mac., А.Қодирий «Мехробдан чаён»да ёзади: «Худоёр муҳр босиши асноси ёзилған ёрлиғ ва номаларни ўкутуб эшитар, муншиларнинг эшитилмаған араб ва форс сўзлари орқалик тўкуған ярим туркий жумлаларига аксар вақт тушунмас: «Эналаринг арапқа текканма?» деб мирзо, муфтиларни койир эди». Худоёрхоннинг койиши бежиз эмас, А.Қодирий бунинг сабабини изоҳлаш учун улар иншо этган

ёрлиқни келтирадики, ундан бир парча будир: «Адои ҳадама асноси биз амири вазифа мутла-қалъинон дорус-салтананинг ҳаққи шаръийсига хиёнат қилишдин ижтиноб, адолатимиз ойнасини данонат ғубороти бирлан халадор айлашдин парҳез, арзи доди фуқаромиз суръати истимоъида иҳмол ва сустлик кўрсатмай интишори адолатимиз кўшишида субҳи шом машғул ва мабзул, дикқат ва эътибори қилғай деб ва яна мазкур исмига ёрлиғ мактуб бўлмиш итоатиға афроди девонхонамиз маъмурлар деб, муҳри шоҳонамиз бирлан таъкид ва тақрир этдик». Ёзувчининг ўзи сатр ости изоҳида ёрлиқнинг учдан бирини ташкил этувчи мазкур парчадаги 11 та сўз (жами 21 та) таржимасини берган. Ҳолбуки, уларнинг сони бундан кўпроқни ташкил қилиши ҳам мумкин эди. XX асрдан бошлаб эса тилимизда рус (ва рус тили орқали бошқа тиллардан кириб келган) сўзларнинг фаоллашуви кузатиладики, жонли сўзлашувдаги бу ҳол адабиётда ҳам ўз аксини топади. Жумладан, А.Қодирий яратган Калвак маҳзум ва Тошпўлат тажанг, Фитрат яратган Почамир каби машхур персонажлар нутқида араб-форс сўзлари қатори яккам-дуккам русча сўзлар ҳам кўлланади, бу эса давр жонли сўзлашув тилига хос хусусиятларни тасаввур этиш имконини беради. Ўтган асрнинг 30-йилларига келиб шеърияти-мизда русча сўзларни кўллаш «мода»си пайдо бўлди, бу ҳол, хусусан, куннинг долзарб мавзуларида яратилган публицистик руҳдаги шеърларда кўп учрайди. Мак., F.Фулом бир шеърида ёза-ди:

*Биз куйчилар, пролетар –
Мозолланган кўлларнинг
Кўз нурлари.*

Шоир ўзбекча қилиб «қадоқ», «қадоқли» ёки «қадоқ босган» дейиш ўрнига «мозолланган» сўзини ишлатади. Бу ўринда В.нинг кўлланиши муайян бадиий-эстетик вазифа бажармайди, демак, у оддийгина модага эргашишдан бошқа нарса эмас. XX аср 80-йиллари насида персонажлар нутқида В.ларнинг кўлланиши уларнинг маънавий-ахлоқий қиёфасини очиш, улар ҳаракатлана-ётган мухит хусусиятларини акс эттиришга хизмат қилди, манқуртлашаётган тоифага, даврнинг оғрикли муаммоларига муносабатни ифода-лаш воситаларидан бири сифатида кенг фойдаланилди (М.М.Дўст. «Истеъфо», Э.Аъзам. «Байрамдан бошқа кунлар» ва б.)

ВАСЛ (ар. وَسْل – уланиш, күшилиш) – 1) арузда ёзилган шеърларда айрим ёпиқ ҳижолар охиридаги ундошни вазн талаби билан ўзидан кейинги унли билан бошланган сўзнинг биринчи ҳижосига кўшиб ўқиш ҳодисаси. Mac., Машрабнинг:

Сажда айлар зоҳид ул меҳробиға,
Ман қулурман сажда эгма қошима, –

байтидаги «зоҳид ул» (— —) бирикмаси В. қоидасига кўра «зо-хидул» (— v —) тарзида ўқилиши лозим, акс ҳолда, шеър вазни бузилади. Чунки байт рамали мусаддаси мақсур (фоилотун, фоилотун, фоилун) вазнида бўлиб, агар В. қоидасига риоя қилинмаса, биринчи мисра ҳашвидаги иккинчи ҳижо қисқа бўлмай қолади, натижада вазнда бузилиш юзага келади; 2) мутлақ қофия (к.) унсури.

ВАСФ (ар. وَسْف – тавсифлाश, тасвирлаш, сифатлаш) – бирор нарса, ҳодиса ёки шахсни мақташ, мадҳ этиш, чиройли ўшратишлар, мажозий иборалар билан таърифу тавсиф бёриш. В. алоҳида жанр эмас, балки тавсифий характердаги қатор жанрлар (қасида, мадҳия, фахрия ва б.)га хос ифода йўсими, усулидир. В. характеристидаги шеърлар қасидадан ажралиб чиқсан бўлиб, жоҳилият даври араб шеъриятида шоирлар ўз туяси, оти ёки бошқа ваҳший ҳайвонларни, саҳродағи турли ҳодисаларни В. қилиб шеърлар битган бўлса, кейинчалик унинг мавзу кўлами кенгайди: бирор шахс, шаҳар, бино, йил фасллари, ой, қалам ёки қаламдон, бошқа бирор буюм, зеб-зийнат ва ш.к.ларни тавсифлаш мақсадида шеърлар битилди. Кўринадики, В.нинг мавзуси чекланган эмас. Шунга қарамай, мумтоз шеърияти-мизда маъшуқа ёки унинг бирор узвини тавсифлашга бағишлиланган шеърлар (мас., «Кокулинг», «Сочларинг», «Қошларинг», «Суратинг» радиофли ғазаллар) кўпроқ учрайди. Одатда, шоир бирор нарсани В. қилар экан, унинг жамиятдаги ёки ўз ҳаётидаги ўрни, аҳамиятига баҳо беради, унга ўзининг муносабатини ифодалайди.

ВАТАД (ар. وَطَاد – қозикча) – сокин ва мутаҳаррик ҳарфларнинг муайян тартибда бирикишидан ҳосил бўлувчи ритмик бирлик, жузэ (к.). Ҳарфларнинг қай тартибда бирикишидан келиб чиқиб В.нинг икки тури фарқланади: В.и мажмуъ (ёки макрун) ва В.и мафруқ. Аввал келган икки мутаҳаррика бир сокин ҳарфнинг кўшилишидан В.и мажмуъ ҳосил бўлади: «самар», «башар», «қамар» каби сўзлар шу вазнга мосдир. Mac.: «қамар»: мутаҳаррик (қа) + мутаҳаррик (ма) + сокин (р). В.и мафруқда эса икки мутаҳаррик орасида бир сокин

ҳарф жойлашади: «нола», «лопа», «зора» каби сўзлар шу вазнга мосдир. Мас., «нола»: мутахаррик (но) + сокин (л) + мутахаррик (а).

ВЕРЛИБР (фр. *vers* – шеър, *libre* – озод, эркин) – муайян ўлчов асосидаги вазн ва қатъий қофияланиш тартибига эга бўлмаган шеър. В. насрдан фақат муайян нутқий бўлак (мисра)ларга бўлингани билан фарқланиб, бўлиниш ёзувда ҳар бир мисрани алоҳида сатрга ёзиш, талаффузда эса интонация (ритмик пауза ва ритмик акцентлар) ҳисобига таъкидланади. Европа халқлари шеъриятига В. ўрта асрлардаги *литургик шеърият*, диний маросимларда ижро этилган қўшиқлар орқали яхши таниш бўлган. В.нинг дунёвий адабиётга кириб келиши немис романтизми билан, фаоллашуви эса француз символист шоирлари ижоди билан боғлиқ. XX асрда В. жаҳон шеъриятида, жумладан, ўзбек шеъриятида ҳам кенг оммалашди (қ. сарбаст).

ВОДЕВИЛЬ (фр. Нормандиядаги *Vau de Vire* деган жой номидан) – драматик жанр, кўпроқ майший мавзудаги, қизиқарли интрига асосига курилган, ўйноки қўшиқ-куплетлар ва шўх рақсларни ўз ичига олган пьеса. Аввалига, XVIII асрнинг 1-ярмида ярмарка сайилларида ижро этилган комедиялар таркибидаги қўшиқ-куплетлар В. деб аталган. XVIII аср охирларига келиб В. мустақил жанр сифатида шаклланган, қўнгилочар драматургик жанр сифатида бутун Европага тарқалган. XIX асрнинг 2-ярмида В. фаол истеъмолдан чиққан, унга хос хусусиятлар бошқа драматик жанрларга, хусусан, опереттага сингиб кетган.

ВОФИР (ар. *وافر* – мўл) – аруз баҳрларидан бири, ҳаракати, яъни қисқа унлилари кўп бўлгани учун шундай ном берилган. *Мафоилатун аслининг* (*v – v v –*) такоридан ҳосил бўлади. В. араб шеъриятига хос баҳр бўлиб, ўзбек ва форс шеъриятида қўлланмаган. “Фақат Навоий ўзининг «Мезон ул-авzon» асарида В. баҳрининг икки вазнiga, Бобур эса «Мухтасар»да йигирма бир вазнiga тўхталиб, уларга маҳсус байтлар битганлар ва мисол сифатида келтирганлар. Хусусан, «Мухтасар»да:

*Кел, эй қаро кўз, манга гузар эт,
Будур санга сўз, манга назар эт, –*

байти вофири мураббаъи солим (*v – v v – \ v – v v –*) вазнiga мисол қилиб келтирилган.

ВОҶЕАБАНД ЛИРИКА – лирик кечинмани воҷеанинг ихчам тасвири асосида ифодаловчи шеърлар, замонавий шеъриятда кенг,

тарқалған жанр. В.л.да воқеани тасвирлаш мақсад әмас, балки бир восита, лирик кечинмани ифодалаш воситасидир. Шунга күра, В.л.да воқеа тұлақонли тасвирланмайды, балки пункттирлар билан чизилади: унинг эңг мұхим деталларини олиш, эңг қызғын, кульминацион нұқтапарига ургу бериш билан кифояланилади. Тасвир күләми, бир томондан, үша воқеа таъсирида юзага келгән ҳис-түйгүни ифодалаш, иккінчи томондан, үқувчининг уни тасаввур қила олиши, лирик кечинмәгә түрткі бўлган асосни ҳис эта билиши учун етарли бўлиши билан белгиланади. Мас., Х.Давроннинг «1941 йил. 22 июнь. Пешин» шеъри:

Уларни қўйишди жар ёқасида...
 Отасин қўлинин ушлаган гўдак
 Чор атрофга қараб шўх, олазарак,
 Сўради: «Ўқ төгса оғрирми, дада?»
 Унинг овозини босди гулдирак...
 Баҳорда жарликни қоплар ўт-ўлан,
 Ўтлар узра сузаб ўтар оқ булут
 Ва шунда гиёҳлар аччиқ дард билан
 Шивирлар-шивирлар: «Оғриркан, дада!»
 Бу нола ҳеч қачон бўлмайди унум...

Шоир урушга муносабатини ифода этиш учун конкрет воқеани олади, лекин уни изчил тасвирламайды, унинг эңг мұхим нұқтасини жонлантириш билан чекланади: кўзлаган мақсади, учун шунинг ўзи етарли. Бу жиҳати билан шеър рангтасвир полотносига монанд, унда воқеанинг муайян лаҳзаси қотириб қўйилган. Худди рангтасвир асарини томоша қилаётган киши каби үқувчи үша лаҳзагача ва ундан сўнг бўлган ҳолатни тасаввурда жонлантира олади (душманнинг кўққисдан хужум қилиши, ота-боланинг бу пайтдаги ҳолати, уларнинг бошқалар билан бирга қўлга олиниши ва х.). Агар булар бари батафсил тасвирланганида, лирик әмас, балки воқеабанд эпик асар яратилган бўлур эди. Шу жиҳатдан В.л. билан шеърий йўлда ёзилган эпик асарни фарқлаш зарур. Мас., А.Ориповнинг «Шарқ ҳикояси», «Ҳангома» шеърлари В.л. намунаси әмас, балки шеърий йўлда ёзилган кичик ҳикоятлар, яъни моҳияттан эпик характердаги асарлардир.

ВУЛЬГАРИЗМ (лат. vulgaris – қўпол, дағал) – нафосат тала-би билан бадиий адабиётда ишлатиш расм бўлмаган қўпол сўз ва

бирикмалар. Персонажлар нутқини индивидуаллаштириш, уларга эмоционал-хиссий муносабатни ифодалаш, конкрет эпизоддаги руҳий ҳолатини кўрсатиш каби мақсадларда ишлатилади. Мас., «Ўткан кунлар»да Отабек «Ич муни, ич, жалаб!» дея заҳарланган аталани Зайнабга отади. Ушбу ўринда ишлатилган В. на Отабекнинг табиатига, на нафосат талабларига мувофиқ, лекин персонажнинг айни дамдаги руҳий ҳолатини бўрттириб тасвирлаш мақсадида жуда ўринли ишлатилган. Кўпинча В.лар матнда келтирилмайди, уларнинг ўрни кўп нуқта билан тўлдирилади. Бу ҳол, аввало, нафосат талаби билан, иккинчидан, В.ларнинг ўз ичидаги даражаланиши, улардан айримларининг бадиий матнда кўлланишини ҳеч бир ғоявий-бадиий мақсад оқлай олмаслиги билан изоҳланади. Зеро, ҳаётда учрагани ҳолда, бундай В.лар миллий маънавиятимизга, миллий ахлоқ нормаларига тамомила зиддир. Мас., Тоғай Муроднинг «От кишинаган оқшом» қиссасида шундай эпизод бор:

«— Ўчир-е ...

— Катта, знамни сўкманг. У бечора ичкарида неварасига қараб ўтирибди. Сизга бундайин бепошна гаплар эп бўлмайди.

— Ўчир дейман-е ...

— Эса, мен ҳам сизнинг ...»

Ўтган асрнинг 20 – 30-йилларида оммалашган инвектива (қ.) руҳидаги шеърларда В.лардан мухолифларга ўта салбий муносабатни ифодалаш учун ҳам кенг фойдаланилган. Мас., F.Ғулом шеъридан олинган қўйидаги:

Ким у –
 Буюк узилиш –
 Иркит қўлларда
 Қай лагөрда қавм?
 Ўртоқ,
 Ўйла, кўр,
 Мана у душман –
 Номард ўлумтик
 Кўк кўйлак билан ўз ичимиизда, –

парчада ғоявий душманларга муносабатни ифодалаш учун «иркит», «ўлумтик» каби В.лар кўлланган. Бундан ташқари, айрим манбаларда персонажлар нутқидаги услубий жиҳатдан ўта ғализ жумлалар, талаффузи бузилган сўзлар ҳам В. саналади.

ВУЛЬГАР СОЦИОЛОГИЗМ – XX асрнинг 20 – 30-йиллари шўро адабиётшунослигига кузатилган қарашлар тизими, адабиётта ёндашув тамойили. В.с. марксча «базис-устқурма» ақидасини, адабиёт ва санъат ижтимоий-иктисодий базиснинг устқурмаси, улар мағкура соҳаси сифатида синфий табиатга эга деган қарашни мутлақлаштириш натижаси ўлароқ юзага келган. В.с. намояндалари фикрича, адабиёт ва санъат мавжуд ижтимоий муносабатларга, бадий ижод эса ижодкорнинг синфий мансублигига бевосита боғлиқ бўлиб, худди шу нарса адабий асарнинг мазмун-мундарижасини белгилайди. Натижада бадий адабиёт билан ижтимоий фанларнинг мазмун-мундарижаси, мақсади ва вазифалари орасида ҳеч бир фарқ кўрилмайди, бадий адабиёт ижтимоий ҳаётнинг бадий иллюстрациясига айлантириб қўйилади. В.с.нинг назарий асослари В.Фриче, В.Ф.Переверзев, В.А.Келтуяла сингари адабиётшуносларнинг асарларида, шунингдек, пролеткультчилар ҳамда ЛЕФчиларнинг назарий қарашларида ўз аксини топган. Шўро адабиётшунослигига В.с. кескин танқид қилинган, 30-йиллар матбуотида бу масалада муросасиз баҳслар бўлиб ўтган. Жумладан, Ҳ.Олимжоннинг «Ўқиш ва ўрганиш қийинчиликлари тўғрисида», «Марксизм ниқоби остидаги меньшевизм» номли мақолаларида ҳам В.с., унинг назариётчиси Переверзев ва унинг издошлари кескин танқид қилинган. Шунга қарамай, шўро адабиётшунослиги ўз фаолиятида В.с. таъсиридан буткул кутулолмади, чунки шўро адабиётшунослигига етакчилик қилган социологик метод билан В.с. чегараси жуда нозик, у томон оғиб кетиш ҳеч гап эмас.

Г

ГЕРМЕНЕВТИКА (юн. *hermeneuo* – тушунтирумoque, талқин қилмоқ) – тушуниш назарияси, матнни талқин қилиш тамойиллари ҳақидаги таълимот, гуманитар фанларнинг методологик асоси. Г.нинг илдизлари қадим Farb ва Шарқ маданиятига бориб тақалсада, XIX асрга келибгина алоҳида фан соҳаси сифатида шаклланган бўлиб, немис файласуфлари Ф.Шлейермахер ва В.Дильтейлар фаолияти билан боғлиқ. Таълимотнинг кейинги ривожида М.Хайдеггер, Г.-Г.Гадамер, П.Рикёр, М.Бахтин сингари олимларнинг хизмати катта бўлди. Г.нинг марказида ТУШУНИШ масаласи туради. Жумладан, Ф.Шлейермахер Г.ни, умуман, ёзма манбаларни «тушуниш санъати ҳақидаги таълимот» деб билади. Унга кўра, ҳар қандай ёзма манба (матн) икки ёқлама табиатга эга; бир томондан, у тил тизимиға нисбатан қисм, иккинчи томондан, муайян бир индивиднинг ижод маҳсулидир. Шунинг учун Г. олдида бир-бирига боғлик иккита вазифа туради: биринчиси – матндаги лисоний ифодани муайян тил тизимининг узви сифатида ўрганиш («грамматик» талқин), иккинчиси – унинг ортида турган бетакрор субъектни англаш («психологик» талқин). В.Дильтей ўзининг «ҳаёт фалсафаси»да Г.га билish назариясининг хусусий томони эмас, балки гуманитар фанлар («руҳ ҳақидаги фанлар»)нинг асоси сифатида қаради. Зоро, унга кўра, тушуниш ҳаёт аталмиш бутунликни адекват ифодалашнинг ягона воситаси бўлиб, у туфайли ҳаётни идрок этиш мумкин бўлади. Дильтейнинг таъкидлашича, ҳар қандай индивиднинг ижод маҳсали ҳаётни объективлаштиришдан бошқа нарса эмас; инсон ўзиша шахсда ҳам ўзида тушуна олган нарсани тушунади. Шу тариқа ҳаёт (тарихий-руҳоний олам) идрок этувчи (тушунаётган шахс)га нисбатан изоморфдир, монанддир.

Г.нинг фалсафага айланиши М.Хайдеггер номи билан боғлиқ бўлиб, у «тушуниш»ни билish эмас, мавжудлик усули деб қаради. Унга кўра, тушуниш инсон мавжудлигининг асосий белгиларидан

бири; инсон мавжудлиги аввалбошдан тушуниш тақозо этиладиган ҳолат, шу ҳолатни тушунтириш Г.нинг вазифасидир. Унинг шогирди ва давомчиси Г.-Г.Гадамер учун ҳам «тушуниш» инсон мавжудлиги билан боғлиқ универсал категория: унинг нафақат муайян матнга, умуман, оламга муносабатининг асосида ҳам «тушуниш» ётади. Яъни у матнни талқин қилиш амалиёти ва назарияси бўлмиш Г.га экзистенционал феноменологияни пайвандлайди. Гадамерга кўра, матнни тушуниш жараёни билан ўқувчининг ўз-ўзини тушуниш жараёнини бир-биридан ажратиб бўлмайди, тушуниш кўп жиҳатдан ўқувчига боғлиқ. Бироқ бу матн талқини мутлақо эркин, ўқувчи маънавий-рухий эҳтиёжларидан келиб чиқиб уни хоҳлаганидек тушуниши мумкин дегани эмас: талқин матнда моддийлашган мазмунни тушуниш демақдир. Шунинг учун Гадамер ўтмишда яратилган матнни «замона»лаштириб тушунишга, унга замона муаммоларини сингдиришга қарши. Унинг таълимотида тил асосий ўрин тутади, чунки тил туфайлигина анъана тирик, тил руҳиятида эса «ҳаракатдаги тарихий онг» воқе бўлади: тушунмоқчи бўлаётганимиз асар, у биздан тарихан қанчалик узоқ бўлмасин, биз билан диалогта киришади, шу асно ўша асар ҳам, биз амалга ошираётган талқин ҳам «канъана ҳодисаси»нинг узвига айланади. Бироқ бу фикрга Г. билан шугулланувчи мутахассисларнинг бари ҳам қўшилмайди. Жумладан, Гадамердан фарқли ўлароқ, Э.Бетти ўзга шахснинг англанишида талқин қилувчи шахсияти, унинг ижодий фаоллиги ҳал қилувчи аҳамиятга эга деб билади. Умуман, ҳозирги вақтда Г. доирасида турлича йўналишлар, қатор баҳсли масалалар ҳам мавжуд. Француз олимни П.Рикёр ҳозирги Г. доирасида иккита бир-бирига зид йўналиш борлигини айтиб, биринчисини телеологик Г., иккинчисини эса археологик Г. деб атайди. Анъанавий Г.ни телеологик деб атаркан, Рикёр унинг мақсадлилигидан, яъни асосий эътибори матннинг зоҳирий мазмунни ва унда акс этган шахс руҳини англашга қаратилганидан келиб чиқади. Иккинчи йўналиш эса археологик бўлиб, у матн (гап)нинг воқе бўлиш сабабини ва шундан келиб чиқсан ҳолда ботиний мазмунини англашга қаратилгандир. Рикёр археологик Г.нинг илдизлари инсоннинг мавжудлик асосини иқтисодий манбаатда кўрган Маркс, ҳокимиятга интилишда деб билган Ницше ва жинсий майллардан излаган Фрейд таълимотларида деб ҳисоблайди. Унинг ўқтиришича, инсон шафқатсиз дунёда ўзига овунч излайди, уни ўзи яратиб олган оламдан топадики, бу олам унинг ўз МАЪНОларидан иборатдир. Археологик Г. шу иллюзор

оламда воқе бўлган матн ортида турган одамнинг ўзи ҳам англамаган (онгсизлик) ёки атайнин яширган маъноларни топиш, «фош этиш» билан шуғулланади. Шу сабабли ҳам Рикёр Гадамернинг лингвоцентрик қарашига қўшилмайди, унинг учун тил анъанаси эмас, балки символлар устувор аҳамият касб этади. Археологик Г.да тушунишнинг энг муҳим хусусияти – диалогиклуга птур етади, бунда талқин қилувчи билан матн ортидаги шахс мулоқоти йўқ, матн ортидаги субъект ҳам обьектга айланади.

Албатта, адабиётшунослик учун фалсафий Г.дан кўра анъанавий тушунчадаги, яъни матнни талқин қилиш («тушуниш») назарияси сифатидаги Г. муҳимроқ. Шу билан бирга, ноанъанавий Г.ни ҳам тўла инкор қилиб бўлмайди, аксинча, талқинда унинг усуllibини қўллаш самарали натижа бериши мумкинлигини эътибордан соқит қилмаслик керак, зоро, улар талқин қилувчи билан матн ортидаги шахс мулоқоти (диалог)нинг янада жонлироқ бўлишига хизмат қиласди.

ГИМН (юн. *hymnos* – мадҳия) – 1) қадимги юонон адабиётида илоҳларни улуғлаш, мақташ учун куйланган қўшиқ. Юононлар Аполлонни мадҳ этиш учун *леан*, Дионис мадҳи учун *дифирамб* тўқиб куйлашган. Кейинчалик тарихий воқеалар, қаҳрамонлар мадҳ этилувчи тантанавор қўшиқлар ҳам Г. деб юритилган. Г.нинг илк на-муналари Миср, Месопотамия, Хиндистон халқлари адабиётида учрайди. Г.га хос хусусиятлар сифатида тантанаворлик, фахр-ифтихор, руҳий кўтаринкиликтининг бўртиб туриши, маросим ва тантаналарда кўпчилик томонидан ижро этилиши кабиларни кўрсатиш мумкин; 2) мазмунан дастурий характердаги шеър асосидаги тантанавор қўшиқ, муайян ижтимоий ҳаракат, уюшма, муассаса, давлат ва ш.к.ларнинг атрибутиларидан бири, мадҳияси. Мас., Ўзбекистон Республикаси Давлат мадҳияси, «Интернационал», «Жаҳон демократик ёшлари федерацияси гимни» ва ҳ.

ГИПЕРБОЛА (юн. *hiperbole* – ўта катталаштириш, бўрттириш) – тасвирланаётган нарса ёки ҳодисанинг у ёки бу жиҳатини ўта бўрттириш, катталаштириш асосига қурилган бадиий усул, стилистик фигура; кўпроқ халқ оғзаки ижоди, романтизм шеърияти, сатирик асарларга хос (қ. муболага).

ГОНГОРИЗМ – испан шоири Л.де Гонгора-и-Арготе (1561 – 1627) номи билан боғлиқ ҳолда испан ва португал тилларидаги адабиётларда юзага келган барокко доирасидаги оқим (қ. барокко).

ГОТИК РОМАН – XVIII асрнинг иккинчи ярми – XIX асрнинг биринчи ярмида Европа ва Америка адабиётларида оммалашган тематик жиҳатдан фарқланувчи роман тури. Г.р.лар ғайриоддий, даҳшат ва сирларга тўлиқ воқеаларни қаламга олиши билан характерланади. Мутахассислар Г.р. маърифатчилик романларига хос рационализмнинг зидди ўлароқ майдонга чиққани, бадиий адабиёт тараққиётида романтизмлди ҳодисаси сифатида воқе бўлгани ҳамда Европа ва Америка адабиётларида романтизмнинг қарор топишига сезиларли таъсир қилганини таъкидлайдилар. Г.р.нинг асосчилари ва йирик намояндалари сифатида инглиз адиллари Х.Уолпол, А.Радклиф, М.Льюис, француз адаби Ж.Казотлар эътироф этилади.

ГРАДАЦИЯ (лот. gradatio – изчил кучаймоқ) – мазмунни изчил кучайтириб боришга асосланган стилистик фигура. Г.нинг икки хил кўриниши мавжуд бўлиб, биринчиси нутқий бирликларни маъносиға кўра белги-хусусият (ҳолат, ҳаракат ва б.)ни кучайтириш (кли-макс), иккинчиси эса сусайтириш (анткли макс) тартибида кетмакет кёлтириш орқали воқе бўлади. Мак., Иқбол Мирзо шеъридан олинган қуйидаги парчада маънонинг кучайтирилган такрори кузатилади:

*Сөвгилим,
дилсизлар дилларимизни
тошбўрон қилсалар,
вайрон қилсалар,
тиконлар қопласа йўлларимизни...*

Бунда маъно «тошбўрон – вайрона – тиконзор» тарзида кучайтирилади: тошбўрон – вайрона – тиконзор – кучайтирилган. Тошбўрон – вайроналикнинг юқори даражаси. Бу ўринда Г. лирик қаҳрамон кечинмалари динамикасини ифодалайди, туйғуни кучайтириб, кечинмани чуқурлаштириб боради. Аксинча, Э.Шукур қуйидаги шеърда худди шу самарага белги-хусусиятни сусайтириб борувчи нутқий бирликларни такрорлаш орқали эришади:

*Жаҳонга сигмасак, уйга сигмасак,
Қаёққа кетармиз, эй дил, қаёққа?
На-да гул бўлолдик, на ўт, на кесак
Қаёққа кетармиз, эй дил, қаёққа?*

ГРАФОМАНИЯ (юн. grapho – ёзмоқ, тапіа – касаллик, дард) – иқтидори бўлмаган ҳолда ёзишга ружу қўймоқ. Г. ёзувчиликни жўн тушуниш, унга шуҳрат ва бойликка эришишнинг осон йўлларидан бири деб қараш, ўзининг ижодий имкониятларини реал баҳолай олмаслик оқибатида юзага келади. Китоб нашр этиш имкониятлари кенгайган ҳозирги кун шароитида Г. кенг тарқалган ҳодисага айланди. Г. маълум даражада касаллик саналиши («мания» психик касалликка нисбатан ишлатилади) мумкин, чунки унга йўлиқкан киши ўз битикларини танқидий баҳолашдан оқиз бўлиб қолади, ўзгалар фикрини қабул қилмайди, ўзини тан олинмаган даҳо деб билади, ҳар қандай йўл билан асар ёзиш ва чоп эттиришга интилади.

ГРОТЕСК (итал. grotta – ер остидаги уй) – бадиий адабиёт ва санъатдаги образлиликтининг фантастика, кулги ва муболагага асосланган бир тури, услуб, бадиий усул. Г.да реаллик ва хаёлот, гўзаплик ва хунуклик, фожеавийлик ва комиқлик каби бир-бирига зид жиҳатлар ғалати, ажабтовур бир тарзда бирикиб кетади. Бадиий шартлиликтининг бошқа турларидан фарқли равишда, Г. ҳамиша на-мойишкорона ошкоралиги билан ажралиб туради. Г. асосида яратилган бадиий воқелик нечоғлик ғайритабии, мантиқиз, ажабтовур бўлмасин, унинг мантиқий асосланиши талаб қилинмайди, зеро, унда реал воқелик эмас, ижодкор тасаввуридаги воқелик акс этади. Г. терминининг пайдо бўлиш тарихи ҳам қизиқ: шогирдлари билан Римдаги қазишмаларда иштирок этган машхур рассом Рафаэль ер ости биноларида турфа безаклар, одамлар, жонивору ўсимликларнинг ғайритабии суратлари солинган топилмаларга дуч келади. Шу топилмалардаги ўзига хос тасвир услуби кейинчалик Г. терминига асос бўлди. Г. образлиликтининг жуда кўхна тури, архаик даврлардаги турли ғайритабии махлуқлар (сфинкслар, кентаврлар, химералар ва б.) тасвири унинг илк намуналариdir. Бироқ қадим аждодлар учун Г. бадиий шартлилик (усул, услуб ёки образлилик тури) бўлмаган, улар бу нарсаларни ҳақиқатда мавжуд деб билишган. Кўпроқ мифология таъсирида Г.дан антик ижодкорлар асарларида ёк бадиий усул сифатида фойдаланила бошланган, бироқ унинг адабиёт ва санъат арсеналидаги муҳим воситалардан бирига айланishi ўрта асрларга келиб амалга ошди. Энди Г. реалистик унсурлар билан уйғунлашиб, воқеликни идрок қилиш, унга муносабатни ифодалашнинг бекиёс воситасига айланди. Уйғониш даврига келиб карнавал маданиятига хос Г. адабиётда ҳам ўз аксини топди, худди карнавалдаги каби

Г. кулгиси бир пайтнинг ўзида ҳам инкор, ҳам тасдиқдир. Худди шу жиҳатлари билан Ф.Рабленинг «Гаргантюа ва Пантагрюэль» асари «гротеск реализми»нинг мумтоз намунаси бўлиб қолди. Г. имкониятларидан Ж.Свифт, В.Гюго, Гофман, Н.В.Гоголь, Салтиков-Шчедрин, М.Булгаков, Ф.Кафка сингари йирик сўз санъаткорлари унумли фойдаланганлар. Ўзбек адабиётидаги Г.нинг яхши намуналарини О.Мухтор («Минг бир қиёфа»), Х.Дўстмуҳаммад («Бозор») асарларида кўриш мумкин.

ДАДАИЗМ (фр. dada – ёғочдан ишланған үйинчоқ от, күчма маңнода болаларга хос бетартиб нутқ) – Бириңчи жағон уруши даври Европа адабиети ва санъатидаги авангардистик оқим; Бириңчи жағон урушида қатнашаётган юртлардан бетараф Швейцарияга келиб мұхожирлиқда яшаётган анархистик кайфиятдаги ижодий зиёлілар мұхитида шаклланған, Цюрихда чол этилган «Кабаре Вольтер» (1916 – 1917) журнали теварагида уушған. Д. моҳият эътибори билан урушға, жағон урушини көлтириб чиқарған мұхитта қарши исён зди. Уларнинг исёни мавжуд тартиботларни инкор қилиш, үларни маңысиз (абсурд) деб ҳисоблашда, анархизмни бундай шароитда энг мақбул мавқе деб билишда намоён бўлади. Шулардан келиб чиқиб Д.нинг санъат ва адабиётдаги исёнкорлик мавқеи белгиланған: улар бадиий ижодда иррационализм тарафдори бўлғанлар, адабий-бадиий анъаналарга нисбатан нигилистик антиэстетизм мавқеини эгаллаганлар. Уларнинг ижод амалиётидаги исёни адабиётда сўз ва товушларни маңносиз бириктириш, тасвирий санъатда нарсаларни ўзаро мазмуний-мантиқий алоқасиз, тасодифий тарзда жамлаб тасвирлаш кабиларда намоён бўлади. Д. вакиллари адабиёт ва санъатнинг ижтимоий функцияларини инкор қилғанлар, чинакам санъат ижтимоийликдан холи бўлади деб ҳисоблаганлар. Адабий-бадиий оқим сифатида Д. узоқ яшамади: ўттан асрнинг 20-йиллари бошида ёқ барҳам топди, унинг қаторида бўлған ижодкорларнинг бир қисми сюрреалистлар, бошқа бир қисми эса экспрессионистлар сафини тўлдирди.

ДЕВОН (ар. دُون – ёзиш, рўйхатга олиш, тўплам) – Шарқ мумтоз адабиётидаги шеърий тўпламларнинг асосий тури. Д.га шоирларнинг ўзлари ёки бошқа шахслар (котиблар, шогирдлар, мұхлислар ва ш.к.) томонидан тартиб берилган. Шарқ адабиётда Д. тартиб бериш анъанаси шаклланған бўлиб, бу анъанага қатъий амал қилинган. Д.га киритилган шеърлар, бир томондан, жанрига кўра, иккинчи

томондан, алифбо (бу талаб, асосан, ғазалларни жойлаштиришга күйилади) тартибига кўра жойлаштирилади. Д.лар, кўпинча, ғазал жанри билан, баъзан эса қасида билан бошланади. Навоийнинг «Хазойин ул-маоний» куллиёти таркибига кирувчи «Гаройиб уссиғар» Д.ига ғазал, мустазод, мухаммас, мусаддас, таржиъбанд, маснавий, қитъа, рубой тарзида тартиб берилган бўлса, «Бадойеъ ул-васат» Д.и ғазал, мустазод, мухаммас, мусаддас, таржиъбанд, қасида, қитъа, чистон, туюқ тарзида тартибланган. Кўриниб турганидек, шеърий мажмуанинг Д. саналиши учун унинг таркибига мумтоз лирикага ҳос барча жанрлардаги шеърларнинг кириши шарт эмас, адабиётимизда факат ғазаллардан тартибланган Д.лар ҳам мавжуд (Навоий. «Наводир ун-ниҳоя»; Атойи Д.и.). Ғазаллар Д.дан қофияланувчи мисраларининг қайси ҳарф билан тугаётганига қараб ўрин әгаллайди.

ДЕКАДЕНТЛИК (лот. decadentia – таназзул, тушкунлик) – XIX аср охири – XX аср бошлари Европа халқлари бадиий ва ижтимоий та-факкурида кузатилган тушкунлик (таназзул) ҳолатларини умумлаштириб ифодаловчи термин. Яъни Д. алоҳида бир адабий йўналиш ёки оқимга ҳос бўлмай, умуман, шу даврда ижод қилган санъаткорларга, ҳатто улкан иқтидор эгаси бўлган айрим реалистларга ҳам у ёки бу даражада ҳос бўлган кайфият, руҳни англатади. Д. кайфияти эртанги кунга, инсоният келажагига умидсиз қараш, инсон ақлзаковати, куч-кудрати, унинг олий хилқат сифатидаги мавжудлигига ишончсизлик, мавжуд воқеликни қабул қилолмаслик кабиларда на-моён бўлади. Мазкур кайфиятнинг кенг тарқалиши унинг объектив тарзда, жамият ҳаётининг барча жабҳаларида кузатилган инқироз натижаси ўлароқ юзага келганидан далолат беради. Д. кайфияти илк бор француз символистлари (П.Верлен, А.Рембо, С.Малларме) ижодида, кейинроқ рус символистлари (Д.Мережковский, З.Гиппиус, Ф.Сологуб) фаолиятида, шунингдек, XX аср бошида оммалашган неонатуралистик проза (Л.Андреев, М.Арцибашев)да кенг кузатилади. Дунёкарош билан узвий боғлиқлиги ва бевосита ижодкорнинг воқеликка муносабати натижаси ўлароқ юзага келиши эътиборга олинса, Д. кайфиятининг кейинги давр модернистик адабиёт вакиллари ижодида тез-тез кўриниш бериб туриши ҳам табиий ва қонуний экани англашилади. Шу билан бирга, модомики, ижодкор дунё билан фаол муносабатда яшар экан, ҳаёти ва фаолиятининг муайян босқичида унинг онгию қалбida шундай кайфият устуворлик қилиб қолиши мумкинлигини ҳам инкор этиб бўлмайди.

ДЕТАЛЬ (фр. *détail* – тафсилот, майдын чүйдө) – бадий деталь; бадий асарда муайян мазмун ифодаловчи, тоякий-бадий юк ташувчи тафсилот. Аввало, Д. бадий воқеликни яратиш воситаси – ашёси бўлиб, у тасвирланаётган нарса-ҳодисани конкретлаштиради, уни ҳиссий идрок қилиш мумкин бўлган тарзда гавдалантиради. Бошқача айтсан, Д. асарда тасвирланган образнинг кичик бир қисми (яъни у ҳамиша предметлиликни кўзда тутади), деталларнинг бирикуви натижасида ўша образ кўз олдимиизда бутун ҳолда намоён бўлади. Бадий Д. ортида маълум бир реалия мавжуд: майший турмуш ёки жой тафсилотлари, портрет чизгилари ва ш.к. Шунингдек, персонажнинг имо-ишоралари (жест), тана ҳолати (поза), хатти-харакати, гап-сўзлари ҳам Д. саналади, улар бари бирликда конкрет инсон образини гавдалантиради. Яъни бадий Д., аввало, бадий воқеликни тўлақонли ва конкрет ҳис этиладиган даражада жонли тасвирлашга хизмат қиласди. Бироқ бадий асардаги Д.нинг функцияси шунинг ўзи билан чекланмайди. У бадий воқелик ашёси бўлиш билан бирга бадий умумлаштиришга интилади, ёзувчи фикрини аниқлаштириш, тўлдириш, кучайтириш мақсадларига ҳам хизмат қиласди. Мас., А.Қахҳорнинг «Анор» ҳикояси қўйидагича бошланади: «Туробжон эшиқдан ҳовлиқиб кирад экан, қалами яктагининг енги зулфинга илиниб тирсаккача йиртилди. Унинг шашти қайтди. Жўхори туяётган хотини унинг қўлидаги тугунчани қўриб келисопни келининг устига қўя чопди. Кели лапанглаб ағанади, чала туйилган жўхори ерга тўкилди». Ушбу парчанинг ўзида ҳаракат («ҳовлиқиб кирмоқ», «келисопни келининг устига қўя чопди»), портрет («қалами яктак»), пейзаж («зулфин»), майший турмуш («кели», «жўхори», «тугунча») Д.лари бўлиб, улар бирликда шу конкрет ҳаётий ҳолатни ўкувчи кўз олдида жонлантиради. Яъни бу уларнинг бирламчи функцияси. Бундан ташқари, мас., «зулфин» Д.и умумлаштириш функциясини бажаради: одам кирганида, енги зулфинга илиниб йиртилиши учун, эшик кичкина бўлиши керак, демак, ҳовли ҳам шу эшикка яраша. Кўринадики, биргина «зулфин» Д.и оиланинг яшаш шароити ҳақидаги информацияни умумлаштириб беради. Парчадаги иккинчи Д. – «тугунча» иккала персонажни бирдек ҳаяжонлантиради: «тугунчанинг олиб келингани» Туробжон учун ҳам, хотини учун ҳам ўта аҳамиятли (психологик функция), мазкур ҳол ўкувчи диккатини унга йўналтиради, ҳолатга беписанд қарамаслик кераклигига ишонтиради (рецептив установка бериш функцияси). Парчада бошқа Д.ларнинг ҳам шунга ўхшаш функциялари бор, бундан ташқари,

уларнинг функцияси шу парча доираси билан чекланмайди. Демак, бадий Д. асар матнида полифункционал табиатга эга бўлади.

ДЕТЕКТИВ АДАБИЁТ (ингл. detective – изқувар) – саргузашт адабиётнинг бир тармоғи, сюжети асосида сирли жиноятларни очиш билан боғлиқ воқелар ётувчи асарларнинг умумий номи. Д.а. турли жанрларга мансуб асарларни – ҳикоя, қисса, романларни ўз ичига оладики, бу унинг тематик жиҳатдан ажратилишини кўрсатади. Шу боис адабиётшуносликка оид айрим ишларда, муомала амалиётида мавзу жиҳатидан Д.а. га яқин бўлган ҳарбий разведка, турли маҳфий хизматлар фаолияти ҳақидаги, шунингдек, бошқа кўплаб ўткир сюжетли, лекин бевосита жиноят қидирув билан боғлиқ бўлмаган асарлар ҳам Д.а.га мансуб саналади. Д.а.нинг классик намуналари XIX аср Европа адабиётида яратилган бўлиб, асосчиси сифатида француз адиби Эдгар По эътироф этилади. Унинг «Морг кўчасидағи қотиллик» (1841) номли асарида илк бор ҳайратомуз мантиқий таҳлил қобилиятига эга изқувар образи яратилган, асар сюжети тўлалигича жиноятни очиш билан боғлиқ воқеалар силсиласидан иборат. Д.а. тараққиётида А.Конан Дойл, Г.Честертон, Ж.Сименон, А.Кристи, Ю.Семёнов каби ижодкорларнинг катта хизматлари бор. Қизиқарли авантюрага бой сюжет, ўқишилилк Д.а.нинг кенг оммалашиб боришига асос бўлди. XX асрга келиб оммавий ахборот воситалари имкониятларининг кенгайиши, кино ва телевидениенинг ривожланиши билан боғлиқ ҳолда Д.а.га талаб янада кучайди. Энди кенг омма талабига мос Д.а. намуналари – Жеймс Бонд типидаги жосулар, Фантомас типидаги ақлли жиноятчилар, мафия ичидаги хуфия иш юритаётган ёки жиноят оламига қарши якка курашаётган полициячию маҳфий хизмат ходимлари ва ш.к.лар ҳақидаги олди-қочдиларга тўла асарлар кўпайди.

ДИАЛЕКТИЗМ (юн. dialektos – шева, лаҳжа) – маълум бир ҳудудда яшовчи кишилар тилига хос лексик бирликлар, фонетик, морфологик, синтактик хусусиятлар жами. Д.лар адабий асарларда тасвирланаётган жой колоритини беришда, маълум ҳудуд кишиларига хос турмуш тарзини тафсилли жонлантириш, персонажлар нутқини индивидуаллаштиришда муҳим аҳамият касб этади. Шу боис Д.лар кўлланиши жиҳатидан анча фаол. Мас., Т.Мурод асарларида Сурхондарё воҳаси кишиларига хос шева элементлари кўплаб учрайдики, улар воҳа кишилари ҳаёти, ўзига хос феъл-атвори, руҳиятининг ҳаққоний ва тўлақонли тасвирланишига замин яратган. Хусусан, «От кишнаган оқшом» қиссасидан олинган куйидаги парча-

ларда тилнинг турли сатҳларидаги Д.ларни кўриш мумкин: «Кўплари мени етиб келди, улоққа узалди»; «Шунда Тарлон бирдан ... сойга қараб зинкийди»; «Тарлон бир-бир босиб оёқ илди»; «Мен араз уришни яхши кўраман»; «Шунда узанги йўлдошларимга юз солдим»; «Гўбалакда бингак нишидай заҳар ниш бўлади»; «Ажабо, бундайчикин қилиғи йўқ эди» «хамсоюмиз Кулмат полвон бозорлаб келди», «Кимнинг ули бўласан?» ва бошқ. Тил ўзида халқ руҳини мужассамлаши Т.Муроднинг полвонлар, улоқчилар ҳаётидан ҳикоя қилувчи қиссаларида, айниқса, яққол намоён бўлади. Персонажларнинг ўзига хос нутқи воҳа кишиларига хос турмуш тарзи, урф-одат, инонч-эътиқодларни жонҳи тасвирилашга хизмат қиласди. Мас., «От кишинаган оқшом» қиссасида шундай эпизод бор:

«– Чақалоқли уйга бемаҳалда келиб бўлмайди. Мабодо бирор билмасдан келиб қолса, ундан улгу олиб қолиш лозим бўлади.

– Қаердан оласан?

– Бизга барибири. Ўнгирингизнинг учидан майдагина бир ип бўлса-да майли. Аёллар чақалоқли уйда ипни исириқча қўшиб тутатадилар».

Д.лар, одатда, кўпроқ персонажлар нутқига киритилади. Уларнинг кўлланиши адабий тилни бойитувчи омиллардан саналади, шунга қарамай, бунда муайян меъёрни сақлаш талаб қилинади.

ДИАЛОГ (юн. *dialogos* – гаплашиш, сухбат) – 1) икки ёки ундан ортиқ кишининг нутқий мулоқоти, сухбат; 2) адабий-бадиий матн компоненти, асардаги персонажларнинг нутқий мулоқоти берилган ўринлар. Ҳозирги замон прозаси *ривоя*, *тавсиф* ва диалогдан таркиб топади; замонавий эпик асарларда диалог салмоғининг ортиши кузатиладики, бунга турлараро синтезлашув, бадиий адабиётнинг бошқа санъатлар билан ўзаро алоқаси натижаси сифатида қараш мумкин; 3) фалсафий-публицистик мазмун йўналишидаги жанр, унда қўйилган масала бир неча кишининг сухбати шаклида муҳокама этилади. Д. жанрига антик даврнинг Сукрот, Афлотун сингари мутафаккирлари асос согланлар. Кейинчалик ўрта асрлар, Ўйғониш даври ва Европа маърифатчилик адабиётида ҳам Д. жанри анча фаол бўлган. Ўзбек адабиётида Д.нинг илдизлари *мунозара* жанрига бориб тақалади. XX аср бошлари ўзбек адабиётида Д. жанри, унга хос унсурлардан маърифатчилик гояларини оммалаштиришда самарали фойдаланилди. Жумладан, Фитратнинг «Мунозара», «Бедил» асарларини Д. жанри намунаси санаш мумкин.

ДИДАКТИК АДАБИЁТ (юн. *didaktikos* – ўргатувчи, таълимий) – мұайян таълимий, тарбиявий мақсадларда яратилған адабий асарларнинг умумий номи. Адабиётнинг таълимий-тарбиявий имкониятлари жуда катта бўлиб, унга қадимдаёқ эътибор қаратилған. Жумладан, антик давр юонон файласуфи Афлотун «Давлат» номли асарида бу имкониятлардан қандай фойдаланиш масаласини атрофлича муҳокама қиласди. Д.а. намуналари мавзу эътибори билан турлича, улар нимани ўргатишни мақсад қилгани жиҳатидан бир-биридан фарқланади. Мас., Д.а.нинг бир қисми *илмий шеърият* деб ҳам юритилади ва маълум бир илм соҳасини оммалаштириш мақсадини кўзлайди: зироатчилик (Гесиод. «Мехнат ва кунлар»), дунёнинг тузилиши (Лукреций Кар. «Нарсалар табиати ҳақида»), тиббиёт (Ибн Сино. «Тиб илми»), поэзия санъати (Н.Буало. «Шеър санъати») ва б. Шарқда ҳам адабиётнинг дидактик имкониятларидан кенг фойдаланилган. Шарқ мумтоз адабиётидаги Д.а.нинг яхши намуналари сифатида Саъдийнинг «Гулистон» ва «Бўстон», Кайковуснинг «Қобуснома», Юсуф Хос Ҳожибининг «Кутадгу билиг», Аҳмад Юғнакийнинг «Ҳибат уя-ҳақойик», Алишер Навоийнинг «Ҳайрат ул-аброр», Бобурнинг «Мубаййин» каби панднома руҳидаги асарларини кўрсатиш мумкин. Мазкур асарлар мазмун-мундарижаси жиҳатидан универсал бўлиб, турли даражадаги ижтимоий муносабатлар, инсоннинг бурчи ва вазифалари, дунё ва охират, эътиқод, одоб-ахлоқ, илмнинг аҳамияти каби ҳаётда зарур турфа масалалардан баҳс юритади. Шунингдек, Шарқда диний маърифатни тарғиб этувчи асарлар ҳам Д.а.нинг муҳим бир тармоғини ташкил этади: «Девони ҳикмат» (А.Яссавий), «Сирож ул-муслимин» (А.Навоий), «Сабот ул-ожизин» (Сўфи Оллоёр) каби кўплаб асарлар диний-дидактик адабиёт намуналариридир. XX аср бошларига келиб жадид маърифатчилик ҳаракати билан боғлиқ ҳолда ўзбек адабиётида дидактиклик тамойили яна устуворлик касб этади. Янги усул мактабларини услубий таъминлаш мақсадида яратилған А.Авлонийнинг «Туркий Гулистан ёхуд ахлоқ», Ҳамзанинг «Енгил адабиёт» каби асарлари том маънодаги Д.а. намуналари бўлса, жадиду маърифатчиларининг деярли барча асарларида дидактиклик, гоявий-маърифий дидактика етакчи хусусият бўлиб қолди. Адабиёт тараққиётининг кейинги босқичларида соғ дидактик характердаги асарлар камайиб, асосан, болалар адабиёти доирасида кузатилади, энди ошкор дидактиклик камчилик сифатида тушунилади, сўз санъати ўзининг дидактиклик функциясини сездирмасдан, баркамол бадий образлар воситасида амалга ошириш йўлини тутади.

ДИЛОГИЯ (юн. *dī* – күшма сўзларда «икки», *logos* – сўз, ҳикоя, ривоят) – композицион жиҳатдан нисбий мустақилликка эга икки асардан ташкил топган асар. Д. таркибидаги икки асарни ижодий ниятнинг яхлитлиги, бир-бирини давом этирувчи умумий сюжет чизиқлари, умумий персонажларга эгалик бир бутунга айлантиради. Шунинг учун, мас., Чўлпоннинг «Кеча ва кундуз» романи Д. сифатида режалаштирилган бўлиб, муаллиф ижодий нияти Д. бутунлигига амалга ошиши лозим эди. Д.нинг «Кундуз» номли иккинчи қисми йўқолгани сабабли, унинг биринчи қисми – «Кеча» тугалланмаган асар деган таассурот қолдиради. Ёзувчи М.Исмоилийнинг «Фарғона тонг отгунча» романини Д.га мисол сифатида кўрсатиш мумкин.

ДОСТОН – 1) туркий халқлар оғзаки ижодидаги эпик жанр. Халқ оғзаки ижодидаги Д.лар воқеабанд сюжет асосига қурилган йирик ҳажмли асарлар бўлиб, улар баҳши (оқин, жиров, манасчи)лар томонидан мусиқа (дўмбира, қўбиз ва б.) жўрлигига ижро қилинган, оғиздан-оғизга ўтиб бизгача етиб келган. Бу жараёнда ҳар бир ижро-чи ўзидан нимадир кўшган, ниманидир тушириб қолдирган ва шутариқа Д.лар сайқалланиб борган. Халқ ижодидаги Д.нинг матний қурилиши ижрога мос – унда насрый ва шеърий парчалар алманиб туради: ривоя, асосан, насрда амалга оширилса, қаҳрамонлар орасидаги энг муҳим диалоглар, уларнинг руҳий ҳолатлари, таърифу тавсифлар, ижрочи муносабати ва ш.к. кўпроқ шеърий йўлда берилади; 2) мумтоз адабиётимиздаги йирик ҳажмли, одатда, маснавий шаклида ва арузнинг маълум бир вазнида ёзилувчи шеърий асар. Мумтоз адабиётимиздаги Д.ларнинг аксариятини яхлит воқеа асосидаги сюжетга қурилган (мас., «Фарҳод ва Ширин», «Лайли ва Мажнун») эпик асарлар ташкил қиласи. Шу билан бирга, сюжети изчил ва яхлит бўлмаган (мас., «Ҳайрат ул-аброр») ёки умуман воқеабанд сюжетсиз (мас., «Хибат ул-хақойик») Д.лар ҳам мавжудки, улар турли ижтимоий-маънавий, ахлоқий-таълимий масалалардан баҳс юритувчи лиро-эпик характердаги фалсафий-таълимий ёки дидактик асарлардир; 3) замонавий адабиётда кенг тарқалган йирик ҳажмли шеърий асар, унга синоним тарзида поэма атамаси ҳам кўлланади. Ҳозирги адабиётда Д.лар битта умумий ном билан аталса-да, жанр хусусиятларига кўра улар турличадир. Шунинг учун амалиётда лирик достон, эпик достон, драматик достон каби аниклаштирувчи атамалар кўлланади. Муайян Д.ни булардан бирига мансублигини белгилашда ўша достон структурасида лирик, эпик ёки драматик элементлардан қай бирининг етакчи мақомга эгали-

гидан келиб чиқилади. Мас., шеърий ривоя – воқеани ҳикоя қилиш устувор «Ўч» (Ойбек), «Ойгул билан Бахтиёр» (Х.Олимжон) каби асарлар эпик достон, воқеа лирик кечинмани ифодалаш воситаси бўлган «Сурат» (Миртемир), «Рух билан сұхбат» (С.Зуннунова), «Нидо» (Э.Воҳидов) каби асарлар лирик достон, воқеа драматик кўринишларда кўрсатилувчи «Маҳмуд Торобий» (Ойбек), «Жаннатга йўл» (А.Орипов) каби асарлар эса драматик достон тарзида фарқланади. Адабиётшунослиқда Д. (поэма)ларнинг ҳаммасини бирдек лиро-эпик жанр ҳисоблаш ҳоллари ҳам борки, юқоридагилардан келиб чиқилса, бу унчалик тўғри эмас. Д.ни лиро-эпик жанр деб атаркан, унинг «баён қилинаётган эпик воқеани лирик қаҳрамон муносабати орқали ифодалаш» хусусияти асос қилиб олинади. Ҳолбуки, биринчидан, Д.ларнинг ҳаммасида ҳам «воқеа лирик қаҳрамон муносабати орқали» берилмайди, иккинчидан, ҳар қандай асарда, у хоҳ эпик, хоҳ драматик асар бўлсин, тасвирланаётган воқеага муаллиф муносабати у ёки бу тарзда мавжуд. Шундай экан, лиро-эпик жанрга барча Д.ларни эмас, структурасида эпик ва драматик унсурлар мавқеи бир хил мақом тутган Д.ларнигина (мас., «Рухлар исёни») киритган тўғрироқ бўлади.

ДОХИЛ (ар. داخل – киравчи, кирган) – қаранг: муқайяд қофия

ДРАМА (юн. *drama* – ҳаракат) – 1) бадиий адабиётнинг учта асосий туридан бири. Д.нинг тасвир предмети – ҳаракат, у, Арасту таърифича, «барча тасвирланаётган шахсларни ҳаракат қилаётган, фаолиятдаги кишилар сифатида тақдим этади». Д. объектнинг пластик образини яратади, унда субъект – ижодкор шахси ҳам объектга сингдириб юборилади. Д. адабиётга ҳам, театр санъатига ҳам бирдек тааллуқли: уни ўқиб ҳам қабул қилиш мумкин, айни чоғда, у театр асари – спектаклнинг асоси. Бошданоқ саҳнага мўлжаллаб ёзилиши драматик асарнинг қурилиши, поэтик ўзига хослигини белгиловчи энг муҳим омилдир. Чунки у саҳна ижросини ҳам кўзда тутиши зарур. Бу нарса Д.нинг ташқи қурилишидаёқ кўринади (парда ва кўринишларга бўлингандлик, ремаркаларнинг ижрони кўзда тутган ҳолда берилиши). Ижрога мўлжаллангандлик Д.нинг ички структурасини ҳам белгилайди. Жумладан, Д.даги ҳаракат – сюжет воқеалари макон ва замонда чекланган, ижро вақтига сигиши учун сюжетнинг кескин конфликт асосида шиддат билан ривожланиши тақозо этилади. Д.да концентрик сюжет типи етакчилик қиласи, сюжет воқеалари сабаб-натижка муносабатлари асосида бир марказга уюштирилади. Сабаб-натижка муносабати воқеаларнинг юз бериш жойи ва вақти жиҳатидан яқин

бўлишини талаб қилади. Яъни драматург асарни яратадиганидаёк сюжет воқеаларининг ижро вақтига сифиши ҳакида қайғуриши, сюжет воқеаларини кескин конфликтлар асосида шиддат билан ривожлантириши заруратга айланади. Д.да сюжет воқеалари юз берадиган мақон ҳам чекланган: биринчидан, воқеалар кечадиган жойни саҳнада шартли қайта яратиш (жой йиллюзиясини ҳосил қила оладиган декорациялар ёрдамида) мумкин бўлиши лозим; иккинчидан, воқеалар мақоний ўзгаришлар жиҳатидан ҳам чекланган, яъни улар кўпли билан тўрт-беш жойдагина кечиши мумкин. Бир парда давомида содири бўлувчи воқеаларнинг битта жойда кечиши, сюжет воқеалари шу жой билан боғлиқ ривожланиши эътиборга олинса, Д.нинг сюжет курилишига ижро имкониятлари кучли таъсир қилиши аён бўлади.

Драматург асарда жонлантироқчи бўлган ҳаёт материалининг айрим унсурларини саҳнада қайта яратиш имкони йўқлигидан, Д.нинг «шартлилик» даражаси жўда юқори бўлади. Чунки муаллиф ишоралар ёрдамида уларни ҳам томошабин (ўкувчи) тасаввурнида уйғотиши, саҳнада бевосита жонлантирилиши мумкин бўлган воқеаларни тўлдириши зарур бўлади. Мас., муаллиф ремаркаларида «саҳна ортида отлар дупури, қиличлар жарангি», «саҳна ортидан кескин тўхтаган машина овози эшитилади» қабилидаги ишоралар берилади, уларнинг ёрдамида саҳнада жонланмаган нарса шартли (яъни ўкувчи тасаввуридагина) жонлантирилади. Д.да сюжетга киритиш имкони бўлмаган воқеа ёки тафсилотларнинг персонажлар тилидан мухтасар берилishi ҳам шартлиликнинг бир кўриниши бўлиб, у персонаж нутқига таъсир қилади. Чунки бу воқеа ва тафсилотлар персонажларга маълум (жонли мулокотда уларни эслатиш шарт эмас), бироқ улар ўкувчи (томушабин)да тасаввур ҳосил қилиш учун зарур ва шу зарурат туфайли сұхбат табиийлиқдан чиқиб, шартлилик касб этади. Яъни тафсилотларни шу йўсун (персонажлар тилидан) бериш мажбурияти драматик асар персонажлари нутқининг бироз «сунъий», «саҳнавий» бўлишига олиб келади. Д.нинг асосий нутқ шакли – диалог. Унда кўлланувчи монологик нутқ ҳам шартлилик кўринишидир. Монологик нутқ шаклида персонажларнинг мушоҳадалари бериладики, овоз чиқариб ўйлаш ҳам шартлиликнинг бир кўринишидир. Айни пайтда, Д.даги монологик нутқ курилиши ўзига хос: у кўпроқ пресонажнинг ўзи билан ўзи ёки хаёлидаги ким биландир сұхбати, баҳси, кимгадир мурожаати тарзида қурилади. Яъни битта персонаж тилидан айтилгани ҳолда ҳам драмадаги монологик нутқ диалогик асосга эгадир.

Драматик асарнинг ўқилиши ва саҳна талқинида бир қатор ўзига хосликлар мавжуд. Д.ни ўқиётган ўқувчининг ижодий фаоллиги билан шу асар асосидаги спектаклни томоша қилаётган томошабиннинг ижодий фаоллиги бир хил эмас. Ўқувчи ўқиш жараёнида «режиссёр» вазифасини зиммасига олади, драмани тасаввуридаги саҳнада жонлантиради; айни пайтда, у «актёр» сифатида ҳар бир персонаж ролини ўйнаши ҳам керак. Д.да объектив ибтидонинг устуворлиги унинг турли ўқувчилар тасаввуррида турлича «саҳналаштирилиши»га асос бўлади. Саҳналаштирилган драматик асарда бадиий мулоқот занжири узаяди: томошабин ва драматург орасида режиссёр (актёрлар, рассом, бастакор ва х.) ўрин олади. Бошқача айтсан, саҳналаштирилган драматик асар сўз санъати доирасидан чиқиб синтетиклик касб этади, сабабки, энди ўнда театр, рассомлик, мусиқа санъатлари уйғунлашиб кетади. Аён бўладики, драма бошқа санъат турлари билан ўзаро алоқада яшайди ва ривожланади. Зоро, драманинг табиати, яъни ижро учун мўлжаллангани унинг шу санъат турлари билан узвий алоқада бўлишини тақозо этади.

Д.нинг асосий жанрлари сифатида *трагедия, комедия ва драма* (жанр маъносида) кўрсатилади. Драматик асарларни жанрларга ажратишда уларнинг асосий эстетик белгиларига таянилади. Трагедиянинг асосий эстетик белгиси трагиклик, комедиянинг асосий эстетик белгиси комиқлик, драманинг асосий эстетик белгиси эса драматиклик саналади. Бундан ташқари, кичик драматургик жанрлар, шунингдек, турли жанр модификациялари ҳам мавжуд. Жумладан, жанр модификацияси сифатида *музиқали драма, мусиқали, комедиялар* кўрсатилиши мумкин. Мусиқа жўрглигидә ижро этишга мўлжаллангани, диалог ва монологлар ўрнини қисман вокал (ария ва дуэтлар) эгаллаши уларнинг ўзига хослигини, синтетик санъат намунаси эканлигини кўрсатади. Айрим санъат турларининг, оммавий ахборот воситаларининг ривожланиши натижасида драматургиянинг янги жанрлари пайдо бўлди, борлари фаоллашди. Мас., эстрада санъатининг ривожи натижасида, монолог (бир актёр театри) жанри дунёга келди, кўгиричоқ театрлари ривожи ва модернизацияси унинг учун ёзиладиган пьесаларни фаоллаштириди, телевидениенинг ривожи миниатюраларни, турли маданий-маърифий тадбирларнинг оммалашуви эса *интермедија* жанрини фаоллаштириди; 2) драматик турнинг учта асосий жанридан бири, тарихий тараққиёт жараёнида драматик турнинг қадимда пайдо бўлган трагедия ва комедия жанрларига бир-бирининг зидди деб қаралган

бўлса, Д. уларнинг синтези сифатида XVIII асрга келиб майдонга чиқкан. Синтезлашув, айниқса, Д.нинг мустақил жанр сифатидаги илк шаклланиш даврида яқол кўринади. Жумладан, комедия сингари Д. ҳам одамларнинг шахсий ҳаётини тасвиirlайди, бироқ ундан фарқли равишда камчилигу нуқсонлардан кулишни эмас, балки жамият билан мураккаб муносабатлардаги шахсни тасвиirlашни мақсад қиласди. Трагедиядаги каби ўткир зиддият ва тўқнашувлар қаламга олингани ҳолда, Д.даги конфликт муайян ечимга эга, у ёки бу даражада ижобий ҳал қилиниши мумкин бўлган конфликтдир. Трагедия қаҳрамонлари фавқулодда кучли шахслар (бунга зид равишда комедияда тубан табақа кишилари) бўлиши талаб этилса, Д. қаҳрамонига бу хил талаблар кўйилмайди – унинг қаҳрамони ҳаётйроқ. Реализм босқичига яқинлашгандарни драматургияда трагедия ўрнини, етакчилик мавқенини Д. эгаллай бошлайди. Чунки Д. реалликдан олинувчи турли мавзуларни, характер ва зиддиятларни бадий талқин қилишга кенг имкониятлар очиши, худди ҳаётнинг ўзидағи каби трагизм ва комизм элементларини уйғунлаштира олиши, реал ҳаётга яқинлиги билан драматик жанрлар орасида алоҳида ўрин тутадики, унинг реалистик адабиётда етакчи мавқе эгаллаши шў билан изохланади.

ДРАМАТИЗМ – бадийлик модуси. Драматиклик модус сифатида идиллия, элегия билан бир гурӯхни ташкил этади (қ. бадийлик модуслари). Драматик «мен» ўзлигини бошқа бир «мен» билан ўзаро муносабатдагина англайди ва намоён этади. Унинг учун дунё олам тартиботи эмас, балки ўзганинг (ёки ўзгаларнинг – жамиятнинг) ҳаёти сифатида идрок этилади. Драматик шахс ўзга билан муносабатда ўзлигини намоён этиш имкониятларининг чегараланганлигидан қийналади. Мас., «Ўткан кунлар»даги Отабек трагик қаҳрамон сингари олам тартиботига қарши туроётгани йўқ, балки ўзгалар нуқтаи назарига (маиший ҳаёт доирасида эскича урф-одатларга, ижтимоий доирада эскича идора тизимига) қарши туради. Трагизмда олам тартиботи қадриятлар, анъаналар кўринишида қаҳрамон онгига унинг шахсий майл ва истаклари, интилишлари билан зиддиятни юзага келтиради. Драматик қаҳрамон эса ўзига қарши турган кучларнинг қадриятларини ўзганинг қадрияти сифатида англайди ва уларни қабул қилолмайди (мас., «Ўткан кунлар»да Отабек, «Даҳшат»да Унсин). Шунга кўра, драматик конфликт трагик конфликт каби келишириб бўлмас зиддият эмас, ундан ҳал этиш имкониятларининг мавжудлиги билан фарқланади. Драматизмда

айб ва хато трагизмдаги каби ўнглаб бўлмас фожеа, жиноят сифатида тушунилмайди. Драматизмда хато ва айблар, қаҳрамон бошдан кечирган можаролар сабоқ чиқариш учун ҳам зарур. Шунинг учун драматизмда муаллиф қаҳрамонни кўпинча янги йўл бошида қолдиради (мас., «Диёнат»да Отакўзи Умаровнинг Нормурод домла қабри тепасидаги ўйлари, «Даҳшат»да Нодирмоҳбетимнинг додхо хонадонидан бош олиб кетиши). Демак, драматик конфликт характерига кўра шахснинг ўзлигини намоён этишини чегаралаётган ташки кучлар билан зиддиятидир. Драматик қаҳрамон ҳаётда ўзига белгиланган ролнинг ижро чегараларига сифмайди, драматизмнинг юзага келиши учун элегиявий узлатнишинликни ёнгиш талаб этилади. Яъни элегиявий қаҳрамондан фарқли ўлароқ, драматик қаҳрамон ўзининг ташки, ўзгалар билан алоқадаги ҳаёти учун масъулликни хис қиласидиган шахсадир. Элегиявийликдаги каби мавжудликнинг драматизмга хос кўриниши ҳам ёлғизлик, бироқ бу элегиявийликдаги иложсиз ёлғизлик эмас, балки ўзга «мен» билан биргаликдаги ёлғизлик. Негаки драматик вазият ўзига хос «мен» билан ўзига хос «сен»нинг ўзаро муттасил алмашиниб турувчи яқинлашиш ва узоклашиш жараёнидир (Нормурод Шомуродов – Отакўзи).

E

ЕЧИМ – сюжет унсури; эпик ёки драматик асар асосида ётган асосий воқеалар ривожининг якуни, уларнинг ниҳоясида қаҳрамонлар рухиятида, тақдирида юзага келган ҳолатни, персонажлар орасидаги конфликтнинг ечимини баён этувчи сюжет қисми. Е.да конфликтли ҳолат, қаҳрамонлар орасидаги зиддиятлар ўзининг бадиий ечимини топади. Бироқ бу қатъий қоида эмас. Кўплаб асарларда Е.дан сўнг ҳам зиддиятлар, қаҳрамонлар тақдиридаги чигалликлар ҳал қилинмаганича қолаверади, бу ўқувчини ўйлашга, мушоҳада қилишга ундейди. Яъни том маънодаги Е.нинг мавжуд эмаслиги асарнинг таъсир кучини, ўқувчининг ижодий фаоллигини оширишга хизмат қилувчи усулга айланади. Мас., П.Қодировнинг «Эрк», О.Ёкубовнинг «Матлуба», «Қанот жуфт бўлади», Х.Султоновнинг «Саодат соҳили» каби қиссаларида шундай. Демак, Е.ни асардаги конфликт (ва у орқали қўйилган проблема)нинг ечими сифатида эмас, балки ундаги воқеалар ривожининг якуни, натижаси сифатида тушуниш тўғрироқдир. Е. турли типдаги сюжетларда турли даражада намоён бўлади. Арасту таъбирича, «бошланиши, ўртаси ва охири» бўлган **концентрик** (қ. *сюжет*) **сюжетли**, тугундан Е.га томон ривожланиб борувчи ўзаро сабаб-натижага муносабати асосида боғланган воқеалар силсиласидан иборат сюжет асосига қурилган асарларда Е., яъни «тугуннинг ечими» бўлган воқеанинг охири яққол кўзга ташланади. Айни пайтда, адабиётда ҳроникали (қ. *сюжет*), Арасту таъбирича, эпизодик сюжеттага қурилган асарлар ҳам кенг тарқалган бўлиб, уларда Е. яққол кўзга ташланмайди. Аниқроғи, бундай асардаги ҳар бир эпизод ўз Е.ига эга бўлади, эпизодлар орасида эса сабаб-натижага муносабати эмас, даврий муносабат ётади. Мас., «Ўткан кунлар» романида биринчи эпизоднинг Е.и – Отабекнинг уйланиши, иккинчи эпизодники – Отабекнинг ғанимларини ер билан яксон қилиши, учинчи эпизоднинг Е.и – Кумушнинг ўлими. Асада сюжетнинг ҳроникалилик даражаси органи сари, сюжет Е.и хиралашиб боради, яъни энди ундаги «тугуннинг ечими» маъноси йўқолиб, «воқеаларнинг охири» маъноси бўртади. Мас., П.Қодировнинг «Юлдузли тунлар» романи.

Ж

ЖАНР (фр. genre – жинс, тур, хил) – адабий жанр, адабий асарларнинг тарихан шаклланувчи типи, муайян давр миллий ёки жаҳон адабиётида умумий хусусиятлари билан турли кўламдаги гурухларни ташкил қилувчи асарларни англатувчи тушунча. Ж. терминининг кўлланишида турличалик кузатилади: айрим манбаларда Ж. термини адабий тур (эпос, лирика, драма) маъносида ишлатилса, бошқа бирларида анча тор маънода (эпос – тур, роман – хил, тарихий роман – жанр) кўлланади. Шунга қарамай, Ж. терминининг бир адабий тур доирасидаги умумий хусусиятлари билан фарқланувчи асарлар гурухи (мас., эпос – адабий тур, ҳикоя, қисса, роман – Ж) маъносида кўлланиши кенгроқ оммалашган. Тарихий категория сифатида адабий Ж.лар системаси муттасил ҳаракатда яшайди: янги Ж.лар вужудга келади, такомиллашади, истеъмолдан чиқади; ҳар бир алоҳида Ж.да ҳам муттасил сифат ўзгаришлари кузатилади, бадиий ижод амалиёти унинг шаклий ва мазмуний хусусиятларига муттасил ўзгартиришлар киритиб боради. Иккинчи томондан, янги давр адабиётида XVIII асрдан бошлаб бадиий ижодда индивид ролининг муттасил ортиб бориши баробарида, анъанавий Ж. канонлари ҳам емирилиб боради: эндилиқда муайян ижодкорнинг у ёки бу Ж.да яратган асари ҳам қатор ўзига хосликларни, яъни конкрет асарга хос Ж. хусусиятларини намоён этаверади. Яна бир жиҳати, ҳар бир давр адабиётидаги Ж.лар тизими адабий, анъаналарнинг давоми ва адабий алоқалар натижаси ўлароқ янада ранг-баранг тус олади: фаол Ж.лар билан бир қаторда анъанавий ва хорижий адабиётлардан ўзлашган Ж.лар ҳам истеъмолда бўлади. Демак, ҳар бир давр адабиётининг Ж.лар тизимини синхрония/диахрония аспектларида ўрганиш тақозо этилади. Айтилганларнинг бари, албатта, Ж. назариясини ишлаб чиқишда қийинчлилик тугдиради, ҳали бу борада умумэътироф этилган, тугалланган таълимот ёхуд тизимли тарзда амалга оширилган Ж.лар таснифининг мавжуд эмаслиги шундан. Бу табиий ҳам, чунки, биринчидан, Ж.лар системаси муттасил ўзгаришда экан, у ҳақдаги назарий қарашибош ҳам адабиёт

тараққиётининг ўтиб бўлинган муайян босқичига нисбатангина тугал бўлиши мумкин. Иккинчидан, ижод амалиётида индивидуалликнинг роли ортган шароитда Ж. канонларини қатъий белгилаб бўлмайди, шу боис таъриф ва таснифда ҳар бир Ж.га хос энг умумий белгиларни асосга олиш билан қаноатланишга тўғри келади. Бундай умумий белгилар сифатида конкрет асарнинг адабий турга мансублиги, асосий эстетик белгиси, композицион хусусиятлари, тасвир кўлами, бадиий нутқ шакли ва табиати кабилар кўрсатилиши мумкин. Мас., асосий эстетик белгисига кўра драматик жанрлар (комедия, трагедия, драма), ҳаётни қамраб олиш кўламига кўра эпик жанрлар (ҳикоя, қисса, роман) бир-биридан яққол фарқланади. Яъни бу белгиларни дастлабки асос қилиб олгач, эътиборни Ж.нинг бошқа белгиларига қаратиш мумкин бўлади. Мас., трагедиянинг асосий эстетик белгиси *трагиклик* бўлса, бу Ж.га мансуб этилиши учун асарда яна трагик ҳолат, трагик конфликт ва трагик қаҳрамон бўлиши ҳам тақозо этилади. Ёки ҳикоя, асосан, қаҳрамон ҳаётидаги битта воқеани қаламга олади, бу – жанрнинг асосий белгиси. Лекин битта воқеа қисса, ҳатто романга ҳам материал бериши мумкин. Демак, асарни ҳикоя жанрига мансуб этиш учун яна унинг ҳажман кичик бўлиши, характернинг тайёр ҳолда берилиши; сюжет асосида «воқеалар ривожи» эмас, балки «воқеанинг ички ривожи» (яъни воқеадан-воқеага тарзида эмас, воқеанинг эпизодидан-эпизодга тарзидаги ривожланиш) ётиши талаб этилади. Бундан кўринадики, Ж.лар тизими муттасил ўзгаришда бўлса ёки конкрет асар ўзига хос Ж. хусусиятларини намоён этса-да, ҳар бир адабий Ж.да юқоридаги каби муайян даражада турғун хусусиятлар ҳам мавжуд экан. Бу эса Ж.ни поэтик матрица деб ҳисоблаш имконини беради. Поэтик матрица бадиий воқеликни ташкиллаш принциплари бўлиб, асарларда бадиий воқеликларнинг турфалигига қарамай, ўзида уларнинг бари учун умумий жиҳатларни жамлайди. Поэтик матрицани бадиий ёки кундалик мулокот нутқидаги клише (қолип, синтактик конструкция) ларга қиёсан тушуниш кулай. Нутқий мулокотга киришаётган инсон тил воситаларидан фойдаланган ҳолда информация етказиш, унга муносабатини ифодалаш ва тингловчига муайян таъсир кўрсатиш мақсадларини кўзлайди. Бунинг учун у онгида мавжуд тайёр клишеларга тил материали (сўзлар)ни муайян алоқа ва муносабатда жойлаштириши лозим. Шуниси муҳимки, бир томондан, клишеларнинг тилдан фойдаланувчиларнинг бари учун умумий эканлиги ўзаро бир-бирини тушунишнинг асоси, иккинчи томондан, умумий клише-

лардан фойдаланган ҳолда ҳар бир сўзловчи нутқи индивидуал хусусиятларини ҳам намоён этаверади. Шунга ўхшаб поэтик матрица-лар ҳам моҳияттан юқорироқ даражадаги клишелар бўлиб, улар бадий хотирада мавжуд, улар воситасида ижодкор бадий воқеликни яратади, яъни ҳаёт материалини муайян бадий информацияни етказадиган, унга муносабатини ифодалайдиган ва ўқувчига муайян таъсир ўтказадиган тарзда жойлаштиради.

ЖАРГОН (фр. jargon – бегона, тушунарсиз тил) – муайян ижтимоий қатлам, кичик гурухга хос «шева», умумхалқ тилидан фарқланиб, асосан, шу «шева» вакилларига тушунарли бўлган унсурлардан таркиб топади. Ж., асосан, лексик ва фразеологик бирликлар ҳисобига юзага келади, шунинг учун у тилнинг лексик ва фразеологик сатҳларида воқе бўлувчи ҳодиса сифатида таърифланади. Бироқ амалда Ж. кўпинча бу икки сатҳ чегарасидан чиқади, яъни бутун бошли гап ҳам Ж. саналиши мумкин. Шунинг учун терминнинг кенгроқ – «шева» сифатида тушунилиши тўғрироқ бўлади. Ж. бадий асарда персонажлар нутқини индивидуаллаштириш, мұхит колоритини бериш мақсадида, асосан, персонажлар нутқида қўлланади.

ЖИМ ҚОЛИШ – стилистик фигуralардан бири, шеърий мисраларда ифодаланаётган фикр ифодасини атайин тугатмай қолдириш. Ж.қ.да фикр охиригача ифодаланмаса-да, унинг аниқ англашилиб туриши шарт, бунинг учун эса аввалги мисраларда пухта замин ҳозирланиши лозим. Мас.:

Мән сөндан кетмоқ истайман

Ёмғирдек эмас, –

Ёмғир яна қайтиб келади.

Мән сөндан кетмоқ истайман

Шамолдек эмас, –

Шамол яна қайтиб елади.

Мән сөндан кетмоқ истайман

Мұҳаббат каби... (Х.Даврон)

Шеърнинг дастлабки икки сатри учинчи мисра билан, кейинги икки сатри олтинчи мисра билан изохланса, сўнгти икки сатрда шоир бу йўлдан бормайди – жим қолади, изоҳни шеърхоннинг ўзи ўзича шакллантириши зарур бўлади. Бунга матнда етарли асос бор: шеърнинг биринчи ва иккинчи уч мисрали бандлари синтактик (строфик) параллелизм усулида қурилган бўлиб, учинчи мисралар дастлаб-

ки икки мисрани изохлайди, яъни «нега ёмғирдек эмас? – чунки у қайтиб келади», «нега шамолдек эмас? – чунки у қайтиб келади». Сўнгти мисрадаги «каби» билан аввалги мисралардаги «эмас»нинг зидлиги охиригача ифодаланмаган фикрни «муҳаббат каби – чунки у қайтиб келмайди» тарзида тушунишга асос бўлади.

ЖОМИЙ УЛ-ХУРУФ (ар. جامع الحروف – ҳарфларни жамловчи, ўз ичига қамраб олувчи) – мумтоз адабиётдаги шеърий санъат, алифбодаги барча ҳарфларни тақорорсиз кўллаган ҳолда байт айтиш. Яъни Ж.ҳ. асосида ёзилган байтда алифбодаги барча ҳарфлар иштирок этиши ва уларнинг ҳеч бири иккинчи ўринда тақорорланмаги талаб этилади. Ўз-ўзидан аёнки, мазкур талабни уддалаш ғоят мушкул. Бир томондан, юзага келтириш имконининг жуда ҳам чеклангани, иккинчи томондан, кўпроқ шаклбозлилка мойил бўлганидан шеъриятда у қадар оммалашмаган.

ЖОНЛАНТИРИШ – кенг маънода метафоранинг бир кўриниши, жонсиз нарса-ҳодисаларга инсон, умуман, жонли мавжудотга хос сифатларнинг берилиши. Шунингдек, жониворларга инсонга хос сифатларнинг берилиши ҳам Ж.нинг бир кўриниши (*антропоморфизм*) саналади. Ж. бадий асарда турли даражада воқе бўлади: 1) стилистик фигура. Инсон тафаккурига хос аналогиялар асосида (метафорик) фикрлаш, тил анъаналари билан боғлиқ ҳолда ва муайян ғоявий-эстетик мақсадни кўзлаб бадий нутқда нарса-ҳодисаларга жонли мавжудотларга хос хусусиятлар берилади. Мас., «Ҳовлиқма жилғалар чопар беэга» (А.Орипов) сатрида инсонга хос сифат («ҳовлиқма») ва ҳаракат тарзи («чопмоқ») жилғага берилмоқдаки, бу билан манзаранинг жонли, таъсирчан чиқишига эришилмоқда. Стилистик фигура сифатидаги яна бир кўриниши эса апострофадир (қ.); 2) бадий усул. Муайян бир мақсадни кўзлаган ҳолда нарса-буюмлар инсон каби ҳаракатлантирилади: улар ўйлайди, изтироб чекади, қувонади ва ш.к. Мас., «Ўткан кунлар»даги Кумушнинг хуснига маҳлиё ариқ суви, Х.Султоновнинг «Ёзнинг ёлғиз ёдгори» қисссасидаги милтиқ; 3) образлилик тури. Кўп ҳолларда Ж. асосида рамзий ва аллегорик образлар яратилади. Жумладан, мумтоз адабиётдаги *ташхис* санъати (қ. *ташхис*) бунга мисол бўла олади. Образлиликнинг мазкур тури ҳозирги адабиётда ҳам фаол қўлланади.

ЖУЗВ (ар. جزو – бўлак, қисм, парча, бутун эмас) – арузда сокин ва мутаҳаррик ҳарфларнинг муайян тартибда бирикишидан ҳосил бўлувчи ритмик бирлик, ҳарф билан руқн орасидаги ритмик бўлак. Ҳозирги адабиётшуносликда Ж. термини кўпроқ мазкур маънода

кўлланса-да, мумтоз арузшунослиқда ушбу тушунча баъзан рукн (Қайс Розий, Ҳусайнний, Навоий), баъзан эса асл (Тарозий) деб юритилган. Ж. термини араб арузига татбиқан фаол, тўркий арузга нисбатан эса кам кўлланади, чунки туркий арузда ҳижо термини ҳарф ва жузе маъноларини аксар ўзига қамраб олади. Шу боис Фитратдан кейинги ўзбек арузшунослигига бу икки термин ўрнига ҳижо терминини қўллаш кўпроқ оммалашган. Ж. мутаҳаррик (чўзғили) ва сокин (чўзғисиз) ҳарфларнинг муайян тартибда бириншидан ҳосил бўлади ва шундан келиб чиқиб Ж.нинг уч хили ажратилади: *сабаб, ватад, фосила* (к.).

3

ЗАРБ (ар. ضرب – урмоқ, зарба бермоқ; иккинчи мисранинг сўнгги бўлagini зарб билан, ургу билан айтиш) – қаранг: тақтиъ

ЗИҲОФ (ар. حف – ўзгарган, аслидан узоқлашган, четлашган, жойидан қўзғолган) – аруз шеър тизими асосини ташкил қилувчи 8 асланинг сифат ёки миқдор жиҳатидан турли ўзгаришларга учраши. Аслларнинг 3.га учраши натижасида уларнинг турли тармоқлари – фуруълар ҳосил бўлади. Асллар уч хил йўл билан 3.га учраши мумкин: 1) ҳижоларнинг миқдор жиҳатдан ўзгариши. Бунда руҳн таркибидаги ҳижолар сони ўзгаради, яъни, асосан, руҳн таркибидан бир ёки бир неча ҳижо тушиб қолади. Мас., фоилотун аслининг ҳазоф 3.ига учраши натижасида охирги чўзиқ ҳижо (*тун*) тушиб қолади ва фоилун (*маҳзуф*) фуруъси ҳосил бўлади; 2) ҳижоларнинг сифат жиҳатдан ўзгариши. Бунда руҳн таркибидаги ҳижолар сифати ўзгаради, яъни чўзиқ ҳижо қисқа ёки ўта чўзиқ ҳижога, қисқа ҳижо чўзиқ ёки ўта чўзиқ ҳижога, ўта чўзиқ ҳижо қисқа ёки чўзиқ ҳижога айланади. Мас., мафоийлун аслининг кафф 3.ига учраши натижасида, охирги чўзиқ ҳижо (*лун*) қисқа ҳижога айланади ва мафоийлу фуруъси (*макфуф*) ҳосил бўлади; 3) руҳн таркибидаги ҳижолар бир пайтнинг ўзида ҳам миқдор, ҳам сифат жиҳатдан ўзгаришга учрайди, яъни руҳн таркибидаги бир ёки бир нечта ҳижо туширилиб, қолган ҳижолардан бирида сифат ўзгариши юз беради. Мас., мафоийлун аслининг қаср 3.ига учраши натижасида, охирги чўзиқ ҳижо (*лун*) туширилиб, ундан олдинги чўзиқ ҳижо (*ий*) ўта чўзиқ ҳижога (*ийл*) айланади ва мафоийл фуруъси (*мақсур*) ҳосил бўлади.

ЗУЛҚАВОФИЙ (ар. نوالقافي – уч ва ундан ортиқ қофияли) – қофия билан боғлиқ шеър санъатларидан бири, байт таркибида уч ёки ундан ортиқ қофиядош сўзлар жуфтлигини келтириш. З. ритмни айрича таъкидлаш орқали байтга ўзига хос мусиқийлик, хушоҳанглик баҳш этади. Навоийнинг «Лайли ва Мажнун» достонидан олинган куйидаги байт 3.га яхши мисол:

*Ҳар қиссада шукр сол тилимга,
Ҳар ғуссада сабр бер илимга.*

Мазкур байтда «тилимга – илимга» жуфтлиги асосий қофия бўлса, «шукр – сабр» ва «қисса – ғусса» жуфтликлари ҳам ўзаро қофияланиб келмоқда. З.ни тарсеъдан фарқлаш керак (қ. тарсеъ). Яъни тарсеъда мисралардаги барча сўзлар ўзаро қофиядош бўлади, З.да эса келтирилган байтдаги каби (сол – бер) бир ёки бир неча қофиядош бўлмаган жуфтликлар қолиши мумкин.

ЗУЛҚОФИЯТАЙН (ар. زعلة قلبين – икки қофияли) – қофия билан боғлиқ шеър санъатларидан бири, байт таркибида асосий қофиядан ташқари яна битта қофиядош сўзлар жуфтлигини келтириш, яъни З. байтда қофиядош сўзлар жуфтлиги иккита бўлишини тақозо қилади. Навоийнинг «Лайли ва Мажнун» достонидан олинган қуйидаги байт З.га мисол бўлади:

*Лола қадаҳини тошқа урдунг,
Жола гуҳарини бошқа урдунг.*

И

ИБТИДО (ар. **ابتدأ** – бошланиш) – қаранг: **тақтиъ**

ИБХОМ (ар. **ابهام** – ёпиқ сүзлаш, ёпіб ўтмоқ, беркитмоқ) – мумтоз адабиётдаги шеърий санъатлардан бири. И.да ғап бүлаклари (ассан, бош бүлаклар) шундай жойлаштирилады, уларнинг синтактик вазифасини турлича (эгани кесим, кесимни эга тарзида) тушуниш мумкин бўлади ва шу асосда бошқа бир маъно келиб чиқади. Яъни И. қўлланган байт (мисра)даги ғап бўлакларининг ўрнини алмаштириб шунга мос ургу ва оҳангда ўқилса, байтнинг иккинчи маъноси келиб чиқади. Мас., «Висолинг шавқидан кун бўлди тун» мисрасида «тун» эга деб тушунилса, «тун ёришди» маъноси; «кун» эга деб тушунилганда, «кун тунга айланди, куннинг ўтгани билинмай қолди» маъноси англашилиши мумкин. «Қутадғу билиг»даги:

*Баъзиси золимдан чекади алам,
Баъзига йўқчилик келтиради ғам, –*

байтида «йўқчилик келтиради ғам» жумласини «йўқчилик кишига ғам келтиради, киши йўқчилик туфайли ғам чекади» тарзида ҳам, «ғам инсонга йўқчилик келтиради, ғам чеккан инсон йўқчиликка учраши мумкин» тарзида ҳам тушуниш мумкин. И. санъати мумтоз шеърията у қадар фаол қўлланмаса ҳам, ўзига хослиги билан ҳамиша ижодкорлар қизиқишига сабаб бўлиб келган. Шу боис ҳозирги шеърията ҳам И. санъатининг яхши намуналарини учратиш мумкин. Мас., Эркин Воҳидовнинг:

*Аслида ким қаарарди ётганда хор сурма,
Бўлди азиз кўзига суртганда ёр сурма, –*

матлаъсидаги иккинчи мисрани «ёр кўзига суртгани учун сурма азиз бўлди» тарзида ҳам, «кўзига сурма суртгани учун ёр азиз бўлди» тарзида ҳам тушуниш мумкин.

ИДЕАЛ, ЭСТЕТИК ИДЕАЛ (юн. *idea* сўзидан фр. *ideal* – тасаввур, тушунча) – эстетика, жумладан, адабиётшуносликнинг муҳим илмий категорияларидан бири, гўзаллик, эстетик мукаммалликнинг юксак даражаси ҳақидаги ҳис этиладиган конкрет-тимсолий шаклда акс этувчи тасаввурлар жами. Жамиятда яшаётган ҳар бир инсон онгидаги мукаммал жамият, мукаммал ижтимоий муносабатлар, мукаммал инсон ҳақидаги тасаввурлар мавжуд бўлиб, буларнинг бари И.ни ташкил қиласи ва унинг воқеликка муносабатини белгилайди. Умуман олганда, эстетик И. ҳам шунинг бир қирраси, конкрет-тимсолий шаклда воқе бўлувчи гўзаллик тасаввуридир. Ҳақиқатда И.нинг қирралари бутуннинг қисми бўлиб, уларни бир-биридан ажратиб бўлмайди. Шунинг учун мутахассислар И.нинг серқирралигини, унинг моҳияти: онг соҳасида ҳақиқат, ахлоқ соҳасида эзгулик, эстетика соҳасида гўзалликдан иборат эканлигини таъкидлайдилар. Албатта, бу қирраларнинг ҳар бири ўзининг муайян меъёрларига эга бўлиб, улар давр ўтиши билан ўзгариб, конкретлашиб боради. Мас., тасаввуф адабиётининг И.ига кўра, ҳақиқат – Ҳақ, Аллоҳ; эзгулик – Ҳақнинг буюрганини қилиш ва у қайтарганни қилмаслик; гўзаллик – шу иккисига мувофиқлиқда, нимаики буларга мувофиқ эмас, у гўзаликдан айро тушади. Инсоннинг ижтимоийлашуви билан боғлиқ ҳолда И. ҳам ҳаётга яқинлашади, у ижтимоий-сиёсий мундарижа касб этади. Мас., жадид адабиётининг И.ига кўра, ҳақиқат – миллат тараққийси (эркин ва адолатли жамият, маърифат, муносиб миллий турмуш, миллий озодлик ва б.); эзгулик – миллат тараққийсига хизмат қилувчи амал; гўзаллик – шу иккисига мувофиқлик. Давр билан боғлиқ ўзгаргани ҳолда, И.ни замонга буткул боғлаб қўйиш хато бўлур эди. Негаки И. ижтимоий характерга эга, у жуда қадим замонлардан шаклланиб, тўлишиб, конкретлашиб келади ва, айни чоғда, у моҳиятан ҳамиша келажакда бўлиб, бу ҳол уни вақт ҳукмидан холи этади. Худди шу нарса санъат асарининг боқийлигини таъминловчи асосий омилдир, чунки санъат олам ва одамни И. асосида акс эттиради, И. асосида баҳолайди. Яъни ижод онларидаги санъаткор И. оламида яшайди, воқеликни унинг нури билан ёритади. Зоро, фақат шундагина ижодкор шахс том маънодаги маънавий-руҳий бутунликка эга бўлади. Маънавий-руҳий бутунлик эса шахс интилган И.нинг мавжудлиги ва унинг ҳаётий принциплари ўша И.дан келиб чиқиши демакдир. Шунга кўра, бутунлик муайян хусусиятларни ўзида жам этган инсоннинг турғун ҳолати эмас, балки узлуксиз ва адоксиз бир жараён. Негаки реаллик билан тўқнашув ҳар вақт шахс-

нинг маънавий-рухий бутунлиги – моҳияти ва мавжудлиги орасида зиддиятлар келтириб чиқараверади. Мана шу зиддиятларни И.дан рух олган ҳолда бартараф этиш орқали мавжудлигини моҳиятига мувофиқлаштириб бориш, шу асно қадам-бақадам И.га яқинлашиб, янги-янги маъноларни кашф этиш ва уларни ўз ҳаётига, жамият ҳаётига татбиқ этиб бориш ижоднинг бош шартидир. Бу жиҳатдан том маънодаги ижодкор ҲАҚ йўлига кирган сўфийга монанд: сўфий ҲАҚқа яқинлашгани сари мавжудликнинг моҳиятини теранроқ идрок қилганидек, ижодкор И.га яқинлашгани сари ҳаётнинг, инсоннинг моҳиятини теранроқ илғайди. Сўфийлик йўлиниң ибтидоси ҳам, интиҳоси ҳам ҲАҚ бўлганидек, ижодкор фаолиятининг *мотиви* (сабаб) ҳам, *мақсади* (натижага) ҳам И.дир.

ИДИЛЛИЯ (юн. *eidyllion* – кичик манзара, унча катта бўлмаган асар) – шаклий туэилишга кўра турлича, мазмун хусусиятларига кўра таснифланувчи поэтик жанр. И. дастлаб Қадимги Юнонистонда чўпон кўшиғи сифатида юзага келган. Антик юонон шоири Феокритнинг аксар асарлари И. деб аталган. Шаклан турлича бўлган Феокрит И.лари мазмун жиҳатидан умумийликка эга: уларни инсоннинг кундалик ҳаёти, интим туйгулари, табиатга қизиқиш бирлаштириб турди, шоир эътибори кўпроқ кишиларнинг ғам-ташвишдан холи, осойишта ҳаётига қаратилади. И.да табиатдаги уйғунлик ва гўзаллик мутлақлаштирилади, уларга дахлсиз ва ўзгармас ҳодисалар сифатида қаралади. И. жанр сифатида, айниқса, XVII – XVIII асрларда Европа, XVIII аср ўрталарида эса рус шеъриятида кенг оммалашди ва ривожландиди, бу кўп жиҳатдан сентименталистларнинг «табиий инсон» гояси билан боғлиқдир. Кўчма маънода И. тинчлик ҳолати, ички ва ташқи уйғунлик, осойишталик ва хотиржамликни ифодалайди.

ИДИЛЛИЯВИЙЛИК (русчадан калька «идиллическое») – бадиийлик модуси. И. модус сифатида элегия, драматизм билан биргаликда қаҳрамонлик, сатира ва трагизмдан фарқланадиган гуруҳни ташкил этади. Яъни И.да дунё мутлақ тартибот сифатида эмас, балки шахс бевосита муносабатда бўладиган борлиқ (яъни конкрет инсон ҳаракатланаётган мухит) сифатида идрок этилади. Идиллиявий «мен» ўзини ташки олам билан бирликда ҳис қилиши нуқтаи назаридан қаҳрамонликка (қ.) яқин, бироқ ундан фарқли равишда И.да кишилик жамияти, мамлакат тақдирни билан боғлиқ муаммо қўйилмайди. Идиллиявий «мен» ўзи бевосита муносабатда бўлаётган мухит қадриятларини сўзсиз қабул қиласи ва ўзлигини уларга

оғишимай амал қилиш, мұхит билан бирлашиб, уйғунлашиб кетиш орқали намоён этади. Идиллиявий қаҳрамон бутун олам тартиботи олдидағи эмас, ўзгалар (ва улар ташиётган анъана, қадриятлар) олдидағи масъулият ҳисси билан яшайды (мас., Т.Мурод. «Юлдузлар мангу ёнади»). Шунинг учун идиллиявий модус қаҳрамони күпинча миший турмуш доирасидагина ҳаракатланади. У ўзини борлықнинг ажралмас қисми сифатида идрόк этади, ўзини құршаган мұхит (табиат, миший турмуш) стихиясига бөрілади. Идиллиявий модусга хос асосий хронотоп – аждодлар билан авлодларни бирлаштириб турувчи «қадрдан уй», «қадрдан гұша». Авлодлар ўртасидаги ворисийлик, инсон ҳәётининг авлодларда давом этиши – идиллиявий қаҳрамон мавжудларыннинг асоси, унинг учун ҳәёттинг мазмұн-моҳияти шунда. Айни шундай қарааш идиллиявий қаҳрамонға ўлимнинг муқаррарларынан келувчи изтироб ва түшкунликни енгішга күч беради, И.ни злегиявийлиқдан фарқлайди.

ИЖОДИЙ НИЯТ, МУАЛЛИФ НИЯТИ – бадий ижод жараёнидаги илк босқич. И.н. санъаткорнинг воқелик билан муносабати, воқеликни ЎЗИЧА (ўзининг эстетик идеали, дүнекараши, сажияси, маданий-маърифий даражаси, ҳәётий ва ижодий тажрибаси, туғма истеъдо-ди куввати асосида) қабул қилиши ва идрок этиши натижаси ўлароқ юзага келади. И.н.да яратилажак асарнинг асосий чизгилари, бироз хирадоқ таразда бўлса-да, кўзга ташланиб туради, бошқача айтсан, И.н. асарнинг санъаткор онгидаги хомаки эскизидир. Бадий ижод жараёнининг ўзига хослиги шундаки, санъаткор И.н.даёқ ўкувчига муайян таъсир қилишни кўзда тутади, яъни мақсад ижрога таъсир қиласи, ният ва ижро бирлашади. Зоро, санъаткорнинг эстетик идеали билан мавжуд воқелик орасидаги номувофиқлик бадий ижодга ундовчи мотив бўлса, идеалга яқинлашиш унинг мақсадидир. Демак, И.н. билан унинг ижроси, ижод мотиви билан мақсадининг бирлиги бадий ижод жараёнини яхлит, бутун ҳодисага айлантиради. Шунга кўра, ижод И.н.ни амалга ошириш, санъаткорнинг ўй-фикрлари, баҳоси, бадий концепциясини бадий образлар тизими воситасида моддийлаштириш жараёни демақдир. Албатта, И.н. турғун тушунча эмас, яъни у ижод жараёнининг бошида пайдо бўлганича қолмайди, аксинча, бевосита ижод жараёнда сайқалланиб, конкретлашиб боради, муайян ўзгаришларга учрайди. Яна бир томони, И.н. турли даражада амалга ошади ва бу табиий ҳам. Чунки И.н.нинг қай даражада амалга ошиши қатор омиллар (муаллифнинг ижодий тажрибаси, бадий маҳорати, конкрет давр шароити ва ш.к.) билан боғлиқдир.

ИЖРОВИЙ ЛИРИКА (руссадан калька: «ролевая лирика») – лириканинг субъектив шакплантирилишига кўра фарқланувчи кўринишларидан бири, лирик кечинма ўзга шахс тилидан ифода этилувчи шеър. Яъни бунда шоир гўё ўзга шахсга эврилади, унинг «роли»ни ижро қиласди, натижада И.л. қаҳрамони лирик кечинманинг ягона субъекти бўлиб қолади. И.л.нинг илдизлари куртак ҳолида халқ оғзаки ижодида (мас., келин тилидан, етим тилидан, хўқиз тилидан), мумтоз шеъриятимизда кузатилса-да, унинг кенг оммалашиши XX асрга тўғри келади. Жумладан, Чўлпоннинг «Мен ва бошқалар» шеъри И.л.нинг янги ўзбек шеъриятидаги илк ва сара намуналаридан бири сифатида кўрсатилиши мумкин. Ўтган асрнинг 20 – 30-йилларида кенг тарқалган «Қўшчи қўшиғи», «Колхозчи қиз қўшиғи», «Сувчи қўшиғи» тарзида яратилган шеърларнинг аксарияти И.л.га мансуб этилиши мумкин. Шеърнинг бу кўриниши 60-йиллардан бошлаб, айниқса, кенг тарқалди: «Ҳамза» (А.Орипов), «Абдулла Набиев» (Э.Воҳидов). 70 – 80-йиллар шеъриятида янада фаоллашган И.л.нинг асосий қаҳрамонлари тарихий шахслар бўлиб қолди: мавжудликнинг мангу муаммолари, миллат ва юрт тақдирни масалалари, жамиятнинг жорий ҳолати уларнинг кўзи билан кўрилди ва баҳоланди. Х.Давроннинг «Тўмариснинг кўзлари» шеърий тўплами, У.Азимнинг «Тушларингизга кирадиган кўзлар» туркуми аксар шундай шеърлардан таркиб топган бўлиб, улар миллий ўзликни англаш жараёнида муҳим аҳамият касб этди.

ИЗДИВОЖ (ар. ازدواج – жуфтлашмоқ, уйланиш) – мумтоз ада-биётдаги шеърий санъатлардан бири, байт мисрасида икки ёки ундан ортиқ сўзнинг ёнма-ён ёхуд бир-бирига яқин ҳолда оҳангдош (ўзаро қофиядош) бўлиб келиши. Манбаларда И.ни тазмини музда-важ деб ҳам атайдилар. Мас., Нодиранинг:

*Қилмагил зинҳор изҳор эҳтиёж
Ким, азиз элни қилур хор эҳтиёж, –*

байтида «зинҳор» ва «изҳор» сўзларининг ёнма-ён келиб ўзаро оҳангдош бўлиши И.ни юзага чиқармоқда.

ИЗОМЕТРИЯ (юн. isometria – тенг ўлчовлилик) – шеърий нутқни ташкил қилувчи бўлак (мисра)ларнинг тенг ўлчовлилиги. И. туфайли шеърдаги нутқий бўлакларнинг ҳар бири талаффузда ажралади ва шунинг ҳисобига ритмиклик яққол ҳис этилади. И. метрик шеър тизимида ритмик бўлаклар талаффуз вақтининг тенглиги (изохронизм),

силлабик шеър тизимида бўгинлар сонининг тенглиги (изосиллабизм), тоник шеъриятда эса урғулар миқдорининг тенглиги (изотонизм) ҳисобига таъминланади.

ИЙЖОЗ (ар. ایچاز – қисқа, лўнда) – оз сўз (лафз) билан кўп маъно ифода этиш. Айрим манбаларда И. ҳам санъатлар сирасида саналса-да, аслида, у санъатга нисбатан кенгроқ тушунча бўлиб, умуман, нутқ услубига хос ҳусусиятни англатади. Нутқдаги И.га зид бўлган ҳусусият, яъни оз маънони кўп сўз билан ифода этиш итноб (ёки баст), маъно кўлами ва сарф этилаётган сўз миқдорининг мувофиқлиги эса мусовот деб юритилади. Мавжуд шеърий санъатларнинг бир қисми (*ташбех, истиора, талмех* ва б.) И.ни юзага чиқарди, чунки улар ёрдамида, одатда, аслида тушунириш учун кўпроқ сўз сарф этиладиган нарса-ҳодиса, тушунчаларга оз сўз билан ишора қилинади, шу ишора туфайли байт ёки мисра мазмуни сўз билан ифодаланганига нисбатан бекиёс даражада кенгаяди. Зоро, ишора ўқувчини матндан ташқаридаги контекстга (воқелик, тарихий воқеа, бошқа бир асар ва ш.к.) йўналтиради, натижада матн мазмуни ўша контекст мазмуни билан бойийди. Аксинча, бир қатор санъатлар (*тафсир, тақрир, жам, тақсим, тафриъ каби*) маънони ифодалаш учун кўп сўз сарфла нишига, яъни итнобга олиб келади. Mac., *тафсир* (к.) санъати байтда ифодаланган фикрнинг кейинги байтларда шарҳланишини тақозо этади, маъно кўлами ўзгармагани ҳолда, матн кенгаяди. Шунинг учун илми балоғада И. ва мусовотнинг маънога халал бермаслиги, фойдасиз итнобдан сақланиш талаб этилади. Яъни барча ҳолларда ҳам мөъёрни сақлаш зарур: оз сўз билан кўп маъно ифодалаш ёки сўз ҳажмининг маънога мувофиқ бўлишини кўзлаб мазмунни хиралаштириш ҳам, шу билан бирга, ортиқча ва фойдасиз итноб ҳам маъкул эмас.

ИЙХОМ (ар. ایخوم – шубҳага солиш, адаштириш) – мумтоз ада-биётдаги шеърий санъатлардан бири, шеърда (баъзан насрда ҳам) бир сўзни бир жойнинг ўзида икки маънода ишлатиш. Ида матннаги сўзнинг бир қарашда англашилиб турган яқин маъносидан ташқари яна бир узоқроқ маъноси мавжуд бўлади ва шу узоқ маъно шоирнинг асл муддаоси ҳисобланади. Икки турли маънода ишлатилган биргина сўз бутун бошли байтни икки хил тушуниш имконини беради. Атоуллоҳ Ҳусайний И. санъати «таерия», «тах-йил», «тасвия» номлари билан ҳам юритилишини қайд этган. Mac., Навоийнинг:

*Лабингни сўргали муҳри сукут оғзима тушмиш
Ки, ул шаккар била эрним бири бирига ёпушиш, –*

байтидаги «сўргали» сўзининг яқин маъноси «сўрамоқ» бўлса, узок маъноси «сўрмоқ», яъни «бўса олмоқ»дир. Ушбу сўзининг икки ҳил маъносига таяниб Бобур ҳам қуидаги машҳур байтида И. санъатини моҳирона қўллғаган:

*Лабинг бағримни қон қилди, кўзимдин қон равон қилди,
Нега ҳолим ёмон қилди, мен андин бир сўрорим бор.*

ИЛМИ АРУЗ (ар. علم العروض – аруз илми) – мумтоз адабиётшуносликнинг таркибий қисми, аруз шеър тизимининг ўзига хос қонуниятларини ўрганувчи соҳа, арузшунослик. И.а.нинг асосчиси сифатида IX асрда яшаган араб олими Ҳалил ибн Аҳмад эътироф этилади. Араб адабиёти заминида пайдо бўлган аруз шеър тизими ўтган асрлар давомида маҳсус ўрганилиб, алоҳида илм сифатида такомиллашиб борди, аруз назариясига доир кўплаб тадқиқотлар яратилди. Ҳалил ибн Аҳмаддан кейин араб арузшунослигига Ибн Усмон Мазиний, Имом Аҳмад ибн Абдураббих, Ибн ал-Хатиб ат-Табризий; форс арузшунослигига Мавлоно Юсуф Нишобурий, Рашидиддин Вотвот, Шамс Қайс, Носириддин Тусий, Салмон Савожий, Абдураҳмон Жомий; туркий арузшуносликда Алишер Навоий, Заҳириддин Муҳаммад Бобур, Шайх Аҳмад Худойдод Тарозий каби олимлар яратган асарлар И.а.нинг ривожига ўлкан ҳисса бўлиб кўшилган. Бундан ташқари, Абу Наср Фаробий, Абу Али ибн Сино, Абул Қосим Замахшарий, Абу Яъқуб Юсуф ибн Абубакр Саккокий каби алломаларнинг бошқа масалаларга бағишланган рисолаларида ҳам арузга оид қимматли фикр-мулоҳазалар билдирилганки, И.а. ривожига уларнинг ҳам сезиларли улуши борлиги эътироф этилади. Ҳозирги ўзбек адабиётшунослигига ҳам аруз масалалари атрофлича тадқиқ этилган: ўтган асрнинг 20-йилларида Фитрат бошлаб берган арузшунослик бобидаги изланишларни кейинчалик С.Мирзаев, А.Рустамов, У.Тўйчиев, С.Ҳасанов, А.Ҳожиаҳмедов, А.Аъзамов каби кўплаб олимлар муваффақиятли давом эттирдилар.

ИЛМИ БАДИЪ (ар. علم البدع – чиройли сўзлаш, гўзал, нафис, нодир, ажойиб; бадиият илми) – мумтоз адабиётшуносликнинг таркибий қисми, нутққа безак берувчи санъатлар, уларнинг ўзига хос

жиҳатлари, таснифланиши, асар бадииятини белгилаш, эстетик функциясини ошириш, фикрни гўзал ва мазмунли ифодалашдаги ўрни каби масалаларни ўрганувчи соҳа. И.б.нинг ўрганиш обьекти бўлган нутқни гўзал қилувчи бадиий усул ва воситалар умумий ном билан санойиъ (к.) деб юритилади. Атоуллоҳ Ҳусайнин нутқни гўзал қилувчи воситаларни икки турга – зотий гўзалликлар ва оризий гўзалликларга бўлади. Зотий гўзалликлар деганда нутқнинг табиий гўзаллиги тушунилиб, Атоуллоҳ Ҳусайнин таърифига кўра, улар «дилбарларнинг табиий хусни янглигидир». Яъни бунда нутққа атайин безак берилмайди, нутқни безаш учун ишлатилаётган воситалар (сўз, ибора, тасвирий ифода ва ш.к.)дан табиий ҳолича фойдаланиллади. Улардан фарқли ўлароқ, оризий гўзалликлар нутқни безаш учун атайин ҳосил қилинади. Атоуллоҳ Ҳусайнин нутқ гўзалликларнинг биринчи тури *илми балоганинг*, иккинчи тури эса *илми бадиънинг* обьекти эканлигини таъкидлайди. Шунингдек, лирик жанрларнинг ўзига хос жиҳатларини тадқиқ қилиш ҳам И.б.нинг вазифаси ҳисобланган. Шуни ҳам айтиш керакки, И.б.га оид рисолаларда обьект доим ҳам қатъий чеклаб олинмайди: уларда кўпинча *илми балога*, *илми қофия*, *илми аруз* масалалари ҳам ёритилаверади (мас., А.Ҳусайнин. «Бадойи ус-санойиъ»).

И.б.га оид дастлабки асарлар араб тилида яратилган бўлиб, улар сирасига IX – X асрларга мансуб Наср бинни Ҳасаннинг «Маҳосин ул-калом», Ибн Мўтазнинг «Китоб ул-бадеъ», Қудама ибн Жаъфарнинг «Нақд уш-шеър» каби рисолалари киради. Кейинроқ XI асрдан бошлаб форс тилида И.б.га оид қатор асарлар яратилдики, унинг кейинги ривожи форс адабиёти билан боғлиқ ҳолда кечди. Жумладан, Умар Родуёнийнинг «Таржимон ул-балога», Рашидиддин Вотвотнинг «Ҳадойик ўс-сехр», Қайс Розийнинг «Ал-мўъжам», Атоуллоҳ Ҳусайниннинг «Бадойи ус-санойиъ», Воҳид Табризийнинг «Жамъи мухтасар» каби асарлари И.б. ривожида муҳим ўрин тутган мўътабар манбалар саналади. Туркий тилдаги И.б.га оид илк асар сифатида Шайх Аҳмад Худойдод Тарозийнинг XV асрда яратилган «Фунун ул-балога» рисоласи эътироф этилади. XX асрдан ўзбек адабиётшунослигига И.б.га оид масалалар кенг кўламда, тарихий-назарий аспектда атрофлича тадқиқ қилина бошлади. Ўтган асрнинг 20-йилларида Фитрат, А.Саъдий каби адабиётшунослярнинг бу борада бошлаган ишлари А.Ҳайитметов, А.Рустамов, Ё.Исҳоқов, Б.Саримсоқов, В.Рахмонов, А.Ҳожиаҳмедов каби кўплаб олимлар томонидан давом эттирилди ва сезиларли ютуқларга эришилди.

ИЛМИ ҚОФИЯ (ар. علم الْقُوَّفِيَّةِ – қофия илми) – мумтоз адабиёт-шуносликнинг таркибий қисми, қофия ва унинг турлари, тузилиши, унинг бадиий санъатлар ва вазн билан муносабати, шеърнинг оҳангдорлигига қофиянинг тутган ўрни каби масалаларни тадқик этувчи соҳа. Шарқ адабиётшунослигига И.қ.га оид маҳсус рисолалар (мас., Абулҳасан Али Сарабхий Баҳромий. «Канз ул-қофия»; Абдураҳмон Жомий. «Рисолай қофия»; Атоуллоҳ Ҳусайнний. «Қофия илми қоидалари ҳақида рисола» ва б.) яратиш билан бирга, илми бадиъга оид рисолаларнинг аксариятида ҳам И.қ. масалалари ни ёритиш учун алоҳида боблар ажратилган. Мас., Шайх Аҳмад Тарозийнинг «Фунун ул-балоға» асари уч бобдан иборат: «ахли табъга қофия илмин билмак мухимдир» деб билган муаллиф рисоланинг «Ал-фанны-с-соний фи қофия ва-р-радиф» (Иккинчи фан қофия ва радиф хусусида) номли иккинчи бобида И.қ. масалаларидан баҳс юритади.

ИЛТИФОТ (ар. الطفَّات – аллангламоқ, бир ҳолатдан иккинчи ҳолатга ўтмоқ) – мумтоз адабиётдаги шеърий санъат, байтда бир шахсдан бошка бир шахсга кўчиш, яъни I шахсдан II ёки III шахсга, II шахсдан I ёки III шахсга, III шахсдан I ёки II шахсга кўринишда кўчиш. Шайх Аҳмад Худойодод Тарозий И.ни «муҳотабадин муғойибаға бормоқ ё гайбдин хитобқа келмоқ» деб таърифлаган. Яъни хитоб қилинувчи (II шахс)дан нутқ сўзланиб турган вазиятда мавжуд бўлмаган III шахс (муғойиба – гайб)га кўчиш И. дейилади. Мас., Атойининг:

*Эл тирик дерлар мени, кўнглимда фикр этсам вале,
Бу тирикликда бўлур юз минг бало сизсиз менга, –*

байтида аввал III шахс (Эл тирик дерлар) ҳақида сўз боради, ундан I шахсга (фикр этсам), сўнг эса II шахсга (сизсиз менга) кўчилади.

ИЛҲОМ (ар. الْهَام – едирмоқ, рухлантирмоқ) – санъаткор руҳиятида юзага келувчи ижодий-руҳий ҳолат, ижодий фаолиятнинг юксак завқ билан, кўнгилли ва енгил кечишини таъмин этувчи кўтаринки ишchan кайфият. Ижодкор кишиларда кузатилувчи мазкур ҳолат одамларга қадимдаёқ маълум бўлганки, уни турлича изоҳлашга ҳаракат қилганлар. Жумладан, қадимги юононлар И. музалар – аёл қиёфасидаги илоҳий мавжудотлар томонидан берилади деб ҳисоблаганлар, Шарқда ҳам И.ни ғайбдан дейишга мойиллик кучли бўлган: ҳозирда ҳам тез-тез тилга олинадиган «илҳом париси»

қабилидаги гаплар шунинг излариdir. Албатта, И. онларини, унинг юзага келишини мантиқий изчиллиқда тушунтириб бериш қиин: Бироқ шуниси аниқки, И. ижодий қобилиятга эга шахснинг ижодий-рухий фаолиятидаги муайян бир босқич бўлиб, ушбу онларда бунга қадар пишиб-етилиб келган жараён тезлашади; ижодкорнинг умумий руҳий қуввати ортади: ақлий ва ҳиссий мушоҳада тезлиги ошади, хотира максимал жонланади, нарса-ходисалар орасидаги ассоциатив алоқаларни илғай олиш қобилияти, нигоҳ ўткирлиги, таъсирчаник кучаяди, ижодий тасаввур кўлами кенгаяди. Айни шу дамларда ижодий жараён кўнгилли, осон ва маҳсулдор кечади – асар гўё «қуиилиб» келади. Демак, И.ни файбдан келган нарса сифатидаги на эмас, балки санъаткор онгию қалбида кечган ижодий-рухий жараённинг энг юксак нуқтаси, туғма имкониятлари ўта кучайган, бир нуқтага йигилган ҳолда эстетик обьектга йўналган палла сифатида ҳам тушуниш мумкин.

ИМПРЕССИОНИЗМ (фр. impression – таассурот) – XIX асрнинг сўнгти чорагида дастлаб рангтасвир санъатида пайдо бўлиб, кейинчилик бошқа санъатларга ҳам сезиларли таъсир ўтказган йўналиш. Адабиётга татбиқан И. термини кенг ва тор маъноларда кўлланади. Кенг маънода И.га турли ижодий методлар доирасида кузатилган услугуб ҳодисаси сифатида қаралади. Жумладан, импрессионистик услугуб реалист санъаткорлар (Ги де Мопассан, А.П.Чехов, И.А.Бунин ва б.) ижодида ҳам кузатилиб, реалистик тасвир имкониятларини кенгайтиришга хизмат қилган. И. услуби оламни янгича кўришга интилиш маҳсулидир, унинг дастлаб рангтасвирда қарор топгани ҳам шундан. Бу услубда тасвирланган нарса реаликдагига монанд аниқ ва мукаммал шакл касб этмайди: у гўё штрихлар билан чизилади ва ҳар бир штрих ўзида ўша нарсадан олинган оний таассуротни акс эттиради. Шунга қарамай, бу штрихлар бутун таркибида бир-бири билан узвий алоқадор, таассуротлар бирлиги ўша нарса ҳақидаги яхлит тасаввурни бераверади. Шунга ўхшаб сўз билан амалга оширилган импрессионистик тасвирда ҳам оний таассурот қайд этилади: гўё воқеликдаги нарса-ходисалар маълум мақсаддан келиб чиқкан ҳолда сайлаб эмас, таассуротлар асосида тасодифий тарзда тасвирдан жой олади. Натижада реалистик тасвирга хос муҳим деталларни мақсадли танлаш («саҳнада милтиқ бўлса, у отилиши керак») ва шундан келиб чикувчи барча деталларнинг бир-бирига боғлиқлиги тамойили бузилади, тасвирланган нарса тасаввурда яхлит шакл-шамойили билан жонланмайди. Лекин деталларнинг ассо-

циатив алоқалари бутунликни ҳосил қылаверади, чунки тасвир битта субъект нигоҳи орқали берилган, фақат бу нигоҳ оламни фотоаппарат объективи каби эмас, чин маънода «қалбдан ўтказиб» кўради. Бу эса тасвирга сержилолик, кўпмъянилилк, эмоционал тўйинтирилганлик бахш этади, унинг эстетик таъсир кучини оширади. Шу жиҳатлари туфайли импрессионистик услуб хусусиятлари реализм, натурализм, неоромантизм, символизм сингари турли ижодий таомилларга таянган адабий йўналиш ва оқимларга мансуб ижодкорлар эътиборини тортди, услубининг таркибий қисмига айланди.

Мазкур хусусиятларни мутлақлаштириш, уларни услуб ҳодисаси эмас, дунёни янгича кўриш ва идрок этиш деб билиш оқибатида XX аср бўсағасига келиб И. алоҳида йўналиш, ижодий метод сифатида шаклланди. Бу метод инсон онгининг оний ҳолатларида ҳосил бўлувчи, фақат ҳис этилиши мумкин бўлган тутқич бермас таассуротларнигина ҳақиқий деб билди. Шунга кўра, у сирли ишораларга асосланган образлар яратади, уларнинг ёрдамида инсон онгининг чуқур пучмоқларига назар солмоқчи бўлади. Айни шу жиҳатлари билан у «онг оқими» адабиётига асос яратди. Алоҳида адабий йўналиш (ижодий метод) сифатидаги И. XX аср ўрталарига келиб барҳам топди.

ИМПРОВИЗАЦИЯ (лот. *improvisus* – кутилмаган, бирдан) – бадиий ижоднинг алоҳида бир кўриниши бўлиб, бунда асар бевосита ижро жараёнида яратилади. И. кўпроқ ижро билан боғлиқ санъат турлари (музиқа, рақс, театр санъати)да, шунингдек, шеъриятда кузатилади. И.нинг илдизлари фольклордан сув ичади. Халқ бахшилари (аэдлар, бардлар, қўбизчилар, оқинлар, ошиқлар ва б.) фольклор намуналарини ижро қилиш жараёнида. И. йўли билан уларга янгиликлар қўшиб боришган, шу йўл билан янги асарлар яратишган. Жумладан, термаларни ижро қилиш, айтишувларда И.нинг роли ва улуши сезиларли бўлган. И. фольклордан ёзма адабиётга, хусусан, шеъриятга кўчган. Ўтмишда мунтазам ўтказиб турилган нафис мажлислардаги шеърхонликнинг ижро билан боғлиқлиги бунга асос бўлган. Шеъриятдаги И.нинг ўзига хослиги аввалдан муайян мавзу белгилаб қўйилиши, яъни маълум шарт асосида воқе бўлишидадир (қ. бадиҳа, экспромт).

ИНВЕКТИВА (лот. *invehor* – ташланмоқ, ҳужум қилмоқ) – бирон шахс, ижтимоий гурӯҳ ёки ҳодисани кескин танқид қилиш, фош этиш, қоралашга қаратилган нутқ. Жанрларни мазмун жиҳатидан таснифлаган ҳолда баъзан И.ни алоҳида лирик жанр деб кўрсатиш ҳоллари

ҳам учрайди. Бироқ бу үнчалик түғри эмас. Чунки И. турли адабий шакллар, турли жанрларда намоён бўлади. Мас., антик Римдаги айблов нутқлари (Цицерон. «Филиппикалар»), айрим элиграммалар, памфлетлар, ҳатлар И. намунаси саналиши мумкин. XX аср ўзбек шеъриятида И. руҳида қўплаб шеърлар яратилган. Жумладан, Чўлпоннинг «Улуғ Британиянинг бу кунги хукуматига», «Қўзғолиш», Гафур Ғуломнинг «Шараф қўллэзмаси» каби шеърлари И.га мисол бўла олади.

ИНВЕРСИЯ (лот. *inversion* – ағдариш, ўрнини алмаштириш) – гап бўлакларининг одатдаги тартибини ўзгартириш асосида юзага келувчи синтактик усул, стилистик фигура. И. гапдаги бирон-бир сўз ёки сўз бирикмаси (гапнинг бир қисми)ни эмфатик ёки мантиқан ахратиш, шеърий нутқни ритмик-интонацион жиҳатдан ташкил этиш (қофияланувчи сўзни керак ўринга ўтказиш) каби мақсадларда қўлланади. И. шеърий нутқда энг кўп қўлланувчи, деярли барча шеърларда учрайдиган синтактик усулдир. И. маъно урғуси тушаётган сўзни таъкидлаб кўрсатиш, уни мисрадаги ургули позиция – кўпроқ мисра охирига суриш имконини беради. Мас., А. Ориповнинг «Улуғвор бир қудрат билан Чайқалади чўнг денгиз» сатрлари синтактик сатҳдаги нормадан оғиш бўлмаган ҳолда «Чўнг денгиз улуғвор қудрат билан чайқалади» тарзида берилиши керак. И. ҳодисасининг юз бериши натижасида, «қудрат билан» сўз қўшилмаси ва «денгиз» сўзи мисраларда ургули позицияга ўтади, айни шу сўзларга маъно урғусининг тушиши муаллиф ижодий ниятига, шеър мазмуни ва эмоционал тоналлигига мувофиқ келади. Шеърнинг кейинги сатрлари – «Қанча оғир харсанг тошлар Тубда унга чўккан тиз» – И.нинг ритмик-интонацион функциялари ҳам борлигини кўрсатади. Одатдаги тартибда бу мисралар «Тубда унга қанча оғир тошлар тиз чўккан» шаклида бўлиши лозим эди. Инверсия натижасида, биринчидан, ифодалаш кўзланган мазмун учун энг муҳим сўзлар («харсанг тошлар», «тиз чўккан») ургули позицияга ўтказилади, иккинчидан, «денгиз» ва «тиз» сўзлари қофияланади. Ўхашашлик асосида синтактик И. билан бир қаторда баъзан композицион И. ҳақида ҳам гапириладики, бунда сюжетда воқеаларнинг юз бериш тартибига мос бўлмаган тарзда жойлашиши (яъни даврий жиҳатдан аввал юз берган воқеанинг кейин тасвирланиши) назарда тутилади.

ИНСЦЕНИРОВКА (лот. *in – ga, scaena – саҳна*) – аслида саҳнага мўлжаллаб ёзилмаган асарларни (кўпроқ, эпик асарларни) саҳналаштириш учун қайта ишлаш. И. саҳналаштирилиши мўлжал-

ланган асарнинг ғоявий-бадиий хусусиятларини (асосий мазмуну, сюжети, услуги ва ш.к.) қайта яратишни тақозо этади. Бу эса, оригиналга нечоғлик боғланган бўлмасин, И. қилувидан маълум даражадаги ижодийликни ҳам талаб этиши шубҳасиз, чунки асарни саҳнага мослаштириш ундан ниманидир олиш, нималарнидир қўшишни тақозо этади. Яъни И. қилинган асар оригиналнинг асосий мазмуни, муҳим сюжет чизиқларини сакласа ҳам, унга тенг бўлмайди, моҳияттан у тамом бошқа асардир. Худди шу ҳол кўплаб ижодкорлар, талабчан ўқувчиларнинг И.га нисбатан салбий муносабатини келтириб чиқаради. Радио ва телевидениенинг ривожланиши билан боғлиқ ҳолда И.нинг радиоинсценировка, телевинсценировка каби кўринишлари пайдо бўлди.

ИНТЕРМЕДИЯ (лот. *intermedius* – ўртада жойлашган, ичидаги) – 1) ўрта асрлар театрларида ўйналаётган асосий спектаклнинг парда ораларидаги танаффус пайти ижро этилган майший мавзудаги кичик ҳажвий саҳна кўриниши; 2) эстрада санъати ва телевидениенинг ривожланиши билан боғлиқ ҳолда фаоллашган комик характердаги кичик драматургик жанр, баъзан миниатюра номи билан ҳам юритилади. Ўзбек адабиётида С.Аҳмад, Алп Жамол каби ижодкорларнинг «Телевизион миниатюралар театри» учун ёзилган И.лари халқимиз орасида шухрат топган. Шунингдек, ҳозирги вақтда турли маданий-маърифий тадбирларда (кўриклар, қувноқлар ва зукколар баҳси ва ҳ.) ижро этилаётган майший мавзулардаги саҳна кўринишларини ҳам И. санаш мумкин. Ушбу саҳна кўринишларини ҳаваскорларнинг (кўпинча колектив тарзда) ўзлари ёзиши эътиборга олинса, уларни замонавий фольклор намунаси дейиш мумкин.

ИНТЕРПРЕТАЦИЯ (лот. *interpretation* – тушунтирумок) – талқин; адабий асар мазмунини идрок қилиш, унинг мазмуни, бадиий концепциясини англаш, тушуниш. Кенг маънода И. ўзга томонидан айтилган гап, ёзилган асар (илмий, фалсафий, диний, бадиий ва ҳ.) мазмунини бир бутун сифатида тушуниш ва тушунтириб бериш маъносини билдиради. Бадиий И. турли кўринишларда, жумладан, бадиий мазмунни, яъни асардаги «образлар тили»ни мантиқий тушунчалар тилига (танқид, адабиётшунослик), лирик-публицистик (эссе-чилик) ёки бошқа бир «бадиий тил» тизимиға (рассомлик, кино, театр ва б.) ўгириш орқали амалга ошади. И. адабиётшунос фаолиятида етакчи ўрин тутадиган бирламчи амал, чунки адабий асар ҳақида фикр билдириш ва баҳолаш учун, аввало, уни бир бутун сифатида

тушуниш талаб қилинади. Шунинг учун И. бадий таҳлил жараёнида ҳар вақт ҳозир бўлган мұхим ва белгиловчи амал ҳисобланади (қ. бадий таҳлил).

ИНТЕРТЕКСТУАЛЛИК (лот. *inter* – аро, *textum* – тўқима, мато, матн) – фанга француз филологи Ю.Кристева киритган термин. Унга кўра, ҳар қандай матн аввал мавжуд бўлган матнларни трансформация қилган ҳолда ўзига сингдирган цитаталар мажмуидир. Мутахассислар И. концепцияси рус олими М.Бахтин қарашларини ривожлантириш, бошқача айтганда, қайта идрок этиш асосида вуждуга келганини таъкидлайдилар. М.Бахтин адабиётнинг мавжудлик қонуниятлари ҳақида тўхталиб, ҳар қандай асар ўзида ижодкор воқелигини акс эттиргани ҳолда, ўзидан аввалги ва ўзига замондош адабиёт билан мунтазам диалогик алоқада бўлади, яъни адабиётнинг мавжудлиги интерсубъектив характерга эга деб билади. М.Бахтин таълимотининг формал томонига ургу берган Ю.Кристева эса диалогни матнлар доираси билан чеклаб, *интерсубъективлик* ўрнига *интертекстуалликни* олдинги планга чиқаради. И. тушунчаси структурализм ва постструктурализм йўналишидаги адабиётшуносликда жуда тез оммалашди. Жумладан, француз адабиётшуноси Р.Барт ҳам И.ни қўллаб-куватлайди, ҳар қандай матн «қўштириноқсиз цитата» деб билади. Яъни, унга кўра, ҳар қандай матн моҳиятнинг интертекст бўлиб, унда аввалги ва жорий маданиятга оид матнлар у ёки бу даражада таниб олиш мумкин бўлган алфозда мавжуддир. Албатта, адабий асар ўзидан олдинги ва жорий замондош адабиёт билан диалогик алоқада экан, унда бошқа матнларнинг излари сезилиши (қ. *рөминисценция*) табиий. Бироқ постструктуралистлар бу ҳолни мутлақлаштирадилар, уни бадий асар табиатини белгиловчи қонуният мақомига кўтарадилар. Аввало, улар матнни ғоят кенг тушунишади: адабиёт, маданият, жамият, тарих, инсон – буларнинг бари матн, бари матн тарзида ўқилиши ва уқилиши мумкин. Шундан келиб чиқиб инсоният маданияти тўлалигича битта интертекст сифатида тушунилдики, у янги яратилаётган ҳар қандай матнга асос (подтекст) бўлиб хизмат қиласи. Демак, янги яратилаётган матн субъекти маданиятнинг улкан интертекстини ташкил қилаётган саноқсиз матнларга сингиб кетади, йўқолади. Шу тариқа матн муаллифи интертекстуал ўйин проекция қилинадиган бўшлиқ деб тушунилади, матнга эса индивиднинг мақсадли фаолияти эмас, онгсиз тарзда амалга ошуви «интертекстуал ўйин» маҳсули сифатида қаралади. Бу эса бадий ижодда индивидуалликни инкор этиб,

табиий равишда, «субъект ўлими» (Фуко), «автор ўлими» (Р.Барт) концепцияларига боғланади.

ИНТИМ ЛИРИКА (лот. *intimus* сўзидан фр. *intime* – ички, ўта шахсий) – лириканинг төмөтик жиҳатдан таснифлаш асосида ажратилувчи бир тури, лирик қаҳрамоннинг ишқий кечинмалари тасвирланган лирик асарлар. Мұхаббат қадимданоқ шеъриятнинг дикқат марказида турган ва ҳануз интенсив ишланиб қелаётган «мангу мавзу»ларидан бири саналади. Ижтимоий-сиёсий лирика ҳар жиҳатдан рағбатлантирилган шўро даврида И.л.га менси-масдан, ижтимоий аҳамиятга молик бўлмаган ҳодиса сифатида паст назар билан қаралган. Ҳолбуки, ижтимоий ҳодиса бўлмиш инсоннинг қалби мұхаббат туфайли тозаради, мұхаббат уни маънан юксалтиради: мұхаббат кўтарган юксакликдан туриб тоза қалб билан боққанда, оламнинг гўзаллиги ҳам, ҳикматлари ҳам яққол кўринади; ёрга мұхаббат билангина лиммо-лим тўлгандек кўринган қалб оламни тўласича қамрашга қодир. Шу боис жаҳон адабиёти И.л.нинг гўзал ва бетакрор намуналарини бера олганки, улар инсониятнинг бебаҳо маънавий мулкига айланган. Жумладан, Ҳофиз ва Навоий, Петрапка ва Шекспир, Пушкин ва А.Блок, Чўлпон ва Миртемир каби кўплаб шоирлар яратган И.л. намуналари ҳануз севиб ўқилади, юксак қадрланади, зеро, улар мұхаббатнинг ўзи каби боқийдир.

ИНТОНАЦИЯ (лот. *intone* – кучли талаффуз этаман) – жонли нутқнинг ифодавийлигини таъминловчи асосий омил, тилнинг фонетик воситалари (товуш тони, талаффуз темпи, тембр, паузалар, мелодика, мантиқий ва эмфатик ургулар) мажмуйи. И. жумла мазмунининг реаллашувида (яъни сўзловчи юклётган мазмун, ҳабар қилинаётган нарсага модал муносабат, суҳбатдошга муносабат ва ш.к.ларнинг ифодаланишида) ҳал қилувчи аҳамиятга эга. Ёзма нутқда И. жумла қурилиши, шунингдек, тиниш белгилари, график воситалар (маълум сўз ёки бўлакни остига чизиб, курсив, қорайтириш ёки бош ҳарфлар билан ёзиб таъкидлаш; сўзларни ўзгача тарзда, мас., бўғинларга ажратиб, айрим товушларни иккаплантириб ва б.) орқали бөрилади. Бироқ мазкур воситалар ҳам жонли нутқ И.сини тўлиқ беришга қодир эмас, ёзма нутқ И.си «ички кулоқ» билан ҳис қилинади, демакки, бунгача у хёлан «талаффуз этилади». Нутқ ҳодисаси саналувчи бадиий асар мазмунини ифодалаш, ўқувчига ғоявий-эмоционал муносабатни юқтириш ва шу асосда унга муайян эстетик таъсир ўтказишда И.нинг жуда катта роли

борки, у шеърий нутқда, айниқса, муҳимдир. Адабиётшунослиқда поэтик И. ҳақида гап кетганда кўпроқ шеърий нутқ назарда тутилиши ҳам шундан. Шеърий нутқнинг туроқ, мисра ва бандларга бўлинниши, уларнинг ҳар бири турли узунликдаги паузалар билан ажратилиши, поэтик синтаксиснинг ўзига хослиги шеър ритмик-интонацион қурилишини белгилайди. Ёзувда шеър И.сини таъкидлаб кўрсатиш, уни ўзига хос тарзда кодлаштиришда эмфатик ургулар, қофияланиш тартиби, мисрадаги сўзларнинг алоҳида қаторга чиқарилиши, турли сатҳдаги (товуш, сўз, мисра) такрорлар, синтактик параллелизмлар, турли график воситалар ҳам муҳим аҳамият касб этади. Кўринадики, шеър И.си унинг синтактик қурилиши, график ифодаланиши билан бевосита боғлиқ экан. Бунгача, асосан, шеърнинг шаклий томони ҳақида гапирилди. Бироқ шунинг ўзи билан кифояланиш қамлик қиласди, чунки И.ни белгилашда тил воситалари орқали ифодаланаётган мазмун ҳам катта аҳамият касб этади. Зоро, аслида, шеърнинг илк мисрасидаги сўзлар, унинг жумла қурилиши бизга И.дан дарак беради. Мас., «Тарихингдир минг асрлар ичра пинҳон, ўзбегим» (Э.Вохидов) ёки «Юртим, сенга шеър битдим бугун» (А.Орипов) мисралари ўкувчини тантанавор, ифтихор билан тўлиқ И.га; «Олти ойким, шеър ёзмайман, юрагим зада» (А.Орипов) ёки «Дўстим, дилда не бор сўзлайн сенга» (Р.Парфи) мисралари ўйчан, фалсафий мушоҳадага мойил И.га созлайди. Демак, шеър И.си унинг синтактик-семантик қурилиши, ритмик ташкилланиши, график ифодаланиши орқали юзага чиқади дейилса, тўғрироқ бўлади.

ИНТОК (ар. *انطاق* – сўзлатиш, гапиришиш) – мумтоз адабиётдаги шеърий санъат, бадий асарда ҳайвонлар, қушлар ва жонсиз нарсаларни худди инсонлар каби сўзлатиш. И. шоирга ўзининг кечинмалари, борлиқка муносабати, ҳаёт ҳақидаги фалсафий мушоҳадаларини билвосита ифодалаш имконини беради. И. санъатининг илдизлари қадимги асотир ва афсоналар, эртак ва достонларга бориб тақалади. Кейинчалик ушбу усул ёзма адабиётда ҳам кенг қўлланилган. Жумладан, ёзма адабиётдаги мунозара, масал каби жанрлар, асосан, И. санъати асосида яратилган. Адабиёт тарихида мазкур санъат асосида «Мантиқ ут-тайр», «Лисон ут-тайр» каби йирик асарлар ҳам ёзилган. И. фаол қўлланувчи бадий усуллардан бўлиб, унинг гўзал намуналари деярли барча мумтоз шоирларимиз ижодида, шунингдек, ҳозирги шеъриятда ҳам кўплаб учрайди. Мас., А.Ориповнинг:

*Шивирлаб гуллар дөди: «Кирма бу бокқа, эй йигит,
Бунга киргандар киурулар сочини қор этгали», –*

байтида И. санъати моҳирона қўлланган.

ИНТРИГА (лот. *intrico*, фр. *intrigue* – чалкаштираман) – воқеабанд асар персонажларининг ўз олдига қўйган мақсадларига эришиш йўлидаги мураккаб, тобора чигаллашиб борувчи хатти-ҳаракатлари, ҳақиқий мақсадини яширган ҳолда ишлатган турфа ҳийла-найранглари. Одатда, бундай хатти-ҳаракатлардан қарши томон бехабар қолади, бу эса сюжет воқеаларининг қизиқарли, асарнинг ўқишли бўлишига хизмат қиласди. Шунга кўра, И. саргузашт типидаги, авантюр сюжет асосига қурилган асарларда, айниқса, кенг қўлланилади. И. асар воқеаларини, қаҳрамонлар тақдирини чалкаштириб юборади, тўқнашувларни кучайтиради, сюжетнинг у ёки бу томон ривожланишига туртки беради. «Ўткан кунлар» романидаги Ҳомиддинг Кумушга эришиш йўлидаги хатти-ҳаракатлари (чакув, сохта талоқ хати, рақибини маҳв этишга интилиш, Кумушни олиб қочиш режаси) И.нинг ёрқин намунаси бўла олади.

ИРОНИЯ (юн. *eironieia* – айнан, ўзини гўлликка солиш) – қаранг: **киноя**

ИРСОЛ УЛ-МАСАЛ (ар. *ارسال المثل* – мақол, масал келтириш) – мумтоз адабиётдаги шеърий санъатлардан бири, шеърда маълум бир поэтик мақсадда машҳур мақол, матал ёки ҳикматли сўз келтириш. Шоир бирор фикрни ўртага ташлар экан, ўз фикрининг исботи, изоҳи, тасдиги учун ҳалқ мақоллари, ҳикматли ибораларни тамсил йўли билан келтиради. Бу уч хил кўрининида амалга ошиши мумкин:

1) мақол ёки матал «масалдурким», «масалким», «дерлар», «айтадиларки», «элда бор шундай масал» каби ишоралар билан келтирилади:

*Касб этар шоҳи Бухоро ҳазрати Хондин камол,
Бу масалдур: «Ой этар хуршиддин нур иқтибос»* (Нодира).

2) мақол ёки матал ҳеч қандай ишораларсиз айнан келтирилади:

*Ерга кирсам кошки, чун етмас ул ойга илик,
Мушкул аҳволе тушубдур: «Ер қатиқ-у, кўк йироқ»* (Лутфий).

3) мазмуни байт ёки мисра ичига сингдириб юборилгани ҳолда, мақол ёки матал ўз шаклини бутунлай йўқотиши, бир оз ўзгартириши ёки янгича шаклга келиши мумкин:

*Сөвги дардидан менинг ҳам бўлди рангим қаҳрабо,
Йўқ илож, не наф ўқинмак бўлмаса кўзгуда айб* (Э.Воҳидов).

Мазкур байтда «Юзинг қийшиқ бўлса, ойнадан ўпкалама» мақоли ўзгарган шаклда бериляпти.

Агар байтда ишлатилаётган мақол ёки маталлар сони икки ёки ундан ортиқ бўлса, *ирсол ул-масалайн* дейилади. Мас., Атойининг:

Бўлди бағрим суғамингдин, яхшилик қил сол суга,

Охир, эй гул, хирманни, албатта, ҳар эккан ўрап, –

байтида «яхшилик қил, сувга от» ва «ҳар ким экканини ўради» мақоллари сингдириб юборилган.

ИРСОЛ УЛ-МАСАЛАЙН (ар. ارسال لمنین – мақоллар, масаллар келтириш) – қаранг: **ирсол ул-масал**

ИСТИДРОК (ар. استدراء – англамок) – мумтоз адабиётдаги шеърий санъат, ҳажв йўли билан бирор фикрни айтиб, сўнг ундан кечгандай, ҳажвни мадҳга айлантириш. Бунинг моҳияти шундан иборатки, гўё шоир аввал ўзи билмай йўл қўйган хатосини, келтирган нотўгри ташбеҳини англаб, сўнг хатони тўғрилаш учун ундан кучлироқ ташбеҳ келтиради. Айни шу жиҳати билан И. ружуъга яқин туради, шунинг учун илми бадиъга оид айрим манбаларда унга ружуъ(к.) нинг бир кўриниши сифатида қаралади. Уларнинг фарқи шундан иборатки, И.да аввалги фикрнинг, ҳажв йўли билан айтилиши шарт қилинади. Шу туфайли ҳам кўпчилик алломалар (мас., Рашидиддин Ватвот) И. қўлланган ўринларда «ўқувчи ёки тингловчи келтирилган ҳажв билан чалғиб, кейинги ташбеҳдан лаззат топа олмайди» деган важ билан уни маъқул кўрмаганлар.

ИСТИОРА (ар. استعاره – вақтинча омонатга, ориятга олмоқ) – мумтоз адабиётдаги шеърий санъат, бир сўз шаклини вақтинча «омонатга олиб», бошка, яъни кўчма маънода ишлатиш. И.да сўзни ўз маъносидан бошка маънода ишлатиш ўхшашиқ асосида амалга ошади. А.Хусайнин таъкидича, И.ни «ажам шуароси саноийъ қабилидан, араб фусаҳоси эса каломнинг зотий гўзалликларидан» деб хисоблаганларки, бунда муайян асос бор. Ҳақиқатан ҳам тил ҳодисасига айланиб бўлган (мас., «кун ботди», «хўрозд» ва х.) И. билан ҳали тил ҳодисасига айланиб ултурмаган (яъни санъаткорона нигоҳ билан кўрилган ўхшашиқ асосидаги образли ифода) И. бадиий-эстетик қиммат жиҳатидан тенг эмас, уларнинг биринчиси зотий гўзалликларга, иккинчиси оризий гўзалликларга (қ. саноийъ) мансуб этилиши тўғри бўлади. Мас., Навоийнинг:

*Ул ой аescofini ахли замондин
Эшитур эрди бал яхши-ямондин, –*

байтидаги «ой» сўзи «ернинг табиий йўлдоши» маъносидан «комонатга олиниб», «ёр» маъносида ишлатилган ва ўзига хос образли ифода юзага келган. Бир қарашда ой сўзини маъшуқа, ёр маъноларида ишлатиш нотабийдек туюлса-да, нур таратиб турган ой билан ёрнинг нурли жамоли ўртасидаги ўхшашлик мана шу нотабийликни табиий, гўзал ифодага айлантиради. Бу эса «фасоҳату балоғат арбоби қошинда ҳақиқаттин яхшироқдир»(А.Хусайнин). Илми бадиъга оид манбаларда И. билан ташбеҳи киноятга берилган тъерифлар ўртасида фарқ сезилмайди. Бу бежиз эмас, чунки моҳиятан И. биргина мушаббихун биҳ иштирок этган *ташбеҳдир* (к.).

ИСТИФХОМ (ар. استفهام – сўрамоқ) – иншо йўлларидан бири, фикрни ифодалаш усули, ўй-фикр, ҳис-туйғу, кечинмаларнинг савол шаклида баён этилиши. И.да савол беришдан мақсад бирор ноаник нарсага аниқлик киритиш эмас, балки сўроқ шаклида чиройли ташбеҳ қўллаш, ўз кечинмаларини баён этиш, ҳаётий хулосаларини айтишдир. Бошқа томони, *тажоҳули ориф* (к.)дан фарқли равишда, И.даги сўроқ риторик характерда бўлмайди, яъни у мазмунан сўроқ гапдир. Mac., Лутфийнинг:

*Кўкарди чаман, гулузорим қани?
Сиҳи сарв бўйлуқ нигорим қани? –*

байтидаги савол орқали ҳукм ифодаланаётгани йўқ, балки савол шаклида маъшуқа тавсиф этилмоқда ва шу орқали лирик қаҳрамон дилидаги ҳижрон, соғинч ҳислари ифодаланмоқда.

ИСТИХРОЖ (ар. استخراج – келтириб чиқармоқ) – мумтоз адабиётдаги шеърий санъат, байтда қўлланаётган ташбеҳларда араб ҳарфларини мушаббихун биҳ вазифасида келтириб, уларнинг йигиндисидан бирор сўз чиқариш. И. санъатини юзага келтиришда араб ҳарфларининг турли шакллари билан бирор нарса (кўпроқ ёрнинг бирор аъзоси) ўртасидаги ўхшашлик асос бўлади. Mac., Навоийнинг машҳур «Жонимдаги жим...» деб бошланган рунончида сочининг гажаги билан «жим» (Ж) ҳарфи, тик қомат билан «алиф» (!), эгилган қош билан «нун» (Ү) ҳарфи, кўз қорачиги билан «жим» ва «нун»нинг нуқтаси ўртасидаги ўхшашликдан фойдаланиб

«жон» (جان) сўзи келтириб чиқарилган. Оғаҳийнинг «Устина» радифли ғазали матлаъсида «нас» (نص) – «ҳукм» сўзининг келтириб чиқарилиши ҳам И.нинг яхши намунасиdir. Яна бир мисол, Сўфи Оллоёрнинг:

*Калиди ганжи маъниким забондур,
Анга бир нуқта кўп бўлса зиёндур, –*

байтида муҳим ахлоқий масала ўртага ташланиб, «забон» – (زبان) сўзига битта ортиқча нуқта қўйиш орқали «зиён» – (زیون) сўзи келтириб чиқарилмоқда. Муҳими, мазкур мисоллардаги сўз ўйинлари мазмунни гўзал поэтик шаклда, ўкувчи шуурида муҳрланиб қоладиган тарзда ифодалашга хизмат қилади.

ИТНОБ (ар. اطناب – кўп сўз, оз маъно) – қаранг: ийжоз

ИТТИФОҚ (ар. اتفاق – ўзаро мувофиклашиш) – мумтоз адабиётдаги шеърий санъат, шеърда шоир тахаллусининг ҳам луғавий маъносида, ҳам тахаллус сифатида ишлатилиши. Яъни шоир мақтаъда ўз тахаллусини кептираётган бўлса-да, байт мазмуни уни луғавий маънода ҳам тушунишни тақозо этади. И. санъати қўлланган байтларни Гадойӣ, Бобур, Феруз, Фурқат, Чўлпон, Э.Воҳидов каби шоирлар ижодида кўплаб учратиш мумкин. Mac., Бобурнинг:

*Оёғим етганча Бобурдек кетар эрдим вале,
Сочининг саёдоси тушди бошима боштин яна, –*

байтида Бобур сўзини шоир номи маъносидан кўра луғавий маънода, яъни «шердек қайтмас бўлиб кетардим» маъносида англаш ўкувчига кўпроқ эстетик завқ беради. Куйидаги байтларда ҳам И. санъатидан моҳирона фойдаланилган:

*Гарчи эрурман толөи Феруз ила оламға шоҳ,
Лек ул парилар сарвари олдида дурман қул букун (Феруз).*

*Мұхаббат осмонида гўзал Чўлпон эдим, дўстлар,
Қубшининг нурига тоқат қишлоғмай өрга ботдим-ку (Чўлпон).*

*Сенга ўн тўртда боғландим, ҳануз Эркин бўлопмас дил,
Ўзим дўғман, ақл кирмас, тўзимсиз ўттизимдан ҳам (Э.Воҳидов).*

*Дамлар шикесига учма, Омон бўл,
Фазлу камолингни эл билса бўлди (Омон Матжон).*

ИФРОТ (ар. افراط – ҳаддан ошиш, ошириш) – қаранг: **муболага**

ИЧКИ МОНОЛОГ – персонажнинг моддийлашмаган, ўзига қаратилган ва ичидагина кечувчи нутқи; бадиий психологизмнинг бевосита шакли. И.м. шартли равища инсон онгига кечётган ўйлов (хис этиш) жараёни сифатида қабул қилинади. Персонаж руҳиятини тасвирлаш воситаси сифатида И.м. антик драматургиядаёқ маълум бўлган, уйғониш давридан, айникса, кенг қўлланила бошлаган. Драматик асарлардаги И.м.ларда «икки карра шартлилик» кузатилади. Чунки драмадаги И.м. моддийлашади – талаффуз этилади, лекин персонаж саҳнада ёлғизлиги ва нутқининг ўзига қаратилгани шартлилик асосида бу гапларни ҳақиқатда воқе бўлмаган, балки унинг онгига кечган жараён имитацияси деб қабул қилишни тақозо этади. Шунга ўхшаб персонажнинг бошқа персонажлар билан мулоқот чоғида «четтгá» гапириши ҳам-ҳақиқатда гапирилмаган деб қабул қилинади. Янги давр ривоявий эпик асарларида ҳам И.м. саҳнавийлик хусусиятини сақлаб қолади: унинг воситасида персонаж юз берәётган воқеаларни мушоҳада қиласи, изланади, ўзини тафтиш қиласи, изҳор этади, иқрор қиласи ва х. – шу тарзда унинг руҳияти драматикаштириллади. Инсон ички олами, унинг туйғу-кечинмаларини биринчи ўринга қўйган сентиментализм адабиёти И.м.ни кенг истифода этиш билан бирга унинг имкониятларини кенгайтиришга ҳам катта ҳисса қўшди. Реалистик адабиёт эса И.м.ни инсон онгига кечувчи жараёнларга яқинлаштиришга интилди. Гап шундаки, реализмга қадар И.м. грамматик жиҳатдан тартибга солинади, унда мантикий изчиллик кузатилади. Ҳақиқатда эса инсон онгидаги ўйлов (хис этиш) жараёни бундай батартиб кечмайди: унга зиддиятлар, парадокслар, чалғишилар, узилишилар ва ш.к.лар ҳам хосдир. Реалистик адабиёт, бир томондан, ўйлов жараёнини тартибга солишни мукаммаллаштириди, иккинчи томондан, унинг мураккаб томонларини ҳам акс эттиришга интилгани учун И.м.га ўрни билан грамматик ва мантикий жиҳатдан изчил тартибга солинмаган унсурларни ҳам киритди. Хусусан, Л.Н.Толстой ва Ф.М.Достоевский асарларида И.м. персонаж онгига ёзувчи аралашувисиз кечётган жараён тасвири сифатида берилиб, онг ва онгости қатламлари фаолиятини бутун мураккаблиги, зиддиятлари билан тасвирлашга ҳаракат кузатилади. Бу икки адаб тажрибалари асосида И.м.ни буткул эркин

кечаёттган психик жараён сифатида тасвирлаш, ҳудди шундай эффект ҳосил қилишга интилиш кучайди ва бунинг натижаси сифатида XIX – XX асрлар чегарасида И.м.нинг «онг оқими» шакли вужудга келди (қ. онг оқими).

Хозирги адабиётда ҳам И.м. персонаж руҳиятини тасвирлашнинг энг муҳим воситаларидан бири бўлиб, унинг асрлар давомида сайқалланган турли шаклларидан персонаж руҳиятини очиб беришда кенг фойдаланилмоқда.

ИШБО (ар. اشبع – тўйдириш) – қаранг: муқайяд қофия

ИШТИҚОҚ (ар. اشتاق – ёриш, бўлиш, сўздан сўзни ажратмоқ) – мумтоз адабиётдаги шеърий санъат, шеър ёки насрда бир ўзакдан ташкил топган сўзларни ишлатиш. И. санъатида насрда бир жумла ичидаги, шеъриятда бир байт, рубоий, туюқ, ғазал ёки қасида доирасида ўзакдош сўзлар иккита ёки ундан ортиқ ўринда келтирилади. И.дан мурод ўзакдош сўзларни шунчаки келтириб шеърга безак бериш эмас, бунда ўзакдош сўзлар орасидаги маъно алоқадорлиги асосида мазмунни тиниқ ва төран, хушоҳанг ифодалаш каби муҳим эстетик самаралар кўзланади. Мас., Навоийнинг:

Фигонким, кўнглим олғон дилбарим дилдорлиғ билмас,

Билур ошиқни ғамгин қилмоқу ғамхорлик билмас, –

байтида «дилбар – дилдор», «ғамгин – ғамхорлик» ўзакдош жуфтликлари бир-бирига қарши кўйилади ва шу асосда ошиқнинг изтироблари ёрқин ифода этилади. Айрим ҳолларда И. тақрир (ёки радд)га ўхшаса-да, уларни фарқлаш жоиз. Мас., Навоийнинг:

Сарвинозим гул чоги гулшанга кирди, эй наисим,

Ҳам они елли-ю, ҳам гул яфрогин бошига соч, –

байтида «гул чоги», «гулшан», «гул яфроги» қаторидаги сўзлар ўзакдош эмасдек, бу ўринда шеърий санъат ўзакдош сўзларни эмас, балки «гул» сўзи тақорори асосида юзага чиқаётгандек туюлиши ва бу ўринда И. эмас, тақрир санъати кўлланган деган янглиш хуласага келиб қолиш мумкин. Ҳолбуки, «гул чоги» маълум бир пайтни (гуллаш вақтини), «гул яфроги» эса нарсани («гулбарг») англатувчи кўшма сўзлар бўлиб, улар морфологик усу碌да ясалган «гулшан» сўзи билан ўзакдошdir.

· ИҚТИБОС (ар. اقتباس – илм ўзлаштиrmоқ, ўзаро фойдаланмоқ) – мумтоз адабиётдаги шеърий санъат. Кенг маънода И. «бир сўз ёки ёзувни бўлгани каби ё қисқартириб олмоқ. Бириданилман истифода этмоқ... Сўз орасида Куръони Каримдан ёхуд Ҳадиси Шарифдан ё бошқа мақбул асарлардан бир жумланинг тўлиқ ёки қисман оз тасарруф ила ёхуд тасарруфсиз олинниши»ни англатади ва бу маъносида И. цитата (к.) билан синонимdir. Шеърий санъат сифатида эса И. «Куръон ё ҳадисдин бир нимани анинг Куръон ёки ҳадисдин олинганига ишора бўлмаған тарзда каломга киритмактин ибораттур» (Атоулло Ҳусайнин). Яъни И. санъати Куръон ва ҳадис илми билан боғлиқ бўлиб, ижодкорнинг ўз фикрини шу икки мўътабар манбага таяниб асослашини англатади. И. санъати мумтоз адабиётимизда кенг қўлланган бўлиб, унинг икки нави мавжуд. Биринчи навида оят ёки ҳадис айнан келтирилади ва «дарж» деб юритилади. Оят ёки ҳадисни айнан эмас, балки таржимаси ёки мазмунини келтириш эса «ҳалл» деб аталади. Демак, умумлаштириб айтиш мумкинки, байтда оят ёки ҳадисни ҳеч қандай ишорасиз айнан келтириш ҳам, байтга оят ёки ҳадиснинг мазмунини сингдириб юбориш ҳам И. саналади. Оят ёки ҳадисни байтга киритишдан мурод шунчаки безак бериш эмас, балки муайян ғоявий-эстетик мақсад (фикрни тасдиқлаш, қувватлантириш, кучайтириш ва ш.к.) билан амалга ошади ва лирик қаҳрамон фикр-кечинмаларини ёрқин ифодалашга хизмат қиласи. Мас., Ҳазинийнинг:

Худовандо, Ҳазинийнинг гуноҳин мағфират айлаб
Ки, доҳили жаннат «мин таҳтиҳ-ал-анҳар» бўлгайму? –

байтидаги «мин таҳтиҳ-ал-анҳар» («остиларидан дарёлар оқиб турувчи») жумласи Куръони Каримнинг «Бақара» сураси 25-оятидан олинган. Мазкур оят (таржимаси)да шундай дейилади: «Иймон келтириб, яхши амал қилган зотларга хушхабар беринг-ки, улар учун остиларидан дарёлар оқиб турувчи боғлар. Қачон ўша боғларнинг бирор мевасидан баҳраманд бўлсалар, «Илгари то-тиб кўрган нарсамиз-ку», – дейишади. Зоро, уларга сурати бир-бирига ўшаган мевалар берилади. Ва улар учун жаннатда покиза жуфтлар бордур. У зотлар жаннатда абадий қолажаклар». Яъни бу ўринда И. лирик қаҳрамоннинг айни дамдаги руҳий ҳолатини ёрқин ифодалайди. Худога илтижо этаётган лирик қаҳрамон ўзининг осий банда эканини билади, шунга қарамай, умидворлик би-

лан яшайды, чунки Аллоҳнинг карами кенглигига инонади, ундан мағфират тилаб, ўзини севимли бандалари, жаннатда абадий қолувчи зотлар қаторига қўшишидан умидвор бўлади. Албатта, шоир байтда айтмоқчи бўлган фикрлар, унинг айни дамдаги ўйхислари И. орқали ишора қилинган манбадан хабардор кишиларга кўпроқ тушунарлидир.

ИФРОК (ар. اغراق – чўқтирмоқ, чукурлаштирмоқ) – қаранг: муболага

K

КАЛОМИ ЖОМИЙ (ар. كَلَمٌ – сўз, جَامِعٌ – жамловчи, умумлаштирувчи) – мумтоз адабиётдаги шеърий санъат, шеърга ёки байтга панд-насиҳат, ўгит, ахлоқ-одобга оид ҳикмат, замондан ёки замондошлардан нолиш маъноларини сингдириш. Яъни К.ж. маънавий санъат бўлиб, у байт ёки шеърнинг маъно-мазмун томони билан белгиланади. Сираси, мумтоз шеъриятдаги деярли барча асарларда ё панд-насиҳат, ё бир ҳаётий ҳикмат, ё замондан, дўст-биродарлардан шикоят мазмуни мавжуд. Шу жиҳатдан қаралса, К.ж.нинг санъат саналишида муайян дараҷада шартлилик, анъанавийлик таъсири бор. Демак, мумтоз шоирларимизнинг минг-минглаб асарларини, байтларини бемалол К.ж.га мисол сифатида келтириш мумкин. Mac., Навоийнинг «Топмадим», «Аввалгиларга ўхшамас», Бобурнинг «Қолдиму» радифли газаллари, қатор рубоийларида замондан, ёр-биродарлардан нолиш кузатилса, кўплаб асарларида панд-насиҳат, ахлоқ-одобга оид ҳикматлар акс этган. Дидақтик йўналишда ижод қилган Яссавий, Сўфи Оллоёр, Ҳувайдо, Ҳазиний каби кўплаб шоирларнинг асарларида эса панд-насиҳат мазмуни устувордир. Mac., Яссавийнинг:

*Бедор бўлғил, эй мўъмин, сахар вакти ичинда,
Кутқор ўзунгни ўтдин сахар вакти ичинда;*

Сўфи Оллоёрнинг:

*Уялма маърифатни ўрганурдин
Жойинг танур бўлур, қолсанг танурдин;*

Ҳувайдонинг:

*Хоки пойи яхшилар бўл хок бўлмасдан бурун,
Бу қаро ер кўйни сенга чок бўлмасдан бурун;*

Хазинийнинг:

**Худонинг ёди бирла йиглагил шому саҳарларда,
Яқонгни чок этиб, сан йиглагил шому саҳарларда, –**

мисраларида мана шундай ҳолатни кузатишимииз мумкин.

КАТАРСИС (юн. *katharsis* – халос бўлиш, покланиш) – адабиёт-шуносликка Арасту томонидан киритилган термин. Арастуга кўра, томошабин трагедияни кўриш асносида ҳамдардлик ва кўркув туфайли ўзидағи шундай аффектлар (хис-туйғулар)дан тозаланади. Яъни К. эстетик кечинманинг моҳиятини ташкил қилиб, қаҳрамоннинг кечинималарини қалбда қайта кечириш асносида воқе бўлади. Арасту давридан бўён ушбу термин турлича, баъзан ҳатто бир-бира га зид талқинларга учради. Шунга қарамай, ҳозирги адабиётшуносликда кўпроқ икки маънода фаол ишлатилади: 1) томошабиннинг драматик асар, айниқса, трагедия қаҳрамони билан у *катастрофа* (к.)га учраган онлардаги эмоционал алоқаси; 2) ҳар қандай адабий асарни ўқиш асносида юзага келадиган қаҳрамон, ўқувчи ва муаллиф онгларининг учрашуви, асарнинг мазмун (маънавий) доирасини белгилаб, унга эстетик обьект сифатидаги тугаллик баҳш этувчи муҳим омил. Яъни бу маънода К. терминининг, гарчи у кўпроқ *трагизм* билан боғлиқ ҳолда тушунилса-да, доираси кенгаяди, трагик К. билан бир қаторда унинг бошқа кўринишлари (мас., комик К.) ҳақида ҳам гапириш мумкин бўлади. Албатта, адабиётшунослик ва эстетикада бадиий асарни қабул қилиш (бадиий рецепция) муаммоларини ўрганиш чукурлашиб боргани сари, К.нинг маъно диапазони кенгайиб, талқинлар турличалиги ҳам ортиб боради, шунга қарамай, термин ўзининг ўзак маъносини сақлаб қолмоқда.

КАТАСТРОФА (юн. *katastrophe* – бурилиш, тўнтариш) – трагедия ёки драма қаҳрамони ҳаётида кескин бурилиш юз берувчи ҳолат, ташки ҳаракат динамикасига асосланган сюжетларда перипетия ўтири намоён бўлувчи нуқта, аксар ҳолларда ёчим билан ҳам мос тушади. Мас., М.Шайхзоданинг «Мирзо Улуғбек» трагедиясида Улуғбекнинг тахтдан кечиши ва охири фармонни бериши ёки Уйгуннинг «Имон» драмасидаги ҳақиқат ошкор бўлган саҳнани К.га мисол қилиб кўрсатиш мумкин. К. термини антик даврларда илмий муомалага киритилган бўлиб, ҳозирги адабиётшуносликда кўлланиши жиҳатидан пассив ҳисобланади.

КИНОЯ – 1) мумтоз адабиётшуносликда мажоз (кўчим)нинг бир тури. Атоуллоҳ Ҳусайнин К.нинг луғавий маъносини «бир нимани

дерлар, лекин андин ўзга нимани ирода қилурлар» тарзида ифодалайдики, бу таъриф кўчим термини маъносига яқин келади. Бироқ бошқа бир ўринда у фикрини куйидагича аниқлаштиради: «...андин ибораттурким, бир маънони анга лозиму табиъ маъно учун ясолғон лафз ила ул тарзда таъбир қилурларким, агар ул лафзнинг ўз ясогин ирода қилсалар ҳам раво бўлур...» Мазкур таърифга «фазл арбоби қошиға кўп бориб келмак анга лозиму тобиъ бўлған кўп кафшийртмоқ била таъбир этилиптур...» мисолининг келтирилганидан К. алоқадорлик асосидаги кўчим деб тушунилгани англашилади. Ҳозирда кўчимнинг бу тури метонимия (қ.) деб юритилади; 2) ҳозирги адабиётшунослиқда ирония терминининг муқобили сифатида фаол қўлланади. Кўчим тури сифатида К. сўз ёки бирикмани асл маъносидан бошқа, тескари маънода қўллаш демакдир. Метафора ҳамда метонимияга кўчимнинг асосий турлари сифатида қараб, бошқа кўчим турларининг улардан келиб чиққани назарда тутилса, К.ни метафора типидаги кўчим, яъни «тескари ўхшатиш» асосидаги маъно кўчиши дейиш мумкин. Мас., А.Қодирий Калвак маҳзумнинг бадбашаралигига ишора қилиб уни «хусни Юсуф» деб атайдики, бу моҳияттан тескари ўхшатишdir. Бироқ К.га фақат кўчим турларидан бири сифатидагина қараш мунозарали масала. Жумладан, К.нинг ўхшатиш объективиз ҳам намоён бўла олиши уни бошқа кўчим турларидан фарқлайди. Оддийгина «яхши» деган сўзни тескари маънода қўллаш учун оҳангини ўзгартириб айтиш кифоя. Ёки «Лолазор» (М.Мұхаммад Дўст) романнда собиқ Иттифоқ раҳбари «КАТТА ПАХТАКОР» деб аталадики, бунда аллюзия (қ.) орқали маъно кўчирилади. Кўчим сўз ёки сўз бирикмасини кўчма маънода ишлатишни назарда тутади, К. эса модаллик ифодаси сифатида тилнинг барча сатҳларида ва шу сатҳ унсурлари (товуш, интонация, сўз, жумла ва х.) воситасида ифодаланиши мумкин. Мас., К. нафақат сўзни тескари маънода қўллаш, балки жумлани киноявий маъно ифодалайдиган тартибда тузиш ва шунга мос оҳанг ёрдамида ҳам юзага чиқарилиши мумкин. Бу ҳолда стилистик фигура сифатидаги К. ҳақида галириладики, унинг бир кўриниши сифатида антифразис (қ.) кўрсатилиши мумкин.

КИНОЯВИЙЛИК – 1) комиклик кўринишларидан бири, воқеликка гоявий-хиссий муносабат тури. Бу ҳолда муаллиф бутун асар воқелигига ёки унинг бир қисмига (айрим характерларга) нисбатан киноявий муносабатда бўлади, асар композицияси киноявий нуқтаи назарни ифодалашга мос равищда қурилади. Киноявий муносабат

идеал ва воқелик ўртасидаги кеңсек номувофиқликни англашдан туғилади. Шунга кўра, К.нинг мақсади фақат кулги ҳосил қилишгина бўлиб қолмай, вазиятнинг қанчалик жиддийлиги ва ҳатто фожеийлигини ҳам таъкидлаб кўрсатишдан иборат бўлади. К.да тасдиқ орқали инкор ёки инкор орқали тасдиқ маъноси ифодаланади. К. комикликнинг алоҳида тури сифатида юмор ва сатирадан субъектив ибтидо-нинг етакчилиги билан фарқланади, яъни объектдаги комик зиддият кўпроқ муаллиф муносабати орқали юзага чиқарилади. Г.Поспеловга кўра, киноя ва унинг юқорироқ даражаси бўлган сарказм комикликнинг асосий турлари – юмор ва сатиранинг субъектив томонини ташкил этади. Яъни воқеликни маънавий-ахлоқий (юмор) ёки ижти-моий (сатира) мавқедан идрок этиш жараёнида муаллифда киноя ёки сарказм туйғуси туғилади. Кўп ҳолларда К.га юмор ва сатиранинг фонида, юмористик ва сатирик асарларнинг ёрдамчи воситаси деб қаралади. Бироқ К. юмористик ёки сатирик бўлмаган асарларда ҳам кузатилиши мумкин (мас., Ф. де Ларошфуко максималари, Умар Хайём рубоийлари). Объект танламаслиги, субъект кайфиятидан ке-либ чиқиб ҳар қандай объектга ҳам қаратилиши мумкинлиги туфайли, Г.Поспелов унга пафос турларидан бири сифатида қарамайди. Шундай бўлса-да, К.га муаллиф эмоционаллиги типларидан бири (В.Хализов) сифатида қараш зарур; 2) бадийлик модуси. Сўнгги давр жаҳон адабиёти тараққиёти давомида киноявий муносабатнинг бутун асар тузилишини белгилашдаги аҳамияти ортди. Агарда илга-ри киноявий муносабат фақат кичик жанрлардаги асарлар (мас., халқ латифалари, Умар Хайём рубоийлари, Ф. де Ларошфуко максималари) структурасини белгилаган бўлса, XX аср адабиётида, хусусан, 80-йиллар ўзбек насирида (М.Мұхаммад Дўст. «Лолазор») бошдан-оёқ киноявийликка асосланган асарлар яратилдики, уларни айни модус хусусиятларини эътиборга олган ҳолдагина бадииятга дохил асарлар ҳисоблаш мумкин бўлади. Киноявийлик бадийлик модуси сифатида «ўзим учун мен»нинг «бошқалар учун мен»дан кескин ажрапиши (фарқланиши) натижасида юзага келади. Киноявий «мен» ташки борлиққа ичдан алоқасизлиги, у билан муносабатда бўлмаслиги билан характерланади. Киноявий асар муаллифи ма-салани ахлоқийлаштирумайди (бу, айни пайтда, ахлоққа зид нуқтаи назар эмас), муаллиф қаҳрамон ва воқеликни баҳолар экан, ҳатто ана шу баҳо принципларидан ҳам четлашиб, уларга бошқа тарафдан назар ташлайди. Зеро, К. сатира ва юмордаги каби реалликни баҳолаш билангина чекланмайди, шу боис воқелик ва бадий

асардаги ҳар қандай ижтимоий-маънавий (баъзан эстетик) идеал ёки ғоявий-ҳиссий муносабат кинояниң объекти бўла олади. Шу маънода киноя «хукм устидан хукмдир». Киноявий нуқтаи назар субъекти ҳамма нарсадан – нафақат қаҳрамон, балки, умуман, воқеилиқдан четлашган, узилган ҳолда уларни юқоридан кузатади, қаҳрамоннинг ожизлиги, у тушиб қолган вазиятнинг абсурд – маънисизлигини гўё ўта ҳиссизлик, бефарқлик билан кузатар, тасвирлар экан, бундай маънисиз вазиятга муаллиф ҳам, китобхон ҳам тушиб қолиши мумкинлигини англаб турдиган. Шунга кўра, киноявий нуқтаи назар эгаси нафақат обьектдан, балки ўз-ўзидан ҳам четлашган бўлади. Бу эса, ўз навбатида, китобхондан ҳам ўзидан, маънавий-ахлоқий принципларидан, эътиқод ва аъмолидан четлаша олиш (воз кечиш эмас), уларга четдан назар ташлай билишни талаб қиласиди, бусиз ўкувчи киноявий модусдаги асар бадииятини тушунолмайди, унда катарсис рўй бермайди. Шунинг учун киноявий адабиёт китобхонларни кескин ажратиб кўяди. Яъни киноявий асарнинг қабул қилиниши, киноявий бадииятнинг юзага чиқишида муаллиф-объект-адресат учлигидаги адресатнинг аҳамияти янада ортади.

КИРИТМА ҲИКОЯ – воқеабанд сюжетли асар таркибига киритилган мустақил ҳикоя. К.ҳ., одатда, асар сюжети билан бевосита боғланмайди, ўзининг мустақил сюжетига эга бўлиб, асар бутунлигига мазмуний жиҳатдан боғланади ва бадиий концепцияни ифодалашга хизмат қиласиди, шу жиҳатлари билан у моҳиятан гап таркибидаги киритма конструкцияларга ўхшашидир. Мас., «Ўткан кунлар»даги уста Олим ҳикояси роман асосий сюжетига бевосита боғлиқ эмас: у бош қаҳрамон билан тасодифан учрашиб қолган кишининг ҳикояси сифатида берилади. Лекин айни шу ҳикоя асарда бир қатор бадиий-эстетик функцияларни бажаради: Отабек билан уста Олимни қалбан яқинлаштиради, уларнинг қиёматлик дўст бўлиб қолишини асослайди; Отабек шу дўстлик туфайли душманини танийди, ғанимлари режасидан воқиф бўлади – яъни К.ҳ. билвосита сюжетнинг кейинги ривожини асослайди; адига икки типдаги одам (янгича фикрлайдиган Отабек ва эскича фикрлайдиган уста Олим)ни қиёслаш ва шу асосда ўзининг бадиий фалсафасини янада ёрқин ифодалаш имконини беради. Ёзувчининг олам, одам ва замон концепцияси – бадиий фалсафасини шакллантириш ва ифодалашда К.ҳ. нечоғлиқ муҳим унсур экани «Асрга татигулик кун» (Ч.Айтматов) романи мисолида яққол кўринади. Романга киритилган «Найман она ҳикояси» адиги-

га асар ёэилган даврда ўта долзарблашган манкуртлик фожиаси, Чингизхон ҳәётидан нақл этувчи «Сариўзакдаги қатл» ҳикояси чекланмаган мустабид тузум моҳияти ва у инсониятга келтириши мумкин бўлган фожиалар, Раймали оға ҳақидаги ҳикоя эса шахс эрки ва унинг дахлсизлиги масалаларини бадий мушоҳада этиш имконини беради. Асар тўқимасига сингдириб юборилган мазкур К.ҳ.лар асосий сюжет воқеалари билан яхлит мазмуний бутунликни ташкил қиласди ва айни шу бутунлик адебнинг олам, одам ва замон ҳақидаги бадий концепциясини ифодалайди. К.ҳ.лар ҳажми, жанр хусусиятларига кўра турлича (киритма эпизод, ривоят, афсона, латифа, ҳикоя, қисса) бўлиши, уларнинг асар структурасига киритилиши турлича усуллар (персонаж ҳикояси, бирорвнинг кўлётмаси ва б.) билан асосланиши ёки асосий сюжетга параллел тарзда бериб борилиши (мас., У.Ҳамдам. «Исён ва итоат») мумкин.

КИТОБАТ (ар. **كتاب** – ёзув, ёзиш, кўчириб ёзиш, хат ёзиш) – мумтоз адабиётдаги шеърий санъат, байтда араб ҳарфлари воситасида ўзига хос ташбех яратиш. Яъни К. санъатида араб ҳарфлари мушаббихун биҳ вазифасини ўтайди: ушбу санъат араб ҳарфларининг ёзувдаги шакли билан бирор нарса-ҳодиса, ҳолат (кўпроқ ёрнинг аъзолари, ошиқнинг эгилган қадди ва ш.к.) ўртасидаги ўхшашлик асосида воқе бўлади. Шунинг учун К.ни алоҳида санъат эмас, ташбехнинг бир кўриниши сифатида тушуниш тўғрироқ бўлади. Мас., Эркин Воҳидовнинг:

*Ҳажрда қаддимни дол эттина десам; бергай жавоб:
Ким қўйибди севгини қадди букилган чол учун, –*

байтида ошиқнинг ҳижрон азобидан эгилган қадди – мушаббих, «дол» (-) ҳарфи эса мушаббихун биҳдир.

КЛАССИКА (лот. *classicus* – намунали, мумтоз) – энг яхши, намунали, мумтоз дея эътироф этилганлик. Яъни, аслида, К. термини ўзида баҳо муносабатини ифодалайди. Шунга қарамай, К. сўзининг муомала амалиёти ва адабиётшуносликдаги қўлланишида турличалик мавжуд. Жумладан, у конкрет асар («Ҳамса», «Ўткан кунлар», «Анор» ва ҳ.), муайян бир ижодкор (А.Навоий, А.Қодирий, А.Қаҳҳор) ёки бутун бир даврга (Ўзбек классик адабиёти) нисбатан ҳам қўлланаверади. Мазкур ҳолатларнинг биринчисида баҳо муносабати тўлиқ сакланади, чунки бу ўринда ҳар жиҳатдан намунали

бўлган мукаммал бадиий асар назарда тутилади. Иккинчи ҳолда ҳам баҳо муносабати устувор, шунинг учун терминни ўйлаброқ ишлатган маъқул: ўз ижоди билан бадиий тафаккурни сезиларли олға силжита олган ижодкорларга нисбатангина *классик* дейиш тўғри бўлади. Учинчи ҳолда эса баҳо муносабати ўрнини давр маъноси эгаллади, яъни ўзбек *классик адабиёти* дегани «энг яхши, намунали» дегани эмас, балки X – XI асрлардан бошлаб XX аср бошларигача бўлган ўзбек адабиёти демакдир.

КЛАССИЦИЗМ (лот. *classicus* – намунали, мумтоз) – XVII асрдан XIX аср бошларига қадар Европа санъатида кузатилган эстетик ҳодиса, шу давр адабий жараёнида етакчи мавқе тутган адабий йўналиш. Мутахассислар К.нинг пайдо бўлишини 1515 йил – итальян ёзувлчиси Триссинонинг «Софонисба» трагедияси яратилишидан бошлаб белгилашади. Триссино бу асарини антик трагедия намуналарига таянган ҳолда, сюжет воқеаларини антик Рим тарихчиси Тит Ливий асарларидан олиб, Арасту «Поэтика»сида қўйилган талабларга риоя қилган ҳолда яратганди. Худди шу нарса – антик адабиётни эталон деб билиш, ундаги образлар ва поэтик шакллардан фойдаланиб ва антик даврда ишлаб чиқилган қоидаларга амал қилган ҳолда ижод қилиш талаби К.нинг асосий хусусиятларидан бири саналади. К.нинг назарий асослали Ю.Ц.Скалигерларнинг охирларида, хусусан, Л.Кастельветро, Ю.Ц.Скалигерларнинг поэтикага оид рисолаларида пайдо бўла бошлаганди.

Францияда К. адабий йўналиш сифатида тўла қарор топиб, адабий жараёнда етакчи мавқе эгаллаган бўлиб, француз К.и Европадаги бошқа халқлар адабиётларига жиддий таъсир кўрсатган. Францияда К. маданиятининг гуллаб-яшнашига асос бўлган қатор омиллар мавжуд эди. Аввало, мавжуд ижтимоий-тарихий шароитда К. давлат ва миллат манфаатларига тўла мос эди. XVII асрга келиб марказлашган давлат ташкил қилиш ҳаракати ниҳоясига етган, том маънодаги абсолют монархия ўрнатилиб, Франция Европадаги энг курдатли мамлакатга айланганди. Мазкур шароитда К. хукумат тан олган расмий ва чин маънода етакчи бадиий метод бўлиб қолди. Қирол хукумати классицист адибларга маош тайин қиласи, уларни кўллаб-куватлайди; хукуматнинг тил ва адабиёт соҳасидаги сиёсати Француз академияси томонидан амалга оширилади. Хукуматнинг бу масалага жиддий эътибор бериши бежиз эмас. К. адабиёти француз давлатчилигининг мустаҳкамланиши, французларнинг ягона

миллат сифатида бирлашишига хизмат қилиши лозим здики, у ушбу миссияни шараф билан уddaлади, француз жамияти ва миллий маданияти тарихидаги жуда муҳим босқич бўлиб қолди.

Француз К.ининг гуллаб-яшнашига асос бўлган яна бир муҳим омил Декарт таълимоти бўлиб, у XVII аср француз фалсафий тафаккурининг чўққиси ҳисобланади. Декарт фалсафада рационализм оқимининг асосчиси, унга кўра, ҳақиқатнинг бош мезони ва манбаи онгдир. Яъни Декарт ҳақиқат манбаи борлиқда ёки тажрибада эмас, балки тафаккур қурилмаларида деб билади. Шундан келиб чиқкан ҳолда К.нинг асосий тамойиллари белгиланади. Уларга кўра, санъат ақл томонидан қатъий тартибга солиниши керак, бадиий асар ақлга мувофиқ ва аниқ таҳлилга имкон берадиган тарзда қурилиши лозим, санъат асарининг кучи тафаккур курдати ва мантиғи билан белгиланади. К. эстетикаси, поэтикасининг асослари, уларнинг норматив характерга эгалиги санъатни шундай тушунишдан келиб чиқади. К. назариётчиларидан бири Ла Менардъер ўзининг «Поэтика» (1639) асари ҳақида «Мен Санъат бўйича йўриқнома ёзишга ҳаракат қилдим», бу машаққатли ишга жазм қиларкан, «Файласуфга (Арастуга – тузувчилар) бадиий маҳоратга оид барча ҳақиқатларнинг манбаи деб қарадим» дейди. Яъни, унга кўра, «Поэтика» ижодкорлар амал қилиши лозим бўлган қоидалар мажмуи (йўриқнома), антик даврда ишлаб чиқилган қоидалар эса эталондир. Худди антик даврдаги каби К. ҳам адабиётни табиатга тақлид деб билади, унинг вазифасини қатъий қоидалар асосида табиат (олам)ни идеал уйғунликдаги тартиби билан намоён этиш – санъат ҳодисасига айлантиришда кўради. К. учун мангув, вақт ҳукмига бўйсунмайдиган қадриятларгина эстетик қимматга эга. Шундай қадриятларни ифодалаш учун К. антик адабиётдаги образлар, сюжетларни асос қилиб, уларга универсаллик баҳш этишга интилади. Оламга хос муайян қонуният асосидаги тартибот санъатда ҳам бўлиши лозим деб билган К. назариётчилари бадиий ижодда белгиланган қоидаларга оғишмай амал қилишни талаб этади. Мас., улар «юксак» (трагедия, эпопея, ода) ва «тубан» (комедия, сатира, масал) жанрларни ажратишади, уларга хос хусусиятларнинг араласиши мумкин эмас; ҳар бир жанрга хос сюжет, материал, мазмун, рух, қаҳрамонлар қатъий белгиланган; драматик асарда уч бирлик (воқеа, вақт ва жой бирлиғи) қоидасига амал қилиш шарт ва ҳ. деб билишган. Эътиборли томони шуки, К. даврида адабиётнинг моҳияти, вазифалари, бадиий асарнинг қурилиши масалаларидан

·баҳс этувчи кўплаб асарлар яратилган, жумладан, Н.Буалонинг «Шеърий санъат» асарида К.нинг адабий-эстетик қарашлари мұфассал ифодасини топган.

КОЛЛИЗИЯ (лот. *collisio* – тўқнашув) – бадиий асарда тасвирланган воқеа асосида ётувчи персонажлар орасидаги тўқнашувлар, зиддиятлар. Илмга Гегель томонидан киритилган К. термини адабиётшуносликда баъзан конфликтнинг синоними сифатида кўлланади. Шунга қарамай, уларни сезиларли фарқ билан қўллаш амалиёти ҳам мавжуд. Жумладан, зиддиятларни ўткирлик жиҳатидан даражалаган ҳолда К.ни ўткир зиддият маъносида тушуниш; кўлам жиҳатидан даражалаган ҳолда тарихан глобал характердаги тўқнашувларни К. деб аташ; шунингдек, К.ни конфликтга нисбатан торроқ кўламда қўллаб, конфликтнинг бир кўриниши, асосан, эпик асарлар воқеа ривожидаги бир ҳолат – *ситуациядаги* (қ.) персонажлар зиддияти сифатида ҳам тушунилади. Кейинги давр адабиётшунослигига К.ни сўнгти маънода, яъни тасвир предмети сифатидаги зиддият (конфликт) эмас, унинг таркибий қисми – ички структуранинг элементи сифатида тушуниш кенгроқ оммалашмоқда.

КОМЕДИЯ (юн. *komos* – қувноқ маросим, *ode* – қўшиқ) – драматик турнинг учта асосий жанридан бири, антик даврда ёк жанр сифатида шаклланган. К. драматик турнинг комикликка асосланган жанри бўлиб, унда характерлар, ҳолат ва воқеалар кулгили тарзда, комикликка йўғрилган ҳолда тақдим этилади. Антик замонлардан то классицизм даврига қадар К.да трагедиянинг зидди кўрилган (трагедия фожиали якун топади – К. баҳтли; трагедия фавқулодда кучли шахслар – К. да қуий табақа кишилари; трагедия тарихий воқеага асосланади – К.да тўқима ва х.), адабиётшуносликка оид рисолаларда трагедияга юксак, К.га эса тубан жанр сифатида қаралган. Мазкур ҳол XVIII асргача, маърифатчилик адабиётида оралиқ жанр сифатида драма пайдо бўлгунга қадар давом этган. Кейинги икки аср давомида К. муттасил ривожланди, турфа жанр хусусиятларини касб этиб, имкониятлари кенгайди.

К.нинг асосида ётувчи ижобий куч – кулги, у жамият ҳаётида, кишилар феъл-авторида мавжуд камчиликлар, идеалга номувофик жиҳатларга қаратилган бўлади. К.нинг марказида комик характерлар туради. Одатда, комик характер деганда ўзида идеалга тамоман зид иллатларни жамловчи ёки улардан айримларини намоён этувчи персонажлар назарда тутилади. Бу ўринда асосий шартлардан бири

шуки, комик персонаж ўзининг мавжуд ҳолатини идрок этмайди, ўзига реал баҳо беришга ожиз. Аксинча, у ўзини бор ҳолига нисбатан тамоман тескари баҳолашга мойил: фирт тентак бўлгани ҳолда ўзини ақли санайди, маънан тубан бўлгани ҳолда ўзини покдомон билади – ўзини ўзгаларга шундай сифатларда тақдим этишга чиранади. Мас., Уйғуннинг «Парвона»сидаги Ўтқурй маънан тубан, ахлоқан бузук, оддий маҳмаданаю фирибгар бўлгани ҳолда ўзини ақли, сўзамол, уддабурон, яшашни биладиган ва ҳ. фазилатлар эгаси деб ҳисоблади, шундай кўринишга уринади. Худди шу нарса – характернинг моҳияти билан мавжудлиги орасидаги номутаносиблик комикликни, характер комиклигини юзага чиқаради. К. ҳолат комиклиги асосига ҳам қурилади. Мас., С.Аҳмаднинг «Келинлар кўзғолони», «Куёв» асарларида ҳолат комиклиги устувор мавқега эга. Аслида, бу хил фарқлашда шартлилик бор, чунки К.да характер комиклиги билан ҳолат комиклиги уйғунлашиб келади, улар бир-бирини тўлдиради, бири иккинчисини намоён этади.

К. сатирик ёки юмористик руҳда бўлиши мумкин, ҳар икки ҳолда ҳам у ғоявий-ҳиссий инкор қиласди: сатирик руҳдаги комедия қаламга олинган характер ёки ҳолатни тўла инкор қиласа, юмористик руҳдаги комедия характер ёки ҳолатдаги айрим жиҳатларни қисман инкор қиласди. Мас., А.Қаҳҳорнинг «Тобутдан товуш», «Оғриқ тишлар» К.лари сатирик руҳдаги асарлар саналса, Э.Воҳидовнинг «Олтин девор» асарида юмористик руҳ устуворлик қиласди. К.даги кулгини жўн тушунмаслик лозим, чунки чинакам комиклик ижтимоий аҳамиятга молик кулгини тақозо этади, бундай кулги кишини ўйлатади, кулдирб кўйдиради, йиглатади. Шу маънода, ҳар қандай кулгили саҳна асарини К. санаш хато бўлур эди. Чинакам комизм билан йўғрилган драматик турнинг бу жанрини кўпроқ ташки саҳна эффектлари орқали кулдиришга қаратилган фарс, қувноқ кулги кўзғатувчи водевиль ёки халқ сайилларида ижро этилувчи қизиқчи-масхарабоз томошаларидан фарқлаш керак.

КОМИКЛИК (юонон. *Komikos* – кулгили, қувноқ) – ҳаётдаги ва санъатдаги кулгилилик; бадиий асарда ижодкор идеалига зид характер ва ҳодисаларнинг кулги йўли билан инкор этилиши. К. умумэстетик категория саналиб, бадиий санъатларнинг барida (меъморликдан ташқари) кузатилиши мумкин. Ҳар қандай кулги ҳам К. саналавермайди, бу ўринда ижтимоий аҳамиятга молик кулги назарда тутилади. Яъни К. муайян тарихий шароитда жамият тараққиётининг мавжуд ҳолати, ундаги тараққийпарвар кучлар, илғор идеаллар-

га номувофиқ бўлиб қолган ижтимоий фактлар (воқеа-ходисалар, ғоялар, урф-одатлар, турмуш тарзи, ижтимоий муносабатлар; инсонларнинг хатти-ҳаракатлари, маънавий-ахлоқий қиёфаси ва ш.к.) устидан кулиш сифатида кўзга ташланади. Яъни К. объект ва субъект бирлигига намоён бўлади: унинг юзага келиши учун объектидаги номувофиқликни кўра оладиган ва идеал нуқтаи назаридан баҳолай биладиган субъектнинг бўлиши шарт қилинади. Шу билан бирга, К.нинг турли кўринишларида объектив ва субъектив ибтидолар нисбати, К.нинг юзага чиқиш йўсини бир хил бўлмайди. Mac., сатира (қ.) ва юморда (қ.) субъект муносабати кўпроқ объектидаги зиддиятни бўрттириб кўрсатиш орқали намоён бўлса, киноя (қ.) ва сарказмда (қ.) объектидаги зиддият, асосан, муаллиф муносабати орқали юзага чиқарилади. Шунинг учун сарказм ва киноя объектида номувофиқлик яққол кўзга ташланмайди, улар кўп жиҳатдан контекст билан боғлиқ бўлади. Комик муносабат объекти ўзида идеалга тамоман зид иллатларни ёки улардан айримларини намоён этадики, шу жиҳатдан сатира ва юмор кўринишлари фарқланади. Сатира объектда идеалга мутлақо зид, жамиятнинг жорий ҳолати нуқтаи назаридан тўла инкор қилинувчи зиддиятларни акс эттира, юморда объектидаги айрим жиҳатларнигина инкор қилиш кўзда тутилади. Адабиётнинг бадиий арсеналида К.ни юзага чиқарувчи қатор бадиий усул ва воситалар мавжуд бўлиб, уларга гротеск, карикатура, пародия, каламбур, закийлик, ззол тили, комик контраст каби қатор воситаларни мисол қилиш мумкин. Ушбу воситаларнинг бир қисми объектни деформацияланган тарзда тасвирлашга, бошқа бир қисми эса субъектив муносабатни турли йўсин ва даражада ифодалашга хизмат қиласди.

КОМИЛ (ар. **کامیل** – етук, мукаммал) – аруз баҳрларидан бири, ҳаракатининг (унлиларининг) кўплиги жиҳатидан воғирга нисбатан етукроқ, мукаммалроқ бўлгани учун шундай номланган. Мутафоилун (vv – v –) аслининг такоридан ҳосил бўлади. К. асосан, араб шеъриятига хос бўлиб, ўзбек шеъриятида жуда кам кўлланган баҳрлардан биридир. Навоийнинг «Мезон ул-авzon»ида К. баҳрининг биргина *комили мусаммани солим* вазни, Бобурнинг «Мухтасар»ида эса унинг йигирма икки вазни мисоллар билан келтирилган. К. баҳри ўзбек шеъриятига илк бор Навоий ижоди орқали кириб келган, ундан кейин Мунис, Оғаҳий, Увайсий, Муқимий, Ҳабибий каби шоирлар ҳам мазкур баҳрда шеърлар битганлар. Mac., Навоийнинг:

*Нə бало эмиш сəнинг ул хиром ила қоматинг,
Гаҳи суръатинг, гаҳи ноз бирла иқоматинг, –*

байти комили мусаддаси солим (*v v – v – / v v – v – / v v – v –*) вазнида ёзилган.

КОМПАРАТИВИЗМ (лот. comparatives – қиёс, қиёсий) – 1) кенг ва кўпчилик томонидан истифода этиладиган маънода қиёсий адабиётшунослик (қ.), адабиёт тарихининг миллий адабиётлар тараққиётидаги ўзаро муштарак ва фарқли томонлар, миллний адабиётларнинг ўзаро алоқалари ва таъсири масалаларини ўрганувчи бўлими; 2) тор маънода қиёсий адабиётшуносликнинг шаклланиш давридаги бир босқич, адабий фактлардаги ташки ўхшашликларни (тарихий шарт-шароит, адабий анъана, ижодкор дунёқарashi, услуби каби контекстлар билан боғламаган ҳолда) қиёслаш билан чекланилган давр.

КОМПОЗИЦИЯ (лот. composition – тузиш, бириктириш) – бадий асар қисмларини яхлит бадий ният (муайян концепцияни шакллантириш ва ифодалаш, кўзланган ғоявий-эстетик таъсир) ижроси учун энг оптималь ҳолда жойлаштириш, бадий система (асар)даги унсурларни ўзаро алоқа ва муносабатлари равshan англашиладиган тарзда бутунликка бириктириш. Яъни композиция бадий шаклнинг унсури эмас, у, аввало, шакл компонентларини бадий мазмунни шакллантириш ва ифодалаш учун энг қулай тарзда уюштиришга қаратилган амал, шуни амалга ошириш принципларидир. Айни амал туфайли асар унсурлари шундай уюштириладики, натижада унда биронта ҳам ортиқча унсур бўлмайди, ҳар бир унсур бутун таркибида ўз функциясига эга бўлади ва муайян ғоявий-бадий юк ташийди. К. тушунчаси бадий асарнинг барча сатҳларига бирдек таалуқли, унинг қайси сатҳи ҳақида гап кетмасин, қурилишининг айни шу аспекти диққат марказида туради: матн қурилиши (боб, сарлавҳа, асосий ва ёндош матн), бадий нутқ шакллари (хикоялаш, тавсиф, диалог), ривоя субъектлари (муаллиф, персонаж, ўзга шахс), нуқтаи назар (ровий ёки персонаж нигоҳи орқали кўриш)ларнинг мақсадли алмашиниб туриши, персонажлар системаси (бош, иккинчи дарожали ва ёрдамчи персонажлар тарзида даражаланиши, уларнинг шунга мос ўзаро муносабатдорликда жойлаштирилиши), сюжет қурилиши (воқеаларнинг замон ёки сабаб-натижа муносабати асосидаги алоқадорлиги, юз бериш ва ҳикоя қилиниш вақти, турли мақон ва замонда кечётган воқеаларнинг ўзаро боғлиқлиги, маконий

ва замоний ўзгаришларнинг асосланиши ва б.) – буларнинг бари К. билан боғлиқ тушунчаларнинг бир қисминигина ташкил қиласди. К. бадий асарнинг чинакам система, яъни қисмлардан таркиб топган, лекин барча қисмлари ўзаро мустаҳкам алоқадаги бутунликка айланишини таъминлайди. Бунинг учун эса қисмларнинг ҳар бири ўз ўрни ва ўз меъёрида, бутун билан мустаҳкам алоқада бўладиган ва бу алоқалар англашадиган тарзда жойлаштирилиши муҳим. Яъни ижодий ниятдаёқ ўқиш жараёни назарда тутиладики, айни шу нарса ижод жараёнига ҳам таъсир қиласди, яратилажак асар К.сининг қандай бўлишини белгилайди. Ўқувчи К. жиҳатидан яхши ташкилланган асардан то сўнгти нуқтага қадар янги-янги мазмун қирраларини кашф этиб боради, ўқиш давомида турфа ҳиссий ҳолатларни қалбдан кечиради, ақлий ёхуд руҳий толиқиши, зерикиш ҳисларидан фориф бўлади. Демак, бадий асар К.си нафақат асарнинг барча компонентларини уюштириб, унинг шаклий ва мазмуний бутунлигини таъминлайдиган, балки унинг ўқилиши, ўқилиши ва китобхонга гоявий-эстетик таъсирини бошқарадиган, хуллас, асарни чинакам санъат ҳодисасига айлантирадиган энг муҳим унсур экан. Шунинг учун К.га бадий шаклнинг гултожи сифатида қаралади, муайян асар бадиияти ҳақида гап кетганда унинг композицион хусусиятларига, бадий маҳорат ҳақида сўз борганда шу борадаги маҳоратга айрича эътибор берилади. Зеро, бадий асарда ҳаёт муайян бадий шаклга солинган ҳолда акс эттирилади, унда янги реаллик – бадий воқелик яратилади. Яъни санъаткор бир бутунликдан иккинчи бир бутунликни – воқеликнинг бадий моделини яратиши, ҳаёт материали (диспозиция)ни бадий асар (композиция)га айлантириши зарур бўлади. Шу боис диспозицияни К.га айлантира олиш иқтидори ижодкор шахснинг туғма имкониятлари сирасида энг муҳими сана-либ, истеъдод кучи шу иқтидорнинг қай даражада эканлиги билан белгиланади.

КОНТЕКСТ (лот. соп – бирга, *textus* – мато, тўқилган) – 1) алоҳида сўз (матн бирлиги)ни курсаб турган ва унинг маъноси тушунилишига асос бўлувчи матн, уни ташкил этаётган сўзларнинг бевосита луғавий маъносидан кенг бўлган маъно тизими. К. нутқий бўлакнинг шаклий ифодаси билан мазмунининг уйғун бирлигини таъминлайди, ундаги турфа маъно жилваларининг реаллашуви, сўзловчининг етказилаётган информацияга муносабатини ифодалашда муҳим аҳамият касб этади. Шу билан бирга, илмда К.ни факат матн (оғзаки ёки ёзма) доираси билан чекламай, кенгроқ тушуниш ама-

лиёти ҳам мавжуд бўлиб, бунда нутқ моменти, мулоқот субъектлари, мулоқотнинг умумий мавзуси кабиларга ҳам К. сифатида қаралади. Яъни бундай ёндашишда К. кенгайиб бориш хусусиятига эга бўлади; 2) адабий асар – сўзлардан таркиб топган матн. Бадий матнни ташкил этаётган унсурлар бир-бири билан қисм – бутун (текст – контекст) муносабатида бўлиб, қисмнинг мазмуни бутун ичида, бутуннинг мазмуни эса қисм орқали реаллашади. Агар асрнинг тўлиқ матнини К. деб олсак, у ўз ичида кичикроқ К.ларга (бўлим, боб, абзац, жумла) ажралади. Булар асарнинг ички алоқаларигагина оид бўлиб, аслида, адабий асар матн (текст) сифатида ўзидан ташқаридаги бошқа К.лар доирасига ҳам киради. Бадий асар санъаткорнинг яратиш онларидаги ижодий-руҳий ҳолати маҳсули сифатида, аввало, айни шу ҳолат К.ига киради, ўз навбатида, бу К. ҳам кенгайиб боради: муаллифнинг асарни яратиш пайтидаги ижодий-руҳий ҳолати – муаллиф биографияси – давр ҳаёти – миллат тарихи. Иккинчи томондан, конкрет асар миллий адабиёт тараққиётининг муайян бир босқичи маҳсули сифатида давр адабиёти К.ига киради ва у ҳам кенгайиб боради: ижодкор мансуб адабий авлод – давр адабиёти – миллний адабий анъаналар – жаҳон адабиёти анъаналари. Мазкур К.ларнинг ҳар бири асарнинг у ёки бу қиррасини англаш, очиб беришга хизмат қилади.

КОНТРАСТ (фр. *contraste* – кескин қарама-қарши қўйиш) – бадий адабиёт ва санъатнинг бошқа турларида тасвирланаётган нарса-ҳодисаларни бир-бирига кескин қарши қўйишга асосланган бадий усул. К. тасвирланаётган нарсани бўрттириб, қабартириб кўрсатиш имконини беради, бадий усул сифатида қадимдан кўлланиб келади. К. бадий асарнинг барча сатхларида (тил, сюжет, характер ва шароит, композиция) намоён бўлиши, унда зидлаш ошкора ёки пинҳона амалга оширилиши мумкин. Жумладан, К. тил сатҳида *антитета* (ёки *тазод*) кўринишида, сюжет сатҳида бир воқеа (ёки ҳолат)нинг иккинчи воқеа (ёки ҳолат)га қарши қўйилиши (мас., «Зумрад ва Қиммат») тарзида, композиция сатҳида эса асарнинг бир қисмини иккинчи қисмiga қарши қўйиш (мас., Чўлпон. «Новвой қиз») орқали намоён бўлади.

КОНФЛИКТ (лот. *conflictus* – тўқнашув) – персонажларнинг асар сюжетида бадий ифодасини топадиган ўзаро тўқнашув ва курашлари, қаҳрамон билан муҳит орасида ёки унинг руҳиятида кечувчи зиддиятлар, қарама-қаршиликлар. К. термини анъанавий тарзда кўпроқ эпик ва драматик асарларга нисбатан кўлланади.

Чунки улар воқеабанд сюжетга эга бўлиб, тасвирий-динамик санъат турлари саналади, яъни уларда ривожланиб борувчи воқеалар силсиласи – макон ва замонда кечувчи ҳаракат қаламга олинади. Сюжет воқеалардан, воқеалар эса персонажларнинг хатти-ҳаракатлари, ўзаро мураккаб муносабатлари, зиддиятларидан таркиб топгани сабабли ҳам, ҳаёт зиддиятларини умумлаштирувчи воқеалар тизими сифатида таърифланади. Сюжет билан К. орасида иккиёклама алоқа кузатилади: бир томондан, сюжет К.ларни умумлаштириб намоён қиласи; иккинчи томондан, К. сюжетни ҳаракатга келтирувчи асосий куч бўлиб, сюжетнинг асосий босқичларини белгилайди: К.нинг қўйилиши – тугуў, К. кескинлашган энг юксак нуқта – кульминация, К.нинг у ёки бу тарзда ҳал этилиши – ечим.

Бадиий асар воқеликни акс эттиргани, унинг марказида инсон образи тургани учун ҳам, инсоннинг реал ҳаётида мавжуд конфликтларнинг бари унда бадиий инъикос этади. Шу нуқтаи назардан бадиий К.нинг учта турини фарқлаш мумкин: 1) характерлараро; 2) қаҳрамон ва муҳит; 3) ички (психологик). К.нинг мазкур турлари бадиий асарда аралаш ҳолда зухур қиласи ва ўзаро узвий алоқада бўлади: бири иккинчисига ўтади, бири иккинчисини келтириб чиқаради, бири иккинчиси орқали ифодаланади ва х. Мас., Чўлпоннинг «Кеч» романидаги Мирёқубнинг муҳит билан зиддияти унинг Акбарали билан ўзаро зиддиятли муносабатлари фонида етилади, шу муносабатлар қаҳрамон руҳиятидаги мураккаб жараёнга – ўй-фикрлар курашига туртки беради. К.нинг барча турлари ҳам қаҳрамонни муайян бир ҳаракатга ундейди, бу эса уни сюжетни юргизувчи куч дейишга асос беради: Акбарали билан очиқ тўқнашув даражасига етмаган зиддияти Мирёқубни ҳаракатга – ўзини валинеъмати билан қиёслаш асосида ўзининг кимлигини, ҳаётдаги ўрнини англашга уннадики, унинг руҳиятида мураккаб ўйлов жараёни («ички ҳаракат») бошланди; ўйловлар натижасида у ўзини ижтимоий шахс сифатида танишга, ўзининг ижтимоий мақомини англашга келдики, бу энди уни фаол ижтимоий ҳаракат («ташқи ҳаракат»)га ундаши табиий (унинг жадидларга хайриҳоҳ мавқени эгаллаши романнинг иккинчи китобида Мирёқуб ижтимоий фаолиятда тасвирланиши мумкин эди деган таҳминни пайдо қиласи). Демак, К. персонажнинг қай йўсин ҳаракат қилишини белгилаб, сюжет воқеаларининг қай тарзда ривожланишига ҳам таъсир қиласи. Мас., «Ўткан кунлар»даги Отабек руҳиятидаги зиддият шуки, у замонасининг илғор зиёлиси сифатида

инсон шахсини хурмат қилади ва, айни чөнда, ўз даври, муҳити таъсиридан буткул холи ҳам эмас. Натижада Отабек муҳит билан К.да (ота-онаси уни иккинчи бор уйлантиришга жазм қилганда, қарши тургани моҳияттан қаҳрамон-муҳит К.и, фақат бу нарса ота-она билан муносабат орқали ифодаланади) ён берди: «бир бечораға кўрабила туриб жабр ҳам хиёнат...» бўлаётганини, Зайнаб «қаршисида бир жонсиз ҳайкал» бўлишини билатуриб уйланишга розилик берди. Яъни Отабек руҳиятидаги эскилик ва янғилик курашида аввалгиси устун келди: у ўша дамда Зайнаб шахсини, унинг хуқуқини ҳимоя қилолмади. Кейинрок, Зайнабнинг ўзига нисбатан муҳаббатини билгач, Отабек айбини чукур ҳис қилди, шу боис Кумушнинг қатъий талабларига қарамасдан, унинг жавобини беришга журъат этолмади, натижада ўзи истамагани ҳолда фожиага йўл очиб берди. Кўринадики, қаҳрамон руҳиятидаги зиддиятлар унинг муҳит ва шу муҳитдаги кишилар билан зиддияти асосида юзага келади, айни пайтда, уларга фаол таъсир ҳам қилади – сюжетнинг у ёки бу тарзда ривожланишини белгилайди. Бу эса К. сюжетни ҳаракатлантирувчи куч эканлигини кўрсатувчи яна бир ёрқин далилдир. Айтилганлардан К.нинг яна бир муҳим функцияси аён бўлади: у шакл унсури сифатида бадиий концепцияни ифодалашда муҳим ўрин тутади, К. мазмун компоненти бўлмиш проблема билан бевосита боғлиқдир. Бошқача айтсан, К. проблематиканинг жавҳарини ташкил этса, уни ҳал қилиш йўсини ва йўналиши бадиий концепциянинг ўзагини ташкил этади. Зоро, ҳар бир конфликтли ҳолат турлича ҳал этилиши, демак, воқеалар ривожи ҳам шунга боғлиқ сифат кўринишига эга бўлиши, бу эса мос равишда гоявий-хиссий муносабатни ўзгартириши ва пировард натижада бадиий концепциянинг ўзгаришига олиб келиши табиийдир.

Адабиётшуносликда К. билан боғлиқ ҳали тугал тўхтамга келинмаган, баҳсли масалалар ҳам бор. Жумладан, лирик асардаги К. масаласи. Албатта, бу ўринда мураккаблик кўп жиҳатдан лирик асарларда вўқеабанд сюжетнинг йўқлиги, адабиётшуносликда лирик асарга сюжетсиз деб қарашнинг мавжудлиги билан боғлиқ. Модомики, лирик асарда ҳам ҳаракат – ҳис-туйғу, ўй-кечинмалар ривожи, сюжетнинг специфик кўриниши бор экан, уни ҳам К. ҳаракатга келтиради. Фақат лирикада К. нинг намоён бўлиши ўзига хос, эпик ва драматик асардаги каби очиқ кўзга ташланмайди. Лирик қаҳрамон ҳис-туйғуларини ҳаракатлантираётган К. характерлараро, қаҳрамон ва муҳит орасидаги кўринишлари кўп ҳолларда асар-

дан ташқарида қолса ҳам, у лирик ҳолатдан (қарама-қарши ҳис-туйгулар, зид қўйилган деталлар, тасаввурдаги обьектга мурожаат; ҳаёт ва ўлим, савоб ва гуноҳ, вафо ва хиёнат, ўтмиш ва ҳозир сингари тематик антиномияларни қелтириш ва ш.к. бошқа унсурлар ёрдамида) ҳар вақт англашилиб туради. Яъни лирик асардаги К. доим ҳам тасвирда бўртиб турмайди, лекин ҳар вақт ҳис этилади. Бу эса ҳар қандай бадий асарда К. бор, муайян бир адабий турга мансуб асарда бадий К.нинг муайян бир тури етакчилик қиласи деганидир. Драматик асарларда характерлараро К., лирик асарларда ички К. (асарда акс этиши жиҳатидан) етакчилик қилса, эпик асарларда К.нинг ҳар учала тури қоришиқ ҳолда намоён бўла олади. Негаки турлича намоён бўлгани ҳолда, ҳар қандай бадий асарда, унинг қайси турга мансублигидан қатъи назар, К.нинг ҳар учала нави мавжуд; улар ўзаро алоқада бўлиб, бири иккинчисини юзага чиқаради, бири орқали иккинчиси ифодаланади .

КУЛЬМИНАЦИЯ (лот. culmen – чўёқки) – бадий асарда воқеалар ривожининг энг юксак нуқтаси, сюжетнинг зиддиятлар кескинлашиб, конфликт яққол намоён бўладиган ўрни. К. воқеабанд сюжетнинг муҳим ва зарурий компоненти саналиб, ёчимнинг йўналишларини белгилайди, шу боис ёчим бўлмаган ҳолларда ҳам асар тугаллик, эстетик бутунлик касб эта олади. Асарнинг сюжет-композицион хусусиятлари билан боғлиқ ҳолда К. турли даражада ва турли сифат кўринишида бўлиши мумкин: концентрик сюжетларда К. бўртиб (мас., «Мехробдан чаён»: Анварнинг хон билан тўқнашуви) кўзга ташланса, хроникали сюжетларда у қадар очиқ кўзга ташланмайди; йирик эпик асарларда К. бутун бошли воқеани ўз ичига олса, кичик эпик шаклларда жажоқи эпизод (мас., «Ўғри»: Қобил бобо билан амин сухбати) ёки биргина деталь (мас., «Анор»: «Ажаб қўлдим, жигарларинг эзилиб кетсин!») кўринишида бўлади; одатда, асар финалига яқин жой олса, баъзан муайян ғоявий-бадий мақсад билан бошланишдаёт (мас., «Даҳшат»: Унсиннинг доддоҳ билан шарт боғлаши) берилади ва х. Мураккаб сюжет қурилишига эга эпик асарларда ҳар бир сюжет линиясининг ўз К.си мавжуд (мас., «Кечा»: Зеби сюжет линиясининг К.си – тўй арафаси; Мирёқуб линиясиники – ноиб билан сухбат; Акбарали линиясиники – Кумариқ воқеалари) бўлиб, улар асарнинг бош К.сига (мас., «Кечা»да – суд жараёни) бўйсундирилади. К.нинг муҳим хусусияти шуки, у персонажлар тақдири, қарашлари, ўзаро муносабатларида сезиларли сифат ўзгаришларига олиб келади, воқеалар оқимини ўзгартиради. Демак, К. деганда воқеалар кескин-

лашган ҳар қандай нүктани эмас, юқоридаги талабларга жавоб берадиган нүктани тушуниш керак.

КҮНДАЛИКЛАР – кўрган-кечиргандарни кунма-кун, одатда, санасини қайд этган ҳолда ёзиб бориш; адабиётдаги шу тарзда амалга оширилган ривоя шакли. Майший-шахсий жанр сифатида К. анча кенг тарқалган бўлиб, турли соҳа кишилари томонидан юритилган К.ни бирлаштирувчи қатор умумий хусусиятлар мавжуд. Аввало, К.да муаллифнинг кўрган-кечиргандарни, ҳис қилганлари билан уларнинг қайд этилиши орасида вақт масофаси йўқ ҳисобида, яъни олинган таассуротлар совимасиданоқ қайд этиладики, шу жиҳати билан улар мемуарлардан фарқланади. Иккинчи муҳим хусусият шуки, К. бирорларнинг ўқиши учун мўлжалланмайди, улар муаллифнинг ўзи учун ёзилади. Шу туфайли К.даги муаллиф ўй-фикрлари баёни, изҳорларида самимият, муносабат ва баҳо ифодасида ҳаққонийлик (яъни муаллифнинг ўйидагини яширмай-нетмай, ҳеч бир истиҳоласиз ёзиши) кузатилади. Худди шу нарса уларга қарийб ҳужкат даражасидаги ишонарлиликни бахш этади. Одатда, К.да кўпроқ муаллифнинг шахсий реаллиги, унинг ўзи билан бевосита боғлиқ воқеалар акс этади, бироқ шулардан келиб чиқкан ҳолда уларда олам ва одам, ҳаётнинг моҳияти, бирон-бир конкрет ҳаётий масала юзасидан умумий тарздаги мушоҳадалар ҳам ифода этилаверади.

Мазкур хусусиятлари туфайли ёзувчи-шоирлар юритган К. адабиётшунослик учун, айниқса, биографик йўналишдаги тадқиқотлар учун бекиёс манбага айланади. Бундан ташқари, К.га хос хусусиятлар айрим ҳолларда бадиий ният ижроси учун жуда қулай имкониятлар яратади. Шунинг учун адабиётда К. шаклида курилган асарлар ҳам, К. шакли муҳим композицион унсур сифатида истифода этилган асарлар ҳам кўплаб учрайди.

КЎРИНИШ – драматик асарнинг энг кичик таркибий қисми. Одатда, пардалар К.ларга бўлиниб, улар шу саҳна эпизодидаги иштирокчилар таркиби билан белгиланади; К.лар бир-биридан персонажлардан бирининг саҳнадан кетиши ёки бошқа персонажнинг келиб кўшилиши билан ажратилади. Антик Рим адабиётидаёқ драматик асар матнида К.лар алоҳида ажратилиб, рақамлаб кўрсатилган. Драматургияда узоқ вақт ҳукм сурган бу анъанадан XIX аср охири – XX аср бошларидан чекинила бошланган. Ҳозирда ҳам драматик асарда парда ичидаги К.лар фарқланиб туради, лекин матнида буни доим ҳам таъкидлаб, алоҳида ажратиб кўрсатиш шарт қилинмайди.

КҮЧИМ, ТРОП – сўзниң одатий маъносидан ўзга маънода кўлланиши, муайян бадиий-эстетик мақсадни кўзлаган ҳолда воқе бўлувчи семантик сатҳдаги нормадан оғиш. Кўчма маънода кўлланган сўзлар троп деган умумий ном билан ҳам юритилади. Маъно кўчишининг асосига таянган ҳолда, К.нинг мәтафора, мөтонимия, синекдоха, киноя, лёрифраза, аллөгория (мажоз), рамз (символ) каби бир қатор кўринишлари ажратилади. Айтиш керакки, К.нинг турлари адабиётшуносликка оид манбаларда турлича кўрсатилади. Жумладан, баъзан К.лар сирасига эпитет, оксиморон, литота, муболага кабиларни ҳам кўшиш ҳолларига дуч келиш мумкин. Албатта, бундай қилишга асос бера оладиган айрим мисоллар борлиги, умуман, бу воситаларда ҳам К.га яқин хусусиятлар кузатилиши бор гап. Лекин К. деганда бадиий матнда муайян бир асосга (нарса-ҳодисалар орасидаги ўхшашиблик, алоқадорлик, вазифадошлиқ ва ҳ. жиҳатидан муштаракликка) таянган ҳолда сўз (баъзан бирикма)нинг ўз маъносидан бошқа маънода кўлланишини тушуниш керакки, шунда чалкашликлар ўз-ўзидан барҳам топади. Бадиий асарда кўлланилувчи К.лар ўзларининг ишлатилиш кўлами, бадиий бўёқдорлиги, таъсирдорлик даражаси каби жиҳатларига кўра бир-биридан жиддий фарқланади: а) уларнинг бир қисми аллақачон тил ҳодисасига айланиб улгурган. Мас., «кун ботди», «соат юряпти» каби бирикмаларда сўз маъноси қўчганлиги аниқ, бироқ биз уларга шу даражада кўникиб кетганмизки, ҳозирда уларга К. сифатида қарамаймиз ҳам. Бадиий асар матнida мазкур К.лар кўлланганида, табиийки, муаллиф муайян бадиий-эстетик мақсад билан семантик сатҳда оғишга йўл қўйган деёлмаймиз, зоро, улар ёзувчи томонидан тайёр ҳолда олинган ва матнда эстетик функция бажармайди. Демак, уларни бадиият ҳодисаси сифатида тушуниб бўлмайди; б) асар матнida бадиий адабиётда анъанавий тарзда ишлатилиб келаётган К.лар ҳам кўп учрайди. Мас., «шакар лаб», «гул юз», «булбул», «сарв қомат», «қоши камон», «наргис кўз» ва ҳ. Бу хил К.лар ҳам юқоридагилар сингари тайёр ҳолда олинади, бироқ, улардан фарқли ўлароқ, матнда эстетик функция ҳам бажаради: тасвирийликни, ифодавийликни кучайтиради. Шунга қарамай, уларнинг қабул қилинишида кўникиб қолганлик оқибатида ҳосил бўлган «автоматизм» кузатиладики, бу уларнинг эстетик таъсир кучини сусайтиради; в) бадиий-эстетик функциядорлиги, тасвирийлик ва ифодавийликни кучайтириши жиҳатидан муайян матнагина кўчма маънода кўлланган, муаллифнинг ассоциатив фикрлаши маҳсулни ўлароқ дунёга келган

К.лар алоҳида ўрин тутади. Уларни шартли равишда «хусусий муаллиф кўчимлари» деб аташимиз мумкин. Шу хилдаги К.ларгина ёзувчининг муайян бадиий-эстетик мақсадни кўзлаб йўл қўйган семантик сатҳдаги оғиши натижасидирки, бадиий тил маҳорати хусусида гап борганда, аввало, шу хил К.ларни эътиборга олиш лозим.

Л

ЛАКОНИЗМ (юн. *lakonismos* – лаконикача) – фикрни ихчам шаклда, лўнда ва аниқ ифодалаш. Бу хусусият антик Юнонистоннинг Лакония вилояти ҳудудида жойлашган Спартада юксак қадрланган, спарталиклар оз сўз билан кўп маъно ифодалашга интилишган, шу билан боғлиқ ҳолда «лаконикача нутқ», «лаконизм» тушунчалари оммалашган. Л. афористика, мақол ва маталлар учун муҳим, айтиш мумкинки, белгиловчи хусусият саналади. Шунингдек, Л. термини айрим ижодкорлар услугуга хос хусусият маъносида ҳам ишлатилади. Mac., баъзан А.Қаҳхор услуги ҳақида гап борганда, ундаги ўзига хос жумла курилиши, сиқиқликни назарда тутиб Л. термини қўлланади.

ЛАТИФА (ар. *لطف* – нозик, ёқимли, зариф, мулоийим) – Яқин ва Ўрта Шарқ, жумладан, Марказий Осиё ҳалқлари оғзаки ижоди ва ёзма адабиётида кенг тарқалган жанр; ихчам ҳикояча, анекдот. Ҳалқ оғзаки ижодидаги Л.лар тематик жиҳатдан турли-туман, марказида кўпроқ кулгили воқеа ётади, аксар ҳолларда воқеа биргина эпизод билан чекланиб, ҳажвий-юмористик руҳ билан йўғрилган бўлади. Умумий қаҳрамонга эгалик оғзаки Л.ларнинг яна бир хусусияти-дир. Жумладан, ўзбек фольклорида – Насриддин Афанди (қисман, Машраб, Кал), тоҷикларда Мушфиқий, қозоқларда Алдарқўса, туркманларда Камина Л.ларнинг умумий қаҳрамони сифатида ҳаракатланадилар. Фольклорга хос вариантилилк Л.ларда ҳам кузатилади, жумладан, битта Л.нинг турли қаҳрамонлар билан боғланиш ҳоллари кўп учрайди. Ёзма адабиётдаги Л.лар кўпроқ ибратли мазмундаги, ўзгалар учун ибрат бўла оладиган шахслар ҳақидаги мўъжаз ҳикоячалар шаклида учрайди. Агар Л.ни жанр сифатида белгиловчи хусусиятлар (ихчамлик, сюжетнинг биргина ҳаётй эпизод асосига курилиши, тасвиirlанган воқеанинг кулгилї ёки ибратли бўлиши, қаҳрамонларига топқирлигу закийлик хослиги) эътиборга олинса, Шарқ мумтоз адабиётдаги Саъдийнинг «Гулистон» ва «Бўстон», Жомийнинг «Баҳористон», Навоийнинг қатор асарлари

ёки Хожа ҳикоятлари, шунингдек, Восифийнинг «Бадоэъ ул-вақое» типидаги қатор тарихий асарлар таркибига Л. жанрига мансуб асарлар киргани аён бўлади. Л. жанри замонавий фольклорда ҳам анча фаол: истеъдодли замондошларимиз томонидан буғунги ҳётимиз билан боғлиқ турфа мазмундаги Л.лар яратилиб, оммалашмоқда, бу – жанрнинг барҳаётлиги белгиси. Шунингдек, ахборот алмашиш жараёнини тезлашган, информацион глобаллашув шароитида бошқа халқлардан ўзлаштирилиб, миллий ҳётимиз ва менталитетимизга мослаштирилган Л.лар – анекдотлар ҳам кўплаб пайдо бўлмоқдаки, бу фольклоршунослар учун алоҳида мавзудир.

ЛАФЗИЙ САНЪАТЛАР – қаранг: санойиъ

ЛАФФ ВА НАШР (ар. لف و نشر – йиғмоқ ва ёймоқ) – мумтоз адабиётдаги шеърий санъат. Л.н. санъатида бир неча нарса-тушунча номи саналиб, кейин уларга ўхшаш, алоқадор, тааллуқли ёки мувофиқ келадиган бошқа нарса-тушунча номлари келтирилади. Л.н. санъати бир мисра доирасида ҳам воқе бўлиши мумкин, шунга қарамай, унинг байт доирасида воқе бўлиши, яъни биринчи мисрада саналган нарса-тушунчаларга ўхшаш, алоқадор, тааллуқли ёки мувофиқ келадиган бошқа нарса-тушунчалар номининг кейинги мисрада келтирилиши кўпроқ учрайди. Бунда саналаётган нарса-тушунчалар бир-бирига очиқ ўхшатилмайди, уларнинг бир-бири билан боғлиқ ёки алоқадор эканлиги ҳам очиқ айтилмайди, улар ўртасидаги ўхшашлик ёки мувофиқликни идрок этиб олиш ўкувчининг ўзига ҳарола қилинади. Л.н.нинг икки нави мавжуд: 1) мураттаб, яъни тартибли Л.н. Бунда ҳар иккала гуруҳдаги саналаётган нарса-тушунчалар тартиби бир-бирига мос бўлади, яъни биринчи мисрада саналаётган нарса-тушунчалар қандай тартибда берилса, кейинги мисрада нарса-тушунчалар шунга мувофиқ тартибда саналади. Мас., Навоийнинг:

Чун ўлармөн чин дейин ишқи бузуг кўнглимдадур,
Мен ўлиб, ул ганж бу вайронда пинҳон қолмасун, –

байти биринчи мисрасида «ишқ» ва «кўнгил» сўзлари саналиб, кейинги мисрада «ишқ» «ганж»га, «кўнгил» «вайрон»га қиёсланмоқда. Байтда кўлланган Л.н.да саналаётган тушунчалар тартиби бир-бирига мос (биринчи мисрада аввал «ишқ», кейин «кўнгил», иккинчи мисрада аввал «ганж», кейин «вайрон») бўлгани учун мураттаб ҳисобланади; 2) мушавваш, яъни тартибсиз ёки номураттаб Л.н. Бунда саналаётган нарса-тушунчалар тартиби бузилган бўлади,

яъни биринчи мисрадаги нарса-тушунчаларни бериш тартиби ке-йинги мисрада бузилади, иккала мисрадаги саноқ тартиби бир-бирига мос келмайди. Мас., Навоийнинг:

*Доми зулфунг ичра хуштур, баски, кўнглум тойири,
Жаврдур бу қушга, эй сайёд, озод айламак, –*

байти биринчи мисрасидаги «доми зулф», «кўнглум тойири» тушунчаларига иккинчи мисрадаги «куш» ва «сайёд» тушунчалари мувофиқ, лекин иккинчи мисрада саноқ тартиби ўзгарган (биринчи мисрада «доми зулф ... кўнгил тойири», кейингисида «куш ... сайёд» тартибида берилган, ҳолбуки, «доми зулф» «сайёд»га, «кўнгил тойири» эса «куш»га алоқадор, яъни биринчи мисрада аввал саналган тушунча иккинчи мисрада кейин келган тушунчага, кейин келгани эса аввал келганига алоқадордир). Баъзи манбаларда *мушавваш* Л.н. ўз ичида яна икки турга ажратилади: биринчи тури «маъкус ут-тартиб» деб номланиб, унда кейин саналаётган нарса-тушунчалар аввал саналганларига акс тартибида (яъни 1, 2, 3, 4 – 4, 3, 2, 1 тарзида) берилади; иккинчи тури «мухталит ут-тартиб» деб аталади, унда тартиб ўзгарган-у, саноқда акс тартиб сақланмайди, чалкаш берила-веради (мас., 1, 2, 3, 4 – 2, 4, 1, 3 каби).

ЛЕЙТМОТИВ (нем. *Leitmotiv* – етакчи мотив) – мусиқадан ўзлаштирилган төрмин бўлиб, кенг маънода муаллиф томонидан илгари сурилаётган асосий гоянинг бутун асар давомида таъкидлаб ўтказилиши бўлиб, шу маънода *гоявий лейтмотив* атамаси ҳам ишлатилади. Мас., А.Ориповнинг «Мен нечун севаман Ўзбекистонни» шеърида ватанга беғараз муҳаббат, «ватанга муҳаббат моҳиятан ҳалққа муҳаббат» деган асосий гоя Л. сифатида бутун шеър матнидан сизиб ўтади. Кенгроқ қаралса, шоирнинг «Ўзбекистон», «Қарши кўшиғи», «Саратон» каби ўнлаб шеърларида ҳам худди шу гоя устуворки, бу ўринда алоҳида шеър Л.и билан бир қаторда, шоир ижодининг Л.и ҳакида ҳам гапириш имкони юзага келади. Шунга ўхшаб баъзан муайян адабий йўналиш, оқим ёки мактабга хос Л. ҳакида ҳам гапириш мумкин бўлади. Мас., жадид адаблари ижодининг Л.и *мътирифат ва тараққийдир*. Адабиётшуносликда Л. термини тор маънода ҳам қўлланиб, бунда асарда илгари сурилган муҳим гоя, ҳис-туйғу, характер ҳолати ва ш.к.ларни ифода этаётган образ ёки нутқий унсур (сўз бирикмаси, жумла, мисра ва ш.к.)нинг қайта-қайта такорланиши назарда тутилади.

ЛИБРЕТТО (итал. *libretto* – китобча) – 1) театрда ижро этиладиган опера, оперетта ва балет спектакларининг қисқача баёни берилган китобча. XVII аср охирларидан театрга келган томошабинларга шундай китобчалар тақдим этилган, терминнинг пайдо бўлиши ҳам шу билан боғлиқ; 2) опера спектаклининг матний асоси, шунингдек, балет спектаклининг адабий сценарийси. Ҳар икки ҳолда ҳам асарни саҳнада ижро қилиш учун асос бўлиб хизмат қиласиди. Л. маҳсус, яъни янги мавзудаги оригинал асар сифатида яратилиши ҳам, мавжуд асарни мослаштириш, опера ёки опереттага мос инсценировка қилиш йўли билан ҳам ёзилиши мумкин.

ЛИРИКА (юн. *lyra* – мусиқа асбоби, қадимда шеърлар унинг жўрлигига ўқилган) – бадиий адабиётнинг учта асосий туридан бири. Л.да воқелик лирик субъект ҳис-туйгулари орқали аксланади, унинг учун бадиий нутқ обьекти эмас, обьекти бирламчидир. Л.нинг ўзига хос хусусиятлари қадимдаёқ таъкидлаб ўтилган. Жумладан, поэзияни тақлид деб билган Афлотун поэзиянинг бу тури «тўлалигича шоирнинг айтганларидан иборат» деса, Арасту фикрича, поэзиянинг бу турида «тақлид қилувчи қиёфасини ўзгартиргмаган ҳолда» тақлидни амалга оширади. Немис файласуфи Гегель Л.нинг турга хос хусусияти сифатида унда обьект ва субъектнинг битта шахсада уйғуналашиши, лирик асар учун муаллифнинг ўзи, унинг ички олами мавзу бўлиб қолишини кўрсатади. Шунга кўра, Л.нинг тасвир предмети ҳис-туйғу, кечинма бўлиб қолади. Яъни эпос ва драмадан фарқли ўлароқ, Л. воқеликни тасвирламайди, унинг учун воқелик лирик субъект руҳий кечинмаларининг асоси, уларга туртки берадиган омил сифатидагина аҳамиятлидир. Шу боис лирик асарда воқелик лирик қаҳрамон қалб призмаси орқали ифодаланади, яна ҳам аникроғи, Л.да воқеликнинг кечинмани тасвирлаш учун етарли микдордаги «парчалари», деталларгина олинади. Ҳатто лирик асарда субъект яққол кўзга кўринмай, унда бирон-бир обьектив нарса тавсифланган ёки тасвирланган ҳоллар (манзара шеърлар, воқеабанд шеърлар) да ҳам у асосий эмас, асосийси – шу тавсиф ёки тасвир замиридаги лирик субъект, унинг кечинмалари. Л.да субъектнинг воқелик таъсирида юзага келган оний кечинмалари мангуга муҳрлаб кўйилади. Бу кечинмалар алоҳида шахсга тегишли бўлган ҳолда умумбашарий мазмун ва қимматга эга бўлаверади, шеърхон ундан ўз дардини, ўз кечинмаларини топади, зоро, ўзгарувчан дунёда туғилувчи инсонга хос туйғу-кечинмаларининг нисбий барқарор асоси, жавҳари мавжуддир.

Юқоридагилардан келиб чиққан ҳолда Л.нинг адабий тур сыйфатидаги айрим ўзига хос хусусиятларини санаб ўтиш мумкин. Аввало, оний кечинмани тасвирловчи лирик асарлар, одатда, ҳажман кичик бўлади. Ҳис-туйғу ва кечинмани ифодаловчи Л.да шунга ҳар жиҳатдан мос – эмоционал тўйинтирилган ва ритмик жиҳатдан тартибга солингани боис, ифодаланаётган ҳис-туйғуга мувофиқ оҳангда жаранг топадиган шеърий нутқ шакли устуворлик қиласи. Шу билан бирга, насррий йўлда ёзилган лирик асарлар ҳам, кам бўлса-да, бор. Алоҳида субъект кечинмаларини ифодалагани учун Л.да монологик нутқ шакли устувор, унда ўчрайдиган диалогик нутқ кўринишлари эса монологик нутқнинг таркибий элементига айланади. Оний кечинмани тасвирловчи Л.нинг бадиий вақти ҳамиша – «хозир»: у айни ҳозир кўнгилда кечаётган ҳис-туйғуларни тасвирлайди, шеър қачон ёзилганидан қатъи назар, шеърхон уни ҳозир кўнгилда кечаётган туйғу каби қабул қиласи.

Лирик асарларни жанр жиҳатидан таснифлашда маълум мураккабликлар мавжуд бўлиб, адабиёт тараққиётининг турли босқичларида жанрларга ажратиш асоси турлича бўлган. Жумладан, ҳалқ оғзаки ижодидаги лирик асарлар кўпроқ функцияси, яъни ижро этилиш вақти, жойи муносабатига (мавсум, маросим, меҳнат кўшиқлари) кўра; антик шеъриятда ижро этилиш тарзи (хор кўшиқлари, соло)га кўра; кейинги даврларда асосий эстетик белгиси (ода, дифирамб, элегия), қатъий шакл кўрсаткичлари (сонет, октава), тематик хусусиятлари (интим, гражданник, фалсафий, сиёсий, интеллектуал) ва ҳ. жиҳатлардан жанрларга ажратилган. Мураккаблик шундаки, тарихий категория сифатида ўз фаоллик даврини ўтиб бўлган жанрлар ҳам шеъриятда анъанавий тарзда қўлланаверади. Мас., ҳозирги ўзбек шеъриятида ҳалқ оғзаки ижодидаги жанрлар (лапар, ёр-ёр) ҳам, мумтоз шеърият жанрлари (ғазал, мухаммас) ҳам, хорижий адабиётлардан ўзлашган жанрлар (сонет, хокку, танка) ҳам, ҳозирда фаоллашган жанр кўринишлари ҳам мавжуд. Шу сабабли лирик жанрлар масаласига синхрония/диахрония аспектларида ёндашиш талаб қилинади.

ЛИРИК ҚАҲРАМОН (рус. калька: «лирический герой») – лирикадаги субъект кўринишларидан бири, муаллифнинг қалб кечинмаларини, ўй-туйғуларини ифодалаш шакли (қ. лирик субъект). Терминнинг ўзиёқ, яъни «қаҳрамон» дейилиши Л.қ. шоирнинг реал «мен»и эмас, балки унинг асосида яратилган «мен» эканлигини англатади. Термин фанга илк бор Ю.Тинянов томонидан рус шоири

А.Блок ижодига татбиқан киритилған бўлиб, бунда шоирнинг лирик ижоди (ёки шеърий туркуми) бағридан ўсиб чиқувчи нопластик образ, тасаввур қилинадиган ШАҲС назарда тутилади. Шунга кўра, Л.қ. ҳақида гапириш учун у бир қадар бутунлик (мавзу-муаммолар доираси, ўй-қарашлар бирлиги, барқарор руҳий-психологик белгилар, биографик чизгилар) касб этиши, алоҳида бир ШАҲС (қалб)ни тасаввур эттира олиши лозим. Л.қ. ва муаллиф муносабати масаласи ҳануз баҳслилигича қолмоқда. Бу масалада кўпчилик эътироф этган қарашиб шуки; шоир ва Л.қ. орасига тенглик аломати қўйиб бўлмайди, айни чоғда, Л.қ.ни шоирдан мутлақо бошқа ҳодиса ҳисоблаш ҳам тўғри эмас: у шоир шахси билан боғлиқликда идрок этилади. Шундай бўлганида ҳам, Л.қ. шоирнинг айнан ўзи эмас: у «мен»дан яратилган бошқа бир «мен»дирки, кўп ҳолларда Л.қ. ва шоир муносабати прототип ва характер муносабатига қиёсан тушунтирилади. Яъни Л.қ. билан шоирни бир-биридан буткул ажратиш ҳам, тамом қўшиб юбориш ҳам мумкин эмас, улар «ажралмас қўшилмаслик»дир. Зоро, Л.қ. эпос, ёки драмадаги характер сингари объектга айланмайди, у воқееликка нисбатан ҳам, ўзига нисбатан ҳам субъектлигича қолади.

ЛИРИК ЧЕКИНИШ (рус. калька: «лирическое отступление») – муаллиф нутқининг кўринишларидан бири, эпик ёки лиро-эпик асарларда учрайдиган композицион унсур. Л.ч. дейилишининг сабаби шуки, унда сюжет воқеаларини ҳикоя қилиш тўхтатиб қўйилади ва муаллиф уларга муносабатни ошкор тарзда ифодалашга ўтади, яъни асосий воқеадан чекинади. Моҳият эътибори билан Л.ч. гап таркибидаги модал сўз ва конструкцияларга ўхшашдир. Л.ч. муаллиф айтмоқчи бўлган фикрни янада таъкидлаш, қабул қилиш жараёнини йўналтириш, эмоционал муносабатни юқтириш каби бадиий-эстетик мақсадларга хизмат қиласи. Л.ч.ларнинг нутқий курилиши ҳам, одатда, шунга мос бўлади: ҳиссий тўйинтирилганлик, ўқувчига бевосита мурожаат қилиш, турли даражадаги такрорлар ва ундовларнинг бўлиши, нутқ бўлагининг насрый асарда ҳам айрича ритмиклика эгалиги ва ш.к. Шу хусусиятларнинг барини «Кеч» романидаги бир Л.ч.да кўриш мумкин. Романнинг бошланишида Чўлпон қизларнинг сафарга рухсат олиш йўлидаги саъй-ҳаракатлари, Зеби кўнглидаги умид ва умидсизлик курашини батафсил тасвирлайди. Сафар орзусида ёнган Зеби билан Салтанат тамом умидсизликка тушаёзганларида, Қурвонбибининг устомонлиги сабаб Раззок сўфи рухсат бериб юборди. Қизларнинг туриш-турмушини бунгача бир қафас сифатида кўрсатган Чўлпон уларнинг беадад шодликларини

тасвирлашга ўтиш учун қуидагиңа күпrik солади: «Қафаснинг даричаси очилди! Энди қушларга қанотларини ростлаб туриб «пир!» эта учмоқдан, кенг күкларга, фазоларга парвоз қилмоқдан бошқа нарса қолмади. Паранжини ёпиниб ўтирмасдан, шундок бош устига ташлаб, чимматни «хўжа кўрсинг»га тутган бўлиб югуриш керак, холос. Фақат, унда даричанинг очилганига ким севинади? Шодликни ким қилади? Эркинликнинг лаззатини ким тотийди? Шу қадар қайсар бир одамни бу қадар усталик билан йўлга солган онанинг ҳурматини ким ўрнига келтиради? Уни ким қучоқлаб, ким ўпади?»

Шуни ҳам таъкидлаш жоизки, Л.ч.ларни қўллашда муайян меъёрни сақлаш зарур, акс ҳолда, асар ортиқча сентименталлик, ошкор дидактиклик каби хусусиятлар касб этиши ва бу охир-оқибатда бадиий жиҳатдан ютқизиққа айланиши мумкин. Адабиётшуносликда лирик муқаддима, лирик хотима тушунчалари ҳам мавжуд бўлиб, улар моҳият эътибори билан Л.ч.нинг ўзи, фақат асарда жойлашиш ўрни ва шу билан боғлиқ бадиий-эстетик вазифалари жиҳатидан бирмунча фарқланади. Жумладан, лирик кириш ўқувчида тасвирлана жак воқени қабул қилишга мос эмоционал ҳолатни юзага келтириш, лирик хотима эса асар воқеаларига эмоционал муносабатни яхлит ифодалаш ва шу орқали ўқувчи таассуротини мустаҳкамлаш каби мақсадларни ҳам кўзлайди.

ЛИТОТА (юн. *litotes* – соддалик) – 1) нарса-ҳодисага хос хусусиятни унинг аксини инкор қилиш орқали ифодалашга асосланган услубий фигура, моҳиятан кинояга яқин туради. Л. кундалик муроқотда ҳам анча фаол қўлланади. Мас., «бу кишим ҳам аҳмоқ эмас» – аклихуши жойида; «уям шаҳар кўрмаганмас» – содда эмас, ишига пишик ва х.; 2) тасвирланаётган нарса-ҳодиса, унга хос белгиларни ўта кичрайтиришга асосланувчи бадиий усул, стилистик фигура; гиперболанинг зидди, мумтоз адабиётшунослигимиизда *тафрит* (қ. *тафрит*) деб юритилади. Жаҳон халқлари оғзаки ижодида Л. усулида қатор образлар яратилган: Нўхатполвон, Ётикулоқ, Бармоқча бола («мальчик-спальчик»), Дюймовочка ва б. Стилистик фигура сифатида қўлланган Л. нарса-ҳодисани ўта кичрайтириш орқали қиёсан тасвирланаётган нарса-ҳодисанинг маҳобатию улуғворлигини, муайян бир сифатда бекиёслигини таъкидлаб кўрсатади.

ЛУҒЗ (ар. لفظ – топишмоқ, сир, махфий) – шеърий топишмоқ, нарса-тушунчанинг номини айтмаган ҳолда ўхшашлик ёки алоқадорлик асосидаги белгиларини тавсифлашга асосланган жанр. Яъни Л.да шоир нарса-тушунчага ишора қиласи, тингловчи (ўқувчи) эса зикр

этилган белгиларга таяниб яширилган номни топиши лозим бўла-ди. Шу жиҳати билан Л. ўкувчидаги теран фикрлаш, кузатувчанлик, ҳозиржавоблик каби кўникмаларни шакллантиради. Л. халқ оғзаки ижодида қадимдан мавжуд бўлган, кейинчалик ёзма адабиётга ҳам кириб келди. Л. жанри форс-тожик адабиётида X – XII асрлардан, ўзбек адабиётида эса XV асрдан бошлаб кенг оммалашган. Хусусан, ўзбек адабиётида Л. жанрининг илк намуналари Навоий ижодида учрайди, Увайсийнинг ушбу жанрдаги асарлари (мас., «Анор») машхур бўлган. Шунингдек, Л.нинг яхши намуналари Шавқий, Дилафгор, Муаззам, Мунис, Оғаҳий, Фақирий каби шоирлар ижодида ҳам учрайди. Илми бадиъга оид айрим манбаларда Л. мустақил жаён сифатида таърифланса, бошқаларида (мас., А.Хусайний. «Бадойиъ ус-санойиъ»)да у шеърий санъатлардан бири сифатида кўрсатила-ди. Л.нинг яна бир номи чистон, бу жанрининг форс адабиётидаги номланиши бўлиб, ўзбек адабиётшунослигида иккала термин ҳам ишлатилади.

M

МАВЗУ (ар. مَوْضِع – қўйилган, тартибга солинган) – бадиий мазмун компоненти, асарда қўйилган ижтимоий, фалсафий, маънавий-ахлоқий ва ҳ. муаммоларни бадиий идрок этиш учун танлаб олинган ва тасвирланган ҳаёт материали; тема. Адабиётшуносликда М. (тема) термини икки маънода ишлатилади: 1) асарда тасвирланаётган ҳаёт материали; 2) асарда бадиий идрок этиш учун қўйилган ижтимоий, маънавий-ахлоқий, фалсафий ва бошқа проблемалар мажмуми. Табиийки, иккита тушунчанинг битта термин билан юритилиши муайян чалкашликларни келтириб чиқаради. Шунинг учун уларнинг мавзуу ва *проблема* тарзида икки хил номлангани маъқул. Агар бадиий ижод табиатидан келиб чиқиб бадиий мазмун компонентлари ижод жараёни ва унинг бадиий асарда намоён бўлиши нуқтаи назаридан фарқланса, шуниси тўғрироқ экани кўринади. Бадиий асар ижодкорнинг борлиқ билан муносабати маҳсули ўлароқ воқе бўлади. Яъни борлиқда яшаётган индивид сифатида ижодкорни муайян муаммолар ўйлатади, ташвишга солади. Ижодкор учун ўша муаммони идрок этиш ички эҳтиёжга айлангани сабабли ҳам асарга қўл уради. Шу маънода бадиий асар «эҳтиёж фарзанди» (А.Орипов) саналади. Ижодкор ўзини қийнаган муаммоларни бадиий идрок этиш учун кенг ва қулай имкон берувчи ҳаёт материалини танлайди ва тасвирлайдики, бу бадиий асар М.си (темаси)дир.

МАДАНИЙ-ТАРИХИЙ МАКТАБ – Европа адабиётшунослигига XIX аср ўрталарида шаклланган илмий йўналиш, мактаб. М.-т.м. немис маърифатчилари (И.Гердер), француз романтизми тарихшунослари (Ф.Гизо, О.Тьери) ва қисман адабиётшуносликдаги биографик методни (Ш.Сент-Бёв) ижодий ривожлантириш натижаси ўлароқ вужудга келган бўлиб, назарий асосларини белгилашда О.Контнинг позитивистик фалсафаси муҳим аҳамият касб этган. М.-т.м. ўз фаолиятида тарихийлик тамойилига таянади, уни асосий тадқиқ методи сифатида тарихийлик тамойилига таянади, уни асосий тадқиқ методи сифатида қабул қиласди. Бу эса адабиётшуносликдаги муҳим ўзга-

риш эди. Агар М.-т.м.га қадар адабиёт норматив поэтикалар асосида тадқиқ этилиб, уларнинг мөъёрларига мос келадиганлари «тўғри» ёки «етук», мос келмайдиганлари эса «нотўғри» ёки «ёввойи» адабиёт сифатида баҳоланганд бўлса, тарихийлик принципи адабиёт тарихига, миллый адабиётларга ўзгача ёндашиш имконини берди. М.-т.м. адабиётни миллат ҳәётининг муайян тарихий босқичидаги халқ руҳининг ифодаси деб билди ва шундан келиб чиқсан ҳолда барча адабиётлар (миллый мансублиги, қайси даврда ёки услубда яратилганидан қатъи назар) тенг ҳукуқли, тенг қимматга эга деган қарашни олдинга сурди. М.-т.м. асосчиларидан бири И.Тэн адабий асарни юзага келтирувчи омиллар сифатида миллатга хос түгма сажия («ирқ»), ўша миллат яшаётган табиий, иклимий ва ижтимоий шарт-шароитлар («муҳит») ҳамда айни вақтдаги маданий савия ва анъаналар («давр»)ни таъкидлаб кўрсатади. Тэнга кўра, худди шу омиллар адабий ҳодиса генезисини эмпирик ўрганиш имконини беради ва шу асосда чиқарилган ҳулосаларгина чинакам илмий бўлади. Албатта, олимнинг мазкур қарашлари асосли; булар адабиётни илмий ўрганиш йўлида олдинга ташланган дадил қадам эканлигини ҳам эътироф этиш лозим. Бироқ буларни мутлақлаштириш оқибатида бир ёқламалик келиб чиқади: М.-т.м. вакилларига эмпирик билишни устувор ҳисоблаш, гуманитар билим соҳаларига табиий фанларда қўлланувчи методларни татбиқ этишга интилиш, улардан ҳам худди табиий фанлардаги каби конкрет фактларга асосланган илмий ҳулосалар чиқаришни талаб қилиш ҳам хос эди. Табиийки, бу гуманитар соҳаларнинг ўзига хослигини инкор этиш бўлиб, шу даврда табиий фанлар эришган ютуқларга маҳлиёлик ва позитивистик фалсафанинг салбий таъсиридан бошқа нарса эмасди. Жумладан, адабий асар билан биологик организм орасида аналогиялар ўтказилиши, адабиёт тарихини эволюциялар назарияси асосида ўрганишга уриниш бунинг ёрқин мисолидир. Натижада М.-т.м.нинг айрим вакиллари учун адабиёт ўз ҳолиҷа, санъат ҳодисаси сифатида эмас, балки ўз даври ҳәётини акс эттиргани билан аҳамиятли; адабиёт тарихи эса ижтимоий тафаккур тараққиёти тарихидан бошқа нарса бўлмай қолди. Бу эса адабиётнинг ижтимоий ҳәётдаги аҳамиятини пасайтириш, унинг воқелик билан алоқаси икки ёқлама эканлигини, ижтимоий ҳәётга таъсирини инкор қилишга олиб келади. Албатта, М.-т.м.нинг бундай қарашлари ўз давридаёқ асосли танқидга учради (қ. руҳий-тарихий мактаб). Мазкур бир ёқламалик оқибатидаги йўқотишларга қарамай, М.-т.м. адабиётшунослик ривожида муҳим

из қолдирди: у қатор мамлакатларда адабиёт тарихини илмий ўрганишни бошлаб берди, тарихий-генетик тадқиқот методологиясига асос солди; тарихий-қиёсий адабиётшунослик, психологик мактаб ва социологик методнинг пайдо бўлиши учун замин ҳозирлади.

МАДИД (ар. مَدِيد – чўзиқ) – аруз баҳрларидан бири, фоилотун (– v – –) ва фоилун (–v –) аслларининг кетма-кет тақороридан ҳосил бўлади, фоилотунидаги сабаблар – фо ва тун орасидаги масофа чўзиқ бўлгани учун шундай номланади. М. баҳри араб шеъриятига хос бўлиб, ўзбек шеъриятида кўлланмайди. Навоийнинг «Мезон ул-авzon», Бобурнинг «Мухтасар» асарларида М. баҳрининг айрим вазнлари келтирилиб, уларга мисол қилиш учун муаллифлар маҳсус байтлар битганлар. Хусусан, «Мухтасар»да *мадиди мусаммани солим* (– v – – / – v – / – v – – / – v –) вазнига:

*Неча тортай ҳажридин сенсизин озормен,
Келки, ҳижронингда мен умрдин безормен, –*

байти мисол сифатида келтирилган.

МАЖОЗ (ар. مَجْزُون – кўчма маънодаги сўз) – 1) мумтоз адабиётшунослиқда сўзни ўз маъносида эмас, бошқа бир кўчма маънода ишлатиш, кўчимнинг умумий номи; Атоуллоҳ Ҳусайний М.га «...лафзни ўз ясоғидин ўзга маънода ясоғу лафзу ўшул маъно орасиндаги бирор алоқаю муносабатқа асосланароқ кўлламоқтин иборатдур, ўз ясоғида тушунмакка монеъ бўлғучи жумладошин келтирмак шарти била» дея таъриф беради. Яъни сўзнинг кўчма маъноси доим матн ичида, у боғланиб келаётган бошқа (ўз ясоғида тушунмакка монеъ бўлғучи жумладош) сўз орқали англашилади. Сўзнинг матндан ташқарида англатган маъноси эса ўз маъноси ҳисобланади. Мас., «хона тинчланди» жумласида «хона» сўзи кўчма маънода, унинг кўчма маънода эканлиги эса «тинчланди» сўзига боғланаётганидан англашилади. Бошқача айтсак, «хона» сўзини ўз маъносида тушунишилизга «тинчланди» сўзи монеъ бўлмоқда, шунинг учун уни «хонадаги одамлар» маъносида тушунамиз. Бу ўринда сўзнинг кўчма маънода тушунилишига унинг ўз маъноси (хона – жой) ва матндан келиб чиқиб англанётган маъно (шу жойдаги кишилар) орасидаги алоқадорлик асос бўлмоқда. Демак, сўзнинг кўчма маънода ишлатилишига унинг ўз маъноси билан кўчма маъноси ўртасида бирор боғлиқлик, ўхшашлиқ ёки алоқадорлик бўлиши шарт қилиб қўйилади. Шу жиҳатдан қаралса, истиора, киноя (метонимия), синекдоха, рамз

кабилар М.нинг турли асосларга таянувчи навлариdir. Ҳозирда М. атамасини бу маънода кўллаш пассивлашган; 2) ҳозирги адабиёт-шуносликда М. атамасини кўчим турларидан бири, яъни аллегория (қ.) сифатида кўллаш кенграқ ғоммалашган.

МАЖРО (ар. مجرأ – сув йўли, ўзан) – қаранг: мутлақ қофия

МАЗИД (ар. مزید – орттирилган) – қаранг: мутлақ қофия

МАЗҲАБИ КАЛОМИЙ (ар. مذهب کلامی – дахлдорлик, алоқадорлик) – мумтоз адабиётдаги шеърий санъат, шоирнинг ўз фикрини ҳақиқий, ҳаётий далил билан хulosалashi. М.к.да келтирилаётган далил ҳусни таълилдаги (қ.) каби шунчаки шоирона, тўқима бўлмасдан, ҳақиқий, ҳаётий бўлмоғи ва унинг келтирилиши натижасида, шеър ўзига хос ҳикмат даражасига кўтарилиши талаб этилади. Mac., Пахлавон Маҳмуднинг:

Уч юз Кўҳи Кофни келида туймок,
Дил қонидан бермоқ фалакка бўёқ
Ёинки бир аср зиндоңда ётмоқ
Нодон-сұҳбатидан кўра яхшироқ, –

рубойиси М.к.га яхши мисол бўла олади.

МАКСИМА (лат. maxima regula – олий тамойил) – афористика жанрларидан бири, мустақил жанр сифатида XVIII аср Европа адабиётида кенг истеъмолда бўлган; бу даврда яшаб ижод этган қатор ёзувчи, олим ва файласуфлар (Ф. де Ларошфуко, И.Гёте, Б.Паскаль, А.Шопенгауэр ва б.) қаламига мансуб М.лар машҳур бўлган. М.ларда маънавий-ахлоқий масалаларга тааллуқли қоидалар қатъий ифода этилиб, уларга қўшилиш ё амал қилиш лозим бўлади. Ифодадаги қатъият, маълум нормаларни ишлаб чиқиш, универсаллик давъоси М.ларнинг айни шу даврда, яъни классицизм даврида фаоллашгани билан боғлиқдир.

МАНБАШУНОСЛИК, АДАБИЙ МАНБАШУНОСЛИК – адабиёт-шуносликнинг ёрдамчи соҳаларидан бири. М. адабиётта тааллуқли манбалар (асар қўлёзмалари, қораламалари, ижодкорларнинг кундадиқлари, ёзишмалари, уларнинг ҳаёти ва фаолияти билан боғлиқ хужокатлар ва б.)ни излаб топиш, тавсифлаш, таснифлаш ва муайян тартибга солиш, илмий муомалага киритиш ҳамда тадқиқ этиш билан шуғулланади, бу ишларни амалга оширишнинг назарий тамойиллари ни ишлаб чиқади ва амалда кўллайди. М. фаолияти адабиёт тарихи ва матншунослик соҳасидаги тадқиқотлар учун муҳим аҳамиятга эга.

МАРСИЯ (ар. مرثیه – йиғламоқ, аза тутмоқ, ачинмоқ) – бирор кишининг вафоти муносабати билан, унинг фазилатларини эътироф этиш, вафотидан афсусланиш мазмунида ёзиладиган лирик жанр. Адабиёт тарихида шоирнинг бирор яқин қишиси, қариндоши, оила аъзоси вафоти муносабати билан ёзилган М.лар билан бир қаторда шоҳлар ва бошқа амалдорлар, устозлар вафоти муносабати билан ёзилган М.лар ҳам кўп учрайди. Мас., Навоийнинг Абдураҳмон Жомий вафотига бағишлиган М.си. Асосан, мазмунга қўйиладиган талаб етакчи бўлгани учун, М.нинг ҳажми, қофияланиши билан боғлиқ талаблар қатъий белгиланган эмас. Шу боис М.лар ғазал, муҳаммас, мусаддас каби лирик жанрларнинг шаклларида битилиши мумкин. Янги давр адабиётида ҳам Мақсад Шайхзода, Миртемир, Абдулла Орипов, Рауф Парфи каби шоирлар ижодида М.нинг яхши намуналари бор.

МАСАЛ (ар. مسئلہ – ўхшамоқ) – сўз санъатидаги энг кўхна ва қадимдан кенг оммалашган жанр, насрой ёки шеърий йўлда ёзиладиган мўъжаз ҳикоя; тарбиявий мақсаднинг устуворлиги ва ошкор дидактиклик хусусиятига эгалиги сабабли, М.га дидактик адабиёт жанри сифатида қаралади. М.нинг қурилиши унинг дидактик характеристига мос: аввал мўъжаз ҳикояча берилади, сўнг «қиссадан ҳисса» шаклидаги хулоса билан унинг мажозий маъноси таъкидлаб кўрсатилади. М.нинг ҳикоя қисми эртак ва латифаларга, «қиссадан ҳисса»си эса мақолларга яқинлашади. М.ларда образлар тизими ҳам дидактик мақсадга мос, ҳаётий ҳолат аллегорик образлар (жоноворлар, дарахт ва ўсимликлар, нарса-ҳодисалар) орқали тасвирланади, шунинг учун улар универсаллик касб этади. Универсаллик шу маънодаки, М.да тасвирланган конкрет ҳолат ҳаётда учровчи турфа ҳолатлар учун ечим бўла олади. Адабиётшуносликда аксар мақоллар М. асосида пайдо бўлган деган қараш ҳам бор: Яъни муайян М. шу даражада оммалашадики, натижада хулоса қисмининг ўзи (албатта, кишилар тасаввурида ҳикоячани уйғотган ҳолда) ҳаётий ҳолаттага ечим бўлиб хизмат қиласи. Шу жиҳатдан қаралса, М.нинг қадимдан оммалашгани унинг инсонлар учун амалий аҳамият касб этгани, уларнинг ўзаро мулоқотида фикр ифодалаш учун тайёр ва самарали восита бўлгани билан изоҳланади. Зоро, М.ларда қадим аждодларнинг ҳаётий тажрибалари, турли майший, ахлоқий, сиёсий ва ҳ. ҳолатларга оид ҳукм-хулосалари умумлашма ифодасини топган. Антик ритор (нотиқ)лар ва файласуфларнинг М.ларга кўп муружаат этганлари ҳам бунинг ёрқин даилидир. Шунинг учун барча

халқлар оғзаки ижодида ҳам, қадимги ёзма манбаларда ҳам М. ва моҳияттан унга яқин жанрлар кенг тарқалған. Жумладан, «масалнинг отаси» саналувчи Эзоп тахминан милоддан аввалги VI асрда яшаган ярим афсонавий шахс бўлиб, унга нисбат берилувчи М.ларнинг аксарияти унга қадар яратилган деб ҳисобланади. Қадимги ҳиндларда «Панчантантра» («Калила ва Димна») каби асарлар мавжудлиги ҳам юқоридаги фикрнинг далилидир. Ёзма адабиётда ҳам М. жанрида кўплаб гўзал асарлар яратилган. Жумладан, француз адаби Ж.Лафронтен, немис адаби Лессинг, рус масалчиси И.Криловларнинг М.лари дунёга машҳур.

МАСНАВИЙ (ар. مثنوی – иккилик) – иккита ўзаро қофияланган мисралардан таркиб топувчи банд тури, шундай бандлардан таркиб топувчи шеърий асар; шеър шакли. Мисраларининг ўзаро қофияланиши (aa, bb, cc, dd каби) М.ни воқеалар баёни учун жуда қулай шаклга айлантиради. Шунинг учун Шарқ адабиётида воқеабанд шеърлар ва достонлар, асосан, М. шаклида яратилган бўлиб, улар бирдек М. деб юритилаверган. Хусусан, Бобур Навоий ҳақида: «Олти маснавий китоб назм қилибтур, беш «Хамса» жавобида, яна бир «Мантиқ ут-тайр» вазнида «Лисон ут-тайр» отлиқ»; Муҳаммад Солиҳ ҳақида эса: «Шайбонийхон отига бир туркий маснавий битибдур», – дейдики, ҳар икки ҳолда ҳам М. термини достон маъносида кўлланаётир. Дарҳақиқат, ўзбек адабиётидаги илк достон «Кутадғу билиг», ундан кейин дунёга келган «Хибат ул-ҳақойиқ», «Мұхаббатнома», «Гул ва Наврӯз», «Сұхайл ва Гулдурсун» каби деярли барча достонлар ҳам М. шаклида яратилган. Шунингдек, адабиётимизда турли (диний, фалсафий, маиший ва б.) мавзулардан баҳс юритувчи ёки воқеабанд характердаги ўрта ҳажмли кўплаб шеърлар ҳам М. шаклида ёзилган. Мас., Яссавийнинг айрим ҳикматлари, Ферузнинг диний-тасаввуфий руҳдаги катта ҳажмли шеърлари, Муқимиининг «Танобчилар», Фурқатнинг «Илм хосияти», «Акт мажлиси хусусида», «Нагма базми хусусида», «Виставка хусусида», «Суворов», «Сабоға хитоб», Комилнинг «Ҳасби ҳол», Сидиқий Ажзийнинг «Анжумани арвоҳ» («Рухлар йигини») асарлари шулар жумласидандир. Янги давр ўзбек шеъриятида ҳам М. шаклида шеър битиш анъанаси давом эттирилди (мас., Миртемир. «Бўлмаса»; Ҳ.Олимжон. «Ўзбекистон»; А.Орипов. «Маймуният», «Кўнгил»; Э.Воҳидов. «Оғрикли саволлар», «Ўзбекистон боғларига қайтиб келди булбуллар»; О.Матжон. «Қуш йўли» достони ва б.).

МАТЛАЬ (ар. ماتلا - бошланиш, қуёш чиқиши) – ғазал ёки қасиданинг мисралари ўзаро қофияланган (а-а) биринчи байти, мабдаъ деб ҳам юритилади. Мумтоз шоирларимиз М.нинг шакл ва мазмун жиҳатидан мукаммал, ҳусни матлаъ (қ.) санъати талабларига мувофиқ бўлишига жиддий эътибор қаратганилар. М.да шоирнинг ғазал ёки қасидада айтмоқчи бўлган фикри ўртага ташланади, бу фикр кейинги байтларда ривожлантириб борилади, далилланади, асосланади ва мақтаъда хulosаланади. Мас., Ҳувайдонинг бир ғазали ушбу М. билан бошланади:

*Эй дило, ҳар кимга тегса дарди ишқ,
Бўлгуси икки жаҳонда фарди ишқ, –*

ва шеър давомида ривожлантирилган мазкур фикр мақтаъда қуидагича хulosаланади:

*Дарди йўқ танни, Ҳувайдо, тан дема,
Бўлмаса ул тан ичидарди ишқ.*

МАТНШУНОСЛИК – филология фанининг тармоғи, адабиётшуносликнинг ёрдамчи соҳаси. М. соҳасидаги илмий изланишларнинг натижаси адабиёт тарихи ва назарияси учун манбавий (матний) асос бўлиб хизмат қиласи, шу сабабли унга адабиётшуносликнинг ёрдамчи соҳаларидан бири сифатида қараб келинади. Шунга қарамай, М.ни филологиянинг алоҳида тармоғи, мустақил бир соҳаси сифатида тушунишга асос берувчи жиҳатлар ҳам бор. Биринчидан, М. фаолияти адабиётшунослик, тилшунослик ва тарих фанлари кесишиган нуқтада кечади; иккинчидан, М.нинг ўзи қатор ёрдамчи соҳалар (палеография, услубшунослик, археография ва х.)га эга. М.нинг вазифаси адабий матнларни ўрганиш ва нашрга тайёрлашдир. М.нинг вазифаси қисқа ифодаланган бўлса-да, унинг амалга оширилиши жуда катта меҳнатни, чуқур билим ва тажрибани талаб қиласи. Адабий матнни ўрганаётган матншунос олдида турли-туман илмий муаммолар кўндаланг бўлади. Дейлик, матншунос муаллифи номаълум асар (матн)га дуч келди. Бу ҳолда у асар муаллифини, матннинг ёши (ёзилган, кўчирилган вақти)ни аниқлаши зарур. Бунинг учун эса у адабиёт тарихи, тил тарихи, манбашунослик, услубшунослик каби соҳалардан яхши хабардор бўлиши ва уларга таянган ҳолда матнни тадқиқ этиши лозим бўлади. Ёки М.нинг бошқа бир

вазифаси – асарнинг илмий-танқидий нашрини тайёрлаш ҳам жуда машақатли иш. Мас., Алишер Навоий асарларининг турли даврларда, турли котиблар томонидан кўчирилган кўлёзмалари мавжуд. Матншунос қаршисида уларни қиёсий ўрганиш, бирининг камчиликларини бошқалари билан тўлдириш ва шу асосда энг мукаммал – илмий-танқидий матнни тайёрлаш вазифаси туради. Тайёр бўлган илмий-танқидий матнни нашр эттириш учун матншунос уни изоҳлар, шархлар, луғатлар билан таъминлаши керак. «Мукаммал асарлар» ортидаги ҳар бир изоҳ, ҳар бир шарҳ ёки луғат бирлиги жуда катта меҳнат орқасида дунёга келади. Зоро, матнда учраган сўз маънисини топиш, ундаги бирор шахс, жой номи ва ш.к.ларга изоҳ бериш учун матншунос жуда кўп изланиши, кўплаб манбаларни кўриб, ўрганиб чиқиши зарур бўлади. Шу билан бирга, М. адабиётшуносликнинг айрим муаммоларини ҳал қилишда муҳим ёрдамчи соҳа, тадқиқот усули бўлиб ҳам хизмат қилади. Мас., унинг тадқиқ усуллари, тажрибаларидан ёзувчи ижодий лабораториясини, муайян асарнинг ижодий тарихини ўрганиш йўлидаги изланишларда кенг фойдаланилади.

МАҲНАВИЙ САНЪАТЛАР – қаранг: санойиъ

МАЪРИФАТЧИЛИК, МАЪРИФАТЧИЛИК АДАБИЁТИ – феодал асосларга қарши ўлароқ майдонга чиқиб, XVII – XVIII асрларда Фарбий Европа мамлакатлари ва Шимолий Америкада кенг ёйилган ғоявий-мафкуравий ҳаракат; шу ҳаракат ғояларини ўзига сингдирган ва тарғиб этган адабиёт. Европанинг турли мамлакатларида М.нинг майдонга келиши вақт жиҳатидан фарқланади: у дастлаб Англияда юзага келган бўлса, ижтимоий шарт-шароитларнинг етилиши баробарида, қитъанинг бошқа мамлакатларига ёйилган ва уларнинг ҳар бирида конкрет шарт-шароитлар билан боғлиқ тарзда кечган. Жумладан, Россияда М. анча кеч – XVIII асрнинг 2-ярмида майдонга чиқкан; шунингдек, XIX аср охири – XX аср бошларида қатор Шарқ мамлакатлари, жумладан, Россия таркибидаги туркий халқлар яшовчи минтақалар (Крим, Татаристон, Озарбайжон, Туркистон)да кузатилган М. ҳаракатлари ҳам Европа М.и билан кўплаб муштарак жиҳатларга эгадир.

Мутахассислар М.ни «фалсафий, ижтимоий, ахлоқий концепция», янгича дунёқарашга асос бўлган МАФКУРА деб ҳисоблайдилар. Янги мафкуранинг ўзагини «инсон ақлу заковати дунёни ўзгартиради» деган қараш ташкил этади. М. ҳаракати буржуа демократияси, ижтимоий тараққиёт, ижтимоий тенглик ва адолат, шахс

эркинлиги каби ғоялар билан майдонга чиқкан. Дунёқарааш нуқтаи назаридан кўпроқ моддиюнчилик ва деизм мавқеида турган М. на-мояндалари феодал-монархик тартиботларга, унинг мафкуравий тиргаги бўлган черковга, илм-фандаги схоластикага қарши турди, табиий фанларни чукур ўрганиш, техникани ривожлантириш каби вазифаларни долзарб билди. Ижтимоий соҳада «аклга мувофиқ жамият» қуриш мақсадини кўйган М. бунга маърифат ёйиш (жумладан, уларнинг бир қисми «маърифатли монарх» ғоясига таянган), ташвиқот-тарғибот орқали эришиш мумкин деб ҳисоблади. М. ижтимоий онгнинг кейинги ривожига жиддий таъсири кўрсатди, жамият ҳаётининг барча соҳаларида, айниқса, адабиёт ва санъатда туб бурилишлар ясади. Европада М. ғоялари таъсирида янгича эстетик принципларга таянган адабиёт шаклландики, унинг асосида «дунёни ва инсонни ўзгартиришга қодир ғоявий адабиёт керак» деган ақида ётади. Бошқача айтсак, М.нинг ижтимоий идеали – «инсон табиати ва «акл»га мувофиқ жамият қуриш» М.а.нинг эстетик идеалига айланди. Бу эса адабиётнингда шунга мувофиқ ҳолда ўзгаришини тақозо қилди. Мазкур ўзгаришлар орасида энг муҳими идеалнинг «ерга тушгани» дирки, бунинг натижаси ўлароқ бадиият, гўзаллик тушунчаларига ҳам жиддий таҳрирлар киритилди. М. адабиётда, аввало, ўқувчиларни тарбиялаш асосида ижтимоий ҳаётни испоҳ қилиш воситасини кўрди, уни конкрет мақсаддага эришиш воситаларидан бири деб билди. Шунинг учун М.а. намуналарида кўпинча қаҳрамонлар орасида очик ғоявий кураш кечади, уларнинг тилидан муайян ғоялар декларатив тарзда айтилади, қисқаси, ғоя асарнинг бирламчи унсурига, уни ифодалаш муаллифнинг асосий мақсадига айланади. М. мақсадларини амалга ошириш учун қулай имкониятлар берувчи санъат турлари ва жанрларга айрича аҳамият берилди. Жумладан, М. театрни ўз ғояларини тарғиб этиш минбари деб билган, шу боис драматик жанрлар ривожлантирилган, улар оммалаштирган драматик жанрларда ҳаётга яқинлашиш (мешчаник драмаси, оиласији драма), олам ва одам ҳақидаги яхлит бадиий концепцияни ифодалашга интилиш (фалсафий драма) кучаяди; М.нинг Дидро, Лессинг каби йирик намояндалари театр санъатига, драматургияга бағишлиланган маҳсус тадқиқотлар яратишган. М.а.да бадиий проза, айниқса, ҳаётни атрофлича бадиий таҳлил этиш ва яхлит бадиий концепцияни ифодалаш имконини берувчи роман жанри гуркираб ривож топди; «эпистоляр роман» (О.Голдсмит. «Дунё фуқароси»; Ш.Монтескъё. «Форс хатлари»), «саёҳатнома роман»

(Ж.Свифт. «Гулливернинг саёҳатлари»), «тарбия романи» (Руссо. «Юлия ёки Янги Элоиза»), «фалсафий қисса» (Дидро. «Рамо жиян») каби қатор янги жанрлар ишлаб чиқилди; инсон характерини яратишнинг янги-янги имкониятлари кашф этилди, янги усулу воситалар жорий қилинди.

Қайд этиш лозимки, М.а. деганда маълум бир ғоявий харакат адабиётини эмас, балки ижтимоий тафаккурда шу ғоялар устуворлик қилган давр – М. даври адабиётини тушунган түғрироқ бўлади. Зоро, бу давр адабиётидаги **маърифатчилик классицизми, маърифатчилик реализми, сентиментализм** каби йўналиш ва оқимларнинг бари М. ғоялари таъсирида бўлган ва уларни тарғиб этган.

МАЪРИФАТЧИЛИК РЕАЛИЗМИ – маърифатчилик даври (к. маърифатчилик) Европа адабиётидаги йўналишлардан бири, шу даврда ҳаётни бадиий акс эттиришнинг реалистик принципи (к. реализм) асосида яратилган қатор асарларга хос умумий хусусиятлардан келиб чиқиб қўлланувчи атама. М.р. адабиётни ҳаётга яқинлаштириди, классицизмдан фарқли ўлароқ, оддий кишилар ҳаёти, уларнинг кундалик турмуши, орзу-интилишларини қаламга олди. М.р.нинг қаҳрамони – ўзининг фаоллиги, ақл-заковати ва ирода кучи билан жамиятда ўз ўрнини топиш, унда ўз мавқеини яхшилаш учун курашайтган шахс. Яъни бу қаҳрамон ўзида маърифатчиликка хос инсон концепциясини ифодалайди, инсон ўзининг ақл-заковати ва ирода кучи билан жамиятни ва ўз тақдирини ўзгартиришга қодир деган ғояга иллюстрация бўлиб хизмат қилади. Шу боис айрим адабиётшунослар «маърифатчилик реализми» атамасидан кўра «дидактик реализм» атамасини кўпроқ маъқул кўрадиларки, бунга етарли асос бор. Зоро, М.р., бир томондан, адабиётни ҳаётга яқинлаштириди, иккинчи томондан, унга тарбия воситаси сифатида қаради. Яна ҳам аникроғи, адабиётни ҳаётга яқинлаштириш ҳам унинг тарбиявий кучини ошириш мақсади билан изоҳланиши мумкин. Яъни ҳаётни аслига монанд тасвирлаб, ундаги фожеа ва иллатларни ҳақоний кўрсатгани ҳолда, М.р. шу реал воқелик фонида идеал қаҳрамонни ҳаракатлантириди, унинг жамиятдаги мавқеини яхшилаш, инсонлик шаънига муносиб турмуш учун курашини ибрат, намуна сифатида талқин қилди. Табиийки, М.р.да шунга мос адабий жанрлар («тарбия романи», «саёҳатнома роман», «саргузашт роман»; очерк, саёҳатнома, мешчанлик драмаси) кенг оммалашди ва ривожлантирилди. М.р.нинг йирик намояндлари сифатида эътироф этилувчи Д. Дефо, Г. Филдинг, Д. Дидро, Г. Лессинг қаби адиллар-

нинг асарлари бадий тафаккур ривожида, адабиётда реалистик тенденцияларнинг қарор топишида катта аҳамиятга эга бўлди. Европа М.р.га хос хусусиятлар XIX аср охири – XX аср бошида қатор Шарқ халқлари адабиётида, жумладан, ўзбек жадид адабиётида ҳам кузатилдики, бу, бир томондан, адабий алоқа ва таъсир, иккинчи томондан, уларни юзага келтирган шарт-шароитлардаги типологик умумийлик билан изоҳланади.

МАҚТАЬ (ар. مقطع – тугаш жойи, кесмоқ) – ғазал ёки қасиданинг охирги, якунловчи байти. М.да шеър давомида билдирилган фикрлар, изҳор этилган ҳис-туйғулар хulosаланади, шоирнинг уларга муносабати ифода этилади. Мұмтоз адабиётшуносликда шеърни чиройли, таъсири ва мазмундор қилиб якунлаш ғоятда мұхим саналган, ҳусни мақтаъга (қ.) алоҳида эътибор берилган. Дарҳа-қиқат, охирги байт шеър мазмун-моҳиятини ўзида мужассам ифода этиб, унинг бадий савиясини белгиловчи мұхим омил бўла олади. Анъянага кўра, аксарият М.ларда шоир тахаллуси келтириладики, у шеър муаллифини кўрсатиб турувчи ўзига хос имзо, тамға вазифасини ўтайди. Mac.:

*Олимни нуктадон манам, пири ҳидояхон манам,
Шухрати шеър бобида Машраби мўътабар ўзум.*

Бироқ М.да тахаллус келтириш қатъий қоида мақомига эга эмас, шеъриятимизда тахаллус келтирилмаган М.лар ҳам талайгина. Хусусан, тахаллус келтирилмаган М.лар Бобур ижодида кўплаб учрайди. Mac., Бобурнинг ғазалларидан бири куйидаги М. билан якунланган:

*Бу маҳвашларға кўнгул бермағилким, асрай олмаслар,
Кўнгулни асрагил, бўлғайки, бир дилдор топқайсөн.*

МАҲАЛЛИЙ КОЛОРИТ, ЖОЙ КОЛОРИТИ – бадий асарда муайян худуд (минтақа, вилоят ва х.)га хос турмуш тарзи, урф-одатлар, шева, пейзаж ва ш.к.ларни қайта яратиш. М.к. тасвирининг ҳаққоний бўлишига хизмат қилиши билан бирга маърифий жиҳати билан ҳам аҳамиятли, чунки у муайян худудда яшовчи кишилар ҳаёти билан яқиндан танишиш имконини яратади.

МЕЛОДРАМА (юн. melos – қўшиқ, drama – ҳаракат) – 1) драматургия жанрларидан бири. М.нинг характерли хусусиятлари сифа-

тида ўткір интрига асосиға қурилған сюжетта зғалиқ, бир қадар бүрттирилған эмоционалликка йўғрилғанлық, әзгулик билан ёвузыннинг кескин ва қабариқ тарзда зидлантирилиши, ахлоқий-тарбиявий йўналтирилғанлық кабилар кўрсатилади. М. драматургия ва театр жанри сифатида XVIII аср охирида Францияда шаклланган, гуллаб-яшнаган даври эса XIX асрнинг иккинчи чорагига тұғыр келади; 2) мусиқали драматик асар, унда персонажларнинг монолог ва диалоглари мусиқа жўрлигига ижро этилади; 3) ҳозирги адабиётшуносликда ва кўпроқ сўзлашув амалиётида М.га хос (интригага бой сюжет, яхшилик билан ёмонлик кескин контрастда тасвиrlанувчи, ошкора кучайтирилған эмоционаллик ва б.) хусусиятларга эга, лекин бадиий жиҳатдан бўш, оммавий китобхон ёки томошабин савиясига мўлжаллаб ёзилған асарларга салбий баҳони ифодалайди. Терминнинг салбий маънода кўлланиши «коммавий санъат» билан боғлиқ бўлиб, унинг М.га хос юқоридагича хусусиятлардан ўкувчи (томушабин)ни ўзига осон жалб этувчи восита сифатида ўринли-ўринисиз фойдаланиш натижасида бадиий ночор асарлар пайдо бўлади, ўз ҳолича яхшигина бадиий усул ва воситалар сийқалашади.

МЕМУАР (фр. *mémoires* – хотиралар, эсдаликлар) – муаллифнинг ўтмишда ўзи бевосита иштирок этган ёки шоҳиди бўлган воқеалар ҳақидаги хотиралари баён қилинувчи адабий асар. М. асарлар ўзининг баён йўсини, воқеаларнинг сюжетли тарзда берилмаслиги, вақт тартибига риоя қилиниши, фактографиклик хусусиятлари билан кундаликларга, материалнинг ҳақонийлиги ва тўқиманинг йўқлиги жиҳатидан ҳужжатли-тарихий очерк, илмий биографияларга яқин туради. Бироқ М.ни булардан фарқловчи қатор муҳим жиҳатлар ҳам бор. Жумладан, хотиранавис, умуман, воқеани эмас, унинг ўзи кўрган томонлари ва ундан бевосита олган таассуротлари ҳақида ёzáди. Шундай экан, М. субъективликдан холи эмас, демак, фактик аниқлиги жиҳатидан ҳужжат санала олмайди. Бироқ бу субъективлик муаллифнинг жонли иштироки, таассуротларнинг табиий ва жонлилиги, шунингдек, ҳужжатларда доим ҳам акс этавермайдиган кўплаб тафсилотларни қамраши ҳисобига ювилиб кетади, шу жиҳатлари билан М. асар муайян воқеа (давр) ҳақида маълумот берувчи қимматли манба бўлиб қолади. М. асарлар ҳажми, ҳаётни қамраш кўлами, услубий хусусиятлари каби қатор жиҳатлари билан бир-биридан фарқланади: айрим М. асарлар хронологик жиҳатдан чекланган (Н.Муҳитдинов. «Кремлда ўтган кунларим») бўлса, бошқалари муаллиф онгли ҳаётини тўла қамраб олади («Бобурнома»); баъзила-

ри дикқатни конкрет воқеага (О.Шарафиддинов. «Бир нутқ тарихи»), бошқалари жамият ҳаётидаги мұхим бир даврнинг қатор воқеаларига (М.Мұхаммаджонов. «Турмуш уринишлары») қаратади; портретта яқин бўлган айрим М.лар бирон-бир шахс ҳаётини деярли тўласи-ча (З.Сайдносирова. «Ойбегим менинг») қаламга олса, бошқалари унинг ҳаётидан бир-икки эпизодни (С.Аҳмад. «Йўқотғанларим ва топғанларим») қамраш билан чекланади. Ёки айрим М.ларда «Бобурнома»даги каби турли тафсилотлар (этнографик, географик, флора ва фауна ва х.)га кенг ўрин берилса, бошқаларида муаллифни қизиқтирган асосий мавзуга оид тафсилотларни қайд этиш билан чекланилади; баъзи М.ларда баён объектив тарзда (фактларни қайд этиш билан) олиб борилса, баъзан фактларни атрофлича мушоҳада қилиш, уларга ғоявий-ҳиссий муносабатни ошкор ифодалаш кузатилади. Яна бир жиҳати, М.лар ёзиш билан профессионал ёзувчиларгина эмас, бошқа соҳа кишилари (давлат арбоблари, санъаткорлар, спортчилар ва х.) ҳам шуғулланадилар.

МЕТАФОРА (юн. *metaphora* – кўчириш) – маъно кўчишининг кенг тарқалган турларидан бири, нарса-ҳодисалар орасидаги ўхшашликка асосланувчи кўчим тури, М. моҳияттан яширин ўхшатиш бўлиб, унда ўхшатилаётган нарса тилга олинмагани ҳолда, унинг маъносини ўхшаётган нарса (яъни уни ифодалаётган сўз) билдиради. Албаттa, бу ўринда ўхшатилаётган нарса-ҳодисаларнинг айнан ўхшашлиги талаб қилинмайди, балки икки нарса-ҳодисага хос белгилардан бирортаси асос учун олинади. Дейлик, «олтин куз», «олтин давр» бирикмаларининг биринчисида ўхшатиш асоси учун «ранг», иккинчисида эса «қиммат» олинган. Бадий матннаги М.нинг маъноси ғоят серқиrrа, чунки у контекстдаги бошқа сўзлар билан бирга мазмуний бутунликни ташкил қилар экан, улар билан алоқада ҳосил бўлган ассоциациялар туфайли маъно диапазонини кенгайтиради. Мас., матндан ажратиб олинган ҳолда «сув синди» бирикмасининг маъноси жуда хира, унинг М. эканлигини идрок қилиш учун ақлни зўриқтириш талаб этилади. Бироқ Р.Парфининг «Сув остида ялтирайди тош, Харсангларда синади сувлар» сатрларида бадий матн контекстидаги бирикма маъноси ёрқин намоён. «Сув синиши» учун унинг ойнага ўхшатилиши зарур, лекин шеърда сув ойнага ўхшати-ган эмас. Шунга қарамай, ассоциатив алоқалар асосида «остида ялтираган тош» кўринадиган даражада тиник сувни ойнага ўхшата-оламиз ва шунинг учун унинг «синиши» табиий кўринади. Шоирнинг «Деразамга урилади қор, Жаранглайди жарангсиз кумуш» сатрла-

рида М.нинг маъно ассоциациялари янада кенгроқ. Ранг ўхшашлиги асосида қорни кумушга ўхшатиш шеъриятда анча кенг қўлланади. Бироқ бу Р.Парфи учун таянч нуқта, холос, ундан туртки олиб бошқа ассоциациялар уйғотилади: «жаранглайди, жарангиз» сўзлари мetonimik асосда «кумуш танга»ларни тасаввурга келтиради ва қор ёғиши «кумуш тангаларнинг сочилиши»га ўхшатилаётгани аён бўлади. Яъни лирик қаҳрамон наздида гўё кимдир хайр-эҳсон қилиб танга сочаётгандек. Лирик қаҳрамон «кор ёғиши тўкинлик, баракотдан нишона» деб билувчи халқ вакили экани эътиборга олинса, унинг айни дамдаги кечинмаларини ҳис этиш мумкин бўлади. Бу ўринда М.нинг воқе бўлишини таъминлаётган ассоциациялар занжирини мана бу тарзда ифодалаш мумкин: кумуш (кор, ранг ўхшашлиги) – жаранг (танга, алоқадорлик асосида) – «танга сочиш» (саҳоват) – кор ёғиши (Яратганинг саҳовати, барака ёғилиши). Демак, лексик М.нинг маъноси бир сўз доирасида англашилиши мумкин ва у номинатив (аташ) функция бажаради, бадий М.нинг функцияси эса аташдан анча кенг, у матндаги бошқа сўзларнинг маънолари таъсирида мазмунини кенгайтиради ва эстетик функция бажаради. Мас., лексик М. сифатида «баҳор» – ёшлиқ, «кузак» – етуклиқ, «куз» – кексалик маъноларида ишлатилиши мумкин, яъни учала ҳолда ҳам М. инсон умрининг бир босқичини бошқа сўз билан атайди, холос. И.Мирзонинг «Кузагимга хуш бўй берган баҳорим» мисрасидаги М.лар алоҳида ҳолда эмас, бир бутунлигига муҳим: улар етуклиқ палласи навқирон гўзалга кўнгил кўйган киши кечинмаларини ифодалайди, образ яратади. Бу каби ҳолларда ёйиқ М. ҳақида гапирилади, яъни бутун бошли жумла ёки матннинг йирикроқ бўлаги доирасида воқе бўлувчи образ назарда тутилади. Албатта, бу ўринда М.ни энди кўчим тури деб бўлмайди, унга образлиникнинг бир кўриниши сифатида қараш тўғрироқ. Адабиётшуносликда бир нарса-ҳодисанинг моҳиятини иккинчи бир нарса-ҳодиса орқали очиш мәттафориклик, шу асосга курилган образни мәттафорик образ деб юритилади (қ. образ).

МЕТОД (юн. *methodos* – тадқиқ усули) – 1) иходий метод; марксистик эстетиканинг асосий категорияларидан бири, XX асрнинг 20-йилларидан кенг оммалашган ва маъноси ўзгариб борган термин. 30 – 40-йиллар адабиётшунослигига адабиёт ва санъатдаги ҳаётни бадий акс эттиришнинг асосий тамойиллари М. деб юритилиб, иккита – реалистик ва нореалистик иходий методлар мавжуд деб ҳисобланган. Кейинроқ М. деганда бадий асарнинг ғоявий мазмуни билан боғлиқ бўлган ҳаёт материалини танлаш, бадий идрок

этиш ва баҳолаш принциплари тушунила бошланган. Яъни бунда М. бадиий тафаккур тарзи сифатида тушунилиб, ижодкор эътиборини воқеликнинг у ёки бу қирраларига қаратиши, типиклаштириши ва баҳолашида намоён бўлувчи ҳодиса саналган. Кейинги маъно кўчиши адабиётнинг мафкура қуролига айланишини илмий асослаш жараёнида амалга ошган ва мафкуралашган шуро адабиётшунослигига М. тушунчасига ўта муҳим аҳамият берилган. Терминнинг кейинги маънода кўлланиши бадиий ижоддаги икки муҳим унсур – метод ва услубни алоҳида категориялар сифатида тушунишга имкон берган. Бунда бадиий тафаккур тарзини англатувчи М.га гносеологик (яъни бадиий билиш билан боғлиқ), услугба эса антропологик (яъни ижодкор шахси билан боғлиқ) категория сифатида қаралади (қ. услуг). Адабиётшуносликда М. терминини бу маънода кўллашда ҳам турличаликлар бор. Жумладан, *романтизм, реализм, танқидий реализм, социалистик реализм* кабилар ижодий М. сифатида кўрсатилса, *классицизм* баъзан М., баъзан эса адабий йўналиш сифатида кўрсатилади. Ҳолбуки, классицизмда ҳам ўзига хос ҳаёт материалини танлаш, бадиий идрок этиш ва баҳолаш принциплари мавжуд бўлиб, бу жиҳатдан у бемалол М. саналиши мумкин. Ҳозирги адабиётшуносликда ижодий М. термини кўлланишда пассивлашди; 2) тадқиқот усули. Бу маънода М. бадиий асар ва адабий жараённи тадқиқ этиш тамойиллари ва усулларини билдиради: биографик метод, қиёсий метод, социологик метод ва ҳ.

МЕТОНИМИЯ (юн. *metonymia* – қайта номлаш, бошқа нарса орқали аташ) – маъно кўчишининг кенг тарқалган турларидан бири, кўчимнинг нарса-ҳодисалар орасидаги алоқадорликка асосланувчи тури. Нарса-ҳодисалар орасидаги алоқадорлик турлича кўринишларда намоён бўлади: нарса-ҳодиса, ҳолат ёки ҳаракат билан улар эгаллаган жой («стадион ҳайқирди», «бутун шаҳар қатнашди»), вақт («оғир кун», «комадли йил»); ҳаракат билан у амалга ошириладиган восита («аччик тил»); нарса ва унинг эгаси, яратувчиси («Фузулийни ўқимоқ»); нарса ва у ясалган модда, хом ашё («бармоқлари тўла тилла»); руҳий ҳолат, хусусият ва унинг ташқи белгиси («кўз юммоқ») ва ҳ. Бадиий адабиётда, айниқса, метафорик тафаккур етакчилик қиласётган замонавий адабиётда М. метафорага нисбатан кам учрайди, зоро, эстетик функциядорлиги жиҳатидан у метафорадан куйироқ туради. Шундай бўлса-да, бадиий матнда метафора билан ёндош кўлланган ҳолда у катта бадиий самара беради, фикрни лўнда ва таъсирли ифодалашга хизмат қиласди. Мас., А.Ориповнинг

«Фарёд чекканим йўқ эл ичра тақир, Ўч ҳам олганим йўқ на қаламимдан» сатрларида восита орқали жараён назарда тутилади ва у «ўч олмоқ» метафораси билан бирга қўлланади. Бу иккиси бирлиқда «бутун вужудим билан ижодга берилиб, ғамларимни унтишга ҳаракат қилмадим» деган маънони ифодалайди ва, муҳими, шу мазмунни образли, таъсирли ифодалашга хизмат қилади. У.Азимнинг: «Кўзларини очиб-юмар Митти қушча – ярадор. Фалак, унга нажот юбор, Ўлим, бўлма харидор», – сатрларида жой М.си қўлланган: «фалак» сўзи тафаккуримизда ўринлашган ишонч асосида «Яратган»ни англатади. Баъзи ҳолларда метафора ва М.нинг қоришиқ ҳолда воқе бўлиши, биргина сўзниң ҳам метонимик, ҳам метафорик асосдаги кўчма маънолари ишлатилиши мумкин. Мас., Ш.Рахмоннинг қуйидаги шеърида шу ҳол кузатилади:

*Хазонга айланди кунларим...
Мотамда тургандай боқаман.
Фасллар тўқнашган лаҳзада
хазонлар тўпини ёқаман.
Кўзларим ачишар бехосдан
юрагим, қўлларим титрайди.
Аланга олмайди кунларим,
тутайди, оҳ, мунча тутайди.*

Шеърнинг лирик қаҳрамони – кечмишини сарҳисоб қилаётган, ўтган кунларидан қониқмаслик ҳиссини туяётган одам: у «хазон»да метонимик асосда кузни (матнда йўқ «куз» сўзи «умр кузи»ига ҳам ишора қилади), метафорик асосда эса ўтган, ҳаёт дарахтидан гўё узилиб тушган кунларини кўради. Шеърнинг кайфиятини ҳис қилишда, уни тушунишда «хазон» етакчи аҳамият касб этади, гўё калит вазифасини бажаради. Шунга ўшаб Х.Давроннинг «Қаршида дераза сўйлайди эртак, Унда икки соя – баҳтиёр малул» сатрларида ҳам ёлғиз аёл руҳиятини очишда М.дан моҳирона фойдаланилган ва унда ҳам М. метафора билан бирга қўлланган. Деразадаги «икки соя» – ёлғиз аёлга армон бўлган сокин оиласвий ҳаёт ва шу армон туфайли дераза унга эртак сўйлаётгандек бўлади. Ҳар икки ҳолда ҳам адабиётшуносни М.нинг номинатив функцияси эмас, унинг бадиий-эстетик функцияси – лирик субъектларнинг кечинмасини образли ифодалашга, уларнинг образини яратишга хизмат қилаётгани қизиқтириши лозим.

МИГРАЦИЯЛАР НАЗАРИЯСИ – қаранг: сайёр сюжетлар назарияси

МИСТИФИКАЦИЯ, АДАБИЙ МИСТИФИКАЦИЯ (юн. *mystes* – сирга ошно, *facio* – қиламан) – 1) асарнинг муаллиф томонидан атайнин бошқа бир шахс (ё ҳақиқатда мавжуд, ё тўқима)га тегишли, ўзга шахс томонидан ёзилган қилиб кўрсатилиши. Муаллифнинг яширин қолишга интилиши жиҳатидан адабий М. аноним (имзосиз эълон қилинган ёки тарқалган асар) ва тахаллус қўллаш (яъни яширин қолиш мақсадида асарни тахаллус билан эълон ғилиш)га яқин. Улардан фарқли томони шуки, адабий М.да асар нисбат берилаётган муаллифнинг услуби, руҳияти, дунёкараши ва ш.к. индивидуал жиҳатларни яратиш орқали реал муаллифдан тамом ўзга муаллиф образи вужудга келтирилади. Мас., кейинги йиллар ўзбек матбуотида эълон қилинган Уста Гулмат ғазаллари бунинг ёрқин намунаси бўлиб, уларда ҳақиқий муаллиф А. Обиджондан тамом ўзга муаллиф образи – лирик қаҳрамон бўй кўрсатади. Уста Гулмат ғазалларидан бир туркумини «Шарқ юлдузи»да эълон қиларкан, ҳақиқий муаллиф унга мухтасар сўзбошини илова қиласди. Унда, жумлада: «Аҳли шуарога маълум бўлгайким, Гулмат Шошийнинг сўнгти ғазалларини тиклаш ишлари ниҳоясига етди. Ғазалларнинг бу қисми 1916 ва 1917 йилнинг бошларига тўғри келади», – дейилади. Табиийки, ҳақиқий муаллиф туркумда нисбат берилган муаллифга хос услубни ҳам, ғазаллар нисбат берилаётган даврга хос мазмун ва руҳни ҳам тиклайди, ҳеч жойда ўз номини келтирмайди; 2) ҳикояни асослаш (*мотивировка*) мақсадида кўлланувчи бадиий усул, эпик асарларда воқеаларнинг тасодифан ёзувчи қўлига тушиб қолган бирорнинг хати, кундалик дафтари, кўлёзмаси ва ш.к. йўсинларда баён қилиш. Бироқ мазкур усул сифатидаги М.нинг дастлабки маънодаги М.дан фарқи шуки, биринчидан, бундай асарларда муаллиф яширин қолиш мақсадини кўзламайди, иккинчидан, уларда муаллиф образи у ёки бу тарзда (мас., кундалик, хат, кўлёзма ва ш.к.ларни топиб олган ва шунчаки эълон қилаётган шахс сифатида) ҳамиша акс этади. Асар тўласича шу усул асосига қурилиши ҳам, М. йўсинаидаги баён ривоянинг бир қисмини ташкил қилиши ҳам мумкин (мас., О. Ёқубов. «Кўхна дунё» – Жузжоний кундаликлари; О. Мухтор. «Минг бир қиёфа» – Абдулла Ҳакимнинг машқ дафтари).

МИФ (юн. *mythos* – ривоят, ҳикоя, масал) – халқ оғзаки ижодининг энг қадим даврларида пайдо бўлган, воқелик (олам) ҳақидаги тасаввурларни конкрет образлар воситасида акс эттирувчи ривоявий

асарлар. М. ривоявий асарлар (олам ва одам ҳақидаги ҳикоялар) бўлса-да, уларни том маънода сўз санъати ҳодисаси деб бўлмайди. М.лар қадимги одамлар учун тафаккур шакли, улар М. воситасида олам сир-синоатлари (оламнинг ёки инсоннинг яратилиши, қуёш чиқиши ва ботиши, шамол эсиши ва момагулдурак сабаби ва х.) ни билишга интилганилар, М.ларда уларнинг олам ҳақидаги билимлари ўз ифодасини топган. М.ларда яратилган образлар (маъбудлар, турли маҳлуқлар ва х.) улар учун ижодий тасаввур маҳсули эмас, аксинча, асл ҳақиқатдир. Дейлик, қадимги юононлар чақмоқ чақишини Зевснинг, денгиздаги даҳшатли довулларни Посейдоннинг ғазаблангани билан изоҳлаганлар, инсон тақдиридаги турфа эврилишларда илоҳларнинг аралашувини кўрганлар. Кейинчалик, мифологиядан ижтимоий онгнинг дин, фан, санъат, адабиёт, сиёсат каби соҳалари ажралиб чиққанидан сўнг, М.лар уларнинг таркибига сингиб кетади. Буни адабиёт мисолида кўрадиган бўлсак, қадимги М.лар антик адабиётда ўзининг иккинчи умрини яшай бошлаганига амин бўлиш мумкин. Зоро, антик адабиётдаги кўплаб асарларга мифологик сюжетлар асос бўлгани, уларда мифологик унсурлардан кенг фойдаланилгани бунинг ёрқин далилидир.

МИФОЛОГИК МАКТАБ – XIX аср Европа адабиётшунослигига вужудга келган илмий йўналиш. М.м.нинг фалсафий негизини Ф.Шеллинг, А.Шлегель ва Ф.Шлегель каби мутафаккирлар таълимоти ташкил этади. Бу мутафаккирлар эстетикасида мифлар жуда катта ўрин тутади. Уларга кўра, адабиёт ва санъатнинг вужудга келишига мифлар асос бўлган, миф – поэзиянинг жавҳаридир. Маълумки, романтизм экзотикага мойиллик билан характерланади, айни шу нарса ҳалқ оғзаки ижодига қизиқиш кучайганининг боз омили бўлди. Зоро, классицизм даври сиғинган антик эталонлардан, маърифатчилик топинган ақл культидан безган романтизм вакиллари ҳалқ оғзаки ижодида чинакам экзотика, битмас-туганмас хазинани кўрдилар. Шунинг учун ҳалқ оғзаки ижоди намуналарини тўплаш ва нашр қилиш, уларни атрофлича тадқиқ этиш ишлари авж олди. Бунда немис олимлари ака-ука Гриммлар, айниқса, жонбозлик кўрсатдилар: 1812 йили улар тўплаган эртакларнинг илк жилди чоп этилди; фольклоршунослик соҳасидаги тадқиқотлари асосида «Немис мифологияси» (1835) асари яратилиб, унда М.м.нинг назарий қарашлари тугал шакллантирилди. Ака-укалар адабиётнинг пайдо бўлишини немис романтизм фалсафасидаги ҳалқ руҳи тушунчаси билан боғлайдилар: ғайбдан илҳомлан-тирилувчи ҳалқ руҳи аввал

мифларни яратади, кейин эса мифлардан эпос, эртак, лирик қүшиқ ва ш.к. бөшқа жанрлар туғилади; илохий илхом туфайли яралғани учун ҳам фольклор – халқ руҳининг англанмаган ижод маҳсулі, унинг шахсизлиги ҳам шу билан боғлиқдир. Ака-ука Гриммлар турли халқлар фольклорини қиёсий ўрганишади, уларда кузатилувчи ўхшашилкларни эса, худди барча ҳинд-европа тиллари учун умумий бобо тил (санскрит) бўлгани каби, барча халқлар (хусусан, ҳинд-европа халқлари) учун умумий қадимги мифология мавжуд бўлгани билан изоҳлашади. Европанинг турли мамлакатларида кўплаб издошлари бўлган М.м.нинг илмий изланишлари, асосан, икки (этимологик ва аналогик) йўналишда кечди. Биринчи йўналиш (А.Кун, М.Мюллер, Ф.Буслаев ва б.) ўз олдига қадимги мифлар мазмунини тиклаш, уларнинг пайдо бўлиш сабабларини аниқлашни мақсад қилиб кўйса, иккинчиси (В.Шварц, В.Манхард ва б.) турли халқлар фольклорини қиёсий ўрганиш орқали ўхшашилкларни аниқлаш йўлидан борди. М.м.нинг бир қатор қарашларини кейинги давр адабиётшунослиги инкор қилган бўлса-да, у адабий назарий тафаккур тараққиётида сезиларли из қолдирди. Жумладан, халқ оғзаки ижоди намуналарини ёзib олиш ва чоп этиш ишларининг йўлга кўйилгани, мифология, фольклор ва ёзма адабиёт намуналарини қиёсий ўрганишнинг бошлаб берилгани бевосита М.м. фаолияти билан боғлиқдир. Шунингдек, М.м.нинг назарий қарашларини ижодий ривожлантириб (қ. *ритуал-мифологик танқид*) ёки инкор қилган ҳолда (қ. *сайёр сюжетлар назарияси*) янги йўналишларнинг майдонга чиққани ҳам унинг адабиётшунослик ривожига жиддий таъсир этганинини кўрсатади.

МОДЕРНИЗМ (фр. *moderne* – энг янги, замонавий) – XIX аср охири – XX аср бошларида оммалашган термин, санъат ва адабиётда декадансдан кейин майдонга чиққан нореалистик оқимларнинг умумий номи сифатида тушунилади. Табиийки, адабиёт ва санъатда кенг тарқалган мазкур ҳодиса бўш жойда пайдо бўлган эмас, унинг куртаклари аввалдан мавжуд эди. Жумладан, илгарироқ вужудга келган «санъат восита эмас – мақсад», «санъат – ўзни ифодалаш», «соф санъат» қабилидаги назарий қарашлар, барокко доирасида саналувчи маньеризм, гонгоризм, прециоз адабиёт намояндларининг ижод амалиётида М.га хос жиҳатларни кузатиш мумкин. Аслида, адабий жараёнда ҳаётни бадиий акс эттириш принциплари (реалистик ва нореалистик), адабиётнинг моҳияти, билиш имконлари, вазифаси ва ш.к. масалаларда зиддиятли қарашлар азалдан мавжуд

бўлгани эътиборга олинса, М. куртакларини жуда қадим замонлардан ҳам топиш мумкин бўлади. Яъни М.га реалистик ва нореалистик йўналишлар орасидаги зиддиятнинг муайян ижтимоий-тарихий шароитда қуюқлашиб, кескин намоён бўлиши, янгиланган назарий асосларга эга бўлиши ва оммалашishi сифатида қарашиб мумкин. М. ўтган аср охирларидан бошлаб майдонга чиққан, ижодий дастурлари ва ижод амалиёти жиҳатидан турли-туман адабий мактаб ва йўналишлар (экспрессионизм, импрессионизм, символизм, акмеизм ва б.) ўзига асос билган эстетик тизим, ижодий метод сифатида тушунилади. М. доирасидаги мактаб ва оқимлар нечоғлик турфа бўлмасин, уларни умумлаштирувчи қатор нуқталар мавжуд. Аввало, дунёқарашиб жиҳатидан улар нафақат XIX асрда оммалашган позитивизм, балки асрлар давомида шаклланган анъанавий христиан дунёқарашидан ҳам деярли узилиб, Ф. Ницше, З. Фрейд, А. Бергсон, У. Жеймс каби мутафаккирлар қарашибларидан озиқланади. Шунга мос тарзда М. йўналишидаги мактаб ва оқимларнинг аксарияти адабий-маданий анъаналарни ҳам турли даражада инкор қиласи ва янги даврга мос янги адабиёт яратиш даъвосини олға суради. Янги адабиёт воқеликни реалистик тасвиrlашдан воз кечиб, уни идрок қилишиб мумкин эмас деб билади, инсоннинг ҳиссий билиш имконидан ташқаридаги моҳиятга интуитив тарзда яқинлашишни кўзлайди (қ. символизм); воқеликда сабаб-натижка асосидаги тартибот мавжудлигини қабул қилмайди (қ. абсурд), унда воқелик гоҳ бирдан пайдо бўлган оний таассуротлар йигиндиси (қ. импрессионизм), гоҳ таниб бўлмас даражада ўзгарган, тасодиф ва гаройиботга тўла макон (қ. сюрреализм) сифатида аксланади. М.га хос умумий хусусиятлардан бири шуки, у объектив воқеликнинг тасвири ўрнига унинг ижодкор тасаввуридаги бадиий моделини яратишни мақсад қиласи. Яъни бу ўринда воқеликни акс эттириш эмас, ижодкорнинг ўз-ўзини ифодалаши (қ. экспрессионизм) устувор аҳамият касб этади. Ижодда субъективликнинг олдинги ўринга чиқарилиши, мантикий билишдан интиутив билишнинг юқори қўйилиши, инсон ички оламида кечувчи тизгинсиз эврилишларга айрича эътибор берилиши (қ. онг оқими), ижодкор шахс ижодий тахайюли ва у акс эттирган воқеликнинг бетакрор ҳодиса сифатида тушунилиши, ўз ўй-хисларини ҳеч қандай (маънавий, ахлоқий, сиёсий ва х.) чекловларсиз ифодалаш хукуқининг эътироф этилиши ҳам М.га хос хусусиятлардандир. Ижодий эркинлик нафақат ғоявий-мазмуний, балки шаклий изланишларда ҳам мутлақо дахлсиз. М. асрлар давомида шаклланган адабий канонларни инкор қиласи

ва ҳар қандай нормативликка қарши (к. футуризм) туради. Бу ҳол М.даги бадий образ структураси, асарнинг субъектив ва объектив ташкилланиши, баён тарзи, сюжет-композицион қурилиши, тил хусусиятлари, хуллас, адабий асарнинг барча сатҳларида шаклий ўзига хосликларни юзага келтиради.

М. ўз ичига санъатнинг моҳияти ва мавжудлиги ҳақида бир-бираидан жиддий фарқланувчи қараашларга асосланган ва, айни чоғда, қатор муштарак жиҳатларга эга турфа оқим ва мактабларни бирлаштирган фалсафий-эстетик ҳодиса бўлиб, у XX аср адабиёти ва санъатида чукур из қолдирди. У кўплаб улуғ адиллар (мас., Ф. Кафка, Ж.Жойс ва б.) таянган ижодий тамойилларни белгиладигина эмас, яхлит олганда, реализм мавқеида турган қатор адиллар (М. Пруст, В. Вулф) ижодий йўсунинг ҳам жиддий таъсир кўрсатди. Шу ўринда М.га берилган таърифларнинг фарқли экани, унинг юзага келиш вақти, даврлаштирилиши каби масалаларда билдирилган фикрларда жиддий тафовутлар борлиги, ниҳоят, унга муносабатнинг турличалигини ҳам таъкидлаб ўтмоқ жоиз. Жумладан, шўро даври адабиётшунослигига М.га салбий ҳодиса деб қарапди, буржуя мафкурасининг хизматчиси, капиталистик тўрмуш тарзи, ахлоқсизлик, индивидуализм ва ш.к. иллатларни тарғиб қилувчи адабий ҳодиса сифатида баҳоланди. Албатта, бу хил айбловларни буткул асоссиз дейиш ҳам адолатдан эмас. Бироқ шўро империясидан ташқаридаги жуда катта ҳудудга ёйилган, кўплаб мутараққий ҳалқларнинг энг ёрқин истеъдодларини ўзига жалб этиб, адабиёт ва санъатига кучли таъсир ўтказган ҳодисани бундай бир ёқлама баҳолаш «мағзавага қўшиб чақалоқни ҳам тўкиб юбориш»нинг айни ўзи эди. Зоро, адабиёт тарихи реалистик ва нореалистик ижодий тамойиллар орасидаги кураш жараёни, айни чоғда, уларнинг бир-бирини тўлдириш, бойитиш жараёни ҳам бўлганини кўрсатади. Ҳатто шўроларнинг мафкуравий иҳотаси ҳам бу табиий жараённинг кечишини батамом йўқ қилишга ожиз эди. Хусусан, рус адабиётида инқилобгача мавжуд бўлган М. адабиёти анъаналарининг таъсири шўро даврида ҳам қатор ижодкорлар асарларида сақланиб қолди; хориждаги рус адабиёти, шўро даври бөрган имкон даражасидаги Farb адабиётидаги янгиликлардан хабардорлик ҳам беиз кетмади. Бундан ташқари, шўро давлати таркибига 40-йилларда қўшилган Болтиқбўйи ҳалқлари адабиёти, Иккинчи жаҳон урушидан кейин социалистик лагерни ташкил қилган ва ўзида демократик тамойилларни бир қадар сақлаб қололган мамлакатлар адабиётлари билан алоқалар

шўро адабиётининг М. адабиётидан буткул узилиб қолишига имкон бермади. Шу омиллар натижаси ўлароқ, 80-йилларга келиб ўзбек адабиётида М. га хос айрим хусусиятлар бавосита ижодий ўзлаштирила бошлангани (М.М.Дўст, А.Аъзам, О.Мухтор, Ф.Хотам ва б.), 90-йиллардан кейин эса кўпроқ модерн йўналишида ижод қилувчи қатор ёшлар (Н.Эшонкул, Т.Рустам, Б.Рўзимуҳаммад, Фахриёр ва б.) майдонга чиққани кузатилади. Ҳозирча ўзбек адабиётшунослигига мазкур ҳодисани ўрганиш «маъқуллаш – инкор қилиш» тарзидаги баҳслар доирасидан чиққанича йўқ, уни фундаментал асосда тадқиқ этиш эртанинг вазифаси бўлиб қолмоқда.

МОДУС (лот. modus – кўриниш, тур, ўлчов, усул) – қаранг: бадиийлик модуслари

МОНОЛОГ (юн. monos – якка, logos – сўз) – якка шахснинг айни пайтда жағоб берилишини талаб қилмайдиган, ўзгалар репликалари билан бўлинмаган нутқи. М. оғзаки шаклда (турли йиғинлардаги нутқ, маъруза, ҳисботлар) ҳам, ёзма шаклда (публицистика, меъуарлар ва х.) ҳам кенг қўлланади. Бадиий адабиётда М.лардан турли мақсадларда фойдаланилади. Айниқса, драматик асарларда М.ларнинг бадиий-эстетик вазифалар доираси анча кенг. Жумладан, М. – драматик персонажнинг руҳий ҳолати, унинг онгию қалбида кечачётган жараёнларни тасвирлашнинг асосий шакли. Айни чоғда, шартли равишда тасвирланувчи бундай руҳий жараёнлар воқеаларга ғоявий-ҳиссий муносабатни ифодалаш, айрим муҳим тафсилотларни бериш, сюжет ривожини асослаш каби қатор муҳим функцияларни ҳам бажаради. М. лириканинг устувор нутқ шакли, лирик қаҳрамон кечинмалари, асосан, унинг М.и орқали ифодаланади. Бу нарса ижровий лирика намуналарида, айниқса, яққол кўзга ташланади, шунинг учун амалиётда бундай шеърлар монолог деб ҳам юритилади (А.Орипов. «Ҳамза»; Х.Даврон. «Абулҳай сўзи»). Сифат жиҳатидан М.нинг турли кўринишлари мавжуд (к. бадиий нутқ, ички монолог).

МОНТАЖ (фр. montage – йиғмок) – кино санъатидан ўзлаштирилган термин, турли макон ва замонда кечган воқеалар тасвирининг бир-бирига тўғридан-тўғри уланишини англатади. Кинонинг ривожланиши, унинг сўз санъатига таъсири натижаси ўлароқ, М. адабиётда ҳам композицион усувлардан бири сифатида кенг қўллана бошлади. Аслида, М.га хос айрим хусусиятлар, жумладан, воқеабанд асарда турли макон ва замонда кечиб, бир-бирининг узвий давоми бўлмаган ва бир-бирига фақат мазмунангина боғланган воқеа

(эпизод)ларнинг тасвирланиши адабиётда эскидан мавжуд эди. Кино санъатида М. усули янада ривож топди, натижада сўз санъатида ҳам унинг имкониятларидан кенгроқ фойдаланила бошланди. Эндиликда эпик асарларда бир қараашда бир-бирига боғлиқ бўлмаган воқеа (эпизод)ларни алоҳида, ўз ҳолича мустақилдек жойлаштириш ҳам мумкин бўлаётирки, сиртдан алоқасиздек кўринган бу ларчалар бадиий ният, ғоя асосида бир бутунликни ҳосил қиласиди. Ўзбек адабиётида М.нинг бу хили илк бор F.Гуломнинг «Нетай» қиссасида синаб кўрилган бўлса, унинг яхши намуналаридан бири сифатида Ч.Айтматовнинг «Қиёмат» романини кўрсатиш мумкин. Ҳар икки асарда ҳам қисмларнинг шаклий боғланиши шартли ва анча заиф, шунга қарамай, улар концептуал асосда бир бутунга биригади.

МОТИВ (лат. moveo – ҳаракатлантираман) – мусиқашуносликдан ўзлаштирилган термин. М. мусиқада асарнинг энг кичик шакл бирлиги саналиб, асар унинг айнан такрорланиши (шунингдек, ўзгартирилиши ёки зид М.лар киритиш) асосида ривожланади. Адабиётшунослиқда М. термини турлича маъноларда қўлланади. Жумладан, воқеабанд асарларда М. сюжет схемаси (мас., қаҳрамон банди этилади, унга бирон-бир қиз ёрдам беради; ўтай она ва муштипар солиҳа қиз; қаҳрамон кимсасиз ётимлиқдан юксак мартабага етади; қаҳрамон отасини танимайди, фавқулодда вазиятда унга дуч келади ва х.) ёки бирон-бир нарса (мас., кўзгу, тумор), ҳолат (мас., туш кўриш, арвоҳ билан сухбат, ўзини танитмай юриш), образ (доно вазир, ёафодор дўст, рақиб) каби қатор кўринишларда воқе бўлади. М.га хос муҳим жиҳатлардан бири муайян турғунликка эгалиқдир. Яъни М.лар ярим тайёр ҳолда олинади: мавжуд М.лар айнан эмас, ўзак сақлаб қолингани ҳолда ёзувчининг бадиий фантазия имконияти ва ижодий ниятидан келиб чиқиб турли варианtlарда талқин этилади. Мас., «Алпомиш»даги Қоражон, «Фарҳод ва Ширин»даги Шопур, «Ўткан кунлар»даги уста Олим – бари дўст мотивининг турли варианtlари бўлиб, улар асар сюжетидаги функциялари, бадиий концепцияни ифодалашда тутган ўрни жиҳатидан фарқланади. Лирикада ҳам М.лар кенг ўрин тутади. Хусусан, анъанавий тарзда ишлатилувчи «ошиқ – ёр – ағёр», «кутаётган ошиқ – келмаган ёр», «борлигини тутган ошиқ – бепарво ёр» сингари қатор лирик сюжет М.лари турли варианtlарда қўлланиб, лирик қаҳрамоннинг турфа ўй-ҳисларини лўнда ва таъсирили ифодалашга хизмат қиласиди. Шунингдек, бир шоир ижоди ёки бир даврда яшаган шоирлар ижоди

доирасида тақорланувчи поэтик образлар саналади. Мас., Чүлпон шеъриятида «йўлчи», «йўл», «юлдуз» поэтик образлари жуда кўп қўлланган бўлиб, улар Элбек, Боту, Ойбек, У.Носир асарларида ҳам тез-тез учрайди. Шу ўринда М.ларнинг тагмаънога ишора қилиш функциясини ҳам таъкидлаш жоиз. Жумладан, «йўл», «йўлчи», «юлдуз» мотивлари ижтимоий мазмунга («йўл» – кураш, «йўлчи» – курашчи, «юлдуз» – мақсад) ишора қилади. Поэтик М.лар мазмун жиҳатидан муайян «уя»ни ташкил қилади, «уя»даги М.лар матнда аксар ҳолларда бирга қўлланади ёки назарда тутилади (мас., «куш» М.и ҳамиша «парвоз»ни назарда тутган ҳолда англана-ди). Тилдаги сўзлар каби М.лар маъно жиҳатидан кенгайиб ё торайиши, баъзан эса тамомила ўзгариб бориши мумкин. Мас., мумтоз шеъриятда «ёр» – Ҳақ, «ошиб» – Ҳақ йўлидаги сўфий, «висол» – Ҳаққа етиш маъноларини берган бўлса, Чүлпон шеъриятида улар ижтимоий мазмун касб этади: «ёр» – эрк, истиқлол, «ошиб» – эрк ва истиқлол йўлидаги курашчи, «висол» – мақсадга эришиш.

МОТИВИРОВКА (фр. motiver – асослаш, далиллаш) – адабий асарда тасвирланаётган воқеа-ҳодисалар, персонажларнинг хатти-харакатлари, ҳис-туйғу ва гап-сўзларини бадиий асослаш. Адабиёт тараққиётининг илк босқичларида М.нинг зарурати бўлмаган, унда муайян ҳодисалар, қаҳрамонлар тақдиридаги бурилишлар, конкрет хаётий ҳолат ва ш.к.лар ҳлоҳий, гайритабиий кучлар аралашуви билан изоҳланган. Реалистик тенденциялар кучайиб борган сари, адабиётда М.нинг аҳамияти ҳам ортиб борган. Дунёни бадиий идрок этиш ва тушуниришга интилган реалистик адабиётда М. ҳал қилувчи аҳамият касб этади: реалистик асардаги ҳар бир воқеа, персонажлар хатти-харакати, ҳис-туйғу ёки гап-сўзлари бадиий асосланади, яъни ўзининг ижтимоий-тариҳий, маънавий-психологик ва ш.к. омиллари-га эга бўлади ва шу боис уларни мантиқан изоҳлаш мумкин. Мас., Чўлпон «Қор қўйнида лола» ҳикоясида Самандар аканинг Эшон совчиларига «Бир қизимиз бўлса, ҳазрат эшонимизга тутдик...» дея жавоб беришини пухта далиллашга интилади. Бунинг учун аввал муаллиф характеристикасида «от чиқарғон савдогар» Самандар аканинг сингани ва эшонга қўл бериб «сўфи бўлиб қолғон»и, яъни персонаж ҳаётидаги бурилиш, омадсизлик унга кучли руҳий таъсир қилгани айтилади. Кейин «эшонникида катта ва қизгин зикр бўлган»и, назр-ниёз бериш маросимида Самандар ака ўзи тушиб қолган аҳволдан нечоғлик эзилгани, шу асно сўфининг «Ҳа, бой ака, назрдан дарак борми?» дея тагдор мазахлашидан оғринган нафс

тўлғонишлари, аламли ўйлари тасвирланади. Нихоят, ўйига ҳайтиб, эшондан совчилар келганини эшитади ва «Бир қизимиз бўлса, ҳазрат эшонимизға тутдик...» деган қарорини беради. Мазкур қарор қатор омиллар асосида етилган, ёзувчи уларни очиб беради, яъни сабаб-натижа алоқалари асосида бадий асосслайди ва шу туфайли ўқувчи персонаж айни шароитда худди шундай қарорга келишига ишонади. Бундан кўринадики, М. асар бутунлигида амалга ошади, буни ҳис қилиш учун эса асардаги ҳеч бир унсурни эътибордан четда қолдирмаслик талаб этилади. Зоро, реалистик асарда қатор композицион унсурлар, усул ва воситалар (деталлар, муаллиф характеристикаси, персонажнинг олдинги тарихи, ретроспекция ва ш.к.) ўзининг бевосита функцияси билан бир қаторда бадий далиллашга ҳам хизмат қиласкеради. Кейинги давр адабиётида, хусусан, модернистик йўналишдаги асарларда М. ўзининг мавқенини йўқотган. Уларда ғайриоддий (қ. сюрреализм), сабаб-натижа тарзида ички алоқага эга бўлмаган воқеа ва ҳолатлар (мас., абсурд адабиёти), персонажларнинг доим ҳам мантиқан изохлаб бўлмайдиган кутилмаган хатти-харакатлари, табиий кечётган тизгинсиз ўй-хислари (қ. онг оқими)ни тасвирлаш одатий ҳол ҳисобланади.

МУАЛЛИФ (ар. مؤلف – тузувчи, тартиб берувчи) – адабий асарни яратган одам, автор терминига синоним сифатида ишлатилади. Замонавий адабиётшуносликда биографик М. билан бадий матнда намоён бўлувчи М. (қ. муаллиф образи) фарқланади. Биографик М. – реал ҳаётда мавжуд бўлган, муайян асарнинг яратувчиси, унга нисбатан муаллифлик хуқуқига эга бўла оладиган шахс. Ҳозирги вақтда биографик М. фаолияти билан боғлиқ равишда муаллифлик хуқуқи, муаллифлик шартномаси, муаллиф кўлёзмаси, муаллифлаштирилган матн, муаллиф таржимаси каби қатор тушунчалар амалиётда фаол ишлатилади. Ҳолбуки, М. тушунчаси сўз санъатининг илк босқичларида – халқ оғзаки ижодида бўлмаган; адабиёт тараққиёти давомида, бадий тафаккур ривожида алоҳида ижодкор шахс роли, унинг ижодий тажрибалари нечоғлик мухим эканлиги англаниб бориши баробарида, М. тушунчаси ҳам қарор топиб, тобора катта аҳамият касб этиб борган.

МУАЛЛИФ НУТҚИ – адабий асардаги бевосита муаллиф тилидан берилган баён, тавсиф, изоҳ ва ш.к. ўринлар. Гарчи биз «бадий асар тили» десак-да, аслида, гап «бадий нутқ» ҳақида боради, чунки адабий асар тил унсурлари воситасида яратилган текст, яъни нутқ ҳодисасидир. Бадий нутқ услубий жиҳатдан фарқланувчи ком-

понентларнинг бирикувидан ҳосил бўлади: унда М.н. билан персонажлар нутқи ажратилади. Мазкур фарқланиш, асосан, эпик ва лиро-эпик характердаги асарларга ҳос бўлиб, уларда воқеа, воқеа кечайтган жой ёки шароит тасвири, персонажларга берилаётган таъриф, муаллиф фикр-мулоҳазалари ва ш.к.лар бевосита муаллиф тилидан берилади. Муаллиф образи асарда тасвирланган ва тасаввуримизда жонланувчи бадий воқеликни яхлитлаштирувчи субъектив асос бўлганидек, М.н. асарнинг моддий тарафини (тил унсурлари воситасида яратилган матнни) яхлитлаштирувчи унсурдир. М.н. грамматик жиҳатдан адабий тил нормаларига яқинлашади, бироқ унинг адабий тил нормаларига тўла мувофиқ келишини талаб қилиш хато бўлур эди. Зоро, ёзувчи ўзининг ҳис-кечинмаларини, ўй-фикрларини имкон қадар ёрқин ифодалашга интиларкан, баъзан адабий тил нормаларидан чекинади, бу билан миллий тил имкониятларини кенгайтиришга ҳисса кўшади, чунки айни шу чекинишларнинг вақти қелиб адабий тил нормасига айланиши эҳтимолдан йироқ эмас.

МУАЛЛИФ ОБРАЗИ – бадий асар матнида англашилиб турувчи муаллиф шахси. Муаллиф шахси асар бадий воқелигига сингиб кетади, чунки бадий воқелик ижодкор томонидан кўрилган ва идеал асосида ижодий қайта яратилган воқеликдир. М.о.нинг намоён бўлиши конкрет асарнинг турга мансублиги, жанр хусусиятлари билан боғлиқ. Мас., драматик асарда М.о. йўқдек, лекин унда тасвирланаётган воқеани танлаган, уни у ёки бу тарзда тасвирланган муаллифнинг қараши, нуқтаи назари, бадий концепцияси барабир англашилиб тураверади. Лирик асарларда эса ҳис-туйғулар кўпроқ «мен» тилидан ифода этилгани учун лирик субъектни шоир деб билишга мойилмиз. Ҳолбуки, гарчи кечинмалар «мен» тилидан берилаётган бўлса ҳам, лирик субъект ҳамма вақт шоирнинг ўзи бўлмайди. Ёки ижровий лирика намуналарида шоир ролини ижро этаётган шахсга эврилади, унинг тилидан «мен» шаклида гапиради (мас., А.Орипов. «Ҳамза»). Шунга ўхшаш, ривоя «мен» тилидан олиб борилган эпик асарлардаги ровий-муаллиф ҳам биографик муаллифга тенг эмас. Бошқача айтсак, асардаги М.о.га биографик муаллифнинг кўп жиҳатлари сингани ҳолда, улар орасида маълум даражадаги прототип – бадий образ муносабати мавжуд. Зоро, бадий асарда биографик муаллиф идеал оламида яшаган ижод онларидаги бетақрор маънавий-рухий ҳолат, унинг шу вақт мобайнида тасаввурдаги ўкувчиси билан мулоқоти акс этгандир. Шунга

кўра, реал муаллиф биографияси асарни тушуниш учун тўғридан тўғри «калит» эмас, балки ўша бетакрор маънавий-руҳий ҳолатни ҳис этишимиз учун асосдир. Иккинчи томондан, М.о. асардаги бадиий воқеаликни яхлителлаштирувчи композицион асос сифатида ҳам муҳим: ўқувчи бадиий воқеаликни муаллиф орқали «кўради», «эшилади», «ҳис қилади». Ниҳоят, М.о. бадиий концепция нуқтаи назаридан ҳам муҳим: муаллифнинг тасвир предметига ғоявий-хиссий муносабати асарнинг ўқувчи томонидан муайян йўналишда тушунилишини бошқаради. Булар бари М.о. адабиётшуносликдаги муҳим илмий категориялардан бири эканини кўрсатади. Шунга қарамай, XX аср ўрталаридан бошлаб Farb адабиётшунослигига «муаллиф ўлими» концепцияси пайдо бўлди. Унга кўра, бадиий ижодда субъективлик излари йўқолади ва субъектдан мосуво бўлган матнгина қолади. Мазкур концепцияга кўшилиш шу жиҳатдан қийинки, адабий асар – нутқ ҳодисаси, нутқ эса субъектдан мосуво бўлолмайди.

МУАЛЛИФ ЧЕКИНИШЛАРИ, АВТОР ЧЕКИНИШЛАРИ – эпик асарларнинг матний унсурларидан бири, сюжет воқеалари баёни (ривоя)ни тўхтатиб, муаллифнинг ўқувчига бевосита мурожаат қилиши ёки фалсафий, публицистик, лирик, адабий-танқидий ва ш.к. масалаларда мушоҳадага берилиши. Анъанавий тарзда кўлланувчи лирик чекиниш (к.) термини мазкур тушунчанинг бир қисменигина қамраб олади. Яъни лирик чекинишлар ҳам моҳиятан М.ч.нинг бир кўринишидир. Mac., «Ўткан кунлар»да муаллифнинг «Мен – ёзгувчи...» дея роман воқеаларини бобосидан кўл бор эшитгани ва кундош можароларини зерикарли бўлгани сабаб ташлаб кетмоқчилигини айтиши, «Наво куйи» бобида романда тасвирланган тарихий давр («Халқимиз таъбирича, бу замонлар мусулмонобод бўлса-да, бироқ бу тантаналик таъбирни бузиб қўятурған ишлар ҳам йўқ эмас эди») ҳақидаги мулоҳазалар; «Мехробдан чаён»да Раънога таъриф бериш асноси исм билан жисм мувофиқлигига тўхталиб, ўз ёшлигидан бир (Лола исмли қиз билан боғлиқ) воқеванинг мухтасар ҳикоя қилиниши – буларнинг бари М.ч.дир. М.ч.нинг бадиий-эстетик функциялари турлича бўлиши мумкин. Жумладан, М.ч.нинг бир тури бўлмиш лирик чекинишларнинг бирламчи функцияси тасвир предметига муносабатни ифодалаш, шунинг учун уларда ҳиссий бўёқдорлик, эмоционаллик қучли бўлиб, бу нарса нутқ қурилишида ҳам ўз аксини топади.

МУАШШАР (ар. معاشر – ўнлик) – мусаммат турларидан бири, ўн мисрали бандлардан таркиб топувчи шеър шакли; ўн мисрали

банд. Мусамматнинг бошқа турларидаги каби М. шеър шаклида ҳам дастлабки банд мисраларининг ўзаро (а-а-а-а-а-а-а-а-а) қофияланиши, кейинги бандларда аввалги тўқиз мисранинг ўзаро, охирги мисранинг эса биринчи банд билан (б-б-б-б-б-б-б-а, в-в-в-в-в-в-в-в-а ва ҳок.) қофияланиши кўзда тутилади. Шунингдек, М.да ҳам бир ёки икки мисра таржеъ сифатида такрорланиши мумкини, бунда қофияланиш тартиби шунга мос бўлади. Худди мутасса (қ.) каби М. ҳам мумтоз шеъриятимизда кам қўлланган шеър шакларидан саналади.

МУАММО (ар. معمو – кўр қилинган, кўрмайдиган) – мумтоз шеъриятдаги топишмоқ жанрлардан бири, кўпроқ фард, яъни бир байтдан (2 – 3 байтлилири кам учрайди) ташкил топувчи шеърий асар. М.да бирор исм (ёки жой номи) яширинган бўлиб, уни топиш учун байтдаги бирор сўз (ёки бирикма) устида ишора қилинган амалларни бажариш лозим бўлади. Ушбу амаллар сўзнинг араб ёзувидағи шакли билан боғлик, гоҳ сўзни чапла ўқиш, гоҳ бирон-бир ҳарфни тушириб қолдириш ёки қўшиш, гоҳ ҳарфлар ўрнини алмаштириш каби кўринишларда бўлади. Худди шу нарса М.ни нарса-ҳодисага хос белгиларни васф этиш билангина жумбоқ ҳосил қилувчи луғз (қ.)дан фарқлаб турадиган ўзига хос хусусиятдир. Шунингдек, айрим манбаларда М.да бирор исмнинг яширилиши ҳам шундай хусусият сифатида кўрсатилади. Mac., Навоийнинг қуйидаги муаммосини олайлик:

*Чок бағрим тарфин айладинг икки парканд,
Бирини ташлабон охир, бирин эттинг пайванд.*

М. даги «бағир» сўзи араб ёзувида фақат ундошлар билан ифодаланади, яъни «бѓр» (بَغْر) тарзида ёзилади. «Бағир»ни «икки парканд» қилиб (парчалаб), улардан бирини охирига ташлаб пайвандлаш кераклигига ишора қилинмоқда. Шу шарт бажарилиб, «б» охирига олиб пайвандланса, «ғрб» (غَرْب) сўзи келиб чиқади. Демак, М.да «Ғариб» исми яширилган экан.

МУБОЛАГА (ар. مبالغة – ошириш, орттириш) – мумтоз адабиётдаги шеърий санъат, нарса-ҳодисалар, инсонлар ва бошқа мавжудотларга хос хусусиятларни табиий ҳолига нисбатан бўрттириб, катталаштириб ёки кичрайтириб тасвирлаш. М. ҳалқ оғзаки ижодида ҳам, ёзма адабиётда ҳам жуда кенг қўлланган санъатлардан саналади. Илми бадиъга оид манбаларда М.га берилган таърифларда

тафовутлар деярли бўлмаса-да, унинг турларга бўлинишида айрим фарқлар сезилади. Шунга қарамай, уларни умумлаштириб М.нинг куйидаги кўринишларини фарқлаш мумкин:

1. Тасвир объектини ўта кичрайтириши ёки ўта катталаштириши жиҳатидан М.нинг *тафрит* ва *ифромт* деб юритилувчи турлари ажратилади. *Тафрит* тасвир объектини ўта кичрайтириш, кучсизлантириш демакдир. Мас., Атойининг:

*Юуруда енг била оғзингни туттма,
Нимаким, йўқтурур ёширмоғинг не? –*

байтида енги билан оғзини беркитган ёрга «Ўзи асли йўқ бўлган нарсани беркитиб нима қиласан?» дея мурожаат қилинадики, бундан ёрнинг оғзи йўқ даражада кичик деган маъно келиб чиқади. Оғизнинг кичик бўлиши гўзаллик белгиларидан бири саналгани эътиборга олинса, шоир ёр гўзаллиги таърифида муболага қилаётгани аён бўлади.

Тафритга зид ўлароқ, *ифромт* тасвир объектини ўта катталаштириш, кучайтиришни кўзда тутади. Мас., Навоийнинг куйидаги байти ифромтнинг яхши намунаси бўла олади:

*Не тушки, ҳажр балосин кўрада сескансанам,
Үқилдамоқ бирла кўшинини уйғотур юрагим.*

Яъни тушида ёридан айрилиб, ҳижрон балосини ҳис қилган ошиқ сесканиб уйғонса, юраги шу қадар қаттиқ урар эканки, унинг «дук-дук»идан қўшнилар уйғониб кетаркан.

2. М.нинг даражаси, яъни М.ли тасвир (ҳолат, хусусият ва ш.к.) га ақлнинг ишониш ё ишонмаслиги, тасаввурга сифдириш мумкин ё мумкин эмаслиги, унинг воқеликда мавжуд бўлиш имкони бор ё йўқлигидан келиб чиқиб М.нинг *таблиғ*, *игроқ*, гулуве деб юритилувчи турлари фарқланади. Албатта, муайян бир М.ни мазкур турлардан бирига таалуқли этишда маълум даражада шартлилик бўлиши табиий, чунки ҳамманинг тасаввур имкониятлари, ҳаётий тажрибаси бир хил эмас. Демак, М.ни мазкур турлардан бирига киритганда буни назарда тутиш мақсадга мувофиқ бўлади..

Кишининг ақлан ишониши ва ҳаётда учраш эҳтимоли бўлган М.ли тасвир (ҳолат, хусусият ва ш.к.) *таблиғ* деб юритилади. Мас., Лутфийнинг машхур:

*Аёқингга тушар ҳар лаҳза гесу,
Масалдурким: «чароғ туби қаронғу», –*

матлаъсида ёр сочларининг узунлиги ҳақида бир қадар М. қилинаётгани шубҳасиз, бироқ бунга ақлан ишониш у қадар қийин эмас, зеро, ҳаётда сочи узун қизлар кўп. Яъни бу ўринда таблиғ мавжуд белги-хусусиятни бирмунча орттириб, бўрттириб ՚асвиirlашда намоён бўлмоқда.

Ақлан ишониш, тасаввур қилиш мумкин-у, ҳақиқатда мавжуд бўлмайдиган М.ли тасвириро деб аталади. Мас., Навоийнинг:

*Фироқ иситмаси андоқ танимдан ўт чиқарур
Ки, гар табиб илигим тутса, бормоги қабарур, –*

байтидаги ҳолатни тасаввур қилиш мумкин, лекин ҳақиқатда иситманинг бу даражада, яъни бемор қўлини тутган табибининг бармоғини куйдириб-қабартирадиган даражада бўлиши мумкин эмас.

Нихоят, ақлан ишониш ва тасаввур қилиш ҳам мушкул, ҳаётда мавжуд бўлиши ҳам истисно қилинадиган М.ли тасвири гулуве деб юритилади. Мас., Атойининг:

*Қилни икки ёрмиш-у, қилмиш азалда бир қалам,
Белингиз тасвирини қилганда наққошинг, бегим, –*

байтида айтилишича, ёрнинг бели шу қадар ингичкали, унинг тасвирини чизиш учун қиљдан қалам қилинса, белнинг сурати йўғон бўлиб қолади, шу боис наққош қилни иккига ёриб, сўнг қалам қилиши лозим, гўё шундагина ёр белининг тасвири аслига монанд бўлади.

МУВАШШАҲ (ар. موشح – зийнатланган, безалган) – қаранг: тавшиҳ

МУВОЗАНА (ар. موازن – вазндош) – мумтоз адабиётдаги шеърий санъат, байтнинг биринчи мисрасидаги барча сўзларнинг иккинчи мисрадаги ўз муқобилларига вазнда тенг бўлиши. Кўп ҳолларда М. санъати *тарсөъ* (қ.) билан қоришиқ ҳолда юзага келади, яъни битта байтнинг ўзи ҳам тарсөъга, ҳам М.га мисол бўлиши мумкин. Мас., Навоийнинг куйидаги фарди:

*Мурувват барча бермакдур өмак йўқ,
Футуевват барча қилмакдур дөмак йўқ.*

Бироқ М. бўлиши учун мисралардаги муқобил сўзларнинг вазнда тенг бўлиши талаб этилади, лекин уларнинг қофиядош бўлиши шарт эмас, яъни тарсеъда қофиядошлиқ бирламчи бўлса, М.да вазнда тенглик бирламчи шартдир. Mac., «Ҳайрат ул-аброр»дан олинган кўйидаги:

*Барча хиёнатни диёнат билиб,
Барча диёнатда хиёнат қилиб, –*

байт мисраларидағи муқобил сўзлар вазнда бир-бирига тенг, лекин хиёнатни-диёнатда жуфтлиги қофиядош эмас. Яъни бу ўринда М. санъати бор, лекин тарсеъ воқе бўлган эмас.

МУЖТАСС (ар. *مجتَّس* – илдизи билан юлинган) – аруз баҳрларидан бири, ҳафиғдан юлиб олинганга ўхшаганлиги учун шундай номланади. *Мустафъилун* (– – v –) ва *фоилотун* (– v – –) асплари нинг кетма-кет тақоридан ҳосил бўлади. Ўзбек шеъриятида фаол қўлланадиган баҳрлардан бири. Навоийнинг «Мезон ул-авзон» асарида М. баҳрининг тўқиз вазни, Бобурнинг «Мухтасар»ида эса йиғирма вазни мисоллар билан кўрсатиб берилган. Шеъриятимизда мазкур баҳрнинг, асосан, бешта вазnidан фойдаланилган. Атойи, Саккокий, Гадоий, Лутфий, Мунис, Оғаҳий, Нодира каби мумтоз шоирлар ижодида М. баҳрининг бир неча вазнида ёзилган шеърлар учрайди. Навоийнинг «Хазойин ул-маоний» куллиётидаги эса 348 та шеър (11 фоиз) М. баҳрида яратилган. М. нинг ўзига хос жиҳатларидан бири унинг кўп вазнлари аралаш қўлланиши мумкин. Бу эса шеърга ўзига хос ўйноқи оҳанг баҳш этади. Навоийнинг кўйидаги байти *мужтасси мусаммани маҳбуни маҳсур* (v – v – / – v – – / v – v – / – v ~) вазнида ёзилган:

*Кўнгул ҳароратин англатти оҳи дардолуд,
Үй ичра ўт эканин элга зоҳир айлар дуд.*

Нодиранинг машҳур:

*Нигори гулбаданимни тушимда кўрсам эдим,
Лаби ширин шиканимни тушимда кўрсам эдим, –*

матлаъли ғазали эса *мужтасси мусаммани маҳбуни маҳзуф* (v – v – / v v – – / v – v – / v v –) вазnidадир.

МУЗОРИЙ (ар. مُزاري – ўхшовчи) – аруз баҳрларидан бири, ҳазаж баҳрига ўхшагани учун шундай номланган. Мафоийлун (v---) ва фоилотун (– v –) аслларининг кетма-кет тақороридан ҳосил бўлади. М. шеъриятимизда анча кенг қўлланадиган баҳрлардан саналади. Навоийнинг «Мезон ул-авzon» асарида М.нинг ўн икки вазни, Бобурнинг «Мухтасар»ида йигирма тўрт вазни мисоллар билан кўрсатиб берилган. «Қисаси Рабгузий»дан бошлаб Атойи, Саккокий, Гадоий, Лутфий каби мумтоз шоирлар ижодида ҳам М. баҳрининг бир неча вазнларидан фойдаланилган. Хусусан, Навоийнинг «Ҳазойин ул-маоний» девонидаги 105 та тури жанрдаги шеърлар мана шу баҳрда яратилган. Mac., Навоий:

*Ишқу жунун эрурлар беихтиёр манда,
Мендумрану бу икки, ўзга не бор манда, –*

байтини музориъи мусаммани ахраб (– v / – v – / – – v / – v – –) вазнига мисол сифатида келтирган.

МУКАРРАР (ар. مکرر – тақорорланган) – мумтоз адабиётдаги шеърий санъат, байт мисраларида жуфт ёки тақорорий сўзларни қўллаш. Илми бадиъга оид манбаларда М.га берилган таърифлар бироз фарқланади: айримларида битта жуфт ёки тақорорий сўзнинг икки ёки ундан ортиқ ўринда қўлланиши М. дейилса, бошқаларида байт таркибида ҳар қандай жуфт ёки тақорорий сўз қўллаш М. саналади. Шу жиҳатдан, Навоийнинг:

*Гарчи келмай-келмай ўлтурдинг Навоийни, валек,
Эй Masix, аниң мазори бошига гоҳ-гоҳ кел, –*

байтида «келмай-келмай» ва «гоҳ-гоҳ» сўзларининг қўллангани М. санъатини юзага келтирган.

МУЛАММАЪ (ар. ملعم – ярқироқ, ранг-баранг) – мумтоз адабиётдаги шеърий санъат, бир байтни икки ёки ундан ортиқ тилда ёзиш. Мумтоз шоирлар, асосан, араб ва форс, араб ва туркий (ўзбек), форс ва туркий (ўзбек), араб ва озарбайжон, кейинчалик ўзбек ва рус, тожик ва рус тилларида М. битганлар. М.нинг икки тилдан фойдаланилган тури *ширу-шакар*, уч тилдан фойдаланилган тури *шаҳду-ширу-шакар* деб аталади. Mac., Машрабнинг:

*Мендин саломе ба сүйи жонон,
Эй бод, еткүр арзи ғарибон*

ёки

*Аз дардми ту намонда сабрам,
Эмди кетарман тахти Сулаймон, –*

байтлари ўзбек ва форс тилларида ёзилган бўлиб, улар ширу-шакар усулига мисол бўла олади. Фузулийнинг:

*Қад анорал-ишқа лип ушишоқи минҳожал худо
Солики роҳи ҳақиқат ишқа айлар иқтидо, –*

байти эса шаҳду-ширу-шакарга мисол бўлиб, у араб, форс ва туркий тилларда ёзилган.

МУНАҚҚИД (ар. مُنْدَى – сараловчи, муҳокама қиливчи) – адабий танқид билан шуғулланувчи шахс; танқидчи сўзига синоним тарзida қўлланади. Кенг маънода М. деганда адабий танқид билан профессионал тарзда шуғулланувчи шахснигина эмас, балки бирон асарни муҳокама қилаётган, у ҳақда фикр билдираётган ҳар қандай одамни ҳам тушуниш мумкин.

МУНСАРИХ (ар. مُنسِرٌ – эркин) – аруз баҳрларидан бири, аруз ва зарбида эркинлик бўлгани учун шундай аталган. *Мустафъилун* (– – v –) ва *мағъюлоту* (– – – v) аслларининг кетма-кет такороридан ҳосил бўлади. Ўзбек шеъриятида анча фаол қўлланади. Навоийнинг «Мезон ул-авзон» асарида М. баҳрининг ўн бир вазни, Бобурнинг «Мұхтасар»ида эса ўттиз тўрт вазни мисоллар билан кўрсатиб берилган. Шеъриятимизда М. баҳрининг, асосан, учта вазнидан фойдаланилади. Навоийга қадар М. баҳридан фойдаланилмаган. Унинг «Ҳазойин ул-маоний» девонига киритилган 12 та шеъри ўзбек шеъриятидаги М. баҳрида яратилган дастлабки асарлар саналади. Жумладан, Навоийнинг:

*Эй оразинг кўнглум коми, лаъли лабинг жон ороми,
Васлинг кунин еткургилки, жоним олур ҳажринг шоми, –*

байти мунсариҳи мусаммани солим (– – v – / – – – v / – – v – / – – – v) вазнида ёзилган.

МУРАББАЬ (ар. مربع – түртлик) – 1) мусаммат турларидан бири, түрт мисрали бандлардан таркиб топувчи шеър шакли; түрт мисрали банд. М. шеър шаклида дастлабки банд мисралари ўзаро қофияланади (а-а-а-а), кейинги бандларнинг дастлабки уч мисраси ўзаро, түртинчи мисраси эса биринчи банд билан қофияланади (б-б-б-а; в-в-в-а ва х.). Шунингдек, шеъриятимизда М.нинг сал ўзгачароқ (а-б-а-б, в-в-в-б, г-г-г-б ва х.) қофияланувчи шакллари (мас., Машраб ижодида), биринчи банднинг охирги мисраси кейинги бандлар охирида таржеъ сифатида айнан такрорланиб келувчи шакллари (мас., Муқимий ижодида) ҳам кўп учрайди; таржеъли М. кўпинча б-б-б-а, в-в-в-а, г-г-г-а тарзида қофияланади. Фазалдаги каби М. охирги бандида тахаллус келтириш өдат бўлган. М. шакли туркий халқлар оғзаки ижодидаги асосий шеър шакли бўлган; Маҳмуд Кошгариининг «Девону луғотит турк» асарида келтирилган халқ қўшикларининг аксарияти М. шаклида экани шундай дейишга асос беради. А.Яссавий кенг оммага мўлжалланган ҳикматлари учун М. шаклини танлагани ҳам шундан, яъни халққа яқинлигидандир. Шунга қарамай, адабиётимизда М. шеър шаклининг фаоллашуви, асосан, XVII аср охирларидан кузатилади: Машраб, Сўфи Оллоёр, Оғаҳий, Ҳувайдо; Ҳазиний, Муқимий каби шоирлар ижодида М.нинг кўплаб гўзал намуналари учрайди; 2) арузда рукннинг байтда тўрт марта такрорланишини билдирувчи ўлчов, М. вазн. Мас., агар мағоийлун руқни байтда ўзгаришсиз тўрт марта такрорланса, ҳазажи мураббаи солим деб аталади.

МУСАББАЬ (ар. مسبع – еттилик) – мусаммат турларидан бири, етти мисрали бандлардан таркиб топувчи шеър шакли; етти мисрали банд. М. шеър шаклида дастлабки банд мисралари ўзаро қофияланади (а-а-а-а-а-а), кейинги бандларнинг дастлабки олти мисраси ўзаро, еттинчи мисраси эса биринчи банд билан қофияланади (б-б-б-б-б-а, в-в-в-в-в-в-а ва х.). Шеъриятимизда М.нинг қофияланиш тартибига кўра бирмунча ўзгачароқ кўринишлари ҳам учрайдики, бунда дастлабки банд мисралари ўзаро (а-а-а-а-а-а) қофияланса, кейинги бандларнинг беш мисраси ўзаро, охирги икки мисраси эса биринчи бандга қофиядош бўлади (б-б-б-б-а-а, в-в-в-в-в-а-а). М.нинг бу хилида баъзан сўнгги икки мисра таржеъ сифатида такрорланиши ҳам кузатилади.

МУСАДДАС (ар. مسدس – олтилик) – 1) мусаммат турларидан бири, олти мисрали бандлардан таркиб топувчи шеър шакли; олти мисрали банд. М. шеър шаклида дастлабки банд мисралари ўза-

ро қофияланади (а-а-а-а-а-а), кейинги бандларининг аввалги беш мисраси ўзаро, охирги мисраси эса биринчи банд билан (б-б-б-б-б-а, в-в-в-в-в-а ва х.) қофияланади. Шеъриятимида М.нинг биринчи бандидаги охирги икки мисра кейинги бандлар сўнгига таржеъ сифатида такрорланувчи хили ҳам учрайди, унинг қофиялананиши а-а-а-а-а-а, б-б-б-б-а-а, в-в-в-в-а-а кўринишида бўлади (мас., Фурқат. «Сайдинг қўябер сайёд»). Ўзбек мумтоз адабиётида М. ёзиш, асосан, Навоий ижодидан бошланган, кейинчалик Машраб, Огаҳий, Нодира, Увайсий, Фурқат, Ҳазиний каби шоирлар ҳам жанр тараққиётига улкан ҳисса қўшганлар. Шунингдек, худди мухаммас каби М. мустақил ёки ўзга шоир ғазали асосида ёзилиши мумкин. М.нинг кейинги хили охирги бандида ғазал муаллифи ва М. боғлаган шоир тахаллуслари келтирилади. Мас., Навоийнинг Ҳусайний ғазали асосида ёзилган М.нинг охирги банди куйидагича:

Чун Навоий жонини май орзуси куйдурур,
Йўқ гадолиққа ажаб майхоналарда гар юрур,
Журъаи дайр аҳли бергунча замоне телмурур,
Шоҳ агар мундок ғадони салтанатқа еткуур,
Эй Ҳусайний, салтанатдин онча фахрим ўйқтуур
Ким, дегайлар кўйининг хайли гадосидиган мени;

2) арузда рукннинг байтда олти марта такрорланишини билдирувчи ўлчов, М. вазн. Мас., агар фоилотун рукни байтда ўзгаришсиз олти марта такрорланса, рамали мусаддаси солим деб аталади.

МУСАЖОАҲ (ар. مساجع – сажъли, қофияли) – мумтоз адабиётдаги қофия билан боғлиқ шеърий санъат. М. санъати асосида ёзилган байтлар бир-бири билан ҳажман тенг бўлган тўрт бўлакка бўлинниб, биринчи, иккинчи ва учинчи бўлаклар ўзаро қофиядош, тўртинчи бўлак эса асосий қофия билан оҳангдош бўлади. М. санъати байтга ўзига хос оҳанг, мусиқийлик баҳш этади. Навоий, Бобур, Машраб, Фурқат каби мумтоз шоирлар ижодида, шунингдек, Эркин Воҳидов шеъриятида М. санъатининг кўплаб гўзал намуналари учрайди. Мас., Бобурнинг қўйидаги байти М.га яхши намуна бўла олади:

Даврон ғамин барбод қил, ишрат уйин обод қил,
Жону кўнгулни шод қил овозу чангу най била.

Агар мазкур байтнинг ҳар бир бўлаги бир мисра кўринишига келтирилса, М. санъатини яхшироқ тасаввур қилиш мумкин бўлади:

*Даврон гамин барбод қил,
ишрат уйин обод қил,
Жону кўнгулни шод қил
овозу чангу най била.*

МУСАЛЛАС (ар. مُسَلَّم – учник) – мусаммат турларидан бири, уч мисрали бандлардан таркиб топувчи шеър шакли; уч мисрали банд. М. шеър шаклида дастлабки банд мисралари ўзаро қофияланади (а-а-а), кейинги бандларнинг дастлабки икки мисраси ўзаро, учинчи мисраси эса биринчи банд билан қофияланади. Худди шу шакл М.нинг каноник шакли саналади. Адабиётимизда М. шеър шаклининг ҳар бир бандидаги мисралари ўзаро (а-а-а, б-б-б, в-в-в...), ҳар бир банди ўрама (а-б-а, в-г-в, д-е-д...) тарзида мустақил қофияланувчи, шунингдек, бандлараро кесишган (а-б-а, б-в-б, в-г-в...) қофияланиш тартибидаги кўринишлари ҳам учрайди. А.Хусайний М.ни «устодлар шеърида камина назарига тушмаган» шеър шакллари қаторида санайди. Дарҳақиат, М. шаклидан Атойи, Лутфий, Навоий, Бобур каби шоирларимиз фойдаланган эмаслар, М.нинг оммалашуви адабиётимизнинг кейинги даврларига тўғри келиб, унинг яхши на-муналари Увайсий, Ҳамза (Ниҳоний) каби шоирлар ижодида учрайди. Шунингдек, учник шеър шакли Ойбек, Мирмуҳсин, А.Мухтор, Шуҳрат, F.Фулом, Р.Парфи, О.Матжон, О.Ҳожиева, А.Обиджон каби шоирларнинг бармоқда ёзилган шеърларида ҳам кўлланган.

МУСОВОТ (ар. مُسَوَّت – тенглаштириш, тенглик) – қаранг: иижоз

МУСТАЗОД (ар. مُسْتَزَد – орттирилган) – мумтоз адабиётдаги лирик жанр, ҳар бир мисрасидан кейин унинг иккита (биринчи ва охирги) рукнига тенг ярим мисра орттирилувчи шеър. М.нинг асосий мисралари ғазал типидаги мустақил қофияланишни ҳосил қилса, ярим мисралари ҳам мустақил ҳолда шундай қофияланишга эга бўлади (А-а-А-а, Б-б-А-а, В-в-А-а, Г-г-А-а...). Ҳофиз Хоразмий шеъриятимизда М. жанридаги илк шеърлар муаллифи сифатида эътироф этилса, кейинчалик Навоий, Машраб, Оғаҳий, Аваз, Комил, Анбар Отин каби шоирлар ҳам М. жанрида самарали ижод қилганлар. А.Навоий «Мезон ул-авzon»да халқ орасида қўшиқ оҳангига мос «бир суруд» борлиги ва унинг М. деб аталишини айтади. Дарҳақиат, М.нинг ўзига хос ритмик-интонацион қурилиши ўйноқи оҳангни юзага келтиради-

ки, у қўшиқ оҳангига мос ва куйлаш учун жуда қулайдир. М.ларнинг аксарияти қўшиқ қилиб куйлангани ҳам шундан. Ҳусусан, ўз шеърларини танбур ва сетор жўрлигидага ижро этиб юрган Машраб ижодида М.ларнинг салмоқли ўрин тутиши ҳам шу билан изоҳланиши мумкин. Машрабнинг М.лари, мас.:

Раҳм айла манга эмди, аё руҳи равоним, –

Жон чиққали өтти,

Турди бу замон ишқ ўтида куйгани жоним, –

Боқсанг манга нётти? –

байти каби ўз мусиқаси билан жаранг топади, қўшиқдек эшигилади. Айрим ҳолларда М.нинг асосий мисрасидан сўнг битта эмас, иккита ярим мисра ортирилиши ҳам мумкинки, бу ҳолда М.даги мисралар газал типидаги учта мустақил қофияланиш тартибини ҳосил қиласди. Mac.:

Эй ёр, санга ушбу жаҳон боғи аро гул

бир ошиқи ҳайрон,
дийдоринга шайдо,

Бир шейфтадур кокули мушкинига сунбул,

ҳам ҳоли паришон,
ҳам бошида савдо.

МУТАДОРИК (ар. مدارك – орқадан келиб қўшилувчи) – аруз баҳрларидан бири, фоилун асли (– v –) такроридан ҳосил бўлади. М. баҳрининг номланиши Ҳалил ибн Аҳмад келтирган 15 та баҳр қаторига Абул Ҳасан Ахфаш томонидан қўшилгани билан изоҳланадики, унинг айрим манбаларда баҳри муҳдас (янги топилган) ёки ғарив (четдан келган) деб юритилиши ҳам шунга далолат қиласди. Манбаларда М. баҳри вазнларини ўзбек шеъриятига илк бор олиб кирган шоир сифатида Алишер Навоий эътироф этилади. Унинг «Мезон ул-авзон» асарида М.нинг 7 вазни, Бобурнинг «Мухтасар»ида эса 26 вазни мисоллар билан кўрсатиб берилган. М. ўзбек шеъриятида кам қўлланган баҳрлардан саналади. Mac., Навоийнинг «Мезон ул-авзон»ида:

Фурқатингда мани сўрмадинг,
Раҳм кўзи билан кўрмадинг, –

байти мутадорики мусаддаси солим ($-v - / -v - / -v -$) вазнига мисол сифатида көлтирилган.

МУТАССАЛЬ (ар. متسع – түккизлик) – мусаммат турларидан бири, түккиз мисрали бандлардан таркиб топувчи шеър шакли; түккиз мисрали банд. Мусамматнинг бошқа турларидағи каби М. шеър шаклида ҳам дастреки банд мисраларининг ўзаро (а-а-а-а-а-а-а-а) қофияланиши, кейинги бандларда авалги саккиз мисранинг ўзаро, охирги мисранинг эса биринчи банд билан (б-б-б-б-б-б-а, в-в-в-в-в-в-в-а ва х.) қофияланиши кўзда тутилади. Шунингдек, М.да ҳам бир ёки икки мисранинг таржевъ сифатида тақорланиши мумкинки, бунда қофияланиш тартиби шунга мос бўлади. М. шеъриятда кам қўлланувчи шеър шакли саналади. Шу боис ўз вақтида А.Хусайнин мусамматнинг бу хилига таъриф бермайди ва бунинг сабабини «устодлар шеърида камина назарига тушмади» деб изоҳлаш билан чекланади.

МУТАҚОРИБ (ар. متقارب – бир-бирига яқин) – аруз баҳрларидан бири, фаулун асли ($v - -$) тақоридан ҳосил бўлади. М. деб номланиши баҳр чизмасида ($v - - / v - - / v - - / v - -$) ватадларнинг бир-бирига яқин туриши билан боғлиқ ҳолда изоҳланади. Чизмага эътибор берилса, унда ватад ($v -$)лар биргина сабаб ($-$)дан сўнг тақорланиб келаётганини кўриш мумкин. М. баҳри мумтоз ўзбек шеъриятида, хусусан, ғазалчиликда анча фаол қўлланган: А.Навоийнинг «Мезон ул-авzon»ида М.нинг ўн бир, Бобурнинг «Мухтасар»ида қирқдан зиёд вазн кўринишлари саналади, уларнинг ҳар бирига мисол сифатида байтлар көлтирилади. Юсуф Хос Ҳожибининг «Қутадгу билиг», Навоийнинг «Садди Искандарий» достонлари ҳам шу баҳрда ёзилган. Mac.; Лутфийнинг:

Кўкарди чаман, гулузорим қани?

Сиҳи сарв бўйлуқ нигорим қани? –

матлаъли ғазали ҳам мутақориби мусаммани солим ($v - - / v - - / v - - / v - -$) вазнида ёзилган.

МУТЛАҚ ҚОФИЯ (ар. متلقى – шартсиз, бирор нарса билан чекланмаган, قافىق – сўзнинг сўзга мос бўлиши) – илми қофияда қофиянинг тузилишига кўра фарқланувчи бир тури, равийдан кейинги унсурлар (хуруж, нафоз, нойира, мажро, мазид) ҳам иштирок этувчи, яъни равийдаёқ тўхтаб қолмайдиган қофия. Mac., Нодиранинг:

*Нигори гулбаданимни тушимда кўрсам эдим,
Лаби ширин шиканимни тушимда кўрсам эдим, –*

байтида М.қ. (баданимни – шиканимни) қўлланган бўлиб, унда равий – бадан ва шикан сўзларидаги охирги «н» ундошидан кейин ҳам оҳангдош товушлар иштирок этган. М.қ.да равийдан кейин келувчи ундош ёки чўзиқ унли васл, васлдан кейинги ундош ёки чўзиқ унли ҳуруж, ҳуруждан кейинги ундош ёки чўзиқ унли мазид, мазиддан кейинги ундош ёки чўзиқ унли нойира дейилади. Равийдан кейинги қисқа унли мажро, ундан кейин келувчи барча қисқа унлилар эса нафоз деб юритилади. Келтирилган мисолдаги «баданимни-шиканнимни» жуфтлигига равийдан кейинги тартибда «и» – мажро, «м» – васл, «н» – ҳуруж, «и» – нафоздир. М.қ. саналиши учун равийдан сўнг шу унсурлардан бирининг бўлиши кифоядир.

МУХАММАС (ар. مُخَمَّس – бешлик) – мусаммат турларидан бири, беш мисрали бандлардан таркиб топувчи шеър шакли; беш мисрали банд. М. шеър шаклида дастлабки банд мисралари ўзаро қофияланади (а-а-а-а-а), кейинги бандларининг аввалги тўрт мисраси ўзаро, охирги мисраси эса биринчи банд билан (б-б-б-б-а, в-в-в-в-а ва х.) қофияланади. М. мумтоз адабиёттимизда кенг тарқалган жанрлардан бири бўлиб, у икки хил бўлади: 1) мустақил М.: мумтоз адабиётшуносликда «табъи худ мухаммас» деб юритилиб, унинг барча мисралари бир шоир қаламига мансубдир. М.нинг бу тури Ҳофиз Хоразмий, Навоий, Машраб, Оғаҳий каби шоирлар ижодида катта ўрин эгаллайди. Шеъриятимизда М.нинг биринчи банд охиридаги бир ёки икки мисра кейинги бандлар сўнгига таржеъ сифатида такрорланувчи хили ҳам учрайди. Бир мисра таржеъ қилинган М.ларда қофияланиш одатдагидек бўлса, икки мисра таржеъ қилинган М.ларда қофияланыш а-а-а-а-а, б-б-б-а-а, в-в-в-а-а... кўринишида бўлади. Мас., Машрабнинг «Эй сафобахши баҳорим, бўстоним, қайдасан?» мисраси билан бошланувчи М.ида ҳар бир банд охирида «Волидам, Маккам, Мадинам, меҳрибоним, қайдасан?» мисраси таржеъ қилинган; 2) ўзга шоир ғазалига боғланган М. тахмис деб юритилиб, у тахмисчи шоирнинг ўзга шоир ғазалидаги ҳар бир байтга ўзидан яна уч мисра қўшиш орқали яратилади. Бунда тахмис боғлаётган шоирнинг ўша ғазал мазмунига путур етказмаслиги, қўшилаётган мисраларнинг ғазал вазни, қофияси, радифи ва бошка жиҳатларига мос бўлиши талаб этилади. Шеъриятимизда тахмис М.нинг Навоий, Оғаҳий, Увайсий, Нодира каби қатор мумтоз

сўз санъаткорлари ҳамда Ҳабибий, Чустий, Э.Воҳидов, А.Орипов, О.Матжон, Ж.Камол каби янги давр шоирлари боғлаган гўзал намуналари мавжуд. Шунингдек, адабиётимиз тарихида шоирнинг ўзи ёзган ғазалга боғлаган тахмис М.лар, сийрак бўлса-да, учрайди (мас., Навоий ва Оғаҳий ижодида).

МУШОИРА, МУШОАРА (ар. **مشاعرہ** – шеър айтишиш) – 1) шоирлар анжумани, шеър мажлиси. Ўтмиш адабий жараёнида М.лар муҳим ўрин тутади, яна ҳам аниқроғи, ўтмишда адабий жараён кўпроқ М. шаклида кечган. М.ларда шоирлар ўз асарларини тақдим этиш, улар ҳақидаги ўзгалар фикрини билиш, шунингдек, бошқа шоирлар билан ижодий фикр алмашиш, ҳамкорлик қилиш имконига эга бўлганлар. Мумтоз адабиётимиздаги бир қатор жанрлар, айрим шеър санъатларининг юзага келиши бевосита М. билан боғланади: уларнинг бир қисми М. иштирокчиларининг бир-бирларига жавоб айтиши (тазмин, тахмис), бошқа бир қисми шеърий мусобақа (муаммо, чистон, бадиҳа) руҳи билан боғлиқ ҳолда вужудга келган. М.лар дастлаб санъат ва адабиётга меҳр қўйган подшо саройларида, ижод ахлига ҳомийлик қилган бадавлат кишилар хонадонларида ўтказилган. Ҳусусан, Ҳусайн Бойқаро саройи ва Навоий хонадонида ўтказиб турилган М.лар давр адабиёти тараққиётининг муҳим омилларидан бўлди. Шу фикр Кўқон адабий мұхитининг юксалишида Умархон, Хива адабий мұхити фаолиятида Мұҳаммад Раҳимхон Феруз саройларида ўтказилган М.ларга нисбатан ҳам бемалол айтилиши мумкин. Айни чоғда, М.ларни фақат подшолар ёки бадавлат ҳомийлар билангина боғлаш тўғри бўлмайди, чунки санъатга меҳри, табъи назми бор кишилар ҳамиша ижодий мулокотга талпинади, уларнинг ўзаро йигинлари мунтазам ўтказиб турилган, уларда нафақат шеърият, балки умуман санъат ҳусусидаги сұхбатлар бўлган, ўз шеърларидан ташқари бошқа шоирлар, салафлар ижодидан намуналар ўқилган, улар таҳлил қилинган, шарҳланган, муносабат билдирилган. Мумтоз адабиётимизнинг кейинги даврларида шу анъана устуворроқ бўлди: М.лар кўпроқ мадраса ҳужралари, шоирлар хонадонларида ўтказиб турилган. Мас., XIX аср охири – XX аср бошларида гоҳ «Қўкалдош», гоҳ «Бекларбеги» мадрасаларида Тавалло, Тошқин, Сидқий, Мискин, Хислат каби шоирлар иштирокида М.лар бўлиб турган. Жумладан, Сидқий «авзон, сажъ, қофия» каби тушунчаларни шундай давраларда ўрганганини эътироф этади. Ёки Кўқонда ўтказилган М.лар ҳақида Фурқат ёзади: «... аср шуаролариким, чунончи: мавлоно Мухий, мавлоно Муқими, мавлоно

Завқий, мавлоно Нисбаттурлар, ҳамиша мажлис бунёд айлаб, зодаи табъларимиздин мушоира қилур эрдик ва бир ғазалда тутаббуъ кўрсатиб, бир мазмун ҳар навъ тарзда ифода топар эди... ва баъзи вақт тавсифи ва ҳусн таърифида ғазал машқ айлаб, қадимиш шуаролар девонларидин бир шўх ғазални топиб, унга ҳар қайсимиш алоҳида мухаммас боғлардик. Дигар шеър арбоблари бизлар сұхбатимизни орзу айлаб келур эдилар. Агар бирор марғуб ғазал зодаи табъ бўлса, табиатлик кишилар нусха сўраб олур эдилар». Фурқатнинг бу гаплари М.ларнинг аҳамияти ҳақида юқорида айтилган фикрларни тасдиқлайди. Шунингдек, ўтмишда маълум бир шоир мухлислиарининг йигинлари ўтказиб турилган бўлиб, бундай М.лар «бедилхонлик», «фузулийхонлик», «машрабхонлик» каби номлар билан юритилган; 2) икки ёки ундан ортиқ шоир айтишуви шаклидаги шеър. Ижодий мусобақа руҳида яратилувчи бундай шеърларда, одатда, маълум бир мавзу, радиф, вазн, муайян бир қофияни сақлаш талаб қилинади, бу эса шеърнинг бир бутунлигини таъминлаш омилидир. XIX асрда яшаган шоира Манзурабону шундай дейди: «Айш-ишрат ботқоғига ботиб қолган пошшаойимларни танқид қилувчи шеърнинг дастлабки:

*Ҳаддидин ошмасинлар вайсақи пошшаойимлар,
Эшон бобомга қилсин минг-мингни лошшаойимлар, –*

байтини Нозимахоним айтган бўлиб, биз етти шоир давом эттирган эдик. Отинча аям энг яхши чиқсан мушоираларимизни биздан хотира сифатида ўз дафтарларига кўчириб кўяр эдилар. Ўша шоир дугоналаримнинг исмлари бундай эди: Муаттар, Гулчехра, Насиба, Париваш, Сайёра, Сурайё. Биз етти шоир биргаликда кирқдан ортиқ мушоира – шеър ижод этган эдик. Афсуски, улардан бирортаси менда сакланиб қолмаган». Шунингдек, М.лар икки шоир саволжавоби тарзида ҳам ёзилиб, уларнинг айримлари топишмоқ (мас., Махтумкули ва Дурди шоир) шаклида бўлса, бошқаларида ҳазилмутойиба (мас., Завқий ва Муқимий М.лари) руҳи устунлик қилган.

МУШОКИЛ (ар. مشاکل – шаклдош) – аруз баҳрларидан бири, 1 та фоилотун (– v – –) ва 2 та мафоийлун (v – – / v – – –) аслларининг кетма-кет тақороридан ҳосил бўлади, қариб билан шаклдош бўлгани учун шу ном билан юритилади. Асосан, араб шеъриятида кўлланади. Навоийнинг «Мезон ул-авзон» асарида ҳам, Бобурнинг «Мухтасар»ида ҳам мушокили мусаддаси солим (– v – – / v – – – / v – – –) вазнига:

*Неча сансиз фироқингда фиғон айлай,
Нола бирла улус бағрини қон айлай, –*

байти мисол сифатида келтирилган. Бундан ташқари, Бобур «Мұхтасар»да М. баҳрининг яна ўн етти вазнини маҳсус мисоллар билан келтирған. Жумладан:

*Йўқ сенингча жафокори жафожўй,
Йўқ менингча өафодори дуогўй, –*

байти мушокили мусаддаси макфуфи мақсур (– v – / v – – / v – ~) вазнига мисол қилинган.

МУҚАЙИАД ҚОФИЯ (ар. مکایید - бояланған қофия) – илми қофияда қофиянинг тузилишига кўра фарқланувчи бир тури, равий билан тўхтайдиган қофия. Mac., Оғаҳийнинг:

*Мунчаким, эй дил, етишди ҳажридин заҳмат санга,
Узмадинг ҳаргиз умидинг васлидин, раҳмат санга, –*

байтида М.к. қўлланган (заҳмат – раҳмат). Мутлақ қофиядаги каби М.к. таркибидаги ҳар бир ҳарф алоҳида ном билан юритилади: қайд – равийдан олдинги ундош, ридф – равийдан олдинги чўзиқ унли, ишбо – равийдан олдинги қисқа унли; дохил – ишбодан олдинги ундош, ҳазе – қайддан олдинги қисқа унли, таъсис – дохилдан олдинги чўзиқ унли. Келтирилган мисолдаги «заҳмат – раҳмат» жуфтлигига равийдан олдинги «а» қисқа унлиси – ишбо, ишбодан олдинги «м» ундоши – дохил.

МУҚОБАЛА (ар. مقابل – бир нарсанинг қаршисида бўлиш, қарши келиш) – мумтоз адабиётдаги шеърий санъат, байтда аввал икки ёки ундан ортиқ бир-бирига мувофиқ келувчи нарса-тушунчаларни англатувчи сўзларни, сўнг уларнинг зидди бўлган нарса-тушунчаларни билдирувчи сўзларни келтириш. Mac., Э.Воҳидовнинг:

*Сенга бўлсин нурли кундуз, менга қолсин қора тун,
Барча гулшан сенга бўлсин, бор тиканзорлик менга, –*

байтида бир-бирига мувофиқ келувчи «нурли», «кундуз», «гулшан» тушунчаларига «қора», «тун», «тиканзор» тушунчалари зидланмоқда, улар ҳам ўзаро мувофиқдир. Гарчи М. билан тазод-

га берилаётган таърифлар бир-бирига яқин ва бу ҳол муайян асосга эга бўлса ҳам, уларни фарқлаш зарур. М.нинг тазоддан фарқи шуки, биринчидан, унда байт таркибидаги зидлик ҳосил қилаётган жуфтликлар сони икки ёки ундан ортиқ бўлиши, иккинчидан, зидлантирилаётган тушунчаларнинг бир гурухга мансублари ўртасида ўзаро мувофиқлик, яқинлик (нурли, кундуз, гулшан каби) бўлиши талаб этилади. Яъни М. тазоднинг мазкур шартлар билан мураккаблашган бир кўриниши, демак, аслида ҳар қандай М. тазоддир, лекин ҳар қандай тазод ҳам М. бўла олмайди.

МУҚТАЗАБ (ар. مقتضب – кесилиш, қисқариш) – аruz баҳрларидан бири, мунсариҳдан кесиб олингандига ўхшаганлиги учун шундай аталади. *Мағъулоту* (— — v) ва *мустағъилун* (— v —) аспларининг кетма-кет тақороридан ҳосил бўлади. М. араб шеъриятига хос баҳр бўлиб, ўзбек шеъриятида қўлланмаган. Навоий «Мезон ул-авzon» асарида мазкур баҳрнинг *муқтазаби мусаммани матвий* (— v — v / — v v — / — v — v / — v v —) вазнига:

*Эй нигори маҳвашим, эй ҳарифи журъакашим,
Тут қадаҳки, бөҳад эрур ишқ тобидин оташим, —*

байтини мисол сифатида келтирган. Бобур эса «Мухтасар» асарида М. баҳрининг жами ўн беш вазнига тўхталган ва маҳсус байтлар битиб, мисол сифатида келтирган.

Н

НАЗИРА (ар. نظیره – ўхшаш, ўхшаш нарса, намуна) – ўзга шоир шеърига эргашиш йўли билан, унга ўхшатма тарзида ёки жавоб сифатида яратилувчи шеър. Шарқ адабиётида Н. битиш анча кенг тарқалган, замондош шоирлар ёки салафлар билан ўзига хос ижодий мусобақа тусини олган анъанадир. Н.да шоир ўзга шоир шеъридан бир байт ёки мисрани айнан олиб, уни давом эттиради ёхуд ўз шеърига айнан келтирилган байт ёки мисрани сингдириб юборади. Бундай шеърлар форс-тохик адабиётида *татаббуъ* (ар. бирор нарсанинг кетидан тушиш, изидан бориш) деб юритилади, лекин ўзбек шеъриятида Н. истилохи кенгроқ оммалашган. Баъзан Н.га нисбатан *тазмин* атамаси ҳам ишлатилади. Бироқ илми бадиъга оид айрим манбаларда Н. билан *тазмин* жиддий фарқланади: ўзга шоирнинг мисра ёки байтини шеърда айнан келтириш *тазмин*, бирорнинг шеърига жавоб сифатида, адабий мусобақа тарзида ёзилган шеър эса Н. ёки татаббуъ атамалари билан юритилади. Ўзга шоир асарига боғлаган Н.нинг тақлиддан иборат бўлиб қолмаслиги, шоирнинг унга ижодий ёндашиши талаб этиладики, бунда мавзунинг янада ёрқинроқ ифодаланиши ва бадиий савиянинг юксалиши кўзда тутилади. Н. деярли барча мумтоз шоирларимиз ижодида учрайди. Мас., «Девони Фоний» Навоийнинг Ҳофиз Шерозий, Дехлавий, Абдураҳмон Жомий, Саъдий, Мавлоно Котибий, Мавлоно Шохий, Камол Хўжандий, Ҳусайнний, Вафой, Қосим Анвор каби ўнлаб шоирлар шеърларига боғланган Н.лардан таркибланган. Мумтоз адабиётимизда ғазал, қасида, мураббаъ ва маснавийларга Н. боғлаш кенгроқ оммалашган. Мас., Жомийнинг «Лужжат ул-асрор» қасидаси Хисрав Дехлавий қасидасига, Навоийнинг «Лисон ут-тайр» достони Атторнинг «Мантиқ ут-тайр» достонига, нома жанридаги «Таашшуқнома» (Сайд Аҳмад) билан «Латофатнома» (Хўжандий). Хоразмийнинг «Мұҳаббатнома»сига, Ҳазинийнинг «Арзим эшил, эй золиму ситамгар» мисраси билан бошланувчи мураббаъси

эса Муқимийнинг «Арзим эшит, аё сарви равоним» мисраси билан бошланувчи машҳур мураббасига Н.лардир. Шунга қарамай, шеъриятимизда ғазалларга боғланган Н.лар кўпроқ учрайди (мас., Навоийнинг «Кошкі» радифли ғазалига Ҳусайнин ва Бобур, Фурқатнинг «Кўзларинг» радифли ғазалига Ҳазиний боғлаган Н.лар ва б.)

НАЗМ (ар. نظم – тузук, тартиб, тартибга келтириш, териш, тизиш) – бадиий нутқ шаклларидан бири, тизма, шеърий нутқ (қ. бадиий нутқ). Нисбатан кам ҳолларда Н. кенг маънода кўлланиб, умуман, шеъриятни билдиради, бу кенг маънодаги наср билан қарши кўйилган ҳолда юзага чиқади.

НАСР (ар. نسر – тизилмаган, тарқоқ, сочма) – бадиий нутқ шаклларидан бири, сочма; прозаик нутқ (қ. бадиий нутқ). Муомала амалиётда, умуман, бадиий проза, Н.да битилган асарлар жами маъносида, проза терминига синоним сифатида ҳам қўлланади. Термин иккала маънода ҳам фаол ишлатилади.

НАСРИЙ ШЕЪР (русчадан калька: «стихотворение в прозе») – насрый йўлда ёзилган лирик асар; ўзбек адабиёти ва адабиётшунослигида сочма, мансур шеър, мансура каби терминлар билан ҳам юритилади. Н.ш. лирик қаҳрамон ҳис-туйғу ва кечинмаларини тасвирлаши, одатда, кичик ҳажмга эга бўлиши, эмоционаллиги каби жиҳатлардан лирик шеърнинг ўзи, ундан фақат нутқий ташкилланиши жиҳати билан фарқланади. Агар лирик шеър муайян ўлчов асосида тартибга солинган нутқ шаклига эга бўлса, Н.ш. ритмик жиҳатдан ўлчовга солинмайди. Иккиси ҳам лирикага мансуб бўлгани ҳолда, шеър атамасини қўллашдаги турличалик (насрый шеър биримасида шеър сўзи турга – лирикага мансубликни, лирик шеър деганда эса нутқ шаклини билдиради) сабабли Н.ш. терминини ҳам ишлатиш зарурати юзага келади. Шу маънода Н.ш.ни ритмик проза, сажъ (кофияли проза) каби эпос ёки сарбаст, оқ шеър каби лирика ҳодисалари билан чалкаштирмаслик қерак. Ўзбек адабиётида Ойбек, Миртемир, Р.Парфи, О.Матжон, И.Ғафуров каби ижодкорлар Н.ш. шаклида самарали ижод қилиб, унинг яхши намуналарини яратганлар.

НАТУРАЛИЗМ (лот. natura – табиат) – 1) табиий фанлар соҳасида эришилган улкан муваффақиятлар таъсирида XIX асрнинг 60-йилларидан бошлаб Европа адабиётларида шаклланган адабий йўналиш. Илк бор Францияда майдонга келган Н.нинг фалсафий асоси – позитивизм, О.Конт таълимотидир. XIX асрнинг 70-йиллари

үрталарига келиб Э.Золя атрофида шу йұналишга мансуб ижодкорлар (Г.Флобер, Ги де Мопассан, Г.Ибсен ва б.) мактаби шаклланған. Э.Золя үзининг «Экспериментал роман», «Натуралист роман-навислар» номли асарларыда Н.нинг назарий асосларини ишлаб чиқди. Табиий фанларнинг табиат сирларини үрганиш борасидаги ютукларидан илхомланған натуралистлар жамиятни, инсонни шу каби теран, юксак даражадаги аниклик билан тадқиқ этишни үз олдиларига мақсад қилиб қўйғанлар, уларга кўра, бадий билиш илмий билишга монанд бўлмоғи зарур. Шунга кўра, улар асарнинг бадийлик даражасини ҳам унда билиш амали нечоғлик кўламли ва' чукур амалга ошганидан келиб чиққан ҳолда белгилаганлар. Улар ҳаётни борича, бўяб-бежамасдан, бирон-бир мафкура ёки ахлоқий тарбия мақсадларига йўналтиргмаган ҳолда тасвирлаш керак деб билишади. Яъни натуралистлар адабиёт ҳаёт материалини танлаб тасвирлаши керак эмас, уни борича тасвирлаши керак, адабиёт учун бегона мавзу ёки сюжет йўқ деб ҳисоблайдилар. Натуралистлар асосий эътиборни майший тафсилотларга, инсон руҳиятининг физиологик асосларига, унинг феъл-хўйи, хатти-ҳаракатлари, тақдиридаги тушунтириш қийин жиҳатларига қаратадилар. Улар учун ижодий қайта яратиш эмас, натурани аслига мувофиқ тасвирлаш мухим. Буларнинг бари Н. ақидаларини мутлақлаштирган ижодкорларни, уларнинг асарларини санъатдан йироқлаштиради. Айни чоғда, Н. адабиёт тарихида үзининг муайян ижобий изини ҳам қолдирди. Жумладан, жамиятнинг энг қуи қатламлари турмушини икир-чикиригача тасвирлашга интилиш, инсон руҳиятининг энг чукур пучмоқларигача кириб боришга интилиш каби жиҳатлар реалистик адабиёт имкониятларининг кенгайишига хизмат қилди; 2) адабиётшуносликда Н. термини реализмга зид қўйилган ҳолда ҳаёт материалини сайламасдан, бадий-фалсафий идрок этмасдан оддийгина қайд этиш, бадий умумлаштириш ва ғоявий-ҳиссий муносабатдан мосуво, ҳаётдан оддийгина нусха кўчиришдан иборат, том маънодаги ижодийликдан йироқ, демакки, чинакам санъатта ёт ижодий метод маъносида ҳам тушунилади. Баъзан шу йўсин тасвир реализм мақомида турган адиллар ижодида, реалистик асарларнинг алоҳида эпизодларида ҳам учраб қоладики, бундай ҳолларда Н. термини баҳо маъносида, йўл қўйилган камчиликларнинг умумий номи сифатида ҳам ишлатилади.

НАФОЗ (ар. نفاذ – сўзи ўтиш, ҳукми жорий бўлиш) – қаранг: мутлақ қоғия

НЕКРОЛОГ (юн. nekros – ўлук, logos – сўз, нутқ) – бирон-бир шахснинг (одатда, таниқли кишилар, давлат ёки жамоат арбоблари, санъаткорлар, адиллар ва х.) ўлими муносабати билан ёзилган мақола; кейинги вақтда бирон-бир шахсга яқин кишиси вафоти муносабати билан билдирилган мўъжаз таъзияномалар ҳам Н. деб юритилмоқда. Одатда, Н.ларда вафот этган шахснинг фаолияти, бу фаолиятнинг аҳамияти мухтасар ёритилади. Шу жихати билан Н.лар вақти келиб қимматли манба бўлиб қолиши ҳам мумкин. Mac., жадид нашрларида И.Фаспрали вафоти муносабати билан эълон қилинган Н.лар унинг Туркистон билан алоқалари ҳақида маълумотлар бериши билан мухим бўлса, Чўлпоннинг «Икки йўқотиш» номли Н.и қўқонлик маърифатпарварлар – домла Йўлдош Мавлавий билан шоир Иброҳим Даврон ҳақида маълумот берадики, улар давр адабиёти ва тарихини ўрганишда аскотади.

НЕОСТРУКТУРАЛИЗМ – қаранг: постструктурализм

НИДО (ар. ند – қичқириқ, чақириқ, ундов) – иншо йўлларидан бири, фикрни ифодалаш усули, ўй-фикр, ҳис-туйғу, кечинмаларнинг кимгадир ёки нимагадир мурожаат тарзида баён этилиши, шеърда ундалма қўллаш. Яъни шоир сабога, кўнгилга, маъшуқага ёки ўз-ўзига мурожаат этар экан, шу орқали ўз ҳис-туйғуларини, кечинмаларини баён қилиб олади. Mac., Бобур ёрга:

Агарчи сенсизин сабр айламак, эй ёр, мушкулдор,
Сенинг бирла чиқишимоқлик дағи бисёр мушкулдор, –

тарзида, Машраб:

Эшиш арзимни, эй дилбар, юрак-бағрим кабоб ўлди,
Рақиблар шодумон бўлди нигоримнинг жафосидин, –

тарзида мурожаат қилиб, шу орқали ишқ изтироблари, ҳижрон азоблари билан боғлиқ туйғуларни изҳор этишни мақсад қиласдилар. Аксар ҳолларда, шоир шеър давомида баён этган фикрлар ўз-ўзига мурожаат тарзида хулосаланиши мумкин. Mac., Навоий бир мақтаъсида:

Эй Навоий, барча ўз узрин дөди, ўлгунча куй
Ким, сенга ишқ ўти – ўқ эрмииш азалнинг қисмати, –

дер экан, ўзига мурожаат қилиш орқали «бошдан кечирилган ишқ изтиробларида ҳеч ким айбдор эмас, балки ишқ сенга тақдирнинг битигидир» деган хуросага келади. Умуман, шеъриятимизда «Эй бод, еткур ёра саломим», «Эй сорбон, охиста юр, оромижоним борадур», «Дўстлар, бу кун ажаб бир сарвқомат кўрмишам», «Эй Навоий, событ ўлсун шоҳи ғозий давлати», «Ул паридин мен нечук жон элтайниким, Бобуро», «Машрабо, ўлгунча даргоҳида мақсадийнг будур» каби кўринишларда байтлар битмаган, Н. усулига мурожаат қилмаган шоир деярли топилмайди.

НОВАТОРЛИК (лот. novator – янгиловчи, янгиланувчи) – адабий жараён билан боғлиқ категория, адабий жараёнда анъана билан ҳар вақт диалектик алоқада мавжуд бўлган ҳодиса, адабиёт тараққиётининг муҳим ички омили, бадиий тафаккур ривожига сезиларли таъсир ўтказиб, кейинчалик анъанага айланувчи муҳим бадиий-эстетик янгилик. Адабий анъанага сайлаб ва танқидий муносабатда бўлолган, ўз даврининг бадиий-эстетик эҳтиёжларини теран ҳис этолган ижодкоргина янгилик яратишга қобил бўлади. Мас., ўзбек мумтоз адабиёти анъаналари бағрида етишган Чўлпон ўз ижоди билан шеъриятимизга қатор янгиликларни олиб кирди. Жумладан, унинг бадиий шакл соҳасидаги Н.и шеърларининг ритмик-интонацион қурилишида бармоқ ва сарбаст имкониятларидан кеңг фойдаланиши, мумтоз шеъриятдаги шеърий шаклларни ўзгартириб қўллаши, шеърият тилини жонли сўзлашув тилига яқинлаштиришга интилиши, шеъриятимизга ижровий лирика, персонажли лирика каби жанр кўринишларини олиб кирганида; бадиий мазмун соҳасида эса шеъриятга ижтимоий «мен»ни олиб киргани, шахсийланган ижтимоий дардни куйлагани, анъанавий поэтик образлар (ёр, ошиқ, висол ва б.) маъносини ўзгартиргани кабиларда кўринади. Унутмаслик керакки, давринг бадиий-эстетик талаб-эҳтиёжларини шу даврда қалам тебратган ижодкорларнинг бари ҳам ҳис этади, шу маънода, талантли ижодкорларнинг ҳаммасида ҳам муайян даражадаги Н. мавжуд. Айни чоғда, Н. хусусиятлари даврнинг йирик санъаткорлари ижодида мужассам ифодасини топади.

НОВЕЛЛА (итал. novella – янгилик) – кичик эпик жанр. Адабиётшуносликда Н. масаласида яқдил тўхтамга келинган эмас: «ҳикоя» ва «новелла» атамаларини синоним деб билувчилар ҳам, уларни кескин фарқловчилар ҳам бор. Яна бир тоифа Н.ни ҳикоянинг бир кўриниши деб ҳисоблайди. Сўнгги қарашга кўра, ҳикоянинг иккни типи бор: биринчисида очерклилик (тавсифий-ривоявий), иккинчи-

сида новеллистиклик (конфликтли-ривоявий) хусусияти устундир. Бу ўринда гап икки турли жанр ҳақида эмас, балки бир жанрнинг икки сифат кўриниши ҳақида боради, ҳикоя ва Н. атамалари шу икки типни фарқлаш учун қўлланади. Ҳикоядан фарқли ўлароқ, Н.га муфассал тафсилотларга бой ривоя хос эмас, мутахассислар уни ҳикоядан фарқлаш учун соғ сюжет санъати деб ҳисоблайдилар ва унда драмага хос хусусиятлар устунлигини таъкидлайдилар. Булардан Н. ҳикоядан ўзининг сюжет-композицион хусусиятлари билан фарқланиши англашилади. Н.нинг (новеллистик ҳикоянинг) композицион қурилиши: 1) ровийнинг холис «кузатувчи» мавқеида туриши; 2) ҳикоя қилинаётган воқеанинг юз бериш вақти билан ҳикоя қилиниш вақтининг бир-бирига мослиги; 3) «саҳнавийлик» – ўкувчи наздида ҳаёт саҳнасида кечәётган воқеани томоша қилаётганлик иллюзиясининг юзага келтирилиши; 4) сюжетнинг шиддатли ривожланишию кутилмаган бурилишларга эгалиги билан ажralиб туради. Мазкур хусусиятлар мавжуд бўлиши учун эса Н.да биргина воқеа – «ҳаётнинг бир парчаси»ни поэтик жонлантириш тақозо этилади. Шундай экан, Н. сюжети ҳам «воқеалар тизими» деган таърифга мувофиқ эмас: унда бир-бирига боғлиқ воқеалар ривожи эмас, балки бир ҳаётий ҳолат ичидаги ўсиш, ривожланиш кузатилади (мас., Чўлпон. «Тарақкий»; А.Қаҳҳор «Бемор»). Шу йўсин тушунилган Н.нинг нодир намуналари сифатида Мопассаннинг «Дўндиқ», А.Чеховнинг «Хамелеон», О'Генрининг «Фаришталар тұхфаси», И.Буниннинг «Хилват йўлкалар» каби асарларини күрсатиш мумкин. Чўлпоннинг «Ойдин кечаларда» асари эса замонавий Н.нинг ўзбек адабиётидаги ilk ва гўзал намунасидир. Шунингдек, жанрнинг сара намуналари А.Қаҳҳор, Ш.Холмирзаев каби адиллар ижодида ҳам кўплаб топилади.

НОЙИРА (ар. «Нур» – нурлантириш, ёритиш) – қаранг: мутлақ қоғия

НУТҚИЙ ХАРАКТЕРИСТИКА – инсон образини яратишнинг мұхим воситаларидан бири, эпик ва драматик асарларда персонаж характерига хос хусусиятларни унинг нутқини индивидуаллаштириш орқали бериш. Кишининг нутқи унинг характер хусусиятлари, интеллектуал даражаси ва маънавий олами, муайян ижтимоий гуруҳ ёки худудга мансублиги ва ш.к.лар ҳақида хабар берувчи энг ишончли манбадир. Шу боис адабий асарда персонаж нутқини индивидуаллаштириш (ўзига хос жиҳатларини акс эттириш) тўлақонли бадий характер яратишнинг мұхим шарти саналади.

O

ОБРАЗ (рус. образ – акс) – қаранг: бадий образ

ОБРАЗЛАР СИСТЕМАСИ – бадий асаардаги бир-бири билан узвий боғланган образлар тизими. Амалиётда О.с. деганда күпинча асаардаги персонажлар тизими назарда тутилади, бироқ бу терминнинг тор маъносидир. Зеро, О.с. фақат персонажларни эмас, балки бадий воқеликни ташкил қилаётган жами (нарса, ҳодиса, жой ва х.) образлардан таркиб топади. Яъни бадий асаардаги ҳар бир образ яхлит системанинг унсури, шунга кўра, у бутуннинг қисми саналади (қ. бадий образ турлари) ва ўзининг мазмун-моҳиятини бутун контекстидагина тўлиқ намоён этади. Чунки О.с.даги барча образлар бир-бири билан узвий алоқада бўлиб, улар бир-бирини тўлдиради, изоҳлайди, ойдинлаштиради. О.с.даги унсурларнинг алоқалари сифат жиҳатидан турлича. Жумладан, образлар орасида интегратив (ҳоким-тобе) алоқанинг мавжудлиги уларнинг системадаги мавқеи, ташиётган ғоявий-бадий юқ залвори жиҳатидан даражаланиши билан изоҳланади. Мас., асаардаги нарса-буюм ёки жой образлари персонаж образига тобеланади: уни тўлақонли яратишга хизмат қиласди. Шунингдек, О.с.нинг таркибий қисми бўлмиш персонажлар тизимида ҳам худди шундай алоқалар кузатилади: ёрдамчи ва иккинчи даражали персонажлар бош персонажларга нисбатан тобе муносабатдадир (қ. ситуация). О.с.даги иккита образ орасида доим ҳам бевосита алоқа кузатилмаслиги мумкин, лекин билвосита (мазманий) алоқа ҳамиша бор. Мас., «Кеча»даги Зеби билан Марям орасида бевосита алоқа йўқ. Бироқ улар Ақбарали билан Мирёкуб орасидаги бевосита алоқа асосида билвосита боғланади: минг-боши хонадони ва фоҳишахона, Зеби ва Марям тақдирларидаги муштараклик туфайли бу алоқа бадий концепцияни ифодалашда муҳим аҳамият касб этади. Шунга ўхшаб романдаги кундошлар – Хадичахон, Пошшахон ва Султонхон образлари Зебини мазмунан тўлдиради, унинг тўйдан кейинги ҳатти-ҳаракатларини асослайди,

Зебидек беғубор қизларнинг шулардан бирига айланиш жараёни ҳақида тасаввур беради. Умуман, романда образларнинг бу каби алоқалари ижтимоий ҳаётнинг кенг эпик полотносини яратиш имконини беради: Рассоқ сўфи, Эшонбобо, Қумариқ масжиди имоми ва судда қатнашган имом-хатиб образларининг бир-бирини тўлдириши эътиқоди суст диндорлар; нойиб тўра, рус инженери, адвокат ва судьяларнинг ўзаро алоқалари эса мустамлакачиларнинг умумлашма образини яратиб, давр картинасини кенг тасаввур қилишимизга имкон беради. Демак, гап О.с. – СИСТЕМА ҳақида борар экан, асар мазмун-моҳиятини тушуниш учун уни ташкил қилаётган образларнинг турфа кўринишдаги алоқаларини теран идрок этиш талаб этилади.

ОКСИМОРОН ёки **ОКСЮМОРОН** (юн. охутогон – закиёна нодонлик) – услубий фигура, мантиқан тамомила зид тушунчалардан ҳосил бўлган синтактик бирлик. Адабиётларда О. сиқиқ ва шунинг учун парадоксал мазмун касб этувчи антитеза деб ҳам таърифланаиди, бироқ бу ҳамиша ҳам тўғри эмас. Чунки антитетизада зид маънодаги икки сўз бир-бирига қарама-қарши қўйилса, О.да мазмун жихатидан зид тушунчаларни ифодаловчи сўзлар ажралмас бирлик ҳосил қиласи, қўпроқ аниқловчи-аниқланмиш муносабатида келади. Мас., «Ёмоннинг яхшиси бўлгунча, яхшининг ёмони бўл» нақли, «сукунат овози», «нафис ҳақорат», «ёлғон ҳақиқат» бирикмаларида, «Ўткан кунлар»даги Отабекнинг «ширин ўлим» дейишида О. ҳодисаси кузатилади. Шунингдек, Х.Давроннинг: «Энг даҳшатли бақириқ – соқовнинг бақириғи» сатридаги соқовнинг бақириғи; И.Мирзонинг «Ишқ қадими масалдир: Ҳам заҳар, ҳам асалдир. Иккисига коса бир, Асалдайин заҳарим!» сатрларидаги «асалдайин заҳарим»; Фахриёрнинг «Бизлар узоқ чекиндик олға, Енгавердик... мағлуб бўлгани» мисраларидаги «олға чекинмоқ», «мағлуб бўлиш учун енгмоқ» бирикмалари ҳам О.га мисол бўла олади.

ОКТАВА (лот. octo, octava – саккиз, саккизлик) – саккиз мисрадан таркиб топувчи, беш ёки опти стопали ямб (қ. стола) ўлчовидаги мисралари abababcc тартибида қофияланувчи банд шакли. Ўйғониш даври итальян шеъриятида юзага келган ва тез орада итальян ҳамда испан эпик поэзиясининг асосий банд шакли бўлиб қолган. Жумладан, Л.Ариосто, Т.Тассо сингари машҳур адилларнинг эпик поэмалари О. банд шаклида ёзилган. Кейинчалик О. банд шакли бошқа халқлар адабиётларида ҳам ўзлашган: немис адабиётида Гёте («Фауст»га ёзилган бағишилов), инглиз адабиётида Байрон

(«Дон Жуан»), рус адабиётида В.Жуковский, А.Пушкин ва б., бой ритмик-интоацион имкониятлари, қофияланиш тартиби ва ўлчовнинг кулайлиги сабабли, О. банд шаклида лирик шеърлар ҳам ёза бошлаганлар. Ода аввалги олти мисранинг кесишган тартибда ва сўнгти икки мисранинг жуфт қофиялангани катта қулайлик туғдиради: дастлабки 6 мисрада ҳис-туйнуни ё ўй-фиркин ривожлантириб келиб, сўнгги икки мисрада лирик якун ясаш мумкин. Шу қулайлик туфайли О. дан лирик шеърлар ёзишда ҳам фойдалана бошланган. Бу ҳолда энди О. қатъий шеър шакли, шеърий жанр сифатида тушунилади.

«ОНГ ОКИМИ» – XX аср модернистик адабиётида майдонга келган ҳаётни тасвирлаш усули; инсон руҳиятида кечувчи жараёнларни бевосита, улар ҳақиқатда қандай кечса, ўшандай тасвирлашга интилган адилар ва уларнинг асарларига нисбатан кўлланувчи шартли атама. О.о. термини XIX аср охирларида оммалашган бўлиб, америкалик файласуф У.Жемс фаолияти билан боғлиқ. У.Жемсга кўра, инсон онги дарё оқимига монанддир, бу оқимда ҳис-туйгулар, ўй-фирклар, туйқус пайдо бўлувчи ассоциациялар бир-бири билан бетартиб алманиниб туради, мантиқан изоҳлаб бўлмайдиган даражада бир-бирига чатишиб кетади. Адабиёт ҳамиша инсон руҳиятида кечувчи жараёнларга қизиқсан, уларни турли йўллар билан ифодалашга интилган. Бу нарса, айниқса, инсон хатти-ҳаракатларини ҳам ижтимоий, ҳам руҳий жиҳатдан асослашга интилган реалистик адабиётда кучли намоён бўлди. XIX аср реалистик адабиётида ички монологнинг кенг оммалашгани, Л.Толстой, Ф.Достоевский каби адиларнинг ички монолог имкониятларидан максимал даражада фойдаланиб руҳий жараёнларни имкон қадар ҳақиқатга монанд тасвирлаш йўлида самарали изланганлари шу интилишнинг натижасидир. О.о.ни шу изланишларнинг бевосита давоми, ички монологнинг шартлилик асосида мантиқ қолилларига солинмаган кўриниши сифатида тушуниш мумкин. Яъни реалистик адабиёт О.о. (ички монолог)ни тасвир усулларидан бири деб билади, унда инсон онгидаги жараёнлар воқелик билан бошланади ва уни бадий идрок этиш воситаси бўлиб қолади. Ўтган аср бошларидан шаклланган О.о. адабиёти эса унга ҳаётни бадий акс эттиришнинг универсал методи деб қаради, инсон руҳиятида кечувчи жараёнларни аслича акс эттиришга интилди, уларни воқелик билан боғлаш, мантикий изчил кўринишга келтириш, қолилга солишдан воз кечди. Натижада О.о. адабиётининг В.Вульф, М.Пруст, Ж.Жойс каби йирик намояндалари асарларида асосий мақсад инсон руҳиятига имкон қадар чукур ки-

риб бориш, унинг қоронғу пучмоқларига назар солиш бўлиб қолдики, натижада улар кўп жиҳатдан экспериментағлик хусусиятини касб этди, анъанавий эпосга хос ривоя структураси парокандалика учради, характер бутунлигига птур етди. О.о. адабиёти инсон рухияти тасвири ва таҳлилида, ҳеч шубҳасиз, олға қадам эди, бироқ, иккинчи томондан, унда рухият тасвири бобида *натурализмга оғиш кузатилди*. Яъни натурализм воқеликни бор ҳолича тасвирлашга интилгани каби, О.о. адабиёти инсон рухиятидаги жараёнларни аслича акс этиришни мақсад қилди. Мазкур камчилик ва чекланганлиқдан қатъи назар, О.о. адабиёти инсонни англаш имкониятларини кенгайтирди, инсон ва унинг рухияти ҳақидаги тасаввурларни бойитди. О.о. адабиёти, хусусан, унинг ёрқин намояндаси Ж.Жойснинг «Улисс» асари бадиий тафаккур ривожида чуқур из қолдирди. Жумладан, О.о. адабиёти Э.Хемингуэй, У.Фолкнер каби бир қатор йирик адилларнинг ижодий ўсишига туртки берди, унинг анъаналари *сюрреализм*, янги роман намояндалари изланишларида ижодий давом эттирилди; О.о.нинг пайдо бўлишига замин ҳозирлаган реалистик адабиёт ҳам унинг маъқул томонларини ўзлаштириди.

ОЧЕРК (рус. очеркать – тасвирлаш) – эпик турнинг кичик шакли, бадиий-публицистик жанр. О. ҳажм эътибори билан ҳикояга яқин туради, лекин ундан қатор жиҳатлари билан фарқланади. Аввало, О. конфликт асосида ривожланиб ечимга интилувчи сюжетга эга эмас. Ҳикояда ҳаётдаги воқеалар ижодий тафаккур кучи билан қайта ишланиб бадиий воқеликка айлантирилса, О.да мавжуд воқеликнинг характерли (муаллиф мақсадига мос) жиҳатларини танлаб олиб тасвирлаш билан чекланилади. Бошқача айтсак, О. ҳамиша ҳужжатлилик хусусиятига эга: унда тасвирланган шахслар ҳаётда мавжуд, воқеалар ҳақиқатда юз берган ва ҳ. Ҳикоя бадиий образлар воситасида фикрлайди, О.да эса муаллиф мушоҳадалари фактографик ва иллюстратив образларга таянади; ҳикоянинг дикқат марказида мұхит билан алоқадаги шахс характери турса, О. марказида ижтимоий мұхитнинг шахс образи орқали кўйилаётган муаммолари туради. Шу жиҳатдан, О.нинг турли муаммоларни идрок қилиш, билиш имкониятлари жуда кенг. Шу боис, мутахассислар фикрича, миллий адабиётлар тарихида О.нинг гуллаб-яшнаши жамият ҳаётида туб ўзгаришлар юз бераётган даврларга тўғри келади. Зоро, деярли барча О.ларнинг материали – муаллиф яшаган давр ҳаёти, уларда шу даврга оид фактлар, замондошлар қаламга олинади.

Айрим манбаларда О.лар табиатига күра бадий адабиёт, беллестристика (қ. беллестристика) ёки публицистикага киритилиши мумкин деб күрсатилади. Бирок бу ҳолда О. билан ҳикояни фарқловчи жиҳатни белгилаб бўлмай қолади, зоро, айрим ҳикоялар очерклилик хусусиятига (қ. ҳикоя) эга. Шунинг учун О.ни беллестристика ва публицистика жанри сифатида тушунган маъқулроқдир.

ОҚ ШЕҮР (русчадан калька: «белый стих») – муайян ўлчовга эга бўлгани ҳолда, мисралари ўзаро қофияланмаган шеър. Европа шеъриятида XVI асрдан бошлаб қофияси бўлмаган антик шеъриятга эргашиб натижаси сифатида пайдо бўлган. Дастрраб эпик ва драматик (Шекспир, Мильтон, Жуковский) поэзияда қўлланган, кейинчалик бу шеър шаклидан лирикада ҳам фойдаланила бошланди. О.ш. билан қофияланиш тартиби эркин бўлган шеър шакларини чалкаштирмаслик керак. Юқорида айтилганидек, О.ш.да ҳамиша маълум ўлчов асосидаги изометрия мавжуд бўлади. Мас., У.Носирнинг қўйидаги шеъри:

Шафақ ўчай деб қолди,
Каптар қонидек рангсиз...
Кўзларимни узмайман.

Дөдинг: Энди ўчар у!
Ўтган қайтиб келмайди,
Эртани сөвениб кут, –

7 бўғинли бармоқ вазнида ёзилган бўлиб, унда шу ўлчов бутун шеър давомида сақланади, лекин мисралари ўзаро қофияланган эмас. XX аср ўзбек адабиётида О.ш. намуналари Ойбек, Ҳ.Олимжон, М.Шайхзода, А.Орипов, Р.Парфи каби кўплаб шоирлар ижодида ҳам учрайди. Шунингдек, адабиётимизда О.ш.дан шеърий драмалар ёзишда ҳам фойдаланилган (М.Шайхзода. «Мирзо Улуғбек»).

П

ПАЛИНДРОМ (юн. palindromeo – орқага югурмок) – сўз ўйинларидан бири; сўзни чаппа ўқилганда ҳам маълум маъно чиқадиган тарзда кўллаш, мисра ёки жумлага шу тарзда тартиб бериш; мумтоз шарқ адабиётшунослигида қалб (к.) деб юритилади. П.да ўнг ё чаппа ўқилишидан қатъи назар бир хил маъно чиқиши (айрим манбаларда турли маънолар чиқиши ҳам П.га мансуб этилаверади) кўзда тутилади. Мисра (жумла) доирасидаги П. сўзма-сўз тартибда ёки ҳарфлар бўйича ўқилганда, сўз доирасидагиси эса ҳарфлар бўйича ўқилганда воқе бўлади. Агглютинатив тилларга мансуб туркий тилларда мисра (жумла) доирасидаги П.нинг воқе бўлиши жуда қийин, бунга сўз ўзгартиувчи қўшимчаларнинг сўз охирида келиши ва кетма-кет қўшилиб бориши халал беради; флекстив тиллардаги шеъриятда мисра доирасидаги П.нинг ҳарфлар бўйича воқе бўлувчи хили, сийрак бўлса-да, учраб туради (мас., «А роза упала на лапу Азора»). Булардан фарқли ўлароқ, П.нинг мазкур хилидан фойдаланиш имкони аморф тилларда (мас., хитой шеъриятида) анча кенг. Сўз доирасидаги П. нисбатан кўпроқ учрайди, ундан турли сўз ўйинлари қилган ҳолда муайян фикрни ифодалаш мақсадида фойдаланилади. Мас.:

*Мен «йўқ»дан «қўй» қилдим,
«Йўқ» сўзини тескари ўқиб.*

«Овсар» – «расво» бўлди.

«Нодон» эса...

Барибир «нодон»лигича қолди (И.Искандар).

Агар келтирилган шеърда сўзниңг ўнг ва чаппа ўқилиши очик қиёсланган бўлса, Фахриёрнинг қуидаги шеърида ўзгача ҳол кузатилади:

*Корни сира тўймаган шу Йўқ
Зарбоф тўн ҳақида ўйларми сира?*

**Ва ҳөчса минямоқ жандасину у
Тескари киймоқни ўйлаб кўрарми?**

Аввалги шеърдан фарқли ўлароқ, бунисида сўзни чаппа ўқиш кераклигига ишора қилиш (*тескари киймоқ*) билан чекланилган. Шоир «йўқ» сўзини мисрада грамматик жиҳатдан амалдаги қоидаларга хилоф позицияга кўяди ва бу билан уни алоҳида, бўрттириб-таъкидлаб кўрсатади, натижада сўз П. объектигина эмас, қўйилаётган саволларга жавоб сифатида лирик қаҳрамон изтиробларининг асоси бўлиб қолади.

Шунингдек, П. усулидан асарга, унда иштирок этувчи персонажлар, нарса-ходиса, тушунча ва ш.к.ларга ном беришда ҳам фойдаланилади. Мас., А.Каримовнинг «Қаро кўзим» фантастик қиссасида ҳаракатланувчи Асрона, Азурефи, Аруҳшама каби персонажларнинг исми Анора, Феруза, Машхура исмларини чаппа ўгириб ҳосил қилинганди. Фақат янги исмлар талаффузига ўзига ҳослик (гўё ўзга сайёраликлар тилига мослик) бағишлиш учун ҳосил қилинган исмларда товуш ортирилган.

ПАМФЛЕТ (фр. pamfe feuillet – учар варақа) – публицистика жанри, аниқ бир шахс ёки ижтимоий тузилма (тузум, партия, ҳаракат, гурӯҳ ва б.)ни кескин фош этиш мақсадига қаратилган қичик ҳажмли асар. П.нинг услубий хусусиятлари шу мақсадга мос: таъкидлар, мурожаатлар ва кучли эмоционаллик асосида юзага келувчи риторик интонациялар, патетик рух, афористик характерда ифодаланган ҳукм-холосалар, ўткир сарказм даражасига етадиган яксон қилувчи киноявийлик. Булар П.нинг ошкор тенденциоз руҳда бўлишини, ўкувчига бевосита таъсир қилишини таъминлайди. Гарчи П. жанр сифатида Реформация даврига келиб қарор топган бўлса-да, унга хос хусусиятлар антик адабиётда ёк мавжуд бўлган. Жаҳон адабиёти тарихида М.Лютер, Э.Роттердамский, Ж.Мильтон, Ж.Свифт, В.Гюго, Э.Золя, Г.Манн, А.Герцен, Л.Толстой каби ижодкорлар қаламига мансуб П.лар машхур ва, муҳими, улар ўз даври ижтимоий-сиёсий тафаккурига жиддий таъсир ўтказган. XX асрда, айниқса, 20 – 30-йилларда F.Гулом, Ҳ.Олимжон, А.Қаҳҳор сингари адилларимизнинг қатор публицистик чиқишилари, гарчи уларнинг жанри аксар фельетон деб белгиланган бўлса-да, моҳиятан П. саналиши мумкин (мас., F.Гулом. «Янкилар, уйингга йўқол!», «Жомаси пок, ўзи нопок бандалар» ва б.). П.га хос юқоридагича хусусиятлар баъзан бадиий асарларда ҳам кучли воқе бўлади ва шу билан боғлиқ ҳолда памфлетлилик ҳақида гапириладики, бундай асарнинг ҳамма унсури –

тили, услуби, образлар тизими тұлалигича фош этиш мақсадига йұналтирилади. Шуны назарда тутиб адабиётшунослиқда баъзан ҳикоя-П., роман-П., пьеса-П. сингари атамалар ҳам ишлатилады, улар асарнинг жанрини эмас, күпроқ услугбий хусусиятлари, ғоявий йұналишини аниқлаштиришга хизмат қиласы.

ПАЛЕОГРАФИЯ (юн. *palaios* – қадимги, *grapho* – ёзмоқ) – ёзув-лар тарихини ўрганувчи тарихий-филологик фан соҳаси. П.нинг вазифалари доирасига қадимги ёзма ёдгорликларни тадқиқ этиш, битикларни ўқиш (расшифровка), улар яратилган жой ва вақтни аниқлаш кабилар ҳам киради. П. бу вазифаларни ёзув асосида, қадимги битикларнинг ёзув хусусиятларидан келиб чиққан ҳолда амалға оширади. П. ўз фаолиятини тарих, тил тарихи, адабиёт тарихи, матншунослик каби соҳалар билан мустаҳкам алоқада олиб боради. Жумладан, матншунослик фаолиятида П. муҳим ёрдамчи соҳа бўлиб хизмат қиласы.

ПАРАДОКС (юн. *paradoxos* – кутилмаган, ғалати) – жамиятда анъянавий тарзда ҳукм суреба келаётган, аксарият томонидан қабул қилинган фикрға, баъзан эса зоҳирлан соғлом мантиқа зид гап. П. афористикага хос лўнда ва ўткир ифода шаклига эга бўлади ва ўзи инкор қилаётган фикр зиддига ишонтира олиш ё олмаслиги, қай даражада тўғрилигидан қатъи назар, оригиналлиги билан эътиборни жалб қиласы. Мазкур жиҳатлари билан П. баҳс-мунозаралар, публицистик чиқишлилар, сатирик асарлар, замонавий анекдотларда самарали бадиий усулга айланади. Мас., Фахриёрнинг «Аксилэкология»(1985) шеърида кўпчилик онгига қарор топган «инсон табиатни бўйсундира олади» деган қараш П. тарзида инкор этилади:

*Пайҳон қилар одамни экин,
Ташбиҳ надур, далаларнинг ўзи бий.
Чўллар уни қувлаб боради,
Ё раббий.*

П. тарзида ифодаланган фикрдаги кутилмаганилик унинг ўкувчи онгига муҳрланиб қолишига, кейинчалик қайта-қайта мушоҳада қилинишига асос бўлиши билан, айниқса, эътиборлидир (мас., Фахриёр: «Юрак күшдир. Қафас билан бирга туғилган қуш»; «Дарё, сени қандоқ чўмилтирамиз, Қайда ювинарсан, булғанчиқ дарё?»). Баъзи асарлардаги сюжет ситуациялари, ҳатто асар тұлалигача П. принципи асосида қурилиши мумкин. Жумладан, Фахриёрнинг қуйидаги шеъри:

Ун бўлмаса ҳам уйида,
Деҳқон элагини сотмайди.
Шикоятлар келмас ўйига,
Бирорга арз қилиб ётмайди.

Очлик өнгигб, тоқ бўлса тоқат,
Икки дунё тор келса кўзга,
У зорланмас, сўкинмас, фақат
Элагини тутар оғизга.

Шоир П. асосида «Эл оғизга элак тутиб бўлмайди» мақолини қайта мушоҳада этади, мустабид тузум шароитида мутелашган халқ фожиасини, замона ва тузумга кинояли муносабатини ифодалайди.

ПАРАЛЛЕЛИЗМ (юн. parallelēlos – ёнма-ён турувчи ёки борувчи) – 1) халқ оғзаки ижодида жуда кенг қўлланган, кейинчалик ёзма адабиёт томонидан ўзлаштирилган тасвир усули, муайян ўхшашиликка эга нарса-ҳодисаларни параллел (ёнма-ён) тарзда тасвирлаш. П. тасвирланаётган нарса-ҳодисалар орасидаги ўхшашлиқ ёки зидлик туфайли образни жонли тасвирлаш, ҳис-туйғуни ёрқин ифодалаш имконини беради. Поэтик усул сифатида П. илдизлари инсон ўзини табиатнинг узвий бўлаги ҳисоблаган, уни илоҳийлаштириб ва сиғиниб яшаган қадим замонларга бориб тақалади. Шу боис халқ ижодида табиат билан инсон ҳаёти (муайян ҳаётий вазият, воқеа, руҳий ҳолат ва х.) манзараларини параллел тарзда тасвирлаш, айнича, кенг қўлланган. Мисол учун, машҳур «Ёр-ёр» мисраларини олайлик:

Далада тойчоқ кишнайди
От бўлдим деб, ёр-ёр.
Ўйда келин йиглайди
Ёт бўлдим деб, ёр-ёр.

Мазкур парчада уйда йиглаётган келин билан далада кишнаётган тойчоқнинг параллел тасвирлангани келиннинг руҳий ҳолатини ёрқин ифодалайди. Тойчоқ «от бўлдим деб кишнайди», чунки «от бўлиш» – етим ташланди демак, энди у олдингидек онасининг бағрида беташвиш ящай олмайди; кишнаётган тойчоқ ўзга уйга келин бўлиб тушган, «чиқкан қиз чилдан ташқари» ақидасига кўра

энди яқинларига «ёт» бўлган келиннинг дардини ифодалайди; 2) аналогия асосида П.нинг синтактик П., лексик-морфологик П., психологик П., интонацион П. каби қатор бошқа кўринишлари ҳақида ҳам гапирилади. Бу ҳолда ташкилланиши (фонетик, лексик-морфологик, ритмик, синтактик ва б.) жиҳатидан бир-бирига ўхшаш нутқ бўлақларини матннинг турли бўлақларида таъкидлаб жойлаштиришга асосланган стилистик фигура, матн композициясига дахлдор бадиий усуллар тушунилади. Жумладан, энг кўп тарқалган кўринишларидан бири синтактик П.дир:

*Йўлин йўқотса одам – муҳаббатга суюнгай,
Ғуссага ботса одам – муҳаббатга суюнгай,
Чорасиз қотса одам – муҳаббатга суюнгай...*

Келтирилган мисолда П. банд доирасида, мисраларда жумла курилишининг бир хиллиги асосида воқе бўлса, баъзан П. бандларнинг синтактик курилишидаги бир хиллик асосида ҳам юзага чиқадики, бу строфик П. деб юритилади.

Синтактик П.нинг мураккаблаштирилган кўринишлари ҳам бўлиб, бунга хиазм ва инкорли П.ларни мисол қилиш мумкин. П.нинг жумладаги сўзларни тўла ёки қисман тескари тартибда тақрорлаш асосига курилган кўриниши хиазм, кейингиси аввалги бўлақни инкор қилувчи тури эса инкорли П. деб аталади. Куйидаги мисолда уларнинг иккиси ҳам мавжуд:

*Ёмоннинг яхиси бўлгунча,
Яхшининг ёмони бўл.
Сомоннинг буғдойи бўлгунча,
Буғдойнинг сомони бўл;*

3) яна аналогия асосида композицион П. тушунчаси ҳам юзага келган. Композицион П. турли кўринишларда намоён бўлади. Мас., эпик асарлардаги бир пайтда ёнма-ён кечеётган (мас., Ч.Айтматовнинг «Қиёмат» романидаги Авдий, Акбара ва Бўстон сюжет чизиклари) ёки турли замонда кечгани ҳолда параллел тасвириланаётган воқеалар ётган сюжет линиялари (мас., Ҳ.Султоновнинг ўтмиш-ҳозир параллелига курилган «Ажойиб кунларнинг бирида» қиссаси) композицион П.га мисол бўла олади. Шунингдек, табиат тасвири билан қаҳрамон руҳияти, хаёлдаги ҳолат билан ҳаётий ҳолат, туш билан

лан ўнг ва ш.к.ни параллел тасвирлаш ҳам композицион П. усулида амалга ошади.

ПАРАФРАЗ(А) (юн. *paraphrases* – қайта ҳикоя қилиш) – адабий матнни бошқа сўзлар билан, баъзан эса бошқача йўсинда (насрий асарни шеърий, шеърий асарни насрий йўлда) қайта баён қилиш. П. турлича сабаблар (матнни муайян ўқувчи оммага мослаштириш зарурати, асарни қабул қилишни осонлаштириш, қисқача мазмун билан таниширишнинг етарли экани, нашр имкониятлари ва ш.к.) билан амалга ошади. Мак., антик Римда Эзоп масаллари Федр ва Бабрийлар томонидан шеърга солинган; А.Навоий «Хамса»сига кирган достонларнинг насрий баёни амалга оширилган; ўқувчилар учун чиқарилган хрестоматияларда йирик асарларнинг боблари тушириб қолдирилади-да, уларнинг мазмуни анча муфассал баён қилинади ва ҳ. Гарчи П. адабиёт тарихида ва ҳозирги ноширлик амалиётида учраб турса-да, терминнинг адабиётшунослиқда қўлланиши фаол эмас.

ПАРДА – драматик асарнинг саҳнага кўйилганда узлуксиз воқеа сифатида ижро этилувчи бўлаги. Одатда, саҳнада шу бўлак ижроси тугагач, парда туширилади: ўзбек адабиётшунослигига П. терми ни шу асосда пайдо бўлган, жаҳон адабиётшунослигига акт (лот. *actus* – ҳаракат) термини билан юритилади. Драмани П.ларга бўлиш антик даврдаёқ анъана тусига кирган, П.лар орасида хорнинг қўшиқрақслари ижро этилган. Антик адабиётда драматурглар асарни беш П.га бўлганлар, бу нарса классицизм даврида қатъий қоидага айлантирилган. Кейинги давр адабиётида бундай қатъийлик йўқ: драматик асарлар бир ёки бир нечта П.дан иборат қилиб бўлинаверади. Шу билан бирга, ҳозирда драматик асарни П.ларга эмас, бир-бирини давом этирувчи «эпизод»ларга бўлиш ва спектаклни битта антракт (танаффус) билан тутгатиш анъанаси шаклланган. Драматик асарнинг ижро учун мўлжаллангани П.ларга бўлининини табиий ва зарур ҳолга айлантиради. Чунки, одатда, бир П. воқеалари узлуксизлиги ва бир жойда кечиши, иштирок этувчи персонажлар таркиби билан бутунлик ҳосил қиласиди, ундан сўнг П. туширилиши кейинги сининг ижроси учун зарур ишларни амалга ошириш (саҳна декорацияси, костюм ўзгариши, грим ва ш.к.) имконини беради.

ПАРОДИЯ (юн. *parodia* – тескари қилиб куйлаш) – 1) бирон-бир асар, ижодкор, ижодий услуб, жанр кабилар устидан қулиб ёзиладиган асар. П.да кулгига олинган асар (ижодкор, услуб, жанр ва б.) га хос белгилар сақлаб қолингани ҳолда, мазмуни унга номувофиқ

бўлади. Шунга кўра, П.нинг моҳияти кулгига олинган объект (асар, ижодкор, услугуб, жанр ва б.) билан бирлиқда англашилади, бу ҳолда П. объекти билан кулги объекти битта. Мас.:

*Тошқинлик, шошқинлик сувгадир хос,
Порлоқлик, ёрқинлик нургадир хос.
Учириш, ўчириш – сувгадир хос,
Барқ уриш, бўй тараш – гулгадир хос.*

Ё.Исҳоқовнинг «Хусусият» шеъридан

*Чўктириш сувга хос, бўктириш – ошга,
Оёқдан чалмоқлик хос эрур тошга.
Мен сенга янги гап айтмоқчи эдим,
Найлай шу эски гап кебқолди бошга.*

Ў.Сайдов пародияси;

2) муайян асар, одатда, кўпчиликка таниш асарга хос шаклий хусусиятларни саклаган ҳолда бошқа бир мавзуни ҳажвий талқин қилишга қаратилган асарлар ҳам П. деб юритилади. Бу ҳолда П. объекти билан кулги объекти битта эмас. Яъни бунда объект қилиб олинган асар устидан кулиш мақсади эмас, бошқа мақсадлар кузатилади. Мас., «Камайиб қолмас-ку давлатинг, ахир, Бир бор кўкрагимга тақиб қўйсанг гул» – «Камайиб қолмас-ку давлатинг, ахир, Бир бор чўнтағимга солиб қўйсанг пул».

ПАРЦЕЛЛЯЦИЯ (фр. *parcelle* – узв, бўлак) – нутқ ифодавийлигини ошириш усулларидан бири, мелодика билан боғлиқ нутқ фигураси; битта жумла таркибидаги бўлакларнинг интонацион жиҳатдан алоҳида гап шаклида берилиши. П.га учраган бўлаклар ёзувда тиниш белгилари билан ажратилади. Мас., У.Азим шеъридан:

*Дарахтларни зулумот кўмди.
Дарахтларга қарғалар қўнди.
Зулумотни оралаб нохуш
Қанот қоқиб ўтди бир бойқуш.
Бир ваҳима!.. Ҳасрат!..*

Парчадаги сўнгти икки мисра грамматик жиҳатдан бир бутунни (*Қанот қоқиб ўтди бир бойқуш – бир ваҳима, ҳасрат...*) ташкил

қилиб, мисрада алоҳида гап шаклини олган бўлаклар (*Бир ваҳима!.. Ҳасрат!..*) аслида ажратилган изоҳловчилардир. Уларнинг алоҳида гап шаклини олиши шеърга ўзига хос оҳанг бағишлаб, мазмунни кучайтиришга (нохуш ҳолатнинг ёркин ифодасига) хизмат қиласди. Ўзбек шеъриятида П. ҳодисаси кўпроқ уюшиқ бўлакларни (У.Азим: «Юравер. Қолма йўлдан. Қолган қолар. Ачинма. Чўчима ҳеч нарсадан»), ундалма ва ундовларни (У.Азим: «Майдада одам! Шошма! Ўз бошинг қолиб, Яна ўзга бошни олиб кетяпсан»; «Нодон! Мақсад тириклик, ишон!»), шунингдек, санаш оҳангидага боғланган йигик содда гапларни (У.Азим: «Ботир бўл. Олға юргур. Кўрқма ҳар хил қотилдан») алоҳида ажратиш орқали воқе бўлади.

ПАУЗА (юн. *pausis* – тўхтам) – нутқнинг бир текис оқимидағи узилиш, тўхтам. Жонли нутқда П.лар фикрни аниқ-равшан, ке-рак ўринларни ажратиб-таъкидлаб ифодалашга ёрдам беради ва шу жиҳатдан мазмун ифодаловчи муҳим унсурлардан саналади. Бадий нутқда П.нинг икки тури ажратилади: жумланинг синтактик қурилиши билан белгиланувчи мантиқий П. ва унга боғлиқ бўлмаган ритмик П.лар. Агар мантиқий П.лар ҳар қандай нутқка хос бўлса, ритмик паузалар фақат шеърий нутқка хос ҳодиса саналади. Ритмик П.лар баъзан мантиқий П.ларга ҳам мос келади, шунга қарамай, шеърий нутқда ритм талабидан келиб чикувчи ритмик П.лар етакчилик қиласди. Шеърий нутқ ритмини ҳис этишда П.лар жуда муҳим бўлиб, улар ритмик бўлакларни (туроқ, мисра, банд) талаффузда бир-биридан ажратади ва шу асосда ритмиклик яқол сезилади. Ритмик П.лар сифат жиҳатидан даражаланади: туроқлардан кейинги П. том маънодаги тўхтам эмас, у кўпроқ мелодиканинг ўзгариши ҳисобига тасаввур қилинади; мисрадан кейин анча сезиларли П., банд ниҳоясида эса бундан-да аниқ сезилувчи П. бўлади (қ. *ритм*).

ПАФОС (юн. *pathos* – ҳис, эҳтирос) – ижодкорнинг ўзи тасвирилаётган воқеликка ғоявий-ҳиссий муносабати, автор эмоционаллиги. П. термини антик эстетика ва риторикада ишлатилган бўлиб, кейинчалик турли маъно ўзгаришларига учраган. Жумладан, Арасту П. деганда инсон қалбининг хусусияти, кучли эҳтиросни назарда тутади. Унга кўра; П. нотиқлик усуулларидан бўлиб, унинг ёрдамида нотиқ тингловчиларда ўзи истаган ҳисларни уйғотади. Терминни трагедияга нисбатан қўллаганида Арасту П.нинг қаҳрамон фожиаси, руҳий изтироблари орқали намоён бўлиши ва томошабинда ҳам шунга мос ҳисларни уйғотишини таъкидлайди. Кейинчалик, хусусан, Ўйғониш давридан П. инсон қалбининг хусусияти деб эмас, балки

асарнинг муайян ҳис-туйғуларни уйғота олиш хусусияти сифатида тушунила бошланди, шу боис у күпроқ услугуб, қаҳрамон, күтарин-килик, трагиклик каби тушунчалар билан боғлиқ ҳолда ишлатилди. Гегель эстетикасида П. жуда мұхим ўрин тутади, у санъатнинг ўзаги, «санъат салтанати»нинг асоси сифатида талқин қилинади. Гегельга кўра, П. инсон моҳиятини ташкил этувчи объектив мавжудлик, қалбни ҳаракатлантирувчи кудратли куч бўлиб, ижодкор ўз асарида уни ифодалашни мақсад қиласди, яъни муайян П.ни ифодалаш санъат асарининг муддаоси, ижоднинг мотивидир. Шу асосда Гегель ижодга туртки берувчи мотивлар, П. кўринишлари сифатида «оила, ватан, давлат, черков, шон-шараф, дўстлик, ғурур, номус, муҳаббат» кабиларни кўрсатади. Гегель таърифидаги П. күпроқ асар персонажлари билан боғлиқ бўлса, В.Белинский уни ижодкор шахси билан боғлайди. Унга кўра, П. «гоя-эҳтирос» бўлиб, у ижодкорнинг маънавий борлигидан келиб чиқади. Бу ҳолда алоҳида олинган асар П.и ҳақида ҳам, муайян ижодкорга хос П. ҳақида ҳам гапириш мумкин бўлади. П.ни бундай тушуниш шўро адабиётшунослигида, жумладан, ўзбек адабиётшунослигида ҳам устуворлик қилди. Мас., Г.Поспелов П.ни бадиий мазмуннинг мавзу, проблематика, бадиий ғоя қаторидаги мұхим узвларидан деб билади ва унинг қаҳрамонлик, трагизм, сентиментализм, романтика, драматизм, сатира ва юмор каби турларини ажратади. Шуни қайд этиш лозимки, Г.Поспелов П. термини билан бир қаторда воқеликка гоявий-ҳиссий муносабат терминини ҳам қўллайди. Адабиёт назариясига оид айrim манбаларда эса П. ўрнига автор эмоционаллиги, воқеликка муносабат турлари каби терминлар ишлатилади. Мазкур ҳол ҳозирги адабиётшуносликда П. термини қўлланиши жиҳатидан пассивлашганидан далолат беради. Бунинг сабаби эса унинг ҳодиса моҳиятини тўла қамрай олмаётгани билан боғлиқдир. Агар Арасту-Гегель анъанаси бўйича П. күпроқ персонажлар (объект) билан, Белинскийдан бошлаб ижодкор (субъект) билан боғланган бўлса, ҳозирда субъект – объект – адресат учлигини бирликда олиб қараб, уларни қамраб олувчи бадиийлик модуслари (қ.) термини фаоллашди.

ПЕЙЗАЖ (фр. *paysage* – жой, юрт) – адабий асарда яратилувчи бадиий воқеликнинг мұхим компоненти, воқеалар кечувчи очик макон (ёпиқ макон – *интерьер*) тасвири. Анъанага кўра, П. дейилганда табиат тасвири тушунилади, лекин бу хил тушуниш бирмунча торроқ. Чунки П. нафақат табиатни (агар бу сўз остида бирламчи табиат тушунилса), балки у билан бирга инсон томонидан яратилган

нарсалар тасвирини ҳам күзда тутади. Шу мәннода, мас., бирон-бир хиёбон ёки шаҳар күчасининг тасвири ҳам П., ҳолбуки, улар табиат тасвири эмас, жой тасвиридир. Ёзувчи П.ни воқеалар ривожи-ни тұхтатиб қўйганча муфассал тасвирлаши (*статик* П.) ёки унга тааллуқли деталларни воқеалар давомида бериб бориши (*динамик* П.) мумкин. Асарда П. бажарувчи бирламчи функция воқеалар ке-чаётган жой ва вақт ҳақида тасаввур беришдир. Бироқ П.нинг асар-даги функциялари бу билан чекланмайды, у полифункционаллик хусусиятига эга. Жумладан, П. қаҳрамон руҳиятини очиш воситаси сифатида кенг қўлланади. Бунда жой тасвири (ундаги «ранг»лар) персонаж руҳияти билан уйғунлик касб этиши ҳам, унга контрастли фон бўлиб хизмат қилиши ҳам мумкин; қаҳрамон руҳиятидан ўтказиб берилган П. эса унинг айни дамдаги ҳолатини тасвирлаш воситаси (мас., «Ўткан кунлар»даги ҳайдалган Отабек кўзи билан кўрилган тол) бўла олади. Шунингдек, айрим ҳолларда П. сюжет воқеаларини асослайди ёки уларнинг у ёки бу йўналишда ривожланишига (мас., А.Орипов. «Ҳангома») туртки беради. Турли адабий турларга ман-суб асарларда П.нинг ўрни ва сифати фарқланади. Эпик асарларда анча муфассал тасвирланган П.лар кенг ўрин тутса, драматик асар-ларда фақат шартли равишдагина П. ҳақида гапириш мумкин. Зоро, ремаркаларда жойга хос бир нечта асосий деталларни умумий тарз-да келтиришнинг ўзини фақат шартли равишдагина жой тасвири дейиш мумкин. Лирик асарларда ҳам П. кўпроқ деталлар тарзида мавжуд, бироқ улар лирик сюжетни ривожлантириш, асослашга хиз-мат қиласди, лирик ҳолат вақти ва макони ҳақида тасаввур беради, лирик субъект руҳиятидан ўтказиб берилгани боис ўша кайфиятнинг суратига айланади ёки уни ифодалаш учун фон вазифасини ўтайди ва б. Яъни П.нинг лирикадаги функциялари қўламлироқ, фақат та-свир қўлами (*лэйзаж лирикаси* истисно қилинса) торроқ.

ПЕЙЗАЖ ЛИРИКАСИ – тавсифий лириканинг бир тури, лирик субъектнинг ҳис-туйғу ва кечинмалари табиат тасвири орқали ифодаланган асарлар. П.л.да тасвирланган табиат манзараасида ли-рик субъект қалби суратланади, лирик субъект қалбидан ўтказиб берилган манзара оний кайфиятнинг образига айланади. Шу мәннода, П.л.да табиатни тасвирлаш мақсад эмас, балки бир восита-дир. Лирик асарларни таснифлашда П.л. кўп ҳолларда тематик жиҳатдан ажратилади. Бироқ бу хил таснифда муайян шартлилик мавжуд. Зоро, шеърда пейзаж тасвирлангани ҳолда, у тематик жиҳатдан фалсафий (А.Орипов. «Куз хаёллари»), ижтимоий-сиёсий

(А.Орипов. «Баҳор кунларида кузнинг ҳавоси»), интим (А.Орипов. «Сен баҳорни соғинмадингми?») ва б. йўналишларда бўлиши мумкин. Кўп ҳолларда шеърда тасвирланган манзара рамзий образга айланади ва мавжудликнинг мангу муаммолари, ижтимоий ҳаёт, инсон феъл-атвори, ҳаётнинг мазмуни ва ш.к.лар моҳиятини образли тарзда очиб беришга қаратилади (Ойбек. «Наъматак»). Шеърни П.л.га киритиш учун унда тўлақонли манзаранинг чизилиши тақозо этилади. Шу маънода, пейзаж деталлари кечинмаларга туртки берувчи, лирик ҳолатни яратувчи ва ш.к. композицион унсур вазифасини ўтаган шеърлар билан П.л.ни фарқлаш жоиз. Мас., А.Ориповнинг «Баҳор» шеърида пейзаж элементлари ҳис-туйғуларга туртки беради, уларнинг ривожидаги бурилишларни асосслайди, шеърнинг айрим парчалари – тўлақонли табиат манзараси. Шунга қарамай, «Баҳор» П.л. намунаси эмас, пейзаж деталлари кенг истифода этилган медитатив лирика намунасидир.

ПЕРИПЕТИЯ (юн. *рεγίρετεια* – кутилмаган бурилиш) – сюжет-шунослик категорияларидан бири, воқеа ривожи ва қаҳрамон тақдиридаги кутилмаган кескин бурилиш. Антик драма назариясида П. термини фаол кўлланган бўлиб, бу ҳол антик драма хусусиятлари билан изоҳланади. Жумладан, Арасту «Поэтика»да трагедиядаги П.ни қаҳрамон саъй-ҳаракатининг кўзланганига тамоман зид ҳолатга олиб келиши сифатида тушунтиради. Яъни П.га кутилмаганлик, қандайдир тасодиф туфайли воқеалар ривожи ва қаҳрамон тақдирида кутилмаган эврилишлар юз бериши хос бўлиб, бу қаҳрамон билан тақдири азал конфликти асосига қурилган сюжетларда муҳим аҳамиятга эга бўлган. Мас., Софоклнинг «Шоҳ Эдип» трагедиясида аввал чўпон, кейин эса элчи олиб келган хабар сюжет воқелари ривожида кескин бурилиш ясайди, натижада шодлиқдан қайғуга ёки, аксинча, қайғудан ҳурсандчиликка бирдан ўтиш кузатилади. П.да қаҳрамон ҳаётидаги эврилишлар «баҳтиёрлик – баҳтсизлик» ёки «баҳтсизлик – баҳтиёрлик» схемалари асосида амалга ошади, сюжетнинг бундай тартибда қурилиши асарга қизиқарлилик, ўқишлилик баҳш этади. Шунинг учун П. антик адабиётда, ўрта асрлар ва Уйғониш даври адабиёти намуналарида воқеабанд сюжетларнинг муҳим структуравий унсури бўлган. Бадиий тафаккурнинг реализм босқичига яқинлашиши баробарида, қаҳрамон тақдирида тасодиф, умуман, тақдири азал роли сусайиб, ундаги ўзгаришларнинг ижтимоий-психологик омилларини очишга интилиш кучаяди, шу билан боғлиқ ҳолда П.нинг сюжет структурасидаги роли ва

салмоғи ҳам ўзгаради. Албатта, у изсиз йўқолгани йўқ, чунки, биринчидан, у сюжетга қизиқарлилик бахш этувчи унсур, иккинчидан, инсон ҳаётида тасодиф сезиларли ўрин тутишини ҳам инкор қилиб бўлмайди. Бироқ реализм адабиётида тасодиф ҳам муайян ҳаётий асосга эга, яъни у ҳақиқатга монанд тасвирланади. Mac., «Ўткан кунлар»да Отабекнинг уста Олим билан учрашиб қолиши – тасодиф, уста Парфи сабаб душманини таниши – тасодиф, ғанимлар режасидан воқиф бўлиши – тасодиф ва буларнинг бари ҳаётий заминга эга. Ҳозирги адабиётшунослиқда П. термини, асосан, драматик асарларга нисбатан кўлланади, эпик асарлар таҳлилида эса тушунчани ситуация термини ўзига қамраб олади.

ПЕРИФРАЗ(А) (юн. peri – яқин, атрофида, phrasis – гапираман) – нарса-ҳодиса, жой ёки шахсни ўз номи билан эмас, унга хос тавсифий белгиларни ифодаловчи сўз бирикмаси билан аташ; моҳияттан кўчимга яқин бўлгани учун манбаларда кўчим тури деб кўрсатилади. Mac., «Икки дарё оралиғида Ҳақ адолат топмади қарор» мисраларида географик жойлашшига оид белги орқали Ўзбекистон аталмоқда, бу ўринда нарса ва унинг жойлашиш ўрни алоқадорлиги асосидаги кўчим кузатилади. Ёки «Шарқнинг юлдузи» (Ўзбекистон), «Юртимнинг юраги» (Тошкент), «Шарқ дарвозаси» (Тошкент) каби П.ларда ҳам ўхашлик, функциядошлиқ асосидаги маъно кўчиши мавжуд. Бироқ П.да ҳамма вақт ҳам маъно кўчиши кузатилавермайди. Mac., Тошкент ўрнига «Юртимиз пойтахти», А.Қодирий ўрнига «Миллий романчилигимиз асосчиси», С.Аҳмад ўрнига «қаҳрамон адабимиз» тарзида атаган П.ларда маъно кўчиши мавжуд эмас, улар объектни унга хос белгиларни ўз маъносида ифодалаш орқали атайди.

ПЕРСОНАЖ (лот. persona – шахс, театр маскаси) – бадиий адабиётдаги инсон образи, адабий асардаги воқеа иштирокчиси, ҳисекчинма ва нутқ субъекти. П. термини қаҳрамон, иштирок этувчи (драматик асарда), характер терминлари билан битта синонимик қаторни ташкил қилиб, маъно жиҳатидан нейтрал бўлгани боис бу қаторда доминанта вазифасини ўтайди. Яъни П. термини уларнинг ўрнида бемалол қўлланиши мумкин, бироқ ҳамма П.ларга нисбатан ҳам қаҳрамон, иштирок этувчи ёки характер терминини ишлатиб бўлмайди. Зоро, улар ўзининг асарда тутган мавқеи, ташиётган ғоявий-бадиий юкнинг салмоғи, воқеалардаги иштироки, умумлаштириш даражаси каби қатор жиҳатлардан фарқланади, даражаланади.

ПЕРСОНАЖЛИ ЛИРИКА – субъектив шакллантирилишига кўра фарқланувчи лирика кўринишларидан бири, лирик кечинма ҳам

лирик қаҳрамон, ҳам ўзга бир шахс тилидан ифодаланувчи шеър. Яъни бундай шеърда лирик қаҳрамон билан бир қаторда персонаж (ўзга бир шахс)нинг иштироки ҳам кўзда тутилади. П.л.нинг илдизлари халқ оғзаки ижоди ва мумтоз адабиётга бориб тақалади, уларда П.л.нинг куртаклари мавжуд. Жумладан, мумтоз адабиётимиздаги кўплаб шеърларда ёр, ағёр каби персонажлар иштирок этади. Бироқ, мас., ёр образи мавжуд шеърларнинг барини ҳам П.л. намунаси дейиш тўғри эмас, уларнинг аксариятида ёр тавсифланади, холос. П.л.га киритиш учун эса ўзга шахс шеър субъектларидан бирига айланиши, унинг тилидан ифода этилган лирик кечинма (ўй-фикр, ҳис-туйғу) мустақил ғоявий-бадиий қиммат касб этиши, бошқача айтсан, шеър диалогиклик (полифониклик) хусусиятига эга бўлиши тақозо этилади. Мас., Э.Воҳидовнинг «Ҳозирги ёшлар» шеърини П.л.нинг яхши намунаси сифатида кўрсатиш мумкин. Шеърдаги лирик персонаж – чолнинг ўй-ҳислари лирик қаҳрамон ўй-ҳисларига уйқашгина эмас, тўлақонли ғоявий-эстетик қимматга ҳам эга, чунки шеърда эстетик мушоҳада обьектига иккита нигоҳ билан қарапади, лирик субъект иккапланган. П.л.га хос бундай белгиловчи хусусият А.Ориповнинг «Самолётда ёзилган шеър», Х.Давроннинг «Дунё гўзал...», «Бобур» каби қатор шеърларида ҳам кузатилади.

ПЛАГИАТ (лот. *plagio* – ўғирламоқ) – адабий ўғирлик, ўзга ижодкорнинг асарини ўзлаштириб, ўзининг номидан (ёки тахаллус остида) эълон қилиш. Шунингдек, бирорнинг асаридан айрим парчаларни айнан ўзлаштириб олиш ҳам, мазмунини сақлаган ҳолда шаклини бироз (жумла тузилишини, услубини, айрим сўзларни ва ш.к.) ўзgartириб ўзлаштириш ҳам П. саналади. Афсуски, П. бадиий ижод амалиётида ҳам, илмий ижод амалиётида ҳам учраб туради. Бу эса қонун билан ҳимояланган муаллифлик хуқуқини топташ бўлиб, юридик жиҳатдан ҳам, маънавий-ахлоқий жиҳатдан ҳам номақбулдир.

ПЛЕОНАЗМ (юн. *pleonastmos* – ортиқчалик) – кўпсўзлилик; нафақат муайян мазмунни тўлиқ ифодалаш учун, балки услубий жиҳатдан ҳам ортиқча сўз қўллаш. П. стилистик фигуранлар сира-сига киритилади, лекин меъёрдан бирорзгина чекиниш уни услубий камчиликка айлантиради. Фикрни кучайтириб ифодаловчи восита сифатида сўзлашув нутқида (мас., «ўз кўзим билан кўрдим»), фольклор асарларида («Қора сиёҳ қошлари... Қаро-қаро соchlари...») кенг кўлланади. П.нинг меъёрни сақлаган ҳолда кўлланиши ифоданинг таъсирили, оҳангдор бўлишига хизмат қиласади (Э.Шукур: «Карвон хоки туроб – теварак сароб, Қаёққа кетармиз, эй дил, қаёққа?»).

Ғ.Үуломдан олинган қуидаги шеърий парчада эса мөъёр бир қадар бузилган, шу боис унда ортиқчалик сезилади, П. услугубий камчиликка айланади:

*Құш чиқди
МТС құрасидан,
«Формол», Челябин,
Харьков тракторлари,
Бир эмас, қатор ряд-ряд,
Якка эмас құш чиқди, құш чиқди.*

Бу ўринда бутун бошли шеърий банд биргина «тракторлар қатор-қатор бўлиб чиқди» деган фикрни ифода этади. Албатта, шоир қишлоқда техниканинг кўпайганидан бениҳоя қувонганини изҳор этмоқчи, лекин мөъёр сақланмагани учун ифода ва мазмун орасида номутаносиблик юзага келади.

ПОВЕСТЬ (рус. ҳикоя, ривоят, қисса) – қаранг: қисса

ПОДТЕКСТ – қаранг: тагмаъно

ПОЛИФОНИЯ (юн. polys – кўп, phone – овоз) – мусиқашуносликдан ўзлашган термин, М.Бахтиннинг «Достоевский иходи муаммолари» (1929) асарида илк бор адабиётта татбиқан ишлатилган. Мазкур асарида олим Ф.Достоевский романнинг янги типи – «полифоник роман» яратганини асослаб берди. М.Бахтинга кўра, Достоевскийга қадар яратилган романларда маллиф онги устувор бўлиб, қолган ҳамма нарса, жумладан, қаҳрамон шунга тўла бўйсундирилган. Олим буни «романнинг монологик типи» деб атайди ва, ундан фарқли равишда, полифоник романнинг асосий белгиси сифатида муаллифнинг қаҳрамонларга нисбатан диалогик мавқеда туриши, яъни уларнинг ҳар бири олам ҳақидаги ўз нуқтаи назарига эгалиги ва бу нуқтаи назарларнинг ҳар бири мустақил ҳолда (муаллиф нуқтаи назари билан параллел тарзда, унга бўйсундирилмаган ҳолда) яшашини кўрсатади. Шундан келиб чиқиб М.Бахтин полифоник роман ғояси индивидуал онгда эмас, онглар диалогида яшайди, икки ёки ундан ортиқ онгнинг диалогида воқе бўлади деб ҳисоблайди. Яъни полифоник романдаги ғоялар интериндивидуал, интерсубъектив характерга эгадир. Монологик типдаги рэмандан фарқли равишда, ғоянинг муаллиф онгига бўйсундирилмаганидан полифоник роман проблематикасининг ўзига хослиги келиб чиқади: унда инсон мавжудлиги билан боғлиқ узил-кесил ҳал қилиб бўлмай-

диган муаммолар, инсон ҳаётидаги тасвирланаётган вақтда ҳали тугалланмаган (давом этаётган) ҳолат ва манзаралар акс этади. М.Бахтин роман мисолида кўрсатиб берган П.ни фақат роман доираси билан чеклаб бўлмайди, зеро, олим роман мисолида XIX аср охирларидан бадиий тафаккурда содир бўлган ўзгаришларни очиб берган эдики, шу маънода П.ни бадиий тафаккурнинг янги сифат кўриниши деб тушуниш лозим. Айни чоғда, бадиий тафаккурнинг мазкур шакли монологик тафаккурни инкор қилмайди, яъни бу иккиси бадиий ижод амалиётида ёнма-ён яшайверади.

Полифонизм XX аср фалсафий-эстетик тафаккурига жиддий таъсир кўрсатиш билан бирга адабиётшунослиқда турлича талқинлар, терминни тури маъноларда қўллашларни ҳам келтириб чиқарди. Жумладан, ўзбек адабиётшунослигига баъзан конкрет романни *полифоник* дейиш учун М.Бахтин Достоевский романлари мисолида кўрсатган барча хусусиятларни излаб топишга интилиш кузатилади. Холбуки, М.Бахтин асарлари 80 йиллар муқаддам ёзилган, полифоник роман ҳақидаги таълимоти эса қарийб 130 – 140 йиллар муқаддам яратилган асарлар асосида ишлаб чиқилган. Демак, полифоник роман айнан М.Бахтин айтган барча хусусиятларни ўзида намоён этиши лозим деган даъво ўринисиз, сабаби, орада ўтган вақт ичиди полифонизм бадиий тафаккурда ўзлашиб бўлган, баски, энди у ўзини ўзгачароқ шаклларда намоён қила олади. Яъни монологик роман (тезис)га зид ўлароқ пайдо бўлган полифоник роман (антитезис) кейинчалик уларнинг ҳар иккисига хос жиҳатларни ўзига сингдириши (синтез), синтезлашиш йўлидан бориши табиий. Шу боис полифоник бадиий тафаккур ҳозирда нафақат роман, балки қисса, ҳикоя каби эпик, шунингдек, драматик ва ҳатто айрим лирик асарларда ҳам кузатилиши мумкин.

ПОРТРЕТ (фр. *porterre* – тасвирламок) – 1) персонажнинг сўз воситасида тасвирланган ташки кўриниши (қиёфаси, жуссаси, кийими, юз-кўз ифодалари, тана ҳолати ва ҳаракатлари, қиликлари), ўқувчи тасаввурида жонланадиган тўлақонли инсон образини яратиш ва унинг характеристини очиш воситаларидан бири. П. эпик асарнинг композицион унсури бўлмиш *тавсифнинг* бир кўринишидир. Шартли равишда *статик* ва *динамик* П. турлари фарқланади. Статик дейилишига сабаб шуки, П.нинг бу навида персонажнинг ташки қиёфаси сюжет воқеаси тўхтатилган ҳолда анча муфассал, деталлаштириб чизилади. Одатда, бундай П.лар персонаж асар воқелигига илк бор кириб келган паллада (мас., «Кечак»даги Рассоқ сўфи П.и) берила-

ди. Динамик П. деганда эса муфассал тасвири эмас, балки воқеа ва диалоглар тасвирида, яъни ҳаракат давомида бериб борилувчи персонаж ташки кўринишига хос айрим деталлар назарда тутилади. Бундай П. деталлари (юз-кўз ифодалари, тана ҳолати ва ҳаракати, қилиқлари) кўпроқ ремаркалардан жой олади ва персонажнинг айни пайтдаги руҳий ҳолатини ифодалашга хизмат қиласи. Адабий асар муаллифи персонаж П.ини муфассал чизиши (А.Қодирий яратган Кумуш, Раъно П.лари) ёки унинг қиёфасига хос айрим деталларни бериш билан кифояланиши мумкин. Чунки П. – восита, демак, унинг қандай бўлиши муаллиф бадиий нияти, унинг ўзига хос тасвири услуги, персонажнинг асарда тутган мавқеи каби қатор омиллар билан боғлиқдир. Мас., Чўлпон севимли қаҳрамони Зеби П.ини чизмаган, у персонажнинг сийратини чизади, хатти-ҳаракатларини жонли тасвирлайди, гап-сўзларидаги жонли оҳангни ифодалашга интилади, хуллас, ҳар бир ўқувчининг ўз Зебисини тасаввур этиб олишига имкон яратади. Натижада қаҳрамон қиёфасини чизмасликнинг ўзи ўзига хос бадиий усулга айланадики, унинг ёрдамида адаб ўқувчини қаҳрамонига «яқинлаштиради». Демак, П.нинг қандай ва қай дараҷада чизилиши белгили эмас, бунда асосий мезон П. (ёки П. деталлари)нинг инсон образини ўқувчи тасаввур эта оладиган даражада тўлақонли яратиш учун етарли бўлишидир; 2) бирон-бир шахс ҳаёти ва фаолиятини атрофлича ёритувчи ҳужоатли ёки мемуар очерк типидаги асарлар ҳам аналогия асосида баъзан П. деб аталади (мас., Ажойиб кишилар ҳаёти нашр туркумидаги асарлар). Шунингдек, танқидчилиқда кенг тарқалган ёзувчи ҳаёти ва ижодини ёритувчи адабий танқидий асарлар жанри адабий портрет деб белгиланиб, муомала амалиётida кўпинча П. деб юритилади.

ПОСТМОДЕРНИЗМ (фр. *postmodernisme* – модернизмдан кейинги) – ўтган асрнинг иккинчи ярмидан адабиёт ва санъатда, умуман, ижтимоий-гуманитар соҳаларда кузатила бошлаган оқим, ижодий - метод. Француз постструктурализмининг деконструкция (Ж.Деррида), постфрейдизмнинг «шизоанализ» ва «онгсизлик тили» (Лакан, Ж.Делёз, Ф.Гаттари) таълимотлари ҳамда семиотикадаги киноявийлик концепцияси (У.Эко) П.нинг фалсафий асосини ташкил қиласи. П.нинг юзага келиш вақти, ўзига хослиги масаласида турлича фикрлар мавжуд. Айрим мутахассислар П. 40-йилларда, Ж.Жойснинг «Финнеган маъракаси» (1939) асари билан бошланган деса, бошқалари ўтган асрнинг ўрталарини, яна бир хиллари 70 – 80-йилларни кўрсатадилар. Ҳолбуки, П. терми-

ни анча аввал пайдо бўлган: илк бор П. Винницнинг «Европа маданияти инқирози» (1917) асарида ишлатилган бўлса, Тойнбининг «Тарихни ўрганиш» (1947) асарида төрмин күльтурологик маънода, жаҳон маданиятида европоцентризмнинг барҳам топиши маъносида қўлланади. Адабиётшунослиқда ҳам П. термини XX асрнинг 20-йилларида ишлатилган бўлиб, у адабий жараёндаги модернизмга акс таъсир ҳодисаларини, 60 – 70-йиллар америка адабий танқидчилигига эса ультрамодернистик ижодий тажрибаларни англатган. Терминнинг кенг оммалашиши Ч. Женкс номи билан боғлиқ: у ўзининг «Постмодернистик меъморлик тили» (1977) асарида П. ни неоавангардга хос экстремизм ва нигилизмдан чекиниш, қисман анъаналарга қайтиш маъносида қўллайди. Аслида, П. терминига турли вақтларда берилган таърифларнинг ҳар бири ўзида ҳодисанинг бир қиррасини мужассам этади, бу маъно ўзгаришлири маълум даражада П. нинг шаклланиш жараёнини акс эттиради. Аввало шуни қайд этиш лозимки, модернизм билан П. муносабати масаласида ҳам фикрлар турлича: П. га модернизм тараққиётидаги бир босқич сифатида қараш ҳам, уни модернизмга акс таъсир сифатида майдонга чиқкан янги ҳодиса деб билиш ҳам, эскирган бадиий шакллардан янгиларига ўтиш даври ҳодисаси деб ҳисоблаш ҳам бор. Шунга қарамай, ўтган асрнинг сўнгги чорагидан П. нинг модернизмдан жиддий фарқланувчи ҳодиса эканлиги тобора ошкор кўзга ташланиб, табиийки, у ҳақдаги шунга мос қарашлар ҳам устуворлик касб этиб борди. Ҳозирги адабиётшунослиқда бу икки ҳодисанинг жиддий фарқланиши эътироф этиладики, фарқлардан айримларини кўрсатиб ўтиш мақсадга мувофиқ:

Модернизм	Постмодернизм
Янги адабиёт ва санъатни яратиш даъвоси, анъаналарни инкор қилиш	Анъаналарни ўзига сингдирис ва уларга киноявий муносабатда бўлиш
Оlamни хаос деб билиш, ундан қочиш	Хаос деб билинган оламни қабул қилиш, уни ўйин тариқасида ўзлаштириш
Гўзалликни реалликдан ташқаридан излаш	Гўзалликни реалликдан излаш
Антрапоцентрик гуманизм: инсонга муҳаббат	Универсал гуманизм, унинг обьекти жами тирик мавжудот, табиат, коинот – бутун ОЛАМ

Маданиятда европоцентризм, Европа халқлари маданиятини умумбашарий маданият асоси деб билиш	Шарқ, Лотин Америкаси, Африка, Океания халқлари маданиятига кучли қизиқиши, барча маданиятларни қиммат жиҳатидан тенг билиш
Элитар санъат	Элитар ва оммавий санъат орасида чегаранинг йўқолиши, асарда элита ва оммага мўлжалланган қатламлар мавжуд бўлиши – икки ёқлама кодлаштириш
Семантика, мазмун муҳим	Риторика, мазмунни етказиш шакли муҳим
Жанрлар, улар орасида аниқ чегаралар мавжуд	Жанрлар мутацияси
Иходий жараённинг натижаси – тугал асар муҳим	Иходий жараённинг ўзи муҳим
Иходни индивидуал ҳодиса деб билиш, иходкор фаоллигини ва унинг мазмунни шакллантирувчи марказ эканини эътироф этиш	Иходда индивид ролини инкоркилиш, «муаллиф ўлими» концепцияси
ва бошқалар	

П. назариётчиларига кўра, «П. асли» ҳисобланмиш 70 – 80-йиллардан олам манзараси тамом ўзгарган, аввалгилардан фарқли шарт-шароитлар юзага келган. Жумладан, электрон ахборот во-ситалари, хусусан, телевидение ва интернет тармоғининг ривожланиши маданиятларнинг ажаб қоришувига олиб келдики, турмуш тарзи ва маданиятдаги эклектиклик санъат ва адабиётда ҳам шунга мос эклектикликни келтириб чиқарди. Хусусан, адабиёт ва санъатда европоцентризм, этноцентризмнинг емирилиши, турили санъат «тил»ларининг қоришиб кетиши айни шу ҳол натижаси деб қаралади. Мазкур ҳолнинг яна бир омили сифатида оммавий дидсизлашиш кўрсатилади. Яъни бадиий дид ўтмаслашган, бадиий асар қиммати унинг қанча фойда келтиргани билан ўлчана-диган шароит адабиёт ва санъатдаги турли, ҳатто бир-бирига зид тамо-йилу услубларнинг қоришуви изн беради. Бу эса анъанавий бадиият мезонларини емиради, ҳақиқий санъат билан оммавий санъат орасидаги фарқни йўқотиб, санъатнинг дизайнлашувига олиб келадики, бундай санъатнинг ўзи бадиий дидни ўтмаслаштиради. П. назариётчилари нафақат реализм, балки, умуман, анъанавий санъат оламни тушуниш ва тушунтиришга интилган, шу

мақсадға қаратилған «метаривоятлар»ни яратған деб биладилар. Бундан фарқылы ўлароқ, П. оламни түшүнтириш, у ҳақда яхлит тасаввур ҳосил қилиш, инсоннинг олам ва үндаги ўз ўрнини англашга қаратилған ҳар қандай ҳаракатни бекор қисоблайды ва «метаривоятлар» ўрнига «кичик ҳикоятлар»ни, яъни олам ҳақида умумий эмас, балки фрагментлар тарзидаги узук-юлук «крайоя»ни тақдим этади. Зоро, П.га кўра, оламнинг мавжуд қиёфатида фақат фрагментларгагина ишониш мумкин. Айрим мутахассислар айни шу жиҳатни П.ни модернизмдан фарқловчи муҳим хусусият сифатида кўрсатишиади. Уларнинг фикрича, воқеликни бадиий идрок этиш мумкинлигини инкор қилгани ҳолда, модернизм унинг бадиий моделини яратадики, ҳақиқатда бу модель анъанавий санъат яратувчи «метаривоят»нинг муқобилидир. Яъни модернист санъаткор барибир ўзи англаган ҳақиқатни ифода этишга интилади, демак, унинг асари муайян ижодий ният асосида шакллантирилған концепциядир. Аксинча, П. учун бадиий асар ижодий ният ижросининг натижаси, яъни олдиндан белгиланган ният асосида ижодий жараён маҳсули эмас, балки унинг ўзи жараёндир. Натижада мазмун энди асрдан ташқаридаги воқелик билан боғлиқ «объектив миф» эмас, балки пароканда оламда ихоталаниб яшаётган индивиднинг шахсий таассуротларигина бўлиб қолади. Шу тарика П. анъанавий маданият асосида ётувчи «логоцентризм»ни инкор қилади. Модомити, асосда маъни (логос) турмас экан, демак, уни шакллантираётган субъект – муаллифнинг фаол мазмунни шакллантирувчилик роли ҳам аҳамиятини йўқотади. П.га кўра, муаллифлик масаласининг актуаллашуви янги давр – XVIII асрдан бошланган бўлиб, бу шахс мақомининг ўзгариши, рационализмга хос инсон дунёни ўзгартира олади деган ишонч натижаси эди. Эндилиқда, бу ишончга путур етган бир шароитда, бетартиб ва пароканда оламда инсон ўз ўрнини йўқотгани каби, адабиётда субъектнинг роли ҳам йўқолиши муқаррардир. Бундай қараш, биринчидан, «муаллиф ўлеми» концепциясини келтириб чиқаради, иккинчидан, ижодни шахснинг мақсадли йўналтирилған яратувчилик фаолияти эмас, моҳияттан колектив ижод бўлган «интертекстуал ўйин» сифатида тушунишга олиб келади.

П. ўта мураккаб, серқирига ва зиддиятли, муҳими, фаол ҳаракатдаги ҳодисадирки, у ҳақдаги мавжуд фикрлар тўлиқлик ва тугаллик даъвосини қилолмайди. Юқоридагилар П. ҳақида мутахассислар билдирган турлича фикрларни умумлаштириб, мухтасар ифодалашга бир уриниш, холос. Ҳозирги ўзбек адабиётида П.га хос айрим

белгилар (мас., киноявий модус, интертекстуал ўйин) модернизмга хос хусусиятлар билан қоришиқ ҳолда зухур қилаётгани ҳам бор гап. Бироқ ўзбек адабиётшунослигидаги хали бу масалани тадқиқ этиш деярли бошланмади, уни атрофлича ўрганиш ҳануз эртанинг вазифаси бўлиб қолмоқда.

ПОСТСТРУКТУРАЛИЗМ (фр. poststructuralisme – структурализмдан кейинги) – ижтимоий-гуманитар билим соҳаларида ўтган асрнинг 70-йилларидан бошлаб шаклланган илмий ёндашувларнинг умумий номи. П. структурализм бағрида етишган, унинг давоми ва қисман зидди сифатида майдонга чиқсан бўлиб, баъзан **неоструктурализм** деб ҳам юритилади. П. учун дастурий саналувчи айрим асарлар (мас., Ж.Деррида «Грамматология ҳақида») 60-йилларнинг охиридаёқ чоп этилган бўлса ҳам, 70-йилларда унга структурализмнинг бир қаноти деб қаралган, 80-йиллардан бошлаб концептуал мустақилликка эришган. П.нинг ватани – Франция, унинг йирик намояндлари сифатида Ж.Деррида, К.Касториадис, Ж.-Ф.Лиотар, Ж.Делез, Ю.Кристева сингари олимлар эътироф этилади; АҚШдаги «деконструкция» йўналишидаги адабиётшунослар (Х.Блум, Д.Миллер, П.де Маршаль) ҳам П.га мансуб этилади. Мутахассислар француз структурализмнинг йирик намояндаси Р.Барт фаолиятининг сўнгги босқичида П. мавқеида турганини таъкидлайдиларки, бу ҳам структурализм ва П. орасидаги генетик алоқани яққол намоён этади. Структурализм каби П. ҳам маданиятга лисоний фаолият, матн деб қарайди, лекин уларнинг матнга муносабати кескин фарқланади. Агар структурализм матнга имманент ҳолда ёндашиб, унинг ички қурилишини ўрганиш билан чекланса, П. асосий эътиборни матннинг ортидаги контекстга қаратади. Структурализм матнга турғун ҳодиса сифатида қараб, унинг унсурларини ажратиш ва таснифлаш орқали универсал қонуниятларни очицга интилса, П. матнни ҳаракатдаги ва ўзгарувчан ҳодиса деб билади, бу билан структуралистлар интилган «универсал структура» – «матрица»ни топиб бориш мумкинлигини инкор қиласди. Яъни структуралистлар матнларро ўхшашикларни матн қурилишининг универсал қонуниятлари натижаси деб билса, П. уларни матнларнинг ўзаро алоқаси (*интертекстуаллик*) натижаси деб ҳисоблайди. Контекстга эътибор қаратиши билан П. герменевтикага яқинлашади, лекин матнни тушуниш масаласида ундан фарқлидир. П.га кўра, матнни тушуниш «деконструкция» орқали амалга ошади: аввалига матн элементар узвларга ажратилади («деструкция»), кейин қайта йигилади («ре-

конструкция») ва шу асно матнга ижод онлари контекстида муаллиф ихтиёридан ташқари, англанмаган тарзда ёки ўзи яширишни хохлаганига зид ўлароқ кириб қолган маъноларни очишга интилади. Яъни П. матнда контекст қолдирган «из»ларни қидирадики, бу излар ғайришуурый (онгсизлик) тарзда акс эттани учун, уларни интуитив тарздагина фарқлаш мумкин. Яна бир жиҳати, П.га кўра, конкрет матнда фақат ижод онлари контекстинингтина эмас, балки унга қадар мавжуд бўлган бошқа матнлар «из»и бор, аникрофи, матн ўша изларнинг йигиндиси («текст – қўштироқсиз цитата». Р.Барт), матнлараро ўхшашиклар (гоя, мотив, образ) эса интертекстуал ўйин, турли аллюзиялар, англанган ёки англанмаган цитациялар натижасидир. Шунга кўра, ижодкор воқеликка эмас; балки ўзигача мавжуд бўлган матнларга таклид қилади. Бу қараш эса ижодда индивидуаллик ролини пасайтириш (автор ўлеми), асаддаги образларнинг воқелик билан алоқасини инкор этишга (яъни белги воқеликка ишора қилмайди, у ўзинигина ифодалайди) олиб келади. Модомики, матн «из»лар йигиндиси экан, талқин ҳам матндан ташқарида қоладиган нарсаларни тушунишdir, демак, тушуниш натижага эмас, балки жараён. Айни чоғда, П. учун муҳими тушуниш эмас, балки матн конструкцияси, унинг қандай ясалгани, матн яратиш технологиясини ўрганиш бўлиб қолади.

П.нинг асосчилари, айни чоғда, постмодернизм классиклари ҳам саналади. Худди постмодернизм каби П. ҳам ҳозирда фаолиятда бўлған, демак, ўзгариб, шаклланиб, такомиллашиб бораётган гоят серқирра ҳодисадир. Шу маънода, юқоридагиларни унинг айрим жиҳатларигина деб тушуниш, у ҳақда тўла маълумот олиш учун кўплаб маҳсус адабиётларни ўрганиш лозим.

ПОЭЗИЯ (юн. роіeo, poiesis – ижод қилмок сўйинан) – 1) ҳозирда кенг кўлланувчи маънода бадий нутқни ташкил қилишнинг иккисосий типидан бири, ритмик жиҳатдан ўлчов асосида тартибга солинган нутқ, назм. Шу билан боғлиқ ҳолда, умуман, шеърий йўлда ёзилган асарларни – шеъриятни билдиради: ўзбек поэзияси, 20-йиллар поэзияси ва ҳ.; 2) термин қарийб XVIII асрга қадар санъат тури, бадиият ҳодисаси сифатидаги адабиёт, бадиий адабиёт маъносида ишлатилган ва прозага қарши қўйилган. Бунда П. турга мансублигидан қатъи назар, барча адабий-бадиий (яъни бадиий образ воситасида иш кўрилган) асарлар жамиини, проза эса адабий асарлар (кундаликлар, хотиралар, саёҳатномалар, тарихий ҳикоялар, фалсафий рисолалар ва ҳ.) жамиини англатган.

ПОЭМА (юн. *poieō, poiemata* – иход қилмоқ, иход қилингандың – қаранғ: достон)

ПОЭТИКА (юн. *poietike techne* – иход санъати) – кенг маънода адабиёт назарияси, тор ва ҳозирда күпроқ құлланилаётган маънода адабиёт назариясинг таркибий қисми, адабий асар ҳақидаги таълиморт. П.ни, умуман, адабиёт, сўз санъати ҳақидаги фан – адабиёт назарияси маъносида тушуниш антик даврлардан анъанага айланган. П.ни тор маънода – адабиёт назариясинг таркибий қисми сифатида тушуниш XX асрнинг илк чорагидан бошлаб қарор топган бўлиб, бунда рус адабиётшунослигидаги формал мактаб вакилларининг хизмати катта. Улар адабий асарнинг шаклий томонларига, унинг қурилиши масалаларига асосий эътиборни қаратдилар. Гарчи бу мактабнинг илк босқичида шаклни устун қўйиш, бадиий асар «приёмлар йигиндиси» (В.Шкловский) қабилидаги даъволар бўлса ҳам, кейинча бадиий шакл ва мазмунни уйғун бирликда олиб ўрганиш томон бурилиш кузатилади. Формал мактаб вакиллари ва унга яқин илмий мавқеда турган олимлар тил ва нутқнинг услубий кўринишлари (В.В.Виноградов), бадиий асар тили (Г.О.Винокур), шеърий композицияси, ритм ва метрика (В.М.Жирмунский), шеърий синтаксис ва поэтик интонация (Б.М.Эйхенбаум), сюжет қурилиши (В.Шкловский), сеҳрли эртаклар структураси (В.Я.Пропп) каби қатор масалаларни атрофлича чуқур тадқиқ этдилар. Бу илмий изланишлар адабий асар моҳиятига кириб бориш, унга бадиий жозиба баҳш этган унсурларни очиб беришга қаратилган бўлиб, улар адабий асар қурилиши билан боғлиқ ўрганилиши лозим бўлган масалалар кўлами бенихоя кенглиги ва муҳимлигини кўрсатди. Б.В.Томашевский ўтган асрнинг 20-йилларида: «П.нинг (бошқача айтсак – адабиёт ёки сўз санъати назариясинг) вазифаси адабий асар қурилиши усулларини ўрганишдан иборатдир. П.нинг обьекти – бадиий адабиёт», – деб ёзаркан, П.ни адабиёт назариясига синоним тарзida ишлатса-да, унинг вазифаси «адабий асар қурилиши усулларини ўрганиш» деб таъкидлайди. Шунинг ўзидаёқ П.ни адабиёт назариясинг маҳсус соҳаси сифатида тушунишга мойиллик кузатилади. Худди шу йилларда В.М.Жирмунский П.ни «адабиётни санъат сифатида ўрганувчи фан» дея таърифлайди. Унинг фикрича, эстетик обьект ва эстетик кечинма хусусиятларини белгилаш алоҳида фан бўлмиш П. доирасидан ташқарида, П.нинг вазифаси эстетик обьект – адабий асар структурасини ўрганиш-

дир. Формал мактабга қарши тұрған М.М.Бахтин социологик П. ҳақида сүз юритади ва унинг вазифаси «Адабий асар нима? Унинг структураси қандай? Бу структуранинг элементлари қайсилар, уларнинг функциялари нималардан иборат? Жанр, услугб, сюжет, мавзу, мотив, қаҳрамон, метр, ритм, мелодика ва ҳ. нима?» каби масалаларни ўрганиш» деб таъкидлайди. М.М.Бахтин назарда тутган социологик П.нинг предмети формал мактаб тушунчасидаги П. предметига, асосан, мос келади. Баҳслашувчи томонлар қараашларидаги бу муштараклик ўтган асрнинг 20-йилларида ёқ П. адабиётшуносликнинг ўз предмети, вазифаларига эга бўлган маҳсус тармоғи сифатида кент эътироф этила бошланганини кўрсатади. XX аср ўрталарига келиб П.ни адабиёт назарияси-нинг таркибий қисми сифатида тушуниш тўла қарор топди де-йиш мумкин. Айни шундай талқин, одатда, кўпчилик томонидан эътироф этилган қараашларни акс эттирадиган энциклопедик луғатлар, ўкув адабиётларидан жой олгани ҳам мазкур фикрни тасдиқлайди. Жумладан, В.М.Жирмунский ўкув қўлланмасида: «Сўз санъатининг умумфалсафий, эстетик асосларини адабиёт назарияси ўрганади. П. эса адабиёт назариясининг асосий хуло-саларига таянган ҳолда поэзия фойдаланадиган ифода восита-лари системасини ўрганади», – деб ёзди, адабиёт назарияси ва П.нинг вазифалар доирасини аниқ чегаралаб, уларнинг бир-бирига боғлиқлигини таъкидлади. Ўтган аср ўрталарида чоп этилган 6 жилдлик «Қисқача адабиёт энциклопедияси»да эса П.га «адабий асарларнинг қурилиши ва уларда фойдаланиладиган эстетик во-ситалар системаси ҳақидаги фан» дея таъриф берилган.

Тадқиқ объектини қайси жиҳатдан ўрганиши, масалалари доира-си, ўз олдига қўйган мақсади ва шуларга мос илмий ёндашувидан келиб чиқсан ҳолда П. доирасида умумий (ёки назарий) П., хусусий П. ва тарихий П. соҳалари фарқланади. Умумий П. кўпинча назарий П., баъзан эса «макропоэтика» деб ҳам юритилади. Умумий П. асарнинг ички қурилиши (фоника, ритмика, строфика, стилистика, образлар тизими, сюжет-композиция сатҳлари) билан боғлиқ уму-мий қонуниятларни очиш, бадиий воситалар ва усууллар тизимини ишлаб чиқиши мақсад қиласи. Назарий П.дан фарқли ўлароқ, ху-сусий П. худди шу ишни конкрет асар доирасида амалга ошира-ди, ўша асарнинг бадиий ўзига хослигини очиб бериш, тавсифлаш мақсадини кўзлайди. Тарихий П. эса алоҳида бадиий усул ва воси-таталарнинг тарихий тадрижини қиёсий ва типологик аспектларда ўр-

ганади. Таъкидлаш жоизки, адабиётшуносликда тез-тез учрайдиган «романтизм П.си», «Чехов П.си», «структурал П.» каби бирималар маъноси ҳам бевосита атаманинг асосий маъносидан ўсиб чиқади. Мас., «романтизм П.си» дейилгандага романтизм йўналишига мансуб асарларнинг қурилишига хос умумий хусусиятлар, бадий усул ва воситалар тизими назарда тутилади.

ПОЭТИК ТИЛ – қаранг: бадий тил

ПРОЗА (лот. prosa – тўғри, одатий) – 1) ҳозирда кенг қўлланувчи маънода бадий нутқнинг икки асосий типидан бири, ритмик жиҳатдан ўлчовли тартибга солинмаган нутқ, наср. Шу асесда умуман насрда ёзилган асарларни – эпик турга мансуб асарларни билдиради: ҳозирги ўзбек прозаси, замонавий проза ва х.; 2) XVIII асрга қадар поэзия билан қарши қўйилган ҳолда санъатга мансуб бўлмаган, яъни бадий образ воситасида фикрламайдиган адабий асарларни билдирган.

ПРОЗАИЗМ – бадий матн таркибида бегона, ўринсиз кўринадиган сўз, сўз шакллари, синтактик бирликлар П.лар деб юритилади. Адабиётда анъаналар, хусусан, бадий тил анъанавийлиги кучли бўлган даврларда бадий матнга одатий мулоқотга хос нутқ бирликларининг киритилишига жiddий камчилик деб қаралган. Бундай муносабат наср бадий нутқнинг назм билан тенг хуқуқли шакли сифатида кечроқ (Фарбда XVIII асрдан кейин) тан олингани, поэзия билан проза бир-бирига қескин қарши қўйилгани билан изоҳланади. Ўзбек шеъриятига бадий тил анъаналарига хилоф сўз ва синтактик конструкциялар – П.ларнинг қўллаб кириб келиши XX аср бошлари га тўғри келади ва бу ҳол адабиётнинг тематик доираси кенгайгани, унинг ҳаётга яқинлашуви билан изоҳланади. Мас.:

Нонеойда йўқдур инсоф, андин ўтадур аллоф,
Кўр, чакса ун хамири қирқ икки нон бўлубдур.

Алҳол муҳтасиб йўқ, бир-икки қисса ул дўйқ
Ичкуга халқ рогиб, доим фиён бўлубдур.

Кўб қозихоналарда ушбу замоналарда
Ишдин закунчилар кўб, эмди ямон бўлубдур.

Ёки:

Бир кунда ўн десят өр ҳайдаб қилурга тайёр,
Гар ҳайдар эрса бир бор, обод этиб трактур.

Яна:

*Бир неча йиллар ичинда шаҳримиз жаннам бўлар,
Бул тариқа бошчилар қилса ташаббуслар агар.*

Ибрат ғазалларидан келтирилган бу парчаларда фақат ўз даври учун янги сўзларнинг киритилиши эмас, ифоданинг ўзи ҳам П.лар саналиши мумкинки, улар оддий гаплар вазнга солиб айтилгандек таассурот қолдиради. Адабиётда реалистик тенденцияларнинг ку чайиб бориши баробарида, П.ларга муносабат ҳам юмшадики, бу сўз эстетик қимматининг қайта кўриб чиқилиши билан боғлиқ. Айни чоғда, бу бадиий тил анъаналарини тўла инкор қилиш дегани эмас, яъни бадиий тилни, айниқса, шеърий нутқни сўзлашув тилига яқинлаштиришда муйян меъёрни сақлаш зарур...

ПРОЛОГ (юн. *rго* – олдидағи, *logos* – сўз) – адабий асарнинг кириш қисми, муқаддима. П.лар мазмун мундарижасига кўра турлича бўлади: асарнинг ёзилиш сабабини изоҳлаш, асосий мазмунини мухтасар баён этиш, асар вақтигача юз берган воқеаларнинг қисқа баёни ва ҳ. Шунга кўра, П.лар турли бадиий-эстетик мақсадларга хизмат қиласи: ўкувчини асар воқелигига олиб кириш, тасвирланажак воқеаларнинг юз бериш омиллари ҳақида умумий тасаввур бериш, муйян эмоционал-ҳиссий ҳолат ҳосил қилиш ва ҳ. Ҳар қандай муқаддима эмас, фақат бадиий муқаддимагина П. саналиши мумкин. Яъни П. саналиши учун муқаддима бадиий матннинг узвий қисми бўлиб қолиши зарур, асосий матндан яққол ажралиб (ўзаро асосий матн – ёндош матн муносабатидаги) турган сўзбошиларни П. санаш тўғри эмас. Мас., «Ўткан кунлар»нинг «Ёзувчидан» деб номланган кириш қисми асосий матннинг узвий қисми бўлмай, балки ёндош матнdir. Чўлпоннинг «Кеча» романи бошланишидаги мўъжазгина баҳор тасвири эса матннинг узвий бўлраги. Шу маънода, «Ўткан кунлар»да муаллиф ижодий ниятлари изҳор этилган алоҳида сўзбоши, «Кеча»да эса ўкувчини тасвирланажак воқеаларни қабул қилишга эмоционал жиҳатдан тайёрлашга қаратилган лирик характердаги П. мавжуддир.

ПРОТОТИП (юн. *prototypon* – образ асоси) – адабий асардаги образнинг яратилишига асос бўлган реал шахс. П. бадиий образ учун материал бўлиб, унинг ёзувчи бадиий ниятига мувофиқ қайта ишланиши асосида бадиий персонаж – бадиий образ яратида. Яъни бадиий персонаж ҳеч вақт П.нинг айнан ўзи эмас, балки унинг ёзувчи ижодий тафаккури маҳсули ўлароқ дунёга келган

«бадий эгизаги»дир: улар орасида ўхшашлик бўр, айнан мослиқ эмас. Шунинг учун ҳужоатли асарлардаги персонажлардан фарқли равишда, бадий асарлардаги П. асосида яратилган персонажлар кўпроқ ўзга ном билан ҳаракатлантирилади. Мас., «Ой ва сариқ чақа» (С.Моэм) романидаги Чарлз Стрикленд образининг П.и машҳур рассом Поль Гоген бўлса, «Қалдирғоч» (Т.Малик) қиссасидаги Асадулла Миръялам образининг П.и улуг маърифатпарвар Абдулла Авлонийдир. Замонавий мавзуларда ёзилган асарларда ҳаракатланувчи персонажлар ўқувчига у ёки бу реал шахсни эслатади, ўша реал шахс қанчалик машҳур бўлса, персонажда уни таниб оловчилар доираси шунчалик кенг бўлади. Мас., ўтган асрнинг 80-йиллари охирлари – 90-йиллари бошларида М.М.Дўстнинг «Лолазор» романидаги Ошно, Назар Яхшибоев, Катта пахтакор, Курбоной ёки С.Аҳмаднинг «Жимжитлик» романидаги Мирвали образларининг П.ларини аксарият ўқувчилар таниб олганлар. Умуман, кенг маънода қаралса образининг материали воқеалик экан, ҳар қандай образнинг ҳам ҳаётда маълум асоси, яъни ёзувчи ҳаётида дуч келган, кузатган, мулоқотда бўлган шахслар борлиги, ўша шахсларнинг маълум жиҳатлари образда акс этиши табиийдир. Бироқ П. ҳакида, одатда, у билан образ орасидаги ўхшашликлар яққол сезилса ёки П. ёзувчи ижодий лабораториясини ўрганишда аҳамиятли бўлсагина гапирилади.

ПСИХОЛОГИК МАКТАБ – XIX асрнинг охирги чорагида Европа ва рус адабиётшунослигида майдонга келган илмий йўналиш. П.м. маданий-тарихий мактаб ва биографик метод қарашларини қайта идрок этиб, уларни ривожлантириш асосида шаклланган. Худди маданий-тарихий мактаб каби П.м. ижодкор шахснинг шаклланишида оила, ижтимоий мухит, давр сингари омилларнинг муҳимлигини эътироф этади, биографик метод каби бадий асарда ижодкор шахси акс этади деб билади. П.м. мазкур қарашларни бирлаштиради, яъни бу омилларнинг бари ижодкор руҳияти орқали намоён бўлади деб ҳисоблайди ва шундан келиб чиқиб ижодкор руҳий биографияси, бадий ижоднинг руҳий томонларини ўрганишни диққат марказига кўяди. П.м.га кўра, бадий образ инсон кўнглида дунё билан алоқа таъсирида пайдо бўлган кечинмаларнинг ташқарига чиқиши, моддийлашуви натижасидир. Ижодкор, аввало, ўзи учун ёзади: у асарда ўзини қийнаётган дардлар, ўй-ҳисларни ифодалайди ва шу орқали улардан фориғ бўлади, асар ижодкор қалби моделидан ўзга нарса эмас. Шунга асосан, П.м. конкрет асарга хос жами хусусиятлар ил-

дизини ижодкор шахсияти, унинг руҳий ўзига хослигидан қидиради, асарлар бир-биридан фарқли бўлишининг сабабини эса турли кечинмалар ва турли ижодкор психологик типлари мавжудлиги билан изоҳлайди. Яъни асарнинг қандай бўлиши кўп жиҳатдан ижодкор психологик типи билан боғлиқ. Мас., Д.Н.Овсянико-Куликовскийга кўра, объектив ижодкор табиатан ўзига ёт бўлган қаҳрамонларни, субъектив ижодкор эса ўзига руҳан яқин бўлган қаҳрамонларни тасвирлайди; эгоцентрик бўлмаган ижодкор (мас., Пушкин, Чехов) ҳаётни кузатиш орқали ўз хулосаларини хотиржам ифода этишга, эгоцентрик ижодкор (мас., Гоголь, Достоевский) эса воқелик устида турли тажрибалар ўтказишга мойил бўлади ва ш.к. Албатта, ижодкор типларини бу тарзда фарқлашни ҳам, асарга хос айрим хусусиятларни тушунтиришда уларнинг аҳамиятини ҳам инкор этиб бўлмайди, бироқ П.м.нинг қарашларида буларни мутлақлаштириш кузатилади ва оқибатда адабиёт (бадиий тафаккур) тараққиёти қонуниятлари, унинг ижтимоий ҳаёт билан боғлиқлиги деярли четга сурилиб қолади. Мутлақлаштириш бадиий асар мазмунни масаласида ҳам яқъол кўзга ташланади, бунда ҳам субъектив ибтидо устуровлик касб этади. П.м. бадиий мазмунни оний ҳодиса ҳисоблайди, яъни бадиий асар мазмунни ўқувчи онгода шаклланади, ҳар бир ўқувчи ўзининг бетакор ҳаётий тажрибасидан келиб чиқсан ҳолда мазмунни шакллантиради. Бундай қараш адабиётшунослик масалаларини фалсафий асосда, тил ва лисоний мулоқот қонуниятларидан келиб чиқсан ҳолда тушунтирган А.Потебня фикрларига асосланади. А.Потебняга кўра, лисоний мулоқотда фикр эмас, балки фикрнинг моделигина («ташқи шакл») етказилади: тингловчи уни «ички шакл» (ташқи шакл онгда уйғотган тасаввур) билан боғлаган ҳолда фикрни (мазмунни) англайди. Яъни сўзловчи фикрни бевосита етказаёттани йўқ, уни моделга таянган ҳолда тингловчининг ўзи қайта ҳосил қилмоқда. Олимнинг фикрича, адабий асарнинг ўқилишида ҳам худди шу қонуният амал қилади. Табиийки, бундай ёндашув диалогиклик қонуниятига зид бўлиб, адабиёт моҳиятини торайтиришга олиб келади. Жумладан, А.Потебня санъаткорнинг вазифаси асарни яратаБтган вақти унга муайян мазмун минимумини юклаш эмас, балки образни ўқувчи онгода турли мазмунларни шакллантиришга асос бўла оладиган даражада серқирра қилиб яратишдан иборат деб ҳисоблайди.

П.м.нинг алоҳида илмий мактаб, йўналиш сифатидаги фаолияти XX аср бошларида барҳам топиб, унинг ўрнини интуитивизм ва

психоанализ эгаллади. Шунга қарамай, П.м. адабиётшунослик ривожида сезиларли из қолдирди, унга хос таҳлил тамойиллари қатор илмий муаммоларни янгича ёритишга имконият яратди ва бу билан сүз санъатини илмий билиш доирасини кенгайтирди. Ҳозирги адабиётшуносликдаги күплаб йұналишлар П.м. ишлаб чиқкан таҳлил усулларини ижодий үзлаштириб, улардан үз адабий-эстетик системалари доирасида самарали фойдаланмоқда.

ПЬЕСА (фр. *piece* – парча, қисм) – драматик турға мансуб ҳар қандай асар. Термин XX асрдан бошлаб шу маънода құлланади, драматик асар, жанридан қатын назар – у трагедия, комедия ё драма бўладими, П. деб ҳам юритилаверади.

P

РАВИЙ (ар. ፭፻ – юкни туяга боғлайдиган арқон) – қофияланиб келаётган сүз ўзаги ёки негизи охирида айнан тақрорланиб келувчи чўзиқ унли ёки ундош. Мумтоз поэтикада қофияланаётган сүзларда Р.нинг айнан тақрорланиши шарт ҳисобланган. Навоий «Мажолис ун-нафоис»да Атойининг машхур:

*Ул санамким сув яқосинда паритек ўлтуурур,
Ғояти нозуклигидин сув била ютса бўлур, –*

байти ҳақида «қофиясинда айбғинаси бор» деганида айнан Р.нинг йўқлигини назарда тутган (бўлур – ўлтуурур). Яъни биринчи мисрадаги «ўлтуурур» сўзининг ўзаги «р» билан, «бўлур» сўзининг ўзаги эса «л» билан тугамоқда.

РАДД (ар. ر - қайтармоқ) – мумтоз адабиётдаги шеърий санъат, бир сўзни байтнинг турли ўринларида тақрорлаш. Сўз байтнинг қайси ўринларида тақрорланаётганига қараб Р.нинг бир неча турлари фарқланади ва уларнинг ҳар бири тақрорланиш ўрнини ифода этувчи алоҳида номга эга. Mac., *раддул ъажз ъала садр* (қ.) каби. Бундан ташқари, шеърда қофия, матлаъ каби унсурларнинг турли кўринишларда тақрорланиб келиши ҳам мана шу истилоҳ билан юритилади: *радд ул-қофия* (қ.), *радд ул-матлаъ* (қ.) каби.

РАДД УЛ-МАТЛАЪ (ар. رد المطاع - матлаънинг қайтарилиши, тақрорланиши) – мумтоз адабиётдаги шеърий санъат. Номланиши «матлаъни тақрорлаш» маъносини берса ҳам, амалда ғазал матлаъси ёки қасиданинг биринчи байти таркибидаги мисралардан бирининг сўнгти байтда (баъзан оралиқдаги байтлардан бирида) тақрорланиши ҳам Р.м. деб юритилаверади. Мисранинг тақрорланиши шунчаки тақрор бўлмай, балки маълум бир поэтик мақсадни кўзлайди. Ғазал матлаъси ёки қасиданинг биринчи байтида илгари сурилган фикр-гояни шоир кейинги байтларда ривожлантириб боради,

шеър ниҳоясида эса байт (мисра)ни тақрорлаш орқали ўша фикр-ғояни таъкидлайди. Натижада матлаъ (ёки унинг бир мисраси)да ифодаланган фикр-ғоя, ҳис-кечинма тўлишади, ёрқинроқ ифодасини топади. Зоро, тақрорланаётган матлаъ (мисра) гўё ўзидан аввал келган байтлардаги мазмунни сингдириб олади ва умумлаштириб ифода этади. Ўзбек мумтоз шеъриятида Навоийдан кенг қўллана бошлаган ушбу санъатнинг гўзал намуналарини деярли барча шоирлар ижодида учратиш мумкин. Хусусан, Э.Воҳидов шеъриятида Р.м. санъатидан жуда самарали фойдаланилган. Mac., шоирнинг:

*Тушда кўрдим дилбаримни, эй сабо, уйғотмагил,
Олма бир дам васл шавқин, қўй, мени қўзғотмагил, –*

матлаъси билан бошланувчи ғазали мақтаъсида матлаънинг ilk мисраси тақрорланади:

*Гар ўқотсам бу кеча мен қайга боргум ахтариб,
Тушда кўрдим дилбаримни, эй сабо, уйғотмагил.*

РАДД УЛ-ҚОФИЯ (ар. رد القافية – қофиянинг қайтиши, тақрор келиши) – мумтоз адабиётдаги шеърий санъат, ғазал ёки қасиданинг биринчи байти мисраларидаги қофия ҳосил қилаётган сўзлардан бири ёки ҳар иккисининг кейинги байтларда, баъзан эса мақтаъда айнан тақрорланиши. Mac., Лутфийнинг:

*Қон бўлди кўнгул фироқингиздин,
Жон куйди ҳам иштиёқингиздин, –*

матлаъси билан бошланувчи ғазали биринчи мисрасидаги қофия мақтаъда яна тақрорланиб келган:

*Бу Лутфийи ҳастани сўрунгким,
Бечора ўлар фироқингиздин.*

РАДД УЛ-ЪАЖЗ МИН АС-САДР (ар. رد العجز من الصدر – садрдан ажзга қайтиш) – мумтоз адабиётдаги шеърий санъат, бир сўзнинг байтнинг турли ўринлари (садр, ҳашв, аruz, ibтидо, зарб)да тақрорланиши. Бунда тақрорланаётган сўзлар бир хил маъноли бўли-

ши, ўзаро тажнис (омонимик муносабат) ёки иштиқоқ (ўзакдош) ҳосил қилиши, шунингдек, шибҳи иштиқоқ, яъни асли ўзакдош бўлмаса-да, ёзилиши (омограф) ёки талаффузи (омофон)га кўра яқин бўлиши мумкин. Шулардан келиб чиқсан ҳолда Р.а.м.с. тарзида умумий ном билан юритилувчи мазкур санъатнинг турли кўринишлари фарқланади. Мас., қуидаги байтларда бир хил маъноли сўзлар байтнинг турли ўринларида такрорланади:

*Ишқ ўти тушган кўнгулга ўзга ўт бөзонадир,
Мен бўлибман, воҳ ажаб, дардманди шеър, бемори ишқ.*

*Ой жамолининг акси кўзгу бағрига тушди,
Рашк ўтида бағримни ўртар-у ёқар кўзгу.*

Навоийнинг:

*Гар Навоий хўблар сайдидур, аммо қилмамиш
Сендин ўзга кимса ул ошуфтаи расвони сайд, –*

байтида такрорланаётган сўзлар ўзаро омонимик муносабатда (биринчи мисрадаги сайд сўзи «ўлжга» маъносида, иккинчи мисрада «ов жараёни» маъносида келган) бўлиб, тажнис ҳосил қиласа, Атойининг:

*Номуроде бўл, Атойи, дилбарунг йўлиндаким,
Дилбар ўқтур, ошиқи содиққа дилбардин мурод, –*

байтида эса ўзакдош сўзлар такрорланиб иштиқоқ ҳосил қиласи.

РАДДУЛ ЪАЖЗ ЪАЛА САДР (ар. رالعجم على الاصدر – ажздан садр-га бориш) – мумтоз адабиётдаги шеърий санъат, байт охири (ажз ёки аруз)да келган сўзни кейинги байт боши (садр)да такрорлаш. Ушбу санъат илми бадиъга оид манбаларда мутобиқ, муқаддар истилоҳлари билан ҳам юритилади. Мас.:

*Кечакундуз қилма гулбонгинги бас, эй андалиб,
Ким санга беш кун бу гулшан ичра меҳмон бўлди гул.
Гул чоги ёри сафар айлаб, Навоий жонига
Хар бири бир тоза қонлиғ дого ҳижрон бўлди гул.*

РАДИФ (ар. رادیف – отнинг орқасига эргашиб, мингашиб келувчи, изма-из борувчи) – мумтоз лирикадаги шеър унсурларидан бири, шеър давомида барча байт (ёки мисра)лар охирида қофиядан сўнг айнан тақрорланиб келувчи сўз, сўз бирикмаси. Яъни моҳияттан Р. ҳам сўз тақрорининг хусусий кўриниши бўлиб, фақат унинг тақрорланиш ўрни қатъий белгиланган. Иккинчи томондан, шеър унсурни сифатида Р. ритмни таъкидлаб кучайтириш функциясини ўтайдики, бу сўз тақрорининг ҳамма кўринишларига ҳам хос эмас. Ниҳоят, Р. сўз ёки сўз бирикмасининг шунчаки тақорори эмас, у байт (ёки мисра) билан ажралмас мазмуний алоқада бўлиб, фикртуйгуларни таъкидлаш, кучайтириш каби вазифаларни ҳам бажаради. Мас., Оғаҳийнинг:

*Дўстлар, бу кун ажаб бир сарв қомат кўрмишам,
Сурати боштин оёқ гарқи латофат кўрмишам, –*

матлаъсида «қомат» ва «латофат» жуфтлиги қофияни ҳосил қилса, улардан кейин тақрорланиб келаётган «кўрмишам» сўзи Р. бўлиб, у ғазалдаги кейинги барча байтларнинг иккинчи мисрасида «қомат-латофат» жуфтлиги билан қофиядош сўзлардан кейин тақрорланади. Машрабнинг қуидаги байтида Р. бир неча сўздан иборат:

*Муродингга ётай десанг, қаландар бўл, қаландар бўл,
Ситам аҳлин ютай десанг, қаландар бўл, қаландар бўл.*

Айрим ҳолларда Р. бундан ҳам кўпроқ сўзлардан таркибланиб, мисранинг асосий қисмини эгаллаши ҳам мумкин. Мас., Навоийнинг «Жондин сени кўп севармен, эй умри азиз», Бобурнинг «Туз оҳ, Захириддини Мухаммад Бобур» мисраси билан бошланувчи рубоийларида ўзаро қофияланаётган мисралар фақат қофия ва Р.дангина иборатдир. Мумтоз шеъриятимизда Р. ғазалларда, айниқса, кенг кўлланади. Шу боис ғазални ё матлаъ, ё Р. билан аташ кўпроқ расм бўлган: «Навоийнинг «Топмадим» Р.ли ғазали», «Бобурнинг «Қолдиму» Р.ли ғазали» ва ш.к.

РАЖАЗ (ар. رجاء – туя ҳолдан тойганда пайдо бўладиган қалтироқ касали) – аруз баҳрларидан бири, мустафъилун аслининг (– – v –) тақороридан ҳосил бўлади. Мазкур баҳр изтиробли оҳангга эгалиги учун шундай номланган. Р. ўзбек шеъриятида анча фаол кўлланадиган баҳрлардан ҳисобланади. Алишер Навоийнинг «Мезон

ул-авзон»ида Р.нинг ўн уч вазни, Бобурнинг «Мухтасар» асарида эса олтмиш уч вазни мисоллар билан санаб ўтилган. Ўзбек шеъриятида Р. баҳрининг саккиз руқнили, тўрт руқнили вазнларидан кенг фойдаланилган. Р. баҳрида ёзилган шеърларнинг ўзбек шеъриятидаги дастлабки намуналари «Қисаси Рабгузий»да учрайди. Навоийнинг жами йигирма тўрт шеъри (жумладан, йигирма икки ғазал, бир қитъа, бир муаммо) Р. баҳрида ёзилган. Бундан ташқари, Атойи, Саккокий, Лутфий, Гадоий, Огаҳий каби мумтоз шоирлар билан бирга замонавий шоирлар ижодида ҳам Р. баҳридан кенг фойдаланилди. Мас., Огаҳийнинг «Устина» радифли машҳур ғазали *ражази мусаммани солим* вазнида бўлиб, унинг чизмаси: – – v – / – – v – / – – v – / – – v – кўринишидадир:

*Қилғил тамошо қомати зебоси бирла оразин,
Гар кўрмасанг гул бўлғонин пайванди шамшод устина.*

РАМАЛ (ар. رمل – туяниң лўқиллаши, куй номи) – аруз баҳрларидан бири; фоилотун асли (– v – –) тақоридан ҳосил бўлади. Баҳрнинг оҳангি туяниң лўқиллашига ўхшагани учун шундай номланган. Фоилотун руқнида бир *ватад* икки сабаб орасига бўйра тўқилганга ўхшаш ҳолатда жойлашгани учун *рамала*, яъни тўқиши маъносини билдирувчи сўздан олинган деган фикрлар ҳам бор. Р. баҳри ўзбек мумтоз шеъриятида энг кўп ишлатилгани учун у *туркий баҳр* деб ҳам юритилади. А.Навоийнинг «Мезон ул-авзон»ида Р.нинг ўн уч вазни, Бобурнинг «Мухтасар» асарида эса эллик тўққиз вазни мисоллар билан санаб ўтилган. Ҳусайний (Ҳусайн Бойқаро) қаламига мансуб ғазалларнинг бари шу баҳрда ёзилган бўлиб, бу Р.нинг жуда фаол қўлланганига ёрқин далиллар. Шеъриятимизда Р.нинг 8 ва 6 руқнили жами йигирма тўрт вазнидан кенг фойдаланиб келинган. Р. баҳрида ёзилган шеърларнинг дастлабки намуналари «Қисаси Рабгузий»да учрайди. Навоийнинг «Хазойин ул-маоний» девонидаги 1827 та (ярмидан кўпи) шеър Р. баҳрида ёзилган. Мас.:

*Дилбаро, сөндин бу ғамким, менда бордур, кимда бор?
Фурқатингдин бу аламким, менда бордур, кимда бор? –*

матлаъли ғазали *рамали мусаммани маҳзуф* вазнида. Манбаларда фоилотун руқнининг байт таркибида ҳеч қандай зиҳофга учрамаган

ҳолда такрорланишидан ҳосил бўладиган вазн (рамали мусаммани солим: -v - - / - v - - / - v - - / - v -) шеъриятимизда Навоийгача ҳам, ундан кейин ҳам мутлақо қўлланмагани, фақат Навоийнинг «Хазойин ул-маоний» куллиётида биргина ғазал мана шу вазнда яратилгани айтилади. Унинг матлаъси:

*Эй жамолу раҳматингдин гар залшу гар муаззаз,
Сафҳаи кавнайн ўлуб отинг тарозидин муттарраз.*

«Мезон ул-авзон»да эса ушбу вазнга мисол сифатида қуйидаги байт келтирилган:

*Келки, ишқингдин кўнгулда йўқтуур сабру қарорим,
Бошима еткур қадамким, ҳаддин ошти интизорим.*

РАМЗ (ар. رمز – имо, ишора, имлаш) – символ; кўчим турларидан бири, фақат шартли равишда ва шу матн доирасида кўчма маъно касб этувчи сўз ёки сўз бирикмаси; образлилик тури. Р. моҳиятан аллегорияга яқин, ундан фарқи шуки, Р. контекст доирасида ҳам ўз маъносида, ҳам кўчма маънода қўлланади. Р.нинг маъноси контекст доирасида ва шартдан хабардорлик бўлганда реаллашади. Mac., Чўлпон шеъриятидаги «юлдуз», «булут», «баҳор», «қиши» образлари Р.нинг ёрқин мисоли бўла олади. Жумладан, машхур «Қаландар ишқи» шеърини ишқий мавзудаги шеър сифатида тушунавериш мумкин. Бироқ ундаги Р.лар қатида бошқа маъно ҳам мустақил ҳолда мавжуд бўлиб, уни ўз вақтида шоирга руҳан яқин кишилар яхши тушунишган. Сабаби, улар рамзларнинг маъноси англашиладиган контекстдан – шоирнинг ҳаёт йўли, орзу-интилишлари, шеър ёзилган пайдаги руҳий ҳолати ва ҳ. омиллардан хабардор бўлганлар. Демак, Р. маъноси ҳозирда ҳам Чўлпоннинг ҳаёт йўли ва ижодий мероси контекстидагина англаниши мумкин. Р.нинг табиатини Р.Парфи шеъридан олинган қуйидаги парча мисолида кўриш мумкин:

*Яна келдим маҳзун гўшага,
Бунда бир най ётибди синиб.
Кўй, сигинма ортиқ ўшангага,
Кўй, сигинма унга, севгилим...*

Парчадаги «синган най» рамздир. Мазкур рамзни ўз маъносида ҳам (яъни гарчи нотабий кўринса-да, ўша гўшада чинданам синган най ётибди маъносида), лирик қаҳрамоннинг йўқотилган ҳислари, армонга айланган орзулари маъносида ҳам тушуниш мумкин. Кейинги ҳолда «синган най»ни Р. сифатида қабул қилган бўламиз. Муҳим томони шуки, «синган най» билан «йўқотилган ҳислар, армонга айланган орзулар» орасида метафорадаги каби ўхшашилик ёки методнимиядаги каби алоқадорлик асосидаги муносабат йўқ. Яъни «синган най» фақат шу контекст доирасидагина шартли равишда ўша мазмунни ифодалайди. Худди шу гап Чўлпоннинг «Қаландар ишқи» шеъридаги «ёр», «муҳаббат», «денгиз», «юлдуз», «куёш» Р.ларига ҳам тааллуқли. Зоро, улар ҳам ўзлари ифодалаётган рамзий маъно билан ўхшашилик ёки алоқадорлик муносабатида эмас, фақат шартли равишдагина (шартдан, контекстдан боҳабар кишиларга) рамзий маънони ифодалайдилар. Шартдан, контекстдан беҳабар ўқувчи учун эса шеърнинг фақат бевосита мазмуни, юзадаги мазмунигина мавжуддир.

РЕАЛИЗМ (лот. *realis* – мавжуд, ҳақиқий) – адабиётшунослика Р. термини тор ва кенг маъноларда қўлланади. Кенг маънода Р. терминининг маъноси бадиий асар (унда тасвирланган бадиий воқелик) билан реал воқелик муносабатидан келиб чиқади. Яъни бу ҳолда Р. умумэстетик тушунча бўлиб, ҳаётни ҳақиқатга (реалликка) мувофиқ тасвирлашни, ҳаёт ҳақиқатини билдиради. Ҳар қандай бадиий асарда воқелик ўёки бу тарзда акс этиши, воқеликни ҳаётга монанд тарзда акс эттириш эса қадимдан мавжудлиги эътиборга олинса, бу маънодаги Р.нинг илдизлари жуда қадим замонларга тақалиши табиийдир. Шу боис адабиётшунослика *антик* Р. (ёки *мифологик* Р.), уйғониш даври Р.и, *маърифатчилик* Р.и каби атамалар ишлатилади, табиийки, бу маънодаги Р. *классицизм, сентиментализм* каби йўналишларга ҳам хосдир. Демак, бу маънода Р. термини ҳаётни бадиий акс эттириш принциплари, бадиий тафаккур типини англатади.

Тор маънода Р. ҳаётни ҳақиқатда мавжуд нарса-ҳодисалар моҳиятига мувофиқ тарзда, воқеликда мавжуд фактларини *типиклаштириш* (к.) асосида яратилган бадиий образлар орқали акс эттиришга асосланувчи ижодий метод ва онгли равишда шу методга таянган адабий йўналишни билдиради. Ушбу метод (йўналиш)нинг майдонга чиқиши XIX асрнинг ўрталарига тўғри келади. Р. методида адабиётнинг билиш функцияси устувор аҳамият

касб этади, реалист ижодкорлар адабиётни олам ва одамни (жумладан, ўзини) идрок этишнинг муҳим ва самарали воситаси деб биладилар. Шунга кўра, Р. ҳаётни бутун мураккаблиги билан кенг кўламда акс эттиришга интилади. Билиш мақсадининг устуворлиги боис Р. инсонни ижтимоий муҳит билан узвий алоқада тасвирлайди, ижтимоий-тарихий шароитнинг инсон тақдири ва феъл-авторига таъсирини теран бадиий тадқиқ этади. Зоро, реалист санъаткор инсон тақдири, унинг амаллари, орзу-интилишлари ижтимоий асосга эга деб билади, буларнинг барини ижтимоий-психологик жиҳатдан асослашга интилади. Айни чоғда, етук Р. адабиётида инсон ижтимоий шароитга боғлабгина қўйилмайди, инсон ўз ирода кучи билан ундан юқори кўтарила оладиган, унга қарши тура биладиган куч сифатида ҳам кўрсатилади. Худди шу жиҳати билан Р. Натурализмдан фарқланади, ҳаётни унга қараганда теранроқ ва ҳаққонийроқ акс эттира олади. Инсонни мураккаб ижтимоий муносабатлар тизимида тасвирларкан, Р. ҳаётни кенг кўламда тасвирлашга эришади, жамиятнинг жорий ҳолати, ундаги тараққиёт ёки таназзул тенденцияларини бадиий идрок этади, у ҳақда ўзининг бадиий хукмини ифодалаб, адабиётнинг концептуал функциясини амалга оширади. Айни чоғда, Р.ни ҳаётдан оддийгина нусха кўчириш (қ. натурализм) деб тушунмаслик керак. Зоро, ижодий метод сифатида Р. ҳам воқеликни ижодий акс эттиради, ижодий қайта яратади. Р. адабиётидаги ижодий қайта яратиш *типиклаштириш*, яъни воқеликнинг муайян давр ва муҳит учун энг характерли жиҳатларини умумлаштириш орқали амалга ошади. Бироқ бу ҳол ижодийликка зид деб тушунилмаслиги керак, зоро, Р.даги типиклаштириш бадиий тўқимани асло инкор қилмайди, фақат унинг ҳам воқелик моҳиятига мувофиқ бўлишини тақозо этади. Шу билан бирга, Р. тараққиёти давомида, хусусан, XX-аср Р.ида бадиий шартлилик (рамзий образлар, ривоятлар, фантастика элементлари ва ш.к.)нинг турли кўринишлари ҳам кенг қўлланила бошлади. Мазкур ҳолга реалистик тасвир принципларидан чекиниш деб қарамаслик керак. Аксинча, бу Р. адабиётининг ҳаётни теранроқ идрок этиш, ўз бадиий имкониятларини бойитиш йўлидаги ҳаракати, унинг адабий жараёндаги бадиий-эстетик ҳодисалар (турли адабий йўналишлар, оқимлар; янги услубий оқимлар, тасвир принциплари ва б.) билан ижодий рақобат-мулоқоти натижасидир.

XIX аср ўрталаридан майдонга чиққан Р. метод (йўналиш)и шўро адабиётшунослигига танқидий Р. деб, шўро адабиётининг методи

эса социалистик Р. деб юритилган. Ҳар икки терминнинг илмий муомалага кириши ҳам М.Горький номи билан боғлиқдир. Улардан биринчисини *танқидий* Р. деб атаркан, М.Горький бу давр реалистик адабиёти намуналарининг аксарияти мавжуд буржуа тузумидаги ижтимоий муносабатларни теран таҳлил этиши ва унинг инсонийликка зид моҳиятини очиб бериши ҳамда ғоявий-бадиий инкор қилишидан келиб чиқади. Иккинчиси, яъни *социалистик* Р. ҳам худди шу каби ғоявий-мафкуравий асосда таърифланган, у воқеликни марксчаленинча дунёқарааш асосида баҳолаши билангина фарқланади. Ҳолбуки, биринчидан, ижодий метод сифатида Р. моҳиятан битта ҳодиса бўлиб, унинг доирасида турлича дунёқараашлар ифода этилиши мумкин; иккинчидан, у ўз тараққиёти давомида сифат жиҳатидан ўзгариб-такомиллашиб, ўзининг тасвир ва ифода имкониятларини муттасил бойитиб борган.

РЕАЛИЯ (лот. *realis* – ашёвий) – муайян ҳалқнинг турмуш тарзи, маданияти, тарихи билан боғлиқ бетакрор, ўзга ҳалқларда учрамайдиган нарса-ходиса, тушунча; шундай нарса ва тушунчаларни англатувчи сўз. Адабий асарда муайян давр, жой колоритини беришда, миллый турмуш тарзи, миллый рухни ифодалашда Р.лар мұхим аҳамиятга эга бўлиб, уларни таржимада адекват ифодалаш катта қийинчилик туғдиради. Шунинг учун таржима амалиётида Р.лар кўпинча айнан берилиб, изоҳ билан таъминланади. Муайян ҳалқ турмушида ишлатилувчи нарса-буюмлар (мас., каноэ, тамогавк, мокасин ва ш.к. – ҳиндуларда; исириқ, обрез, тахмон ва ш.к. – ўзбекларда), ҳудудий-маъмурий бўлиниш номлари (аббатлик, губерния; улус, туман, музофот), диний унвон ва даражалар (аббат, поп, епископ; шайхулислом, муфтий, қози), мансаб номлари (граф, барон, дъяк; бек, амир, тунқотар, худайчи, ҳоким), шунингдек, географик ёки маданий-этнографик тушунчаларни англатувчи сўзлар ҳам Р.лар сирасига киритилади.

РЕМАРКА (фр. *remarque* – изоҳ) – драматик асарларда муаллиф томонидан саҳна воқесининг бошланиши олдидан берилувчи ёки унинг кечиши давомида қавс ичидан бериб борилувчи изоҳлар. Р. парда ёки кўриниш олдидан берилган ҳолларда воқеа кечаётган жой, вақт, иштирок этувчилар ва ш.к.лар ҳақидаги зарур маълумотлардан иборат бўлади. Воқеа давомида берилаётган Р.лар эса нутқ жараёнига (овоз тони, оҳанги, темпи, паузалар; персонажнинг тана ҳолати, юз-кўз ифодаси, имо-ишоралари, қилиқлари) ёки саҳнадаги ҳаракатга (персонажларнинг саҳна бўйлаб ҳаракатлари, янги персо-

нажнинг саҳнага чиқиб келиши ё кетиши ва б.) оид тафсилотларни ўз ичига олади. Р.лар драматик асарни саҳналаштиришда ва, айниқса, уни ўқиш жараёнида воқеаларни тасаввурда жонлантиришда жуда муҳим. Чунки Р.лар муаллифнинг ўзи асар воқеаларини қандай «кўргани», персонажларнинг гап-сўзларини қандай «эшитгани»ни ифода этади.

Анъанага кўра, Р.термини драматик асарларга нисбатан қўлланиб келинган бўлса, эпик асарларда диалогнинг (саҳнавийлик хусусиятига эгаликнинг) кенг ўрин олиб бориши баробарида, термин эпик асарларга нисбатан ҳам қўлланила бошлади. Ҳозирда эпик асарлардаги диалоглар давомида муаллиф томонидан бериб борилувчи (овоз тони, оҳанг, темп, паузалар; мимика, имо-ишоралар, персонажнинг ҳаракати ва ш.к.ларга оид) изоҳлар ҳам кўпинча Р. деб юритилмоқда.

РЕМИНИСЦЕНЦИЯ (лот. *reminiscentia* – хотирлаш, эслаш) – 1) адабий ҳодисаларнинг диалогик муносабатда бўлиши натижаси ўлароқ юзага келувчи ҳодиса, адабий асардаги илгари мавжуд бўлган асарларни ёдга солувчи нуқталар. Бундай Р.лар англанган ёки англанмаган (асарда ижодкор хотирасида муҳрланиб қолган ўзга асардаги нуқталарнинг гайрихтиёрий тарзда акс этиши) равишда воқе бўллади; улар очиқ-ошкор эмас, шу боис илғаб олиниши ҳам бирмунча қийин ва шу жиҳати билан ўзлаштириш ва тақлиддан фарқланади. Мас., Ш.Раҳмоннинг шеърида Торобий тилидан айтилган қуйидаги сўзлар Чўлпон шеърларини ёдга солади:

*Жоним-жигаримсан
сен-да одамсан,
лоақал кўзингда бир ёш кўрсайдим,
лоақал қовушиб қолган қўлингда
 ёларга аталган бир тош кўрсайдим.*

Ҳозирги китобхон учун парчадаги Р.лар аниқ кўринар, лекин шеър ёзилган 1983 йили кўпчилик учун ўхшашликни илғаб олиш қийин бўлгани ҳам аниқ. Ёки шоирнинг «Мен севган дарёлар шундок қолурму, мени ўйлаттан йўл қолурми шундоқ? Мен суюнган тоғлар шундоқ қолурми, шундоқ қолармикан юракларда доғ?» сатрлари жадид шеъриятидаги оҳангларни ёдга солади. Шунга ўхшаб Ҳ.Олимжоннинг «Муқанна»сида Муқанна тилидан айтилган қуйидаги

гаплар ҳам Чўлпоннинг «Бузилган ўлка»га шеъридаги оҳангларни эслатади:

*Нима учун юрт чиқмайди оловдан?
 Нима учун эл қутулмас таловдан?
 Нима учун элни босган ҳашарот?
 Дин, хирож деб ўз-ўзига қўйди от?
 Нега қилди элни бунча гадой, хор?
 Нега бўлди ҳамма сенга отбоқар?
 Қиз онадан, хотин эрдан ажралди,
 Косиб уйдан, дехқон ердан ажралди?
 Нима учун?*

Кейинги мисоллардаги Р.лар ритмик хотира туфайли вужудга келган бўлиб, Р.нинг бу тури деярли барча шоирлар ижодида кўплаб кузатилади; 2) адабий асардаги ўзидан илгариги адабий ҳодисаларни эслатувчи, онгли равишда ёки англанмаган тарзда юзага, келган нуқталарнинг бари, адабиётдаги адабиёт образи. Мазкур маънода терминнинг қамров кўлами кенгаяди ва у, табиийки, биринчи маънони ҳам ўз ичига олади. Бунда асардаги (кўштироқда ёки кўштироқсиз берилган) цитаталар, шеърий мисралар (жумладан, назира, тахмис), образлар (мас., талмәҳ санъати), гоявий-тематик ва эмоционал мотивлар (мас., А.С.Пушкиннинг «Куз» – А.Ориповнинг «Куз хаёллари» шеърлари) билан бирга бошқа ижодкорларнинг асарларини эслатиш (мас., А.Қодирий романларида Фузулий ва Саъдий; Чўлпон романида М.Арцибашев, Л.Андреев асарлари тилга олинади), улар ҳакида билдирилган мулоҳазалар ҳам Р.лар ҳиссобланади. Шунингдек, бу маънода адабий асарда бошқа санъат турларига мансуб асарларнинг эслатилиши, муҳокама этилиши ёки шарҳланиши (мас., А.Ориповнинг «Муножотни тинглаб», У.Азимнинг «Театр» туркуми, Х.Давроннинг «Гулливер лилипутлар диёрида» шеърлари) ҳам Р.ларга киритилади.

РЕТАРДАЦИЯ (лот. retardation – секинлаштириш, тутиб туриш) – эпик асарларга хос сюжет-композицион усул, воқеалар ҳакида ҳикоя қилишни, сюжет ривожини секинлатиш. Р. асарга сюжетдан ташқари элементлар (лирик чекинишлар, муфассал портрет, пейзаж тасвири, персонаж характеристикасини бериш, персонажнинг ўтмиши ҳакида ҳикоя қилиш, киритма ҳикоялар, ривоят ва ш.к.лар)ни кири-

тиш орқали амалга ошади. Mac., «Мехробдан чаён»нинг бошланишида шу усулда ҳар бир персонаж ҳақида тафсилотлар берилади, натижада Солиҳ маҳдум асарнинг бошида буюрган манти 17-бобга бориб ейилади, яъни асосий воқеанинг ҳикоя қилиниши секинлаштирилади.

РЕПЛИКА (фр. *réplique* – жавоб, эътиroz) – диалогнинг нутқ субъекти алмашиши билан чегараланувчи қисми, битта нутқ субъекти томонидан айтилган нутқ бўллаги. Ҳажм жиҳатидан Р. чегараланганд эмас: у биргина товуш, сўз, сўз бирикмаси, битта гап ёки бир-бирига боғлиқ бир неча гапдан иборат бўлиши мумкин. Шунингдек, диалог иштирокчиларидан бирининг бошқасига жавобан жим қолиши (бу ёзувда кўп нуқта билан ифодаланади) ҳам Р.дир, чунки у шаклан нолга тенг бўлса-да, ҳамиша мазмунга эга бўлади.

РЕФРЕН (фр. *refrain* – нақорат) – 1) нақорат, қўшиқнинг ҳар бир бандидан сўнг айнан қайтариладиган банд, ярим банд ёки мисра. Р. ёзма адабиётта фольклордан ўтган бўлиб, у халқ қўшиқларида кенг қўлланган; 2) шеърдаги ҳар бир банд охирида тақрорланиб келувчи мисра. Бу маънода Р. мумтоз шеъриятимиздаги *таржеъ санъатига тўғри* келади. Фарб шеъриятида Р. асосига қурилган рондо, рондөль, *триолет*, баллада каби, ўзбек мумтоз шеъриятида эса *таржеъбанд* каби қатъий шеър шакллари мавжуд.

РИВОЯ (ар. رواية – ҳикоя қилиш) – воқеаликни объектив-воқеабанд тарзда акс эттирувчи эпик асарларнинг ўзаги, эпик асар курилишининг асосий шакли, ундаги муаллиф ёки персонаж-ҳикоячи нутқи, яъни асар матнининг персонажлар нутқидан ташқари қисми. Р.нинг асоси замон ва маконда кечувчи воқеалар ҳақидаги ҳикоя бўлиб, ўша воқеалар кечаётган замон ва макон, уларнинг иштирокчилари бўлган персонажларга оид турли тафсилотлар (пейзаж, нарса-буюмлар, портрет, муаллиф характеристикаси), муаллифнинг фалсафий, маънавий-ахлоқий, ижтимоий-сиёсий ва ш.к. мазмундаги мушоҳадалари, муаллиф тилидан берилган персонаж ўй-фир克拉ри (ўзиники бўлмаган муаллиф нутқи) ҳам бевосита унинг таркибий қисмидир. Эпик асардаги Р. муаллиф, ровий ёки персонаж ҳикоячи тилидан, яъни турли мавқе, «нуқтаи назар»дан туриб олиб борилиши мумкин. Шунга кўра, Р. композицияси «нуқтаи назар»ларнинг муайян ғоявий-бадиий мақсадлар билан ўзаро алмашиб туриши, параллел берилиши, бирлаштирилиши, зидланиши кабилар билан белгиланади. Эпик асарда Р.нинг объектив ва субъектив кўринишлари кузатилади. Биринчи ҳолда Р. «холис кузатувчи» мавқеидан туриб

олиб борилади, яъни ровий воқеаларга аралашмайди, тасвир предметига муносабат очиқ ифодаланмайди; иккинчисида эса, аксинча, воқелик «ичдан ўтказиб» берилади, тасвир предметига муносабат ҳам ошкор ифодаланади (қиёсланг: А.Қаххор. «Ўғри» – F.Гулом. «Менинг ўғригина болам»). Яна бир фарқ Р. субъектининг тасвирланаётган воқеадан хабардорлик даражасида ҳам кузатилади. Аńъанавий эпосда Р. субъекти воқеанинг барча икир-чикирларидан воқиф шахс сифатида намоён бўлади (мас., эртакларда), у асарнинг ҳар нуқтасида ҳозиру нозир, воқелик, асосан, унинг нигоҳи орқали берилади. Замонавий эпосда кенг оммалашган объектив Р. гўё айни дамда ўз ҳолиша кечачётган воқеа-ҳодисаларни тасвирлаётганлик иллюзиясини ҳосил қила олади (бу жиҳат кичик эпик шаклларда тўла, йирик эпик шаклларда эса кўпроқ эпизодик тарзда намоён бўлади), бу эса ўкувчидаги Р. субъекти ҳам воқеаларни шу вақтда кузатаётгандек (яъни воқеаларнинг юз бериш ва ҳикоя қилиниш вақти орасида тафовут йўқдек) таассурот қолдиради. Шунингдек, ҳозирги эпосда етакчилик қилаётган бу нав Р. асар давомида нуқтаи назарнинг ўзгариши, воқеликнинг гоҳ муаллиф, гоҳ ҳикоячи-персонаж, гоҳ эса бошқа бир персонаж нигоҳи билан кўрилиши ва баҳоланишига имкон беради. Бу эса тасвирнинг динамиклигини таъминлайди, унга жонлилик ва ҳаётийлик баҳш этиб, эстетик таъсир кучининг ошишига хизмат қиласи. Бундан ташқари, тасвир предметига баҳо бераётган субъектларнинг кўпайиши Р.нинг полифониклик касб ётиши, яъни муаллиф, ҳикоячи-персонаж ва қаҳрамон ғоявий мавқеларининг турлича бўлишига имкон яратади (қ. *полифония*). Замонавий эпик асарларда Р.нинг турли кўринишлари мавжуд эканлиги, улар конкрет асарда синтезлашган ҳолда воқе бўлаётганини таъкидлаш лозим.

РИДФ (ар. ریڈف – изма-из келтириш) – қаранг: **муқайяд қофия**

РИТМ (юн. *rhythmos* – тенг ўлчовлилик) – кенг маънода Р. муайян бўлакларнинг маълум вақт оралигида тартибли тақрорланиб туришидир. Бу маънодаги Р. борликдаги жуда кўп нарса-ҳодисаларда бор. Мас., тарновдан томчилаб турган томчилар чиқараётган товшуда, ариқ сувининг маромли шилдираб оқишида, йил фасларининг, кун билан туннинг алмашинувида; инсоннинг юрак уриши, нафас олиши, маълум бир ҳаракатни бажариши – буларнинг барида Р. кузатилади. Р. табиий равишда инсон нутқига ҳам хос. Ҳар бир индивид нутқининг ўзига хос Р.и бўлиб, бу ритм унинг физиологик имкониятлари (мас., ҳар бир одамнинг нафақ олиши ўзига хос;

нүткө ритми эса күп жиҳатдан шунга боғлиқ) билан белгиланади. Кундалик мулокот нутқидаги ритмга турли омиллар (мас., касаллик, рұхий ҳолат, бирор нарсадан таъсирланиш, ҳаракат мароми ва б.) таъсир қилиши ҳамда уни ўзgartириши мумкин. Оғзаки нуткқа хос Р. табиий равишда ёзма нутққа ҳам күчади, зеро, ёзув оғзаки нутқнинг ҳарфлар воситасида моддийлашуви: одам ёзганида «мия»да гапиради, ўқиганда «тасаввурда» эшитади. Демак, нутқ ҳодисаси бўлмиш ҳар қандай адабий асарда Р. бўлиши қонуний ва табиий ҳол экан. Ритмиклик адабий асарнинг турли сатҳлари (нутқ, ривоя, композиция)да намоён бўлса-да, нутқий қурилишида, айниқса, аниқ кўзга ташланади, шунинг учун Р. ҳақида кўпроқ бадиий нутқ билан боғлиқ ҳолда гапирилади. Бадиий нутқнинг насрый ва шеърий шакллари Р. жиҳатидан фарқланади. Насрий нутқ Р.и, умуман, инсон нутқининг ритмиклигидан келиб чиқади, ундаги ўзгаришу товланишлар эса матннинг конкрет бўлагидаги тасвир предметининг мазмун-моҳияти, унга муаллиф муносабати билан боғлиқ ҳолда юзага келади. Насрдагидан фарқли ўлароқ, шеърий нутқ Р.и маҳсус ҳосил қилинган, муайян ўлчов асосида тартибга солинган. Шеърий Р.нинг ўлчов бирликлари ўзаро қисм-бутун алоқасидаги нутқий бўлаклар (бўғин, туроқ, мисра, банд) бўлиб, улар ритмик бўлаклар ёки ритмик бирликлар деб юритилади. Р.нинг ҳис этилиши учун шеърни ўқиганда (талаффузда) ритмик бирликлар бир-биридан ажралиб турганини ҳис қилиш керак, бунда ритмик воситалар муҳим аҳамиятга эга. Ритмик воситалар шеър Р.нинг таъкидланиши, кучайтирилишига хизмат қиласди, уларнинг асосийлари сифатида ритмик пауза, қофия ва қофияланиш системасини кўрсатиш мумкин. Ҳар бир ритмик бўлак бошқаларидан ритмик пауза билан ажратилади, шу ажратилиш ҳисобига улар талаффузда ўлчов бирлиги сифатида намоён бўлади. Дейлик, бўғин бир товуш зарби билан айтилади ва жуда ҳам қисқа, сезилар-сезилмас пауза (аслида, бу пауза эмас, иккى товуш зарбининг бир-биридан фарқланиб туриши ҳисобига «пауза»дек таассурот қолдиради, холос) билан ажралади. Туроқлардан кейинги пауза бироз сезиларлироқ бўлса, мисралар ниҳоясидаги пауза яқъол сезилади, банд якунидаги катта пауза унга ритмик-интонацион тугаллик баҳш этади. Ритмик пауза билан мантиқий пауза доим ҳам бир-бирига мос келавермаслиги мумкин, яъни шеърий нутқда вергул қўйилмаган ўринларда ҳам тўхталиб ўтиш ва, аксинча, вергулли ўринларда тўхталишни сезилмаслик даражасига келтириш зарурати юзага келиши одатий

холдир. Мисра якунида келувчи қофиялар ритмик жиҳатдан мисраны таъкидлаб күрсатишга, шеърнинг оҳангдорлиги, мусиқийлиги, таъсирдорлигини оширишга хизмат қиласи. Шеърни ўқиш давомида қофия мисранинг тугаганидан дарак беради, пауза бажараётган ажратиш функциясини таъкидлайди. Шунга ўхшаб қофияланиш тартиби банднинг шаклланиб бўлгани, тугаганини таъкидлайди. Мас., тўрт мисрали а-б-а-б тарзида қофияланган шеър ўқилаётган бўлса, ўқувчи кейинги бандларда ҳам шу хил тартибни кутади, тартиб ниҳояланганида, банддаги тугалланганликни ҳис қиласи. Яъни қофияланиш тартиби, бир тарафдан, шеър ритмининг ҳис этилишига, иккинчи тарафдан, мазмун ва ритмнинг уйғунлашувига, уларнинг ўқувчи тасаввурнида яхлит бирлик ҳосил қилишига ёрдам беради. Хуллас, Р. шеърий нутқнинг эмоционаллиги, мусиқийлиги асоси, пойдеворидир.

РИТОРИКА (юн. *rhetorike* – нотиқлик) – 1) нотиқлик санъати ҳақидаги фан. Антик Юнонистонда мил. ав. V асрларда пайдо бўлган. Мил. ав. II – I асрларга келиб тизим ҳолини олган, антик Римда ҳам изчил ривожланган. Р.нинг назарий асослари файласуфлар, амалиётчи нотиқлар томонидан ишлаб чиқилган бўлиб, бунда Арасту, Цицерон, Квинтилианларнинг хизматлари, айниқса, катта. Антик Юнонистон ва Рим ижтимоий тузумида нотиқликнинг катта ўрин тутгани Р.нинг гуркираб ривожланишига асос бўлган. Шунга кўра, Р.нинг предмети нутқ бўлиб, у билан боғлиқ барча масалаларни (материал танлаш, жойлаштириш, жумла тузиш, фикрни далиллаш ва инкор қилиш, сўз танлаш, услугуб, услугубий фигуralардан фойдаланиш, нутқни ўқиш ва х.) ўрганган. Шу билан бирга, қадимдаёқ Р.нинг ўрганиш обьектига проза ҳам кирган бўлиб, бу жиҳатдан у поэтикага қарши қўйилган. Яъни поэтика бадиий тўқима билан иш кўрувчи поэзия бадиий адабиётни, Р. эса реал материал билан иш кўрувчи проза нутқлар, фалсафий ва тарихий асарларни ўрганган; 2) ҳозирда Р. адабиётшуносликнинг бадиий матнни, унинг ташкилланиш қонуниятларини ўрганувчи соҳаси сифатида ҳам таърифланади ва шу маънони таъкидлаш учун баъзан неориторика термини билан ҳам юритилади. Бу қарашга кўра, Р. бадиий матннинг ташкилланишини, поэтика эса бадиий воқеликнинг ташкилланишини ўрганади, яъни улар бадиий асарнинг турли сатҳларида иш юритади.

РИТОРИК МУРОЖААТ – бадиий ундалма. Жонли сўзлашувда ундалма нутқ қаратилган шахснинг муайян жавоб ҳаракатини (диққатини жалб этиш, гапиравчига қараш, яқинлашиш ва б.) талаб

қилади. Яъни худди риторик савол жавоб талаб қилмагани каби, Р.м. ҳам мос реакцияни талаб қилмайди, нутқни безаш, муайян кайфият ё ҳиссий муносабатни ифодалаш воситаси бўлибгина хизмат қилади. Р.м. шеърий нутқда, айниқса, кенг қўлланилиб, кўпроқ нарса-ҳодиса, жой кабиларга қаратилади: «Қайда ўсдинг, қайда яшнадинг, Япроқ, япроқ, айтиб бер менга...» (Р.Парфи), «Юртим, сенга шеър битдим бугун...»(А.Орипов), «Гул бўйларини боғдан келтирган, эй шабода...»(Э.Воҳидов), «Ай, қалдириғоч, ўқи «Вал-лайли...» (З.Мирзо) . Шунингдек, ўзи ҳозир бўлмаган одамга шу ерда каби мурожаат қилиш ҳам Р.м.нинг бир кўринишидир: «Эшитдим, онажон, хафа эмишсан, Кечир, ойлаб сенга ёзолмадим хат...» (Р.Парфи). Булардан Р.м. апострофа (қ.) термини билан синонимик муносабатда экани аён бўлади.

РИТОРИК СЎРОҚ – жавоб берилишини талаб қилмайдиган савол, фикрнинг сўроқ шаклида тасдиқланиши. Худди риторик мурожаат каби Р.с. ҳам нутқ безаги, эмоционал муносабатни кучайтириш, фикрни таъкидлаб ифодалаш сингари мақсадларга хизмат қилади. Мас., А.Ориповнинг «Ахир, у эмасми дўстни ғаним-у, Ғанимни дўст қилиб қўйгувчи одам?» тарзидаги Р.с.и «ҳа, айнан ўша – учинчи одам» деган фикрни таъкидлаб ифодалайди. Р.Парфининг «Япроқ, япроқ, сўзлаб берсанг-чи, Ўз севгингдан бўзлаб берсанг-чи, Нечун тушдинг, нечун оёққа?..» тарзидаги Р.с. эса лирик қаҳрамонни ўйлататётган муаммо, қийнаётган дардга ишора қилади. Ёки «Сени, оҳанг, эй ғамили оҳанг, Танимасдим, билмасдим олдин. Томиримда хун талашур жанг, Шунча ғамини қаердан олдинг?» мисраларини олсак, Р.с. дастлабки уч мисрадаги ўй-хисларни хulosалаб, бир зарб каби кучайтириб ифодалаётгани кўринади. Келтирилган миссоллардан Р.с. лирик асарда турлича бадиий-эстетик мақсадларда ишлатилиши, унинг полифункционал табиати маълум бўлади. Мумтоз шеъриятимиздаги тажохули ориф санъати Р.с.нинг айрим кўринишларига ўхшаш, бироқ юқоридагилардан келиб чиқилса, Р.с. мазкур санъатга нисбатан анча кенг ҳодиса экани аён бўлади.

РИТУАЛ-МИФОЛОГИК ТАНҚИД – Фарб маданиятшунослиги ва адабиётшунослигидаги метод, XX асрнинг 30-йилларида кўхна маданиятларни ўрганишдаги ритуал-мифологик йўналиш (Ж.Фрейзер) ва К.Юнг аналитик психологисининг синтези сифатида майдонга чиқкан. Агар мифологик мактаб вакиллари адабиётнинг пайдо бўлишини мифлар билан боғлаган бўлсалар, Р.-м.т. мифларнинг ўзи ритуаллардан келиб чиқкан деб ҳисоблайди. Уларга

кўра, нафақат антик театр, балки қаҳрамонлик эпоси ҳам, қадим Шарқнинг муқаддас манбаларию антик фалсафа, ўрта асрлар эпосиу роман – хуллас, адабиёт тўласича ритуалдан келиб чиқсан. Муҳим жиҳати шуки, Р.-м.т. ритуал-мифологик моделларни ижодий тасаввурга қанот берувчи манба эмас, балки унинг структурасини белгиловчи бош омил деб билади. Шунинг учун К.Юнгнинг архетиплар (к.) ҳақидаги таълимоти уларнинг қарашларида муҳим ўрин тутади. Албатта, энг қадимги даврларда яратилган кўплаб асарларга, архаик жанрларга бундай ёндашув асосли. Лекин Р.-м.т. бундай ёндашувни адабиёт тарихининг энг қадимги давларидан то ҳозирги кунига қадар татбиқ этади, замонавий адабиёт намуналарида ҳам ритуал-мифологик илдизларни очиш ва уларни шу асосда тушунтиришга интилади. Тўғри, XX аср жаҳон адабиётида мифларга мурожаат этишнинг кучайиши бунга маълум даражада асос ҳам берар, лекин мазкур ҳолатни инсоният хотирасида «коллектив онгиззлик» сифатида яшаётган архетипларнинг ўзини намоён этиши сифатидагина тушуниш, архетипнинг бадиий тафаккурдаги ролини мутлақлаштириш тўғри бўлмайди. Зоро, худди шу ҳол Р.-м.т.ни бадиий ижодда колектив ролини индивид ролидан устувор деб билишга, ундаги биографик факторни буткул инкор қилишга олиб келади. Шу каби бир ёқламаликларга қарамай, Р.-м.т.га хос ёндашув архаик жанрларни, ҳақиқатан ҳам ритуал-мифологик асоси кучли бўлган ўрта асрлар ва қисман Ўйғониш даври (умумлаштириб айтганда, ижодда традиционализм етакчилик қилган даврлар) адабиётини ўрганишда самарали натижалар берганини ҳам қайд этиш лозим. Жумладан, унга хос ёндашув рус олими М.Бахтиннинг «Франсуа Рабле ижоди ва ўрта асрлар ҳамда ренессанс даври ҳалқ маданияти» асарида кўплланган, бу эса муҳим назарий умумлашмалар чиқаришга асос бўлган.

РИЦАРЛИК РОМАНИ (фр. roman chevaleresque – кавалерлик романи, нем. Ritterroman – рицарлик романи) – ўрта асрлар куртуз адабиётининг асосий жанрларидан бири, дастлаб XII аср ўрталарида рицарлик ҳаракати гуллаб-яшнаган Францияда пайдо бўлиб, кейин бутун Европага тарқалган. Жанр генезиси қаҳрамонлик эпосига бориб тақалса-да, Р.р. қатор хусусиятлари билан мажусийлик даври мифлари, қадимги кельтлар ва германларнинг ривоятлари, ҳалқ эртаклари, шунингдек, Шарқ адабиёти намуналарига ҳам яқин туради. Р.р. марказидаги қаҳрамон – рицарь ўзининг бекиёс жасорати, олийжаноблиги билан ажралиб туради. Айни шу нарса,

қаҳрамон шахсининг олдинги планга чиқарилиши, ўни алоҳида шахс сифатида (ҳам руҳиятидаги жараёнларни, ҳам ўзи ва суюкли ёри шон-шарафи йўлидаги кураши, бу йўлдаги жонбозлик ва беқиёс қаҳрамонликларини) тасвирлашга ургу берилгани Р.р.ни роман жанри тараққиётидаги муҳим босқичга айлантиради. Р.р.лари аввалига шеърий шаклда яратилган бўлса, XIII аср ўрталаридан унинг насрый баёнлари ҳам пайдо бўла бошлаган. Кўплаб Р.р.лари тематик жиҳатдан туркумларга бирлашган бўлиб, ўз даврида улардан Тристан ва Изольда муҳаббати, «юмалоқ стол» рицарлари, қирол Артур, Ланселот ҳақидаги туркумлар машҳур бўлган. Гарчи Р.р. Европа адабиёти ҳодисаси бўлса-да, Узок, Ўрта ва Яқин Шарқ адабиётларида ҳам унинг ўхшашлари (аналоглари) мавжуд бўлганки, бу миллий адабиётлар тараққиётидаги стадиал умумийликнинг ёрқин далилидир. Жумладан, ўзбек халқ оғзаки ижоди (мас., Гўрўғли туркуми) ёки ёзма адабиётимиздаги қатор достонлар (мас., «Фарҳод ва Ширин») моҳият эътибори билан Р.р.ларига яқин туради.

РОВИЙ (ар. راوی – ҳикоячи, қисса айтувчи, хабар, маълумот берувчи) – эпик асарлардаги ривоя субъекти, воқеаларни ҳикоя қилаётган, улар кечётган макон ва замон, уларда иштирок этаётган персонажларга оид тафсилотларни етказиб, тасвир предметига у ёки бу тарзда муносабат билдираётган шахс. Эпик асарда ривоя кўпроқ муаллиф (конкретлаштирилмаган «учинчи шахс» ҳам асар муаллиф сифатида тушунилади), баъзан эса персонаж (мас., F.Фулом. «Шум бола») тилидан олиб борилади. Шунингдек, баъзан асарда бир неча Р.нинг иштирок этиши ҳам кузатилади (мас., Ў.Хошимов. «Икки эшик ораси»; М.Муҳаммад Дўст. «Лолазор»). Шунга қарамай, Р.ларнинг кўпайиши ривоянинг бутунлигига путур етказмайди, чунки бу ҳолда ҳам матндан муаллиф (ёки асосий Р. вазифасидағи персонаж)нинг тингловчи мақомида тургани англашилаверади.

РОМАН (фр. roman – «лотин тилида эмас, роман тилларидан бирида ёзилган» маъносида) – замонавий адабиётда эпик турнинг йирик ҳажмли жанри. Р.га таъриф берилганда, одатда, унинг ҳажман катталиги, ҳаётни кенг кўламда тасвирлаши, қаҳрамон ҳаётидан катта даврни олиб, турли ижтимоий муносабатлар билан боғлаб талқин қилиши, кўплаб ва турфа кишилар тақдирлари орқали жамиятнинг жорий ҳолатини акс эттира олиши; мураккаб кўп чизиқли сюжетга эга бўлиши каби жанр хусусиятлари қайд этилади. Дарҳақиқат, бу

хусусиятлар аксарият Р.ларга хос, лекин жанр хусусиятларини шуларнинг ўзи билангина белгилаш камлик қиласди: амалда ҳажман қиссадан фарқ қилмайдиган ёки қисқагина давр мобайнида кечган воқеалар тасвири билан чөкланган Р.лар ҳам, марказида биргина шахс тақдиди (бошқа персонажлар унинг характерини очишга хизмат қиласди) турган ёки биргина сюжет чизигига эга Р.лар ҳам учрайди. Шунинг учун мутахассислар Р.нинг жанр сифатида белгиловчи мухим хусусиятлари деб яна романий проблема, романий қаҳрамон ва романий тафаккурни кўрсатишади. Табиийки, бу учала тушунча бир-бирига узвий боғлиқ, бири иккинчисини тақозо этади. Романий проблеманинг моҳияти шундаки, у инсон тақдиди, унинг жамият (кенгроқ қаралса – олам) билан ўзаро муносабати бадиий тадқики орқали оламу одам моҳиятини англашга интилади. Г.Лукач фикрига кўра, дунёнинг яхлитлиги бутунлигини, мавжудликнинг туб моҳиятини англаш Р.нинг бош муаммоси бўлса, қаҳрамоннинг дунё билан зиддияти ўша муаммони ҳал қилиш воситасидир. М.М.Бахтин эса қаҳрамон тақдиди ва эгаллаган мавқеининг унинг ўзига номувофиқлиги Р. жанрининг марказий мавзу-муаммоларидан бири деб ҳисоблайди. Демак, Р.да кўйилган проблемани бадиий идрок этиш учун қаҳрамон ҳам шунга мос бўлиши талаб қилинадики, бунинг учун романий қаҳрамон жамиятда яшагани ҳолда, ўзининг индивидлигини теран идрок этадиган, мухит билан зиддиятга киришган шахс бўлиши лозим. Зоро, Р.нинг классик тушунчадаги «буржуа эпоси» (Гегель), «янги давр эпоси» (Белинский) сифатидаги кўриниши шахснинг жамиятдаги мақоми ўзгарган, у ўзини ўз ҳолича бутун бир олам сифатида идрок эта бошлаган бир шароитда шаклланди. Ўзини алоҳида олам сифатида идрок этган шахснинг жамият билан, олам билан зиддиятларини бадиий талқин қилишу йўқотилган эпик бутунликни тиклаш классик Р.нинг бош муаммоси бўлиб қолдики, шу маънода у «янги давр эпоси» саналади. Шу боис Р. марказида шахснинг ҳаёти, унинг зиддиятларию тўқнашувлари туради. Немис файласуфи Шеллинг Р. воқеани эпосдан, тақдирни драмадан олади деганида айни шу нарсани назарда тутган. Эпик бутунликни тиклашга интилаётган шахс деганимиз, аввало, ижодкорнинг ўзи, Р. марказида турган қаҳрамоннинг ташки олам билан тўқнашувлари (кенг маънода шахс драмаси) ўша бутунликни тиклаш воситаси эканлиги эътиборга олинса, Р.ни ўз ҳаёт йўлида чигал муаммоларга дуч келган ижодкорнинг «зиддиятли ҳолатни адабий йўл билан ечишга уриниши»(А.Прието) дейиш мумкин бўлади.

Кўйилган проблемани шунга мос қаҳрамон воситасида идрок этиш жараёнида жамиятнинг жорий ҳолати, оламу одам ҳақидаги яхлит бир концепция, Р. бадиий фалсафаси шаклланадики, бу романий тафаккур маҳсулидир. Албатта, Р. жанрининг бир неча асрлик тараққиёти давомида унинг турли хил ва кўринишлари яратилгани, жанрнинг ҳозирда ҳам такомиллашиб бораётгани эътиборга олинса, юқорида санаалган хусусиятларни барча Р.лардан излаш, уларни қатъий қоида деб тушуниш тўғри бўлмайди. Бу ўринда ҳар бир даврнинг бадиий-эстетик талаб-эҳтиёжлари Р.га маълум ўзгаришлар киритиши, ўтган давр мобайнида Р.нинг турфа (тарбиявий, мәиший, ишқий, саргузашт-дөтектив, ижтимоий-психологик, тарихий-биографик, сатирик ва ҳ.) хиллари яратилгани, ниҳоят, Р. ҳозирда ҳам такомиллашиб бораётган жанр эканлигини ҳамиша ёдда тутиш лозим.

РОМАНТИЗМ (фр. *romantique*, ингл. *romantic*) – Европа адабиётида XVIII аср охири – XIX асрнинг биринчи ярмида етакчилик қилган адабий йўналиш. Этимологик жиҳатдан термин испанча «готапсе» сўзи билан боғлиқ бўлиб, XVIII асрда китоблардагина учратиш мумкин бўлган ғайритабиий, ажабтовур, фантастик нарсаларнинг бари шу сўз билан юритилган. Дарҳақиқат, Р. адабиёти яратган бадиий оламни шундай сўз билан номлашга етарли асос бор эди. Зеро, Р. мавжуд воқелиқдан қониқмаслик туфайли, маърифатчиликка хос олам (одам ва жамият)ни ақл билан расо ҳолга келтириш гоясига ишончнинг барбод бўлиши натижаси ўлароқ юзага келган бўлиб, «реаллиқдан қочиши»га, реал оламдан кўра мукаммалроқ олам яратишига интилади. Р. классицизмга хос «табиатга тақлид» ва ундан келиб чиқувчи ҳақиқатга монандлик талабларини инкор қиласи, унинг учун бадиий реаллик мавжуд реаллиқдан ҳаққонийроқдир. Мавжуд воқелиқдаги туссизликдан безган Р. вакиллари кўпинча кўхна ўтмишдан маъни излашади (мас., В.Скотт, В.Гюго, А.Дюма романлари), улар тасвирлаган воқеа-ҳодисалар аксар узоқ, экзотикага бой юртларда кечади ва ш.к.

Р. адабиётининг умумлаштириш принципи – идеаллаштириш, у воқеликка боқий ва мутлақ идеаллар асосида ёндашади, шунинг учун Р.да воқелик билан идеал орасидаги номутаносиблик яқъол кўринади, уларнинг зиддияти ўта кескин намоён бўлади. Натижада Р. адабиётида олам иккига ажralади, иккиси – идеал олам билан мавжуд олам алоҳида яшайди. Р. адабиётининг бош зиддияти – эзгулик ва ёвузлик кураши, унга кўра, ёвузлик ҳам, унга қарши

кураш ҳам бирдек бокийдир. Яъни бу кураш ёвузликни илдизи билан йўқотишу оламни тубдан ўзгартиришга ожиз, қўлидан келадигани – ёвузликнинг оламда мутлақ ҳоким бўлишига йўл бермаслик, холос. Ёвузликка қарши курашаётган бетакрор шахс – Р. адабиётининг бош қаҳрамони. Р. адабиётга ўзининг янгича шахс концепцияси билан кириб келди. Унинг учун шахс – алоҳида олам. Шахснинг сирли ва ададсиз ички олами Р. адабиётининг марказий муаммосига айланади. Р. шахсдаги бетакрор индивидуал хусусиятларга ургу беради, асосий эътиборни унинг ички оламидаги зиддиятлар, қалбию онгидаги изоҳлаш мушкул ҳаракатлар, ғайришуурый ҳолатларга қаратади. Мавжуд воқеликдаги маишат қулига айланиб бораётган одамларга зид ўлароқ, Р. адабиёти муҳаббатию нафрати, меҳрию қаҳри чексиз, юксак туйгуларга, изтиробли ўйловлару ўзини бешафқат тафтиш қилишга қобил қаҳрамонни яратади. Бу қаҳрамон олам сир-синоатини англашга ожизлигидан изтироб чекади, мавжуд воқелик соглом ақлга номувофиқ экани, ўзининг шахсий эркига дахл қилаётганидан изтиробга тушади. Р. адабиётининг қаҳрамони шахсий эркини, инсонлик шаънини юксак қадрлайди, уларга қарши ҳар қандай ҳаракатга бутун вужуди билан қарши туради.

Шахсга бу хил қараш Р.нинг ижодкор шахсга муносабатида ҳам ўз аксини топади. Ижодкорни муайян қоидалар билан чеклаган классицизмдан фарқли ўлароқ, Р. том маънодаги ижодий эркинлик тараффори, у ҳар қандай чекловларни инкор қиласи. Шунинг учун Р. назариётчилари адабий тур ва жанрлар орасига қатъий чегара қўймайдилар, адабиётнинг бошқа санъат турлари билан синтезлашуви ёки конкрет бадиий асарда турли эстетик белгилар (трагизм ва комизм, тубан ва юксак ва б.)нинг қоришиқ ҳолда намоён бўлишини табиий ҳол деб биладилар. Улар бадиий асарни тирик организмга қиёс қиладилар, бадиий шакл мазмундан табиий равишда ўсиб чиқади ва у билан узвий боғлиқ ҳолда яшайди деб тушунадилар. Яъни бунда ҳам норматив ҳарактердаги поэтикага оид қўлланмаларда қатъий белгиланган меъёрларни инкор қилиш, ижодкорнинг яратувчилик хукуқини эътироф этиш кузатилади. Р. адабиётни тарихий роман, фантастик қисса, лиро-эпик поэзма каби жанрлар билан бойитди; ифодада метафориклик, юксак дара-жадаги ассоциативлик ва шу асосда кўп маънолиликка интилгани сабаб бадиий тилнинг ифода имкониятларини кенгайтира билди. Р. бадиий тафаккур ривожида сезиларли из қолдирди, унинг анъанала-

ри символизм, экспрессионизм, сюрреализм сингари оқимлар томонидан ижодий ўзлаштирилди, романтик пафос адабиёт ва санъатга хос эстетик белгилардан бири бўлиб қолди.

РУБОИЙ (ар. روبوي - тўртлик) – Шарқ мумтоз шеъриятида кенг тарқалган лирик жанр, ҳазаж баҳрининг ахраб ва ахрам шажараларида ёзилиб, кўпроқ а-а-б-а тарзида қофияланувчи тўрт мисрали мустақил лирик асар. Арабча номланишига қарамай, Р. дастлаб форсий адабиётда пайдо бўлиб, кейин араб ва туркий адабиётларга ўтган. Р.нинг келиб чиқиши масаласида ихтилофлар мавжуд: айрим мутахассислар жанр генезисини туркий халқлар оғзаки ижодидаги тўртликлар билан боғласа, бошқалари уни форс шеъриятига хос ва жанр асосчиси Абу Абдулло Рудакий деб ҳисоблашади. Ўзбек халқ оғзаки ижодида, шунингдек, ёзма адабиётимизнинг Навоийгача бўлган даврида дубайтий (дубайтий – икки байт ёки тўрт мисрадан иборат шеър, яъни тўртлик) вазнига (ҳазажи мусаддаси маҳзуф ёки мақсур) тушадиган тўртликлар кўплаб яратилган бўлса-да, Р. вазнига тушадиган тўртликлар учрамайди. Юсуф Хос Ҳожибининг «Қутадғу билиг» асаридаги тўртликлар мутақориб, Насимий ва Лутфий тўртликлари эса рамал баҳрида яратилган. Шайх Аҳмад Тарозийнинг «Фунун үл-балога» асарида Р. сифатида келтирилган форс тилидаги мисоллар ҳазаж баҳрида, туркийдагилари эса рамали мусаддаси мақсур (ёки маҳзуф) вазnidадир. Бундан ўша давр (XV аср бошлари) ўзбек адабиётида Р. жанри вазн жиҳатдан ҳали қатъий тартиба солинмагани кўринади. Навоийдан бошлаб ўзбек адабиётида ҳам Р.нинг ҳазаж баҳри тармоқларида ёзилиши қатъий қоида тусини олдики, шу боис Навоийни ҳақли равища ўзбек адабиётида Р. жанри асосчиси дейиш мумкин. Дарҳақиқат, барча манбаларда Р.ни жанр сифатида белгиловчи муҳим хусусиятлардан бири сифатида унинг вазни, яъни ҳазаж баҳрининг ахрам ва ахраб шажараларида ёзилиши эътироф этилади. Яъни бундан бошқа вазнга тушувчи ҳар қандай тўрт мисрали шеър Р. эмас, балки қитъа, дубайтий ёки тўртлиқидир: «Бирор тўртликни Р. деб аташ учун унда тугал мазмун, Р. шакли бўлишидан ташқари Р. вазни ҳам бўлиши керак. Тўртлик қанчалик чуқур маъно ва гўзал шаклга эга бўлмасин, агар у Р.нинг маҳсус вазнига тушмаса, Р. бўла олмайди» (Ё.Исҳоқов). Мумтоз поэтикага оид асарларда Р.нинг нега айнан ҳазаж баҳрида ёзилиши ва бу вазннинг нега қатъийлиги ҳақида аниқ фикр йўқ. Ўтмиш адабиётшунослари факат фалсафий фикрлар, ҳаётий кечинмаларни ифодалаш учун мазкур вазнларнинг қулайлиги хусусида гапириш билан кифояланадилар.

Р. икки хил қофияланиш тартибига эга: биринчи, иккинчи ва түрткінчи мисралары үзаро қофияланиб, учинчі мисраси очиқ қоладиган (а-а-б-а) тури хосий Р. ёки Р.и хоса дейилади. Мас.:

*Хижронда согиниб мәни шод этгайсөн,
Мен хастани мухлис эътиқод этгайсен,
Бу хатни анинг учун битидим мунда,
Күргач бу хатимни мени ёд этгайсан (Бобур).*

Түртала мисраси үзаро қофияланадиган (а-а-а-а) Р. күпроқ тарона – ёки Р.и тарона, айрим манбаларда эса мусарраъ деб юритиляди. Шунингдек, А.Навоий Р.нинг бу хилини рубоия деб атаган. Мас.:

*Кўнглумни ғаму дард ила қон айлади ишқ,
Кўз йўлидин ул қонни рағон айлади ишқ.
Ҳар қатрани билмадим қаён айлади ишқ,
Бедил эканим бўйла аён айлади ишқ (Навоий).*

Қайд этиш керакки, хосий Р. билан таронаи Р.нинг турли даврлардаги фаоллик даражаси, уларга ижодкорларнинг муносабати бир хил бўлмаган. Хусусан, Навоий меросида таронаи Р. салмоқли (ўзбекча Р.ларининг 95 фоизи, форсий Р.ларининг ҳаммаси) бўлса, Бобур хосий Р.ни маъқул кўрган (унинг 211 та Р.сидан 181 тасида уч мисра үзаро қофияланган); X – XI асрларда таронаи Р. ёзиш урф бўлса, Навоийдан кейинги даврда хосий Р.лар салмоғи ортиб борган.

Рубоийнинг композицион қурилиши маълум бир масала юзасидан фикрни изчил ривожлантириб, ихчам ва тугал ифодалашга мос: дастлабки икки мисрада ғоя ва мақсад, кейинги икки мисрада далил ва хулоса ўз аксини топлади. Шундан келиб чиқиб ҳозирги адабиётшуносликда Р.нинг биринчи мисраси *тезис*, иккинчиси *антитетис*, учинчиси *моддаи рубоия* (ёки хулоса учун асос бўладиган кўприк), түрткінчи мисра эса *синтез* дейилади. Яъни Р.нинг биринчи мисрасида жуда муҳим бир фикр тезис қилиб қўйилади-да, кейинги уч мисра шу фикр талқинига бағишлианди; ёки биринчи ва иккинчи мисрадаги фикрий тезисга учинчі мисрада антитетис қўйилиб, түрткінчи мисрада синтез (хулоса) берилади.

РУЖҮЙ (ар. رُجْعَى – қайтиш) – мұмтоз адабиётдаги шеърий санъат, аввал айтилған фикр (бирор нарса-тушунча, ҳолат ҳақида айтилған гап, унга қилинган қиёс, ташбех, тамсил ва ш.к.)дан қайтиб,

сүнг уни янада кучлироқ, таъсирироқ, гўзалроқ тарзда ифодалаш. Яъни Р. санъатида шоир шеърда ўзи келтирган чиройли ўхшатиш ва сифатлашларни гўё билмасдан айтиб қўйгандек ёки улардан қаноатланмагандай бўлиб, фикридан қайтади ва аввалгилардан кўра гўзалроқ ташбеху сифатлашларни келтиради. Атоуллоҳ Ҳусайнин таърифига кўра, Р.да лирик қаҳрамон маъшуқа гўзаллиги ёки бошқа бирор сабаб туфайли хушини йўқотар ҳолатга келади ва шу ҳолатида беихтиёр фикр айтиб қўйиб, кейин, хушига келгач, «аспиди мана-бундоқ эди» тарзида «гапини тўғрилаб олади». Мас., Мунис:

*Сабо таҳрикидин, йўқ, балки оғзинг шармидин бошин
Қуий салмоққа мойил бўлғусидур ҳар замон гунча, –*

байтида ғунчанинг бош эгиб туришини аввал шамол ҳаракати («сабо таҳрикидин») туфайли деб айтади, сўнг фикридан қайтиб, бунинг сабаби ғунчанинг ёр «оғзи шарми», яъни ёр оғзи гўзаллиги олдида бош эгиб туриши деб изоҳлайди. Бу ўринда Р. санъати ҳуснি таълил (қ.) санъати билан қоришиқ ҳолда намоён бўлади, бу эса ифоданинг янада гўзал ва таъсирили чиқишини таъминлайди. Илми бадиъга оид манбаларда Р. истидрок (қ.) деб ҳам юритилади, бироқ бу масала да яқдиллик йўқ, истидрокка берилган таърифлар Р.дан бирмунча фарқлидир.

РУКН (ар. رکن – устун) – арузда жузв (туркий арузда ҳижо)ларнинг муайян тартибда бирикишидан ҳосил бўлувчи ритмик бўлак, жузв билан баҳр орасидаги ритмик бирлик. Ҳозирги адабиётшуносликда Р. термини кўпроқ мазкур маънода қўлланса-да, мумтоз арузшуносликда у жузв (қ.) маъносида ҳам фаол ишлатилган. Аксинча, ҳозирда Р. термини билан юритилувчи тушунча мумтоз арузшуносликда афойил, тафойил, ажзо, вазн, аркон (Р.нинг кўплиги) каби истилоҳлар билан ҳам ифодаланган. Арузда жузвларнинг маълум тартибда қўшилишидан саккизта афойил ёки асллар, яъни асл Р.лар юзага келади:

Фауалун = ватади мажмуъ + сабаби ҳафиғ

Фоилун = сабаби ҳафиғ + ватади мажмуъ

Мафоийлун = ватади мажмуъ + сабаби ҳафиғ + сабаби ҳафиғ

Фоилотун = сабаби ҳафиғ + ватади мажмуъ + сабаби ҳафиғ

Мустафъилун = сабаби ҳафиғ + сабаби ҳафиғ + ватади мажмуъ

Мафъулоту = сабаби ҳафиф + сабаби ҳафиф + ватади мафрук

Мафоилатун = ватади мажмұъ + фосилаи сұғро

Мутафоилун = фосилаи сұғро + ватади мажмұъ

Мазкур саккыз асл Р.нинг тақроридан баҳрлар (қ.) хөсил бүлади. Аслларнинг зиҳофга (қ.) учрашидан тармоқ (ёки фаръий, фуруй) Р.лар юзага келади.

РУХИЙ-ТАРИХИЙ МАКТАБ – XIX аср охири – XX аср бошларыда романтизм эстетикаси ва немис файласуғи В.Дильтейнинг «ҳаёт фалсафаси» таълимоти асосида маданий-тарихий мактаба га зид ўлароқ вужудга келган адабиётшунослик мактаби. Дильтей таълимотига кўра, тарихий рух миллат ва даврнинг уйғун бирлиги бўлиб, мазкур бирлик, аввало, санъаткор даҳоси туфайли воқе бўлади. Яъни тарих ва руҳият санъаткор қалбида ягона кечинмага айланади ва худди шу кечинма бадиий шаклда моддийлашиб, яхлит маънавий-руҳий реалликка айланадики, бу маънавий-руҳий реаллик нафакат ўқувчи, балки санъаткорнинг ўзига ҳам илк бор намоён бўлаётган ҳақиқатнинг ўзидир. Дильтей санъат воқеликни бошқа гуманитар фанларга қараганда адекват акс этиришга кўпроқ қодир, санъат турлари орасида эса адабиёт руҳий-тарихий мавжудлик моҳиятини ҳаммадан кўра теранроқ идрок эта олади деб билади. Чунки адабиёт тил билан иш кўради, рух эса тилда ўзининг бутун теранлиги билан тўла ва объектив ифодасини топади. Шулардан келиб чиқиб Р.-т.м. бадиий асар талқинида руҳий-тарихий ва психологик ёндашувларни синтезлаштиришга интилади. У маданий-тарихий мактабга хос адабиётга позитивистик ёндашувни қабул қиласайди, адабиётшуносликнинг вазифаси табиий фанлардаги каби рационал тушунтириб бериш эмас, балки бадиий бутунликни кўпроқ интуитив тарзда («ҳамдардлик», «асар руҳига кириш» асосида) бевосита тушуниш ва талқин қилишдан иборат деб билади. Р.-т.м. бадиий асар таҳлилида «кечинма»ни марказий ўринга қўяди, унга субъект (ижодкор) ва объект (давр) бирлиги сифатида қарайди, ҳар бир ижодкор бетакрор, «руҳ тарихи»даги ўзига хос ва автоном ҳодиса деб билади. Бирок бу биографик ёндашувдан мутлақо фарқланади. Зоро, бадиий асарда тарихий рух акс этади деб билган Р.-т.м. ижодкор шахси, дунёқараши масалаларига жиддий эътибор бергани ҳолда, асарда акслангандар тарихий рух илдизини биографик фактлардан эмас, даврнинг умуммаданий контексти (даврнинг умумий руҳи, етакчи фалсафий қарашлар, шуларга бевосита боғлиқ ижодкор дунёқараши)дан қидиради. Р.-т.м.

ўтган асрнинг 20-йилларида гуллаб-яшнаган бўлса, 30-йилларда унинг алоҳида адабий мактаб сифатидаги фаолияти тугади: унинг бир кисм тарафдорлари ўз фаолиятини феноменологик мактаб, бошқа бир қисми янги гегелчилар қаторида давом эттириди.

C

САБАБ (ар. سَبَاب – чодирнинг арқони) – сокин ва мутаҳаррик ҳарфларнинг муайян тартибда биришидан ҳосил бўлувчи ритмик бирлик, жуз (к.). Ҳарфларнинг қай тартибда биришидан келиб чиқиб, С.нинг икки тури фарқланади: С.и ҳафиғ (ёки енгил С.) ва С.и сақийл (ёки оғир С.). Битта мутаҳаррикка бир сокин ҳарфнинг қўшилишидан С.и ҳафиғ ҳосил бўлади: «гул», «кўз», «қад» каби сўзлар шу вазнга мос. Мас., «гул»: мутаҳаррик (гу) + сокин (л). Иккита мутаҳаррик ҳарфнинг қўшилишидан С.и сақийл (талаффузи С.и ҳафиғга нисбатан қийинроқ экани учун шундай номланади) ҳосил бўлади: «гала», «сана», «била» каби сўзлар шу вазнга мос. Мас., «била»: мутаҳаррик (би) + мутаҳаррик (ла).

САВОЛУ ЖАВОБ (ар. سوال و جواب – савол-жавоб) – мумтоз адабиётдаги шеърий санъат, байтни икки шахснинг ўзаро савол-жавоби тарзида шакллантириш. С.ж. санъати, шунингдек, байт доирасидан чиқиши, яъни бир байт савол, иккинчиси эса жавоб тарзида шакллантирилиши ҳам мумкин. Рашидиiddин Вотвот ушбу санъатни форсийзабон шоирлар ғоят қадрлаши, форс шеъриятида бошдан-оёқ шу санъат асосида ёзилган қасидалар мавжудлигини қайд этган. С.ж. санъати ўзбек шеъриятида ҳам жуда фаол кўлланган, у шеърга жонлилик, ҳаётйлик баҳш этиши билан деярли барча мумтоз шоирларимиз эътиборини тортган. Мас.:

Сўрса малакулмавт: «Санга ҳур көрак?» деб,
«Йўқ-йўқ, манга дилхоҳ!» дегумдур, даги ўлгум (Атойи).

Дедим: кўнглумга ҳар ёндин ҳадангинг недурур ёра?
Мұхаббат ўтиға, деди, ўтингурким қалайдурман (А.Навоий).

Ҳажрда қаддимни дол эттинг, десам, бөргай жавоб:
Ким қўйибдур севгини қадди букилган чол учун (Э.Воҳидов).

САДР (ар. صدر – күкрак) – қаранг: тақтиъ

САЁХАТНОМА – адабий жанр, йўлчининг сафар давомида кўрган-кечиргандарни, ўзга юртларнинг табиати, ижтимоий-майлий турмуши, халқи, урф-одатлари ва бошқа ш.к. муаллиф мансуб миллат ўкувчилари учун қизиқарли ва фойдали бўлиши мумкин маълумотлар берувчи асар. Аксар ҳолларда С.лар ўз олдига ўзга юртлар ҳақида маълумот бериш, яъни маърифий мақсад билан бир қаторда публицистик, бадиий-эстетик, фалсафий, сиёсий мақсадларни ҳам кўяди. Жанрнинг генезиси фольклор ва ёзма адабиёт анъаналарининг синтезлашуви натижаси бўлиб, марказида сайёх-ҳикоячи турган асарлар фольклор (мас., эртаклар) ва ёзма адабиётда (мас., антик саёхатномалар) жуда қадимдаёқ яратилган. С.ларнинг жанр-композицион ҳусусиятлари сифатида марказида сайёх-ҳикоячи образининг туриши ва сафар (муайян йўналишдаги макон ва замонда ўзгарувчи ҳаракат) фактининг мавжудлиги, сайёх-ҳикоячининг кузатувчи мақомида туриши ва ўзга юртда кўргандарни ўз юритидаги ҳолат билан қиёслаб бориши кабиларни кўрсатиш мумкин. Жанрнинг ушбу асосий ҳусусиятлари сақлаб қолингани ҳолда, адабиёт ривожи давомида С.нинг бир қатор бошқа кўринишлари ҳам пайдо бўлди. Жумладан, кўпроқ публицистик характердаги ва ижтимоий-маърифий мақсадларни кўзловчи «ўз юрти бўйлаб сафар»лар (А.Радищев. «Петербургдан Москвага саёҳат»; Муқими. «Саёҳатнома»; Чўлпон. «Вайроналар орасидан»); ўз юртидаги ҳолатни шартли-равишда таҳлил қилиш, муайян ижтимоий-сиёсий қарашларни ифодалаш мақсадларига қаратилган ва кўпроқ сатирик характердаги асли мавжуд бўлмаган «фантастик юртлар»га саёҳатлар (Ж.Свифт. «Гулливернинг саёҳатлари»); хорижтикларнинг муаллиф юртидаги саёҳати (Монтескье. «Форс хатлари»; Фитрат. «Сайёх ҳинди») ва б. Шунингдек, адабиёт тарихида жанрга хос шаклий ҳусусиятлар (сайёх, сафар факти) олингани ҳолда, С.лардан ўзгача мақсадларни кўзловчи асарлар ҳам кўплаб учрайди. Мас., Чўлпоннинг «Йўл эсдалиги»да С.га хос шакл асосида сайёх-муаллиф руҳияти, дунёқарашидаги ўзгариш жараёнлари ифодаланганки, уни рамзий лирик-публицистик асар ҳисоблаш мумкин.

САЖЬ (ар. سجع – булбул, тўти, қумри каби қушлар овозининг уйғунлашиб келиши, ўлчовли) – мумтоз адабиётдаги лафзий санъат, бир ёки бир неча гаплардаги айрим бўлакларнинг ё вазнда, ё қофияда, ё ҳар иккаласида мос келиши. Илми бадиъга оид айрим манбаларда С. насрга хос дейилса, бошқаларида ҳам насрга, ҳам

назмга хослиги эътироф этилади. Шунга қарамай, С.ни насрға хос деб билиш, уни қофияли наср сифатида тушуниш кенгроқ оммалашган ва бу илмий жиҳатдан тўғрироқдир. Чунки назмдаги С. ва унинг турларига берилган таърифлар *тарсеъ*, *мувозана*, зулқофитайн, зулқавофиъ, издивож каби қатор шеърий санъатларни қамраб олади. Яъни бу ҳолда бир ҳодиса турли номлар билан юритилади, холос, С.ни бундай кенг маънода тушуниш терминологик чалкашликларни янада кучайтиради. Шунинг учун С.ни наср билан боғлиқ ҳодиса деб билиш мақсадга мувофиқ. С.нинг илдизлари туркий халқлар фольклорига бориб тақалади. Агар халқ оғзаки ижоди жанрларининг, асосан, ижрога мўлжаллангани, ижронинг мусиқа жўрлигига амалга ошгани эътиборга олинса, С.нинг фольклорда кенг оммалашиш сабаби (ўзига хос оҳанг, мусиқийлик ҳосил қилиши, эстетик таъсир кучининг ошиши каби) аён бўлади. Мас., «Шайтиб ҳут кириб, мушуклар миёв бўлиб, қозонлар сутга тўлиб, битта-ярим эрта қочган қўйлар кўзилаб, қорлар қошоқ бўлиб эрив, кўзигуллар очилиб, одамзод баҳрига оламга бир ажойиб эрта қўклам иси сочилибди» («Юнус билан Мисқол»).

С. ёзма адабиётда ҳам анча кенг тарқалган санъатлардан биридир. Жумладан, мумтоз адабиётимизда достон бобларига қўйилган насррий сарлавҳаларда (мас., Навоий «Хамса»си), девонларга ёзилган дебочаларда, насррий муножотларда С. санъати кенг қўлланган. Ҳозирги насрда ҳам матннинг айрим ўринларида, хусусан, тасвир предметига эмоционал муносабат қуюқ ифодаланувчи лирик чекинишларда, воқеа ривожидаги ҳаяжонли нуқталар ёки персонажлар руҳиятида жунбишга келган кечинмалар тасвирида С.га хос хусусиятларни кўриш мумкин.

САЙЁР СЮЖЕТЛАР НАЗАРИЯСИ, МИГРАЦИЯЛАР НАЗАРИЯСИ – XIX нинг иккинчи ярмида пайдо бўлган назария. Унга кўра, турли халқлар оғзаки ижодида бир-бирига ўхшаш сюжетлар мавжудлиги адабий асарлар бир маданий-тариҳий ҳудуддан бошқа маданий-тариҳий ҳудудларга кўчиб юриши билан изоҳланади. Мутахассислар С.с.н.нинг вужудга келишини халқаро маданий алоқаларнинг кучайиши билан боғлайдилар, унинг асосчиси сифатида эса немис олимни Т.Бенфей эътироф этилади. 1859 йили Т.Бенфей хинд фольклори намунаси бўлмиш «Панчататра»ни нашр эттиради, унга олимнинг бу нодир асар юзасидан олиб борган тадқиқотлари ҳам кўшилганди. Бу тадқиқотида Т.Бенфей аксарият ҳикоят ва эртаклар Хинди斯顿да пайдо бўлган, кейин бутун дунёга тарқалган деган хулоса чиқаради.

Мазкур хулоса *мифологик мактаб* (қ.) қарашларига зид бўлиб, икки йўналиш орасидаги баҳс-мунозаралар натижасида уларнинг тадқиқ предмети чегараланади: *мифологик мактаб* вакиллари асосий эътиборни фольклор генезисига, миграциялар назарияси эса унинг кейинги ҳаётига қаратди. С.с.н. фольклорни муайян бир элат ёки халқ мулки тарзida тушунишни чеклади, унга турли юрт, даврлар поэтик маданиятларидан ўзлаштириш натижаси деб қаради. Албатта, бундай қарашда муайян бир ёқламалик бор. Зеро, турли халқлар фольклоридаги ўхшашиклар факат адабий алоқа, ўзлаштириш билан гина изоҳланмайди, бунда типологик ўхшашикларни ҳам назарга олмок зарур. Бироқ С.с.н. қиёсни кўпроқ формал-схематик асосда амалга оширдики, бу типологик ўхшашикларнинг ҳам аксар ўзлаштириш сифатида тушунилишига олиб келди. Шуларга қарамай, С.с.н. фольклоршунослик ва адабиётшунослик ривожида сезиларли из қолдирди: фаолияти турли халқлар фольклорини қиёсий ўрганиш билан боғлиқ бўлгани учун ҳам, у илмий муомалага жуда катта ҳажм ва қўламдаги материални жалб этди, қиёсий адабиётшунослик ривожига хизмат қилди, тарихий поэтика соҳасининг шаклланишига ҳам маълум даражада асос солди.

САНОЙИЪ (ар. صناعي – санъатнинг кўплиги) – нутқни гўзал қилувчи бадиий воситаларнинг жами. Нутқни безовчи воситалар, нутқ гўзалликлари дастлаб икки турга бўлинади. Биринчиси нутқнинг атайлаб ишлов берилмаган, тил ҳодисасига айланиб улгурган табиий гўзаллиги бўлиб, улар зотий гўзалликлар дейилади. Нутқка безак бериш учун атайн яратиладиган воситалар оризий гўзалликлар дейилади. Атоуллоҳ Хусайний таъбири билан айтганда: «Биринчи наеъи ... дилбарларнинг табиий ҳусни янглиғдур ва иккинчи наеъи ... безаклар сингаридур». Илми бадиъда С.ни нутқнинг кўпроқ қайси жиҳатига безак бериши жиҳатидан лафзий, маънавий ҳамда лафзию маънавий санъатлар кўрининишида таснифлаш анъанаси шаклланган. Нутқнинг маъно томони билан боғлиқ бўлиб, унинг маъно гўзалигини таъминлашга хизмат қилувчи шеърий санъатлар маънавий санъатлар деб юритилади. Адабиётларда ийхом, тавжих, тажохули ориф, талмех, ирсол ул-масал, ҳусни таълил, лаффу нашр, муболага, ташбех, тамсил, истиора каби ўнлаб санъатлар маънавий санъатлар сирасига киритилади. Шеърнинг кўпроқ шакл томонига эътибор қаратган ҳолда унинг услубига безак берувчи санъатлар эса лафзий санъатлар дейилади. Айни пайтла, бу ўринда маъно ҳам эътибордан четла копмайди, аксинча

«алфозни маъноға тобиъ қилмоқ» (А.Хусайний) талаби қўйилади. Илми бадиъга оид асарларда *тарсөъ, тажнис, сажъ, қалб, тажзия, зулқофиятайн* кабилар лафзий санъатлар сифатида тавсифланади. Нутқни гўзал қилувчи бир гуруҳ воситалар ҳам шаклга, ҳам маънога алоқадор бўлгани боис, *лафзию маънавий ёки муштарак санъатлар* деб юритилиб, унга *тақобул, муқобала, таъдил, тансиқ ус-сифот, иқтибос, тазмин, ҳусни ибтидо, ҳусни тахаллус, ҳусни маттлаъ, ҳусни мақтас* кабилар киритилади. Санъатларни бундай гурухлашда бирмунча шартлилик бор. Чунки шаклнинг маънодан, маънонинг эса шаклдан айри ҳолда санъат ҳосил қилиши мумкин бўлмаган ҳолдир. Бу ҳақда яна Атоуллоҳ Хусайний ёзади: «Борча гўзалликларнинг асоси улдурким, нутқ ул тарзда адо этилгайким, маънони англашға, анинг латофати, таркиби ва соғламлиғига ҳеч бир халал ётмагай. Асос ул эмаским алфозға ҳусни зийнат бермакка сайъ қилгайлар-у, маъноға халал етур ҳолдин кўз юмғайлар ёхуд, аксинча, холис маъно баён этиб, ҳусни адо тариқига йўламагайлар».

САРБАСТ, ВЕРЛИБР – ўзбек адабиётида XX асрдан оммалаша бошлаган шеър шакли. С.да ёзилган шеър мисраларидаги бўғинлар сони ҳам, уларнинг чўзиқ-қисқалиги ҳам, туроқланиш ёхуд қофияланиш тартиби ҳам мутлако эркинлар. Шунинг учун ўзбек адабиётшунослигига С. ва эркин шеър терминлари кўпинча синоним тарзида ишлатилади, бироқ бу терминлар бошқа-бошқа тушунчаларни англатади (к. эркин шеър). С. шеър насррий нутқдан аввалбошдан нутқий бўлак (мисра)ларга бўлиниши билан фарқ қилиб, бу нарса график (ҳар бир мисрани алоҳида сатрга ёзиш) ва интонацион (ритмик пауза ва ритмик акцентлар ҳисобига) жиҳатдан таъкидланади. Х.Давроннинг «Энг кучли бақириқ...» номли шеъри С.га мисол бўла олади:

Энг кучли бақириқ –	6
Соқовнинг бақириғи.	7
Ў, қандай куч билан бақирадар	9
Қабртошлар...	3
Энг кучли сукунат – на кўз сукути,	11
на соқов сукути, на тош сукути.	11
Энг даҳшатли сукунат – Шоир жим юрса...	12

Келтирилган шеърда мисралардаги бўғинлар сони турлича, мисраларнинг ўзаро қофияланиши кузатилмайди, лекин график кўриниши унинг шеър эканини, эмоционал тўйинтирилган нутқ экан-

лигини таъкидлаб турадики, уни мос оҳанг билан ўқиймиз. Прозаик нутқдан фарқли ўлароқ, бунда нутқнинг мусиқий бўлишига ҳам эътибор берилади, лекин унинг мусиқийлиги төнг ўлчовлилик ёки тартибли қофияланиш асосида эмас, балки сўз ва товуш такрорлари, ритмик ургулар ҳисобига таъминланмоқда, С.да ёзилган шеърнинг анъанавий бармоқ ёки аруздаги шеърдан фарқли томони шуки, ундаги оҳангдорлик аввалбошдан маълум маромга солинмайди, муайян маромга мос кечинмалар ифодаланмайди. Аксинча, бунда фикртуйғуга мос оҳанг сўзнинг маъноси асосида юзага келади, яъни бу ўринда маъно асосида ўқилади ва сўзлар шунга мос оҳангларга ўрлади.

САРГУЗАШТ АДАБИЁТИ – ҳақиқатда юз берган ёки тўқиб чиқарилган воқеаларни қизиқарли тарзда ҳикоя қилувчи воқеабанд асарларнинг умумий номи. С.а. намуналарига хос умумий хусусиятлар сифатида сюжет воқеаларининг шиддат билан ривожланиши, сирли ва ажабтовур воқеаларнинг юз бериши, ўткир интригаларга бойлиги, сюжет ситуацияларининг кескин ўзгариши ва персонажлар тақдирида терс бурилишлар юз бериши (омад – омадсизлик, баҳтиёрлик – баҳтсизлик), қаҳрамонларнинг турли синовларга дуч келишию уларни енгигб ўтиши ва ш.к.ларни кўрсатиш мумкин. Бу жиҳатлари билан С.а. *фантастика, илмий фантастика ва детектив адабиётга яқин туради, аникроғи, саргузаштилилк* бу турдаги асарларнинг ғарбасига хос хусусиятдир. Шунга кўра, кўплаб асарларда саргузаштилилк, детектив ва фантастика элементларининг қоришик ҳолда намоён бўлиши табиийдир. Айни чоғда, саргузаштилилкка енгил-елпи ҳодиса сифатидагина қараш ҳам учалик тўғри бўлмайди. Чунки жаҳон адабиёти саргузаштилилк асосида яратилган жиддий асарларни, сўз санъатининг нодир намуналарини ҳам билади. Жумладан, Сервантеснинг «Дон Кихот», Ф.Рабленинг «Гаргантюа ва Пантагрюэль», Ж.Свифтнинг «Гулливернинг саёҳатлари» каби асарлари ҳам саргузашт сюжет асосига қурилган. Умуман олганда, кўпроқ оммавий китобхонга мўлжаллангани, китобхонни ўзига жалб этишни асосий мақсад қилишидан келиб чиқиб С.а. беллелтистикага мансуб дейилади. Айримлар эса болалар ва ўсмиirlар томонидан севиб ўқилгани учун С.а.нинг кўплаб намуналари, жумладан, А.Дюма, Ф.Купер, М.Рид, Р.Стивенсон, Р.Хаггард каби адилларнинг дунёга машҳур асарларини болалар адабиёти сирасига киритадилар. Ўзбек адабиётида саргузашт сюжет асосида яратилган асарлар (А.Навоий. «Фарҳод ва Ширин»; Ф.Гулом. «Шум

бала» ва б.) ҳам, С.а.нинг яхши намуналари ҳам (Х.Тўхтабоев. «Сарик девни миниб») мавжуд.

САРИЙ (ар. ساری – тез) – аруз баҳрларидан бири, тез айтиладиган баҳр бўлгани учун шундай номланган. 2 та *мустафъилун* (– – V – / – – V –) ва 1 та *мағъулоту* (– – – V) аслларининг кетмакет тақорланишидан ҳосил бўлади. Навоийнинг «Мезон ул-авzon» асарида С. баҳрининг бөш вазни, Бобурнинг «Мухтасар»ида ўн етти вазни мисоллар билан келтирилган. С. баҳрининг бир неча вазнлари бўлса ҳам, шеъриятимизда, асосан, икки вазнидан кенг фойдаланилади. Ўзбек мумтоз шеъриятида илк бор Алишер Навоий ўзининг икки ғазали ва бир фардини ҳамда «Ҳамса» таркибидаги «Ҳайрат ул-аброр» достонини С. баҳрида яратган. Навоийдан сўнг Оғаҳий, Муқимий, Ҳабибий каби шоирлар ҳам ушбу баҳрда шеърлар ёзгандар. Мас., Навоийнинг:

Сендин йироқ кўзнинг эрур ҳайронлиги,
Ҳажринг аро ҳар лаҳза саргардонлиги, –

байти шу баҳрда бўлиб, у сариъи мусаддаси солим (– – V – \ – – V – / – – – V) вазnidадир.

САРКАЗМ (юн. sarkaso – этини юлмоқ) – 1) комикликнинг тури, тасвирланаётган нарсага қаратилган заҳарли кулги. Антик даврлардан келувчи анъанага кўра, С.га киноянинг бир тури, унинг кескин ва юқори даражада намоён бўлиши сифатида қаралади. С. билан киноя орасида ўхшашлик катталигига қарамай, уларни жиддий фарқловчи жиҳатлар ҳам бор. Жумладан, кинояда ҳамиша кўчма маънолилик хусусияти сақланади ва объект билан ифода алоқаси пардаланади, С.да эса кўчма маънолилик, пардалангандлик хусусияти емирилади – назарда тутилган объект билан ифоданинг алоқаси анча очиқ бўлади. Агар кинояда баҳо контекстда реаллашса, С.да салбий баҳо матннинг ўзиданоқ англашилади – у гўё ҳарир мато билан пардаланганд (юзадаги мақтов ёки нормал муносабат замидаги кулги шундоқ сезилиб туради). Маълум даражада пардалангандлик С.ни инвективадан, ошкора фош этувчи ғазабли нутқдан фарклайди. Айни чоғда, С. субъектив муносабатнинг намоён бўлиши жиҳатидан ҳам киноя билан инвектива оралиғида туради: кинояда объектга нисбатан яшириб, хотиржам турган ҳолда кулинса, С.да субъект муносабати яширилмайди, лекин унинг ифодаси инвектива даражасида кескин бўлмайди; 2) бадиийлик модуси. С. бадиийлик

модуси сифатида юмор билан бирга бир гурӯҳни ташкил қиласиди. Агар юморда ниқоб остида индивидуаллик бўлса, С. ниқоб остида индивидуалликнинг йўқлиги билан характерланади. С. бадийлик модуси қаҳрамони учун ниқоб оламда мавжудликнинг ягона шакли, унинг бору йўғи ниқоб, шунинг учун ундан айрилиб қолмасликка ҳаракат қиласиди. Яъни С.даги «мен» – ноль, йўқ даражадаги «мен», у оламда ниқобсиз мавжуд бўлолмайди. Мас., «Парвона»даги Ўткурий турли ниқоблар (шоир, ошиқ, улфат ва х.)ни кетма-кет алмаштираверади, бироқ бу ниқоблар ортида унинг ўзига хос шахсияти кўринмайди. Ёки М.Муҳаммад Дўстнинг «Истеъфо» қиссасидаги бошқа қаҳрамонларга киноявий муносабат кузатилгани ҳолда, Бинафшахонга муносабат С. даражасига чиқадики, унда хурмат қилишга, қадрлашга арзийдиган шахсиятнинг ўзи йўқ. Бинафшахон фақат роль ўйнайди, унинг турган-битгани ниқобдан («элга таникли шоира», «катта арбобнинг хотини») иборат, холос. «Бинафшахон шеър ёзганда тақадиган тақинчоқларини тақиб... фарангি атирнинг анвойи бўйларини ҳар ён таратиб» каби жумлалардан унинг барча хатти-ҳаракатлари ниқобга мос қиёфани ўхшатишга қаратилганини англаш мумкин. Худди юморда бўлгани каби, С. бадийлик модуси учун ҳам энг олий қадрият – индивидуаллик. Фарқи шуки, юмор ниқоб остидаги ҳақиқий индивидуалликни очишга қаратилса, С. қаҳрамон ниқоб қилиб олган соҳта индивидуалликни инкор қилишга қаратилади.

САТИРА (лот. *satira* – аралаш, қурама) – 1) комикликнинг асосий турларидан бири. С.нинг юмордан фарқи шундаки, у ўз обьектида айрим нуқсонлар, тузатса бўладиган камчиликларни эмас, балки бутунлай танқид ва инкор этиладиган моҳиятни – жамият ва унинг тараққиёти учун жиддий зарар келтирадиган, ижтимоий хавфли иллатларни кўради. Шу боис С. тузатишни эмас, бутунлай йўқотиш мақсадини қўяди. С.даги кулги юмордаги каби дўстона, беғараз кулги эмас, балки фош қилувчи бешафқат кулгидир (мас., А.Қаҳҳор. «Оғриқ тишлар», «Тобутдан товуш»); 2) бадийлик модуси. С., одатда, қаҳрамонликка тескари модус сифатида талқин этилади. Сатирик модус қаҳрамони жамият ҳаёти учун муҳим ва дол зарб мақомга даъво қилгани ҳолда, шахс сифатида бундай мақомга муносиб бўлолмайди. Унинг барча интилишлари, муҳим ва ноёб шахс эканига ўзини ва бошқаларни ишонтиришга уринишлари, ўзи эгаллаб турган мақомни сақлаб қолиш учун хатти-ҳаракатлари – барчаси ўз-ўзини тасдиқлаш шаклида бўлишига қарамай, моҳиятнан

ўз-ўзини инкор қилишгача олиб келади. Сатиранинг идеали ҳам худди қаҳрамонлик модусидаги каби жамият ҳаётидаги энг муҳим ва долзарб вазифани адо этувчи шахсадир. Фарқи шуки, сатирик қаҳрамоннинг моҳияти (имкони, савияси ва б.) у ижро этаётган рол (ижтимоий мавқеи, вазифаси)дан анча тор. Қаҳрамон буни англаб тургани ҳолда, ўзини эгаллаб турган мавқеига муносиб қилиб кўр-сатишга интилади, бу эса уни қаҳрамонлик ва трагик модуслардан фарқлайди. Сатирик модуснинг воқе бўлишида муаллифнинг фаол муносабати, кулги орқали инкор қилиш мавқеида туриши муҳим. Шу билан бирга, сатирик модус марказидаги шахс муаллиф учун кулги объектигина бўлиб қолмайди, у ҳам, модус назариясидаги «мен-оламда» концепциясига кўра, трагик ва драматик қаҳрамонлар каби муаллиф (китобхон) учун ўз-ўзини англаш имкониятидир. Айтиш керакки, модус маъносидаги С. комиклик тури сифатида тушунилган С. билан доим ҳам мувофиқ келмайди. Бу ўринда С. қаҳрамонлик модусининг трансформацияга учраши натижасида ва унинг зидди сифатида пайдо бўлгани (қаҳрамон – аксилқаҳрамон), шунингдек, комиклик С.нинг бош хусусияти эмас, балки унинг учун факультатив ҳодиса эканлигини эсда тутиш лозим. Бундан ташқари, битта асар доирасида турли бадиийлик модуслари қоришик ҳолда намоён бўла олади. Агар шулардан келиб чиқилса, мас., А. Қаҳҳорнинг «Сароб» романидаги Саидийга фақат драматик модус эмас, сатирик модус қаҳрамони сифатида ҳам қараш керак. Муаллиф уни инкор қиласи, бироқ қаҳрамон эстетик аналогия сифатида ёзувчи учун ўз-ўзини англаш воситаси бўлиб, Саидийнинг йўли нотўғри эканлигини ўзи учун тасдиқлаб олишни хоҳлайди. Табиийки, ўкувчида ҳам худди шу ҳолнинг кечиши кўзда тутилади. Демак, «Сароб»дан трагик ёки фақат драматик катарсисни кутиш ўзини оқламайди, чунки бу ҳолда субъект – обьект – ўкувчи бирлигига эришилмайди. «Сароб»нинг баъзан нотўғри талқин ва баҳоларга учрагани асар бадииятининг айни шу хусусияти доим ҳам эътиборга олинмагани билан изоҳланиши мумкин.

СЕНТИМЕНТАЛИЗМ (фр. *sentiment* – ҳис) – XVIII асрнинг иккинчи ярмида Европа миллий адабиётларида вужудга келган оқим, номланиши инглиз адаби Л. Стерннинг «Сентиментал саёҳат» (1768) асари билан боғланади. Маърифатпарварлик рационализмининг таназзулга учраши натижасида майдонга чиқсан С., ундан фарқли ўлароқ, инсон табиатининг жавҳари онг эмас, ҳисдир деган қарашга асосланади. Шунга кўра, С. мукаммал инсонни тарбиялашнинг шар-

ти дунёни ақлға мұвоғық тарзда қайта қуриш әмас, унга табиатан хос бўлган ҳисларни эркинлаштириш ва ривожлантиришдир деб билади. С. адабиётининг қаҳрамонига хос мұхим хусусият юқори дара жада индивидуаллаштирилганлик бўлиб, бу жиҳати билан у жонли инсонга яқинроқ туради. Яна бир жиҳати, С.да қуйи табақа кишилари ҳаёти, ички дунёси тасвирига кўпроқ эътибор бериладики, бу унинг ютуқ томони, қашфи сифатида баҳоланади. Табиийки, С.да инсонни баҳолаш мезони ҳам шунга мос ўзгарди: инсон қиммати унинг ҳис эта олиш даражаси, катта туйгуларга қобиллигига қараб белгиланади, ҳис эта олиш инсонга хос энг юксак фазилат ҳисобланади. С. адабиёти инсон руҳиятини чуқур таҳлил қилишга интилди, инсон бир қолип доирасида қолмаслиги, унинг турли омиллар таъсирида «ҳар хил» бўлиб туриши мумкинлигини кўрсата олди ва бу билан инсонни анча ҳаётий тасвирлашга эришди. С.нинг кўплаб вакиллари инсон руҳиятини, умуман, инсонни ижтимоий мұхит билан боғлиқлиқда тасвирлашга интилдилар (Ж.Руссо. «Янги Элоиза»; Д.Дидро. «Фаталист Жак»). Булар С. бағрида адабиёт тараққиётининг кейинги босқичлари – романтизм ва реализмга хос хусусиятлар ниш уриб етилгани, унинг бадиий тафаккур ривожида сезиларли аҳамият касб этганидан далолат беради. Айни чоғда, С. адабиётининг ўртамиёна намуналарида меъёрдан ошган, сунъийлик даражасига етган эмоционаллик – йиғлоқилик, ҳиссиётга ўта берилувчанлик, ҳиссиётлар оламида ўралашиб қолишилик каби жиҳатлар ҳам учрайди. Илмий муомалада салбий маънода қўлланувчи «сентименталлик» терминининг келиб чиқиши шунга бориб тақалади. Шу билан бирга, жаҳон бадиий тафаккури С.нинг бош хусусияти бўлган ҳиссийликни ўзига сингдириб олганини ҳам эътироф этиш керакки, сентименталлик (к.) адабиётдаги воқеаликка муносабат турларидан бири сифатида тушунилиши шундандир.

СЕНТИМЕНТАЛЛИК (русчадан калька: «сентиментальность») – муаллиф эмоционаллиги кўринишларидан бири; маънавий дунёси ғоят бой бўлгани ҳолда, ҳаётда шунга муносаб ўрин тополмаган, тақдирнинг изми ёки жамиятнинг жорий тартиботлари бир четга суриб кўйган инсонларга ачиниш ҳисси билан йўғрилган муносабат. Бадиийлик модусларидан фарқли равишда, С. кўпроқ субъект билан боғлиқ. Яъни бу ўринда субъект – объект – ўкувчи учлигидан биринчиси (ижодкор) етакчилик қиласи. Шуни ҳам таъкидлаш жоизки, ижодкор С.и барча ўкувчиларга бирдек таъсир қилолмайди, бу нарса конкрет ўкувчининг характер хусусиятлари, бадиий диди,

дунёқараши кабилар билан бевосита боғлиқдир. Яъни ижодкор С.и айрим ўкувчиларда шунга мос катарсисни юзага келтирса, бошқаларида киноявий муносабат ҳам уйғотиши мумкин. Мазкур ҳол С.нинг объект (қаҳрамон)даги асоси аниқ-равшан, мустаҳкам эмаслиги билан боғлиқдир. Ривоя персонаж тилидан берилган ёки муаллиф ўзи билан персонаж орасида эстетик дистанцияни сақлай олмаган (бу нарса, айниқса, бошловчи ижодкорларга хос) ҳолларда объект (қаҳрамон)нинг ўзида С. бордай туюлади, лекин бу ҳол-да ҳам С., аслида, муаллифнинг ғоявий-эмоционал муносабати асосида юзага чиқади. Чунки объект ўз табиатига кўра трагик ёки драматик хусусиятга эга бўлиши мумкин, бироқ муаллиф ундаги бу жиҳатларга урғу беришга эмас, унга ачиниш туйғуларини ифодалаш ва ўкувчига юқтиришга интилади. Mac., Чўлпоннинг «Қурбони жаҳолат» ҳикояси қаҳрамони Эшмуродда драматизмдаги каби ўзини ўзгаларга (муҳит, жамият ҳолати) қарши кўйган ҳолдаги ички фаол муносабати бор. Лекин муаллиф қаҳрамонида мавжуд драматизм имконларини рӯёбга чиқариш ўрнига унга сентиментал муносабатини ифодалаш ва шу орқали ўкувчидан ачиниш туйғуларини уйғотишга интилади. Натижада Эшмурод ўкувчи ачиниши керак бўлган «қурбон» мақомида қолади, муаллиф С.и қаҳрамонни ёқлаб, уни «қурбон» қиласётган муҳитни инкор этишга қаратилади. Сентиментал қаҳрамонлардан фарқли ўлароқ, трагик ва драматик қаҳрамонлар ўз мавжудлигини намоён этиш учун олам тартиботига (трагизм) ёки бошқа бир «мен»га – ўзгалағта (драматизм) қарши тура олади, яъни улар ҳаракатсиз, пассив қурбон эмас, уларнинг ҳатто ўлимни ҳам ўз мавжудлигини намоён қилиш йўлидаги ҳаракат, уриниш бўлиб қолади (Анна Каренина, Жюльен Сорель). Агар бадиийлик модуслари асосида ётувчи «мен-оламда» концепцияси қаҳрамоннинг ўз мавжудлигини англаши ва намоён этишини талаб этса, С.да қаҳрамоннинг мавжудлигини идрок этган ҳолда уни намоён қилолмаслиги кузатилади ва айни шу ҳол уни «қурбон» мақомида қолдиради (қиёсланг: «Ўткан кунлар»даги Кумуш ва «Даҳшат»даги Унсиннинг ўлими).

СИЛЛАБИК ШЕЪР ТИЗИМИ (юн. syllabe – бўғин) – бир хил миқдордаги бўғинлардан таркиб топган мисралар такорига асосла-нувчи шеър тизими. С.ш.т. ургуси турғун бўлган тиллар (мас., француз тили) табиатига мос бўлса-да, тарқалиш кўлами анча кенгки, бу турли омилларга боғлиқ. Mac., роман тилларидаги адабиётларда у антик шеър тизими асосида, бу тил эгалари учун лотин тилидаги хижолар қисқа-чўзиқлиги аҳамиятсиз бўлиб қолиши оқибатида (яъни

қисқа-чүзиқлилік фарқланмай қолгач, антик шеърларда изометрия факат хижолар сонига боғлиқдек бўлиб қолган) юзага келган ва у миллий тил табиатига мос шеър тизимиға ўтишда бир босқич бўлиб хизмат қилган. Жумладан, рус шеъриятига поляк адабиётидан ўзлашган силлабик шеърларда мисра охири ёки ўртасида ритмни таъкидлаш учун ургули бўғин, келтирилганки, бу кейинчалик силлаботоник шеър тизимиға ўтишга асос бўлган. Баъзида С.ш.т. билан бармоқ битта нарса деб тушунишга мойиллик кузатилади, бу тўғри эмас. Бармоқ тизимида, силлабик шеърдан фарқли ўлароқ, мисрадаги бўғинлар сонигина эмас, уларнинг қай тартибда турокланиши ҳам аҳамиятлидир (қ. бармоқ).

СИЛЛАБО-ТОНИК ШЕЪР ТИЗИМИ (юн. syllabe – бўғин, tonos – ургу) – шеър мисраларида ургули ва ургусиз бўғинларнинг бир тартибда гурухланиб такрорланишига асосланган шеър тизими, XX асрға қадар ушбу шеър тизими «силлабо-метрик» деб номланган. Рус шеъриятида В.Тредиаковский ва М.Ломоносовлар ўтказган ислоҳотдан сўнг мазкур шеър тизими етакчилик қила бошлаган. Рус силлабо-тоник шеър тизимида бешта стола (рун) бўлиб, улар хорей, ямб, дактиль, анапест ва амфибрахий тарзида антик шеър тизимидан ўзлаштирилган терминлар билан юритилади. Шу столаларнинг тартибли такрори ритмни ҳосил қилади, конкрет шеър ўлчови эса уч столали ямб, тўрт столали ямб қабилида номланади.

СИМВОЛИЗМ (юн. simbolon, фр. symbolisme – белги, нишон) – Европада XIX аср охири – XX аср бошларида кузатилган маданий-маънавий инқирозшароитида, позитивистикёндашув (қ. **натурализм**) ва тобора урчиб бораётган омма адабиёти (**беллестристика**) намуналари обрўсизлантирган реалистик тасвир принципларига қарши ўлароқ вужудга кёлган адабий оқим. С.нинг адабий-эстетик асослари XIX асрнинг 60 – 70-йилларида П.Верлен, А.Рембо, С.Малларме каби француз шоирлари ижоди билан қўйилган. Мутахассислар С.га **романтизм** вориси сифатида қарайдилар, шу боис унинг фалсафий асосларини А.Шопенгауэр, Э.Гартман ва қисман Ф.Ницше таълимотида кўрадилар. Символистлар конкрет-ҳиссий идрок доирасидан ташқарида турувчи ғоялар, «ўзи-ўзидағи нарса»ларни бадиий акс эттиришга интиладилар. Уларга кўра, символ кундалик майшат до-мидан кутулиш ва дунёнинг идеал мөхиятини англаш учун образдан кўра самаралироқ воситадир. Улар шоир қалбан мутлақ ҳақиқатга яқин туради, шу боис у оламни символлар орқали интуитив тарзда идрок эта олади деб ҳисоблайдилар. Умуман олганда, С. намоянда-

лари дунёқарааш нүктаи назаридан Афлотунизм таълимоти, пантегизм фалсафаси, оламни рамзли идрок этишга қаратилган христиан диний-мистик таълимотлар (мас., Псевдо Дионисий, Августин ва б.) билан ҳам боғланади. Рус С.ининг фалсафий-эстетик қарашлари (улар В.Соловьёв таълимотига асосланади) ҳам кўп жиҳатдан гарблик ҳаммаслаклари қарашларига, мос, бироқ улар рус менталитети ва мамлакат ижтимоий-тарихий шароити билан боғлиқ ўзига хос жиҳатларга ҳам эга. Жумладан, рус С.ининг етакчиларидан бири Д.Мережковский уни юзага келтирган асосий омилни жамиятда «энг ашаддий моддиюнчилик билан руҳнинг энг эҳтиросли идеал интилишлари» тўқнаш яшаган давр шароитида кўради. Яъни бу ўринда ашаддий моддиюнчилик реалистлар бўлса, руҳнинг идеал интилишлари С.га хосдир. Уларга кўра, реалистлар ҳаётнинг оддий кузатувчилари, С.лар эса ҳамиша мутафаккирдир (К.Бальмонт). Символистларнинг реалликдан безгани, оламни интуитив тарздагина идрок қилиш мумкин деб билгандарни уларни романтизмнинг бевосита ворислари дейишга асос беради. Улар учун дунё қоронгу бир зиндон, ундан чиқадиган биргина туйнук борки, у ҳам бўлса ижод онларидаги экстаз ҳолатидир, айни шу онларда санъаткор оламнинг моҳиятига кира билади. Санъатнинг вазифаси эса шу онларни мангуга муҳрлашдан иборатдир. Яъни санъат бошқа соҳаларда вахий деб аталувчи нарсанинг ўзгинаси. Шунга кўра, ижодкор ўз қалбининг қоронгу пучмоқларини ўзи учун ойдинлаштиришга киришган палладагина санъат бошланади (В.Брюсов). С. вакиллари учун символ – мангаликка очилган дарича. Айни чоғда, символлар воқелик қаъридан табиий равищда ва беихтиёр оқиб чиқиши лозим, мабодо ижодкор бирон-бир гояни ифодалаш учун уларни ўйлаб топса, унинг ўлик аллегориядан фарқи қолмайди. Яъни конкрет мазмунга боғланган аллегориядан фарқли ўлароқ, символ доимий ҳаракатда – у турфа мазмун қирраларини очиб бораверади; символ воситасида ифодаланган фикр сирли милтираб, ҳамиша ўзига жалб этиб туради, у инсон қалбига сўз билан айтгандан кўра кучлироқ таъсир қиласди. Майдонга келган давр ижтимоий ҳаётидаги бўхронлар, маънавий таназзул билан боғлиқ ҳолда С.да ҳам-дөқаданс кайфияти сезиларли, шунга қарамай, унинг энг иқтидорли вакиллари ижоди умумбашарий ва мангу муаммоларнинг бадиий идрокига қаратилган бўлиб, бадиий тафаккур ривожига муносиб ҳисса бўлиб қўшилган.

СИНЕКДОХА (юн. synekdoche – нисбат бериш) – кўчим тури, бутун-қисм алоқаси асосидаги маъно кўчиши, метонимиянинг бир

кўриниши. С.да ҳам маъно алоқадорлик асосида кўчади, шу сабабли унга метонимиянинг бир тури (унинг миқдорий кўриниши) сифатида қаралади. Мас., Х.Давроннинг «Кулол муҳаббати» шеъридаги илк банд:

*Саҳардан то оқшомга қадар,
Кўкда порлаб ёнмагунча ой,
Эртак сўйлар сархуш бармоқлар,
Эртак тинглар қизил рангли лой...*

Бунда «эртак сўйлар» деганда кулол ўз ишига бутун меҳри, қалб кўри билан берилган ижоднинг сеҳрли онлари назарда тутилади. Эртак сўйлаётган «бармоқлар» – қисм, у бутунни – кулолни англатади. Метафора билан С.нинг бирлиги ифоданинг гўзал ва таъсирли бўлишини таъминлайди: гўё йирик планли кино кадри каби сеҳрли бармоқлар тафтидан ийиб, гўзал бир шаклга кираётган чархдаги лойни шеърхон кўз олдига келтиради. Ёки М.Юсуфнинг:

*Фақат шу ер яқин юракка,
Фақат шунда қувонар кўзлар, –*

мисраларида «кўз» одам маъносида ишлатилгани ҳам С.га мисолдир. Якка нарса номини аташ билан умумни назарда тутишлик ҳам С. саналади. Ш.Раҳмон бир шеърида: «Қадимда мевалар етилган пайтда савоб деб яшаган комил аждодим мусоғир чанқоғин боссин деб атай бузиб кўяр экан боғлар деворин», – деб ёзаркан, «қадим аждодим» бирикмаси остида аждодларни, бутун халқни назарда тутиади. Шунга ўхшаб «Ўзбекнинг қоракўз болаларига битта дунё қолсин ҳайратлик» деганида ҳам ўзбек халқи назарда тутилган. Бадиий асарларда атоқли отларнинг турдош от маъносида қўлланиши ҳам С.нинг бир кўриниши саналади. Чунки, мас., шоир «фақат Жумавойи бўлгани учун ҳавасларинг кепар робинзонларга» деганида, машхур романга ишора қилгани ҳолда, Робинзонга ўхшашиб кечирувчи кишиларни – кўпчиликни назарда тутади.

СИТУАЦИЯ (фр. situation – ҳолат, шарт-шароит) – сюжетшунослик категорияларидан бири, воқеабанд сюжетнинг муҳим унсури. С. деганда сюжетнинг икки муҳим воқеаси орасидаги шундай ҳолат назарда тутиладики, унда иштирок этувчи персонажлар ва улар орасидаги ўзаро муносабатлар муайян даражада турғунлик касб эта-

ди. Бироқ сиртдан турғун күринган ҳолат ўз ички зиддиятларига эга: турли персонажлар мавжуд ҳолатни у ёки бу тарзда ўзгартиришни истайди. Ички зиддиятлар ҳолатни кескинлаштиради ва бу кескинлашув С.ни коллизияга (к. коллизия) айлантирадики, энди сифат жиҳатидан бошқа С.га ўтилади. Шу маънода, сюжет ривожини бир С.дан иккинчисига ўтиш, шундай алмашишлар йигиндиси сифатида таърифлаш мумкин. Мас., Чўлпоннинг «Кечा» романидаги Зеби сюжет чизигининг илк С.и: сўфининг хонадонида тутқун мақомида яшаётган, энди кўнгли кенгликларга талпинаётган Зеби (бу ҳолат роман вақтига қадар шаклланган, унинг иштирокчилари Зеби, Раззоқ сўфи ва Курвонбibi). С.да мавжуд ички зиддият Салтининг келиши ва дугонасини қишлоқ сафарига таклиф этиши билан очикроқ намоён бўлади. Раззоқ сўфининг кириб келиши билан коллизията айланади ва сафарга рухсат берилиши билан сифат жиҳатидан янги С.га алмашади. Умуман, Зеби сюжет линияси яна сафар – тўй арафаси – мингбошига таслим бўлиш – кундошлар орасидаги турмуш – суд каби С.ларни ўз ичига олади. Ушбу С.ларнинг ҳар бирида иштирок этувчи персонажларнинг ўзаро муносабатлари маълум даражадаги турғунликдан коллизияга ва сўнг сифат жиҳатидан янги С.га айланишини кузатиш мумкин. С.нинг сюжетда намоён бўлиши асар жанри, турга мансублигига қараб турлича бўлади. Жумладан, драматик асар сюжетида С. ва унинг алмашиниши яққол кўзга ташланиши мухим хусусият, ҳикояларда эса С. ва унинг ўзгариши бир воқеанинг ички эпизодлари даражасида намоён бўлади.

СИФАТЛАШ – қаранг: эпитет

СОНЕТ (итал. sonetto, провансча sonet – қўшиқ сўзидан) – қатъий шеър шаклларидан бири, шакл хусусиятларига кўра тасниф этилувчи лирик жанр. С. ўн тўрт мисрадан таркиб топиб, иккита катрен ва иккита терцетни ўз ичига олади. С.нинг каноник шакли икки кўринишда бўлиб, «итальянча» вариантида катренлари abab abab, терцетлари эса cdc dcd (ёки cde cde); «французча» вариантида катренлари abba abba, терцетлари ccd eed (ёки ccd ede) тарзида қофияланади. Шеърият тарихида С.нинг каноник талаблардан чекиниш ҳоллари ҳам учрайди. Жумладан, «инглиз» С.ида учта катрен ва битта дистихдан ташкил топиб, катренлари abab cdcd efef тарзида қофияланади. Шунингдек, С.га бундан бошқа ҳам турли ўзгаришлар (қофияланishiiga: бошдан охиригача жуфт ва тоқ мисралари ababab... тарзидаги схема; композициясига: аввал икки терцет, кейин икки катрен; ўлчовига: катрен-

лардаги түрткінчи мисра бошқа ўлчовда ва б.) киритиб, турфа вариантлари тажриба қилиб күрілған. Бироқ С.нинг каноник шакллари барибир ўз мавқеини дахлсиз сақлаб қолған, ҳозирда ҳам С. деганда шулар назарда тутилади.

СОНЕТЛАР ГУЛЧАМБАРИ – сонетлар гулдастаси; ўн түртта сонетдан таркиб топған түркүм бўлиб, ҳар бир сонет ўзидан аввалги сонетнинг охирги мисраси билан бошланади, ўн түртта сонетнинг биринчи мисраларидан эса ўн бешинчи сонет – магистрал таркиб топади. Магистрал түркүмнинг ғоявий-композицион асоси бўлиб, одатда, у бошқаларидан аввал ёзилади. Бу жиҳатдан қаралса, магистралнинг ҳар бир мисраси тартиб бўйича қолған ўн түрт сонетнинг биринчи мисраси бўлиб келади. Ўзбек шеъриятида С.г. шоир Б.Бойқобилов ижодида кузатилади.

СОЦИАЛИСТИК РЕАЛИЗМ – XX аср бошларида Россия ва Европанинг бошқа мамлакатлари адабиёттида юзага келган адабий йўналиш; шуролар хукумати томонидан расман қўллаб-куватланган ва собиқ Иттифоқ ҳамда жаҳоннинг бошқа социалистик мамлакатлари адабиёттида етакчилик қўлган ижодий метод. Фалсафадаги тушунчаларни адабиётга «диалектик-материалистик ижодий метод» тарзида тўғридан-тўғри кўчиришга қарши ўлароқ С.р. термини шўро матбуотида илк бор 1932 йили ишлатилган. Кейинроқ собиқ Иттифоқ ёзувчиларининг биринчи съездига (1934) М.Горький томонидан инқилобий гуманистик ғояларни амалга татбиқ этишга қаратилган ижодий дастур сифатида таърифланган С.р.ни шўро адабиётнинг асосий методи дея эътироф этган. Тўғри, XX аср бўсағасига келиб Европанинг қатор мамлакатлари, айниқса, Россиядаги инқилобий ҳаракатлар сабаб жиддий ўзгарған ижтимоий-тарихий шароитда адабиётнинг дунёни идрок қилишида ҳам жиддий ўзгаришлар содир бўлди: реалиzmни инкор қилиш билан бир қаторда уни сифат жиҳатидан янгилашга, янгиланган ижтимоий воқеликни янгича акс эттиришга интилиш ҳам мавжуд эди. Худди шу шароитда яратилган М.Горькийнинг «Она» романи, «Душманлар» пьесаси С.р. адабиётнинг илк намуналари сифатида кўрсатилади. Ижодий принциплари нуқтаи назаридан қаралса, бу асарлар моҳият эътибори билан реалистик адабиёт намунаси эди, лекин уларда ҳаёт материалини танлаш, тасвирлаш ва баҳолаш принциплари янгиланганди. Яъни бу адабиёт, аввало, ғоявий нуқтаи назардан фарқланди. Шу жиҳатдан С.р.ни XX аср бошларида вужудга келган ва собиқ Иттифоқ, шунингдек, жаҳоннинг қатор социалистик мамлакатлари адабиёттида

70-йилларга қадар етакчилик қылған адабий йұналиш деб ҳисоблаш мүмкін. Мазкур йұналишнинг табиий ва қонуний равишда, ижтимоий-тарихий шароитдаги ўзгаришлар билан боғлиқ ҳолда юзага келгани ва адабий жараёнда бошқа йұналиш ва оқимлар қатори мавжуд бўлгани шубҳасиз. Бироқ адабиёт соҳасида ўз гегемонлиги, яккаҳокимлигини ўрнатышга бел боғлаган шўро сиёсати уни муайян адабий-эстетик канонга айлантириш ва барча ижодкорларни шу асосда бирлаштирган ҳолда ўз мафкурасига хизмат қилдиришга интилди. С.р.нинг қатор талаблари ишлаб чиқилди. Жумладан, воқееликни инқилобий ривожланишда тасвирлаш, асарнинг инқилобий фаол гуманизм билан йўғрилган бўлиши, унинг марказида коммунистик ғоялар ғалабасига ишонган ва шу йўлда толмай курашаётган ижобий қаҳрамоннинг туриши, давр зиддиятларини марксистик синфийлик нұқтаи назаридан тушуниш ҳамда баҳолаш ва ш.к. Мазкур талаблар туб моҳияти билан ғоявий асосда бўлиб, улар воқееликни бир ғоявий қолипда кўришни тақозо этиши билан, табиийки, ижодий индивидуалликка ражна солади. Иккинчи томондан, улар 30-йиллар ўрталарида марксизм-ленинизм асосчиларининг қарийб 50 – 100 йиллар аввалги шароитда айтган фикрларига таянган ҳолда ишлаб чиқилган. Ҳолбуки, ўтган даврлар мобайнида ҳаёт XX аср шиддатига мос муттасил ўзгаришда бўлган. Албатта, бу зиддиятли ҳолатда С.р. назариясининг ижод амалиётидан орқада қолиши, унинг дормага айланиси табиий зди. Натижада назария бир томон, адабий жараён бир томонлигича қолди. Ҳозирда совет даври адабиёти билан социалистик реализм адабиёти битта нарса эмаслиги кенг эътироф этилади. Зоро, чинакам санъаткорлар мафкура зуғуми остида ҳам дунёни ўзича кўриш, тасвирлаш ва баҳолашга интилдилар. Аксинча, шу қолиплар асосида, шўро адиби олдига қўйилган талабларга оғишмай амал қилиб ёзилган асарларнинг аксарияти ғоявий схематизм қурбони бўлди, метод зуғуми сабаб ижодий имкониятлар рўёбга чиқмади. Ўтган асрнинг 60 – 70-йилларидан методнинг дормага айланиб бораётгани очиқ кўзга ташлана бошлади. Ҳудди шу шароитда назарияда С.р.ни очиқ система сифатида талқин этиш, бошқача айтсак, уни ислоҳ қилишга интилиш ҳам кучайди. Бироқ мазкур ҳаракат методни инқироздан сақлаб қолишга ожиз зди, чунки яккаҳоким мафкура шароити методнинг асоси (яъни марксча-ленинча фалсафа) дахлсиз қолишини тақозо этарди. Ҳозирги адабиётшунослиқда С.р. методи ва адабиётига салбий муносабат, уни «сохта метод» деб аташ устуворроқ. Албатта, бунга муайян асос ҳам йўқ

эмас. Айни чоғда, С.р. адабиёт тарихининг маълум босқичида табиий равишда вужудга келганини ҳам эътироф этиш зарур. Фақат шу ҳодисани мутлақлаштириб, уни бадиий ижоддаги ягона ва энг тўғри йўл деб тушунилгани, муайян давр адабиётига хос хусусиятлар асосида гўё универсал қоидалар ишлаб чиқилгани ва ижодкорларнинг уларга риоя қилиши лозимлиги деярли маъмурий тарзда белгилаб қўйилгани уни муқаррар таназзулга олиб келди.

СОЦИОЛОГИК МЕТОД – бадиий адабиётни, адабий ҳодиса ва фактларни ижтимоий ҳаёт билан узвий алоқада ўрганишга асосланувчи тадқиқот методи. Адабиёт ва санъатга ижтимоий ҳодиса сифатида қараш қадимдан мавжуд (мас., Афлотун. «Давлат») бўлсада, уларнинг ижтимоий табиатини илмий асосда ўрганиш XIX аср ўрталаридан бошланди. Адабиётга социологик ёндашув тамойиллари илк бор маданий-тарихий мактаб фаолиятида кўзга ташланади. Жумладан, шу мактабнинг йирик намояндаси И.Тэн адабий асарда маълум бир тарихий даврдаги «халқ руҳи» акс этади деб билади, бу руҳ эса миллатнинг айни шу даврдаги тафаккур даражаси, турмуш тарзи, урф-одатлари ва ш.к.лар билан чамбарчас боғлиқ. Тэнга кўра, адабий асар табиати «ирқ» (миллатга хос түфма сажия), «муҳит» (табиат, иқлим, ижтимоий шароит) ва «давр» (эришилган маданий даража ва анъана) хусусиятлари билан белгиланади. Шунинг учун адабий асарни алоҳида олиб эмас, балки шу омилларни ҳисобга олган ҳолда таҳлил ва талқин қилиш зарурки, шундай ёндашувгина илмий жиҳатдан асосли хulosалар чиқаришга имкон беради. Шундан бўлса керак, XIX аср ўрталаридан бошлаб адабиётшуносликда социологик ёндашувнинг салмоғи муттасил ортиб борди; социологик ёндашув марксистик адабиётшуносликнинг, хусусан, шўро адабиётшунослигининг ҳам асосини ташкил қилди. Дарҳақиқат, С.м. адабиётшуносликнинг қатор масалаларини ўрганишда муҳим ўрин тутади. Мас., бадиий воқелик билан реаллик муносабатлари, унинг тарихан ҳақонийлик даражаси, ҳаёт ҳақиқати билан бадиий ҳақиқат муносабати каби масалаларни ўрганишда С.м.гина қўл келиши мумкин. Унга таяниб асарнинг ғоявий-мафкуравий томонлари, қаҳрамонларнинг характер хусусиятлари, асардаги конфликтлар табиати, образлар тизими ва ҳ. бадиий унсурларнинг ижтимоий илдизларини очиш мумкин. Ҳаёт ҳақиқатининг бадиий ҳақиқатга айланиш жараёни, характер ва прототип, тарихий шахс образи ва реал тарихий шахс муносабати каби ижод жараёни билан боғлиқ муаммоларни ўрганишда ҳам социологик ёндашув асос вазифасини ўтайди.

С.м.нинг адабиётшуносликда муҳим аҳамиятга моликлиги шубҳасиз, бироқ уни мутлақлаштириш ярамайди. Аксинча, унга мавжуд тадқиқ методларидан бири сифатида қараш, муайян масалани ўрганиш учун зарур ўринларда ва бошқа методлар билан бирликда қўллаш самаралироқ. Зеро, адабиёт фақат ижтимоий омилларгагина боғлиқ эмас, адабиётшуносликнинг предмети, уни қизиқтирган масалалар фоят серқиррадир. Буни эътиборга олмаслик эса адабиёт учун зарарли оқибатларга олиб келиши мумкинки, бунга ёрқин мисолларни шўро адабиётшунослигидан истаганча топишимиш мумкин. Мас., шўро адабиётшунослигидаги вульгар социологизм кўринишлари С.м. мавқенини мутлақлаштириш натижаси эди. Бадиий асарлар, адабий ҳодисалар таҳлилида С.м. бузиб қўлланган, уларни шу асосда баҳолаган танқидий мақолалар кейинча кўплаб ижодкорларни қатағон қилиш учун дастакка айланди, ўкувчи оммани ўша ижодкорларни «халқ душмани», асарларини «зараарли» деб тушунишга тайёрлади. Айтиш керакки, шўро даврида айрича аҳамият берилган С.м. ҳозирда анча эътибордан қолган, кўпинча унга салбий муносабат кузатилади. Бироқ бунга кўшилиб бўлмайди, чунки гап методда эмас, ҳамма гап унинг қандай ва қай мақсадда қўлланишидадир. Демак, ундан воз кечиш тўғри эмас, зеро, адабиётшуносликдаги талай масалаларни тадқиқ этишда С.м.нинг муҳимлиги инкор қилиб бўлмайдиган ҳақиқатdir.

СОҚИЙНОМА (ар. ساقی – сув улашувчи, руҳий озуқа берувчи, نامہ – хат) – мумтоз адабиётдаги ўзига хос композицион қурилишга эга йирик ҳажмли лирик жанр. С. бир неча банддан ташкил топиб, унинг ҳар бир банди маснавий шаклидаги бир неча байтдан (а-а, б-б, в-в ва х.) таркибланади. Манбаларда С.нинг қатъий шаклий белгилари сифатида *мутақориб* баҳрида ёзилиши ва ҳар бир бандининг соқийга мурожаат билан бошланиши кўрсатилади. Мас., Навоийнинг «Фавойид ул-кибар» девонига киритилган С. жами 32 банддан иборат бўлиб, унинг биринчи банди куйидаги байт билан бошланади:

Соқиё, тут қадаҳи шоҳона,
Қатраси лаъл vale яқдона.

СТИЛИЗАЦИЯ (юн. *stylos* – мумланган таҳтачага ёзиш учун ишлатилган таёқча; услуб) – муайян бадиий-эстетик мақсадларни кўзлаб ўзга бир ижодкор, давр, адабий йўналиш ва ш.к.ларга хос услубий хусусиятларни қайта тиклашга асосланган усул. Манбаларда бирон-

бир ижтимоий гурухга мансуб шахс тилининг ўзига хос жиҳатларини қайта яратиш ҳам С.нинг бир кўриниши деб таърифланади. Бироқ буни персонаж нутқини индивидуаллаштиришдан фарқлаш лозим: С. ҳақида ривоя персонаж-ҳикоячи тилидан олиб борилган ва ўша ҳикоячи нутқига хос услуб қайта тикланган ҳолларда гапириш тўғрироқ бўлади. Мас., F.Фуломнинг «Шум бола» қиссасида ривоя персонаж тилидан олиб борилган ва унга хос услубий хусусиятлар қайта яратилган. Ёки X.Султоновнинг «Кўнгил озодадур» қиссасида XIX аср адабий тили, хусусан, Гулханий услубига хос жиҳатлар қайта яратилади. Ёзма адабиётда фольклорга хос услубни қайта яратиш ҳам С.нинг анча кенг тарқалган кўринишидир. Бунга халқ йўлида ёзилган шеърлар (И.Мирзо. «Фарғонача»; Э.Шукур. «Менгим момонинг йўқлови»), адабий эртакларни (F.Фулом. «Ҳасан Кайфий», «Афанди ўлмайдиган бўлди») мисол қилиш мумкин. У.Азимнинг «Бахшиёна» туркуми, Х.Давроннинг «Бахши ўғиллари ҳақида ривояят», Фахриёрнинг «Бахшининг севгиси» асарлари халқ достонларига С. қилиш асосида яратилган. Шунингдек, С. пародиянинг ўзак хусусияти саналади, унда объектга хос услубий хусусиятлар сақлангани ҳолда, бу иш ҳажвий-кулгили тарзда амалга оширилади.

СТОПА (юнон тилидан русчага калька: оёқ, товон) – антик шеър тизимидағи ритмик бирлик, чўзиқ ва қисқа ҳижоларнинг муайян тартибдаги гурухи, уларнинг такрорланиши ҳисобига маълум ўлчовли ритм юзага келади. Терминнинг пайдо бўлиши қадимда шеър ритми оёқни кўтариб-тушириш орқали белгилаб (доирада усул белгилангани каби) борилгани билан боғлиқ: қисқа ҳижода оёқ (товон) ердан узилиб, чўзиқ ҳижода ерга урилган. Термин рус силлабо-тоник шеърияти томонидан ўзлаштирилган бўлиб, унда С. ургули ва ургусиз ҳижоларнинг муайян тартибдаги гурухини билдиради. Бу шеър тизимида бешта стола (рукн) бўлиб, улар: хорей (–V), ямб (V –), дактиль (– V V), анапест (V V –) ва амфибрахий (V – V) тарзида антик шеър тизимидағи ўзлаштирилган терминлар билан юритилган (ургусиз: V, ургули: –). Моҳиятига кўра, С. аруз тизимидағи руқн (к.) билан ўхшацадир.

СТРОФИКА (юн. strophe – бурилиш; банд) – шеършуносликнинг банд тузилиши ҳақидаги бўлими, шеърий мисраларнинг бандга бирикиш тамойиллари (ҳажм, жумла қурилиши, ритмик композиция) ва қонуниятларини, шунингдек, қатъий банд тузилишига (строфик) эга ва эга бўлмаган (астрофик) шеър шакллари, шаклий белгиларига кўра таснифланувчи қатъий шеърий шаклларни ўрганади.

СТРУКТУРАЛИЗМ (лот. *structura* – курилиш, жойлашиш) – XX асрдаги иккита жаҳон уруши оралиғида шаклланган ва 60-йилларга келиб кенг (айниқса, Францияда) оммалашган йўналиш, ижтимоий ва гуманитар илм соҳаларидағи тадқиқот методи. С.нинг отаси сифатида замонавий тилшуносликнинг асосчиси Ф. де Соссюр (1857 – 1913) эътироф этилади. Олим ўзининг «Умумий тилшунослик-курси» асарида реал нутқ бирлиги билан унинг асосида ётувчи системани фарқлайдики, бу система инсон томонидан тил ўрганиш жараёнида ўзлаштирилди. Соссюрга кўра, шу системанинг структураси (тузилиши, унсурлари, уларнинг ўзаро муносабати)ни тавсифлаш ва ўрганиш тилшуносликнинг асосий вазифасидир. Худди шу тамоил кейинчалик, Иккинчи жаҳон урушидан сўнг, бошқа ижтимоий-маданий ҳодисаларга ҳам кўчирилиб, тилшунослик методлари эстетика, санъат ва маданиятнинг барча соҳаларига татбиқ этила бошланди. Тилшунослик методлари билан бирга С. ўз фаолиятида мантиқий-математик тадқиқ усулларига таянди, психоанализдаги онгизлик категориясини ўзлаштириди. Дунёкараш нуқтаи назаридан С. экспозиционализмга зид мавқе эгаллагани ҳолда, фалсафадаги баъзи (марксизм, феноменология, герменевтика) таълимотлар билан муштарак нуқталари ҳам бор. Хусусан, мутахассислар С.нинг ҳаммадан ҳам неопозитивизмга яқин туришини таъкидлайдиларки, бу гуманитар бўйим соҳасини аниқ ва табиий фанлар (яъни аниқ ва қатъий қонуниятларига эга илм) даражасига етказиш мақсади билан изоҳланади. Хуллас, ўтган аср ўрталарига келиб С. ижтимоий-маданий ҳодисалар замирида ётувчи моделларни очиш, шу асосда ижтимоий-гуманитар соҳаларда объектив илмий билиш имкониятларини намоён этишни мақсад қилган илмий йўналиш, методга айланади. С. тилшунослик, адабиётшунослик ва антропологияда бошқа соҳаларга қараганда кучлироқ намоён бўлдики, илмий йўналиш сифатидаги С.нинг етакчилари сифатида тилшунос Р.Якобсон, адабиётшунос Р.Барт, антрополог К.Леви-Строссларнинг эътироф этилиши шундан.

С.нинг адабиётшуносликдаги илк куртаклари рус формал мактаби намояндалари (Р.Якобсон, В.Шкловский, Ю.Эйхенбаум, Ю.Тинянов ва б.) фаолиятида юз кўрсатган бўлса, В.Проппнинг «Сехрли эртак морфологияси» (1928) асари мазкур метод анча изчил қўлланган тадқиқот саналади. Кейинчалик структур адабиётшунослик маркази Францияга кўчиб, унинг ривожи Р.Якобсон, Р.Барт, Ц.Тодоров каби олимлар фаолияти билан боғлиқ ҳолда кечди. Шунингдек, структур

адабиётшунослик ривожида Ю.М.Лотман бошчилигидаги Москва-Тарту илмий мактабининг ҳам катта хизмати бор. Шу ўринда структурал адабиётшуносликка хос хусусиятлардан айримларини келтириб ўтиш ўринли. Жумладан, у адабий асарга имманентлик тамойили асосида ёндашади, яъни адабий асарни алоҳида ҳодиса сифатида олиб, унинг ички қурилишини тадқиқ этади, асардан ташқаридағи омиллар (генезиси, ривожланиши, ташки вазифалари ва ш.к.) эътибордан соқит қилинади. Имманент таҳлилнинг мақсади эса тадқиқ этилаётган асарнинг ички қурилиши, ундаги унсурларнинг асарнинг систем бутунлик сифатида намоён бўлишини таъминловчи ўзаро алоқа ва муносабатларини ўрганишдан иборатdir. С. ифода ва маъно муносабатига ноанъанавий ёндашади. Анъанага кўра, маъно аввалдан мавжуд ва ифодалашни тақозо этадиган нарса сифатида тушунилса, С. буни инкор қилиб, структура – шакл унсурларининг ўзаро алоқа-муносабатлари системани юзага келтириши давомида маъно воқе бўлади деб билади. Яъни бу хил ёндашувда, бир томондан, маъно структуранинг ҳосиласи сифатида тушунилади; иккинчи томондан, ҳар қандай ҳодисанинг туб ва универсал структуралари мавжуд деган қарашдан келиб чиқиб айни шу структураларга маънени шакллантирувчи омил деб қаралади, натижада эса ижодда субъектнинг роли пасайтирилади ё буткул истисно қилинади. Туб универсал структураларни аниқлаш, нарса-ҳодисаларнинг математик аниқликдаги моделларини яратиш С. ўз олдига қўйган асосий мақсадлардан биридир. Жумладан, Ц.Тодоров структурал поэтика ўз тушунчаларини конкрет асарга эмас, балки ҳар қандай адабий матнга қаратади деб айтади. Яъни модель жанрга мансублигидан қатъи назар, ҳар қандай асар таҳлилини асослашга ярамоги керак. Р.Барт эса ўз олдига янада максимал мақсадни кўяди: у «сўнгги структура» ёки «матрица»ни излайдики, у нафақат адабий, балки, умуман, ҳар қандай матн, бунга қадар яратилган, яратилаётган ва яратилажак матнлар моҳиятини акс эттира олсин. Модель ва структураларни яратиш, табиийки, тадқиқ обьектининг структуравий унсурларини ажратиш, таснифлаш, улар орасидаги турли (бинар оппозиция, контраст, зидлаш, тўлдириш, симметрия, асимметрия ва б.) муносабатларни ўрганишни тақозо этади. Шунга кўра, структур адабиётшуносликда мазкур талабга мос тушунчалар тизими, таҳлил усуллари ишлаб чиқилган.

70-йилларга келиб С. ўз имконларини сарфлаб бўлди, ўрнини ўзининг бағрида етишган, ўзининг давомчиси ва зидди сифатида

майдонга чиққан постструктуралызмга (к.) бүшатиб берди. Умуман олганда, С. ўз олдига күйган улкан мақсадларга, хусусан, адабий асарга бадий-эстетик қадрият сифатида ёндашиш масаласини ҳал қилишга эришолмади. Зоро, бадий асарнинг ички тузилиши, структура элементлари ва уларнинг ўзаро алоқалари, қисмларнинг бутунликка бирикиш қонуниятларини нечоғлик чуқур ва атрофлича ўрганмасин, унинг таҳлиллари бадий асарнинг эстетик таъсир кучи ва бадий қимматини белгилайдиган қатор омилларни эътибордан сокит қилганди. Шунга қарамай, С. адабий-назарий тафаккурни, бадий асар ҳақидаги мавжуд тасаввурларни бойитди, унинг илгари етарли эътибор берилмаган томонларига диққатни жалб қила билди, у ишлаб чиққан методлар ҳозирги адабиётшуносликнинг бадий таҳлил имконларини кенгайтирди.

СЮЖЕТ (фр. sujet – предмет, асосга қўйилган нарса) – бадий шаклнинг энг муҳим элементларидан бири, асардаги бир-бирига уз-вий боғлиқ ҳолда кечадиган, қаҳрамонларнинг хатти-ҳаракатларидан таркиб топувчи воқеалар тизими. Сюжетлилек бадий адабиётнинг хос хусусиятларидан бири бўлиб, С. тур ё жанридан қатъи назар, барча асарларда бор, бироқ унинг намоён бўлиши кўп жиҳатдан қайси тур ёки жанрга мансублигига боғлиқ. Мас., лирикада воқеалар тизими йўқ, лекин унда ўй-фирклар, ҳис-кечинмалар ривожи мавжуд ва бу унинг С.ини ташкил қиласиди. Ёки эпоснинг кичик шакллари, хусусан, новеллалардаги С. ҳам «воқеалар тизими» деган таърифга мувофиқ эмас: бунда бир ҳаётий ҳолат ичидаги ўсиш, ривожланиш кузатилади (мас., Чўлпон. «Тараққий»; А.Қаҳҳор. «Бемор»). Шуни кўзда тутган ҳолда адабиётшуносликда воқеабанд ва воқеабанд бўлмаган С. лар ажратилади. Айрим адабиётшунослар (мас., Г.Поспелов) С. эпик ва драматик асарларга хос, лирик асарлар С.га эга эмас деб ҳисоблайди. Бу қарашга кўра, лирик асарда композиция С. (воқеалар тизими) ўринини босиб, ўй-кечинмаларни муайян тартибда уюштиради. Мазкур қараш терминологик чалкашликлардан қочиш, С. терминини бир маънода – воқеалар тизими деб тушиш имконини беради. Кенг оммалашган таърифлардан бирига кўра, С. «у ёки бу характернинг, типнинг тарихий ривожланиши, ташкил топиб боришидир»(М.Горький). Бироқ характер доим ҳам ривожланиш, ўсиш ва шаклланишда кўрсатилмайди. Мас., ҳикояда характерлар тайёр ҳолда берилади, воқеа давомида ривожланмайди, С. бу ўринда воқеанинг ички ривожини намоён этади, холос. Демак, мазкур таъриф универсал эмас, у айрим типдаги асарларга (мас.,

«Күтлүг қон») нисбатангина тұғридир. Албатта, С. ривожи давомида характернинг шаклланиши, очилиши ҳам бор гап, лекин бу С.нинг бадий функцияларидан бири, унинг моҳияти эмас. Хуллас, агар «сюжет» термини остида эпик ва драматик асарларга хос С. назарда тутилса, унда С. асардаги «бир-бирига боғлиқ воқеалар тизими» ёки «конкрет ҳолат, битта воқеанинг ички ривожи»дир.

С.нинг бирламчи функцияси асар проблемасини бадий тадқиқ этишга имкон берадиган ҳаёт материалыни уюштириб беришдан иборатдир. Демак, С. нинг қандай бўлиши мазмунга, муаллиф ижодий ниятига боғлиқ. Mac., A.Қодирий «Ўткан кунлар» учун танлаган С. Отабекнинг Тошкентдан, Кумушнинг Марғилондан бўлиши – ижодий ният ижроси учун энг мақбул вариант. Негаки С.нинг «ўқи» – «ишиккий-маиший» С. чизиги Тошкент билан Марғилонни боғлагани ёзувчига ўзини ўйлатган проблемалар тадқики учун зарур воқеа ва тафсилотлар (хон ўрдаси, Тошкент исёни, қипчоқ қирғини каби)ни асарга олиб кириш имконини беради. Мухими, улар асарга ҳеч бир зўракиликсиз, ўкувчи хаёlinи банд этган Отабек-Кумуш линиясига узвий боғланган ҳолда олиб кирилади, натижада адигба шахс эрки, миллат эрки, миллат тақдири муаммоларини атрофлича бадий тадқиқ этиш, фикрларини ифодалаш имкони яратилади. Кўринадики, С. ҳаёт материалыни шунчаки эмас, балки бадий концепцияни шакллантириш ва ифодалашга энг қулай (оптимал) тарзда уюштириш экан.

С. персонажларнинг «ҳаракат»ларидан таркиб топади. Персонажларнинг макон ва замонда кечувчи хатти-ҳаракатлари ҳам, руҳиятидаги ўй-фикрлар, ҳис-кечинмалар ривожи ҳам ҳаракатдир. Шу ҳаракат типларидан қайси бири етакчилик қилишига қараб С.нинг икки типи ажратилади: а) «ташқи ҳаракат» динамикасига асосланган С.; б) «ички ҳаракат» динамикасига асосланган С. Биринчи типдаги С.ларда персонажларнинг бирор мақсад йўлидаги хатти-ҳаракатлари, кураши, тўқнашувлари, ҳаётидаги бурилишлар тасвирланади ва шу асосда уларнинг тақдири, ижтимоий мавқеида муайян ўзгаришлар юз беради. Бу нав С.ларда воқеа тўлақонли тасвирланади ва ўз ҳолика ҳам бадий-эстетик қиммат касб этади. Келиб чиқиши жиҳатидан С.нинг мазкур тури қадимийроқ (фольклордаги сехрли эртаклар, ривоятлар, достонлар). Янги ўзбек адабиётида ҳам С.нинг бу типи кенгроқ тарқалган: «Ўткан кунлар», «Мехробдан чаён», «Кеча ва кундуз», «Күтлүг қон», «Сароб» – буларнинг барида ташқи ҳаракат динамикаси етакчилик қилади.

Албатта, бу асарларда «ички ҳаракат» динамикаси ҳам бор, бироқ у мавқе жиҳатидан С. типини белгилашга ожизлик қиласи. С.нинг иккинчи типида воқеалар ўз ҳолича эмас, персонаж руҳиятидаги жараёнга туртки бериши жиҳатидан аҳамият касб этиб, асар давомида персонажлар ҳаётида, тақдирида ёки ижтимоий ҳолатида эмас, унинг руҳиятида бурилишлар, ўзгаришлар содир бўлади. Бу тип С.лар адабиётимизда анча кейин, XX асрнинг 80-йилларидан, пайдо бўлиб, ҳозирча насрнинг кичик ва ўрта (мас., А.Аъзам. «Бу куннинг давоми», «Асқартоғ томонларда») шаклларида, шунингдек, бир қатор драматик (мас., Ш.Бошбеков. «Тақдир эшиги», «Эшик қоқсан ким бўлди») асарларда синаб кўрилди.

Воқеаларнинг ўзаро муносабатига кўра С.нинг хроникали ва концентрик турлари ажратилилади. Хроникали С.да воқеалар орасида вақт муносабати (А воқеа юз берганидан сўнг, Б воқеа юз берди) етакчилик қиласа, концентрик С. воқеалари орасида сабабнатижа муносабати (А воқеа юз бергани учун, Б воқеа юз берди) етакчилик қиласи. Хроникали С., бир томондан, ҳаётни кенг эпик кўламда тасвирлаш, иккинчи томондан, қаҳрамон тақдирини даврий изчилликда, характерини ривожланишда кўрсатиш учун кулай. Чунки унда асосий сюжет билан ёндош ҳолда ёрдамчи сюжет чизикларини ҳам юргизиш, жуда катта ҳаёт материалыни қамраб олиш имконияти мавжуд. Хроникали С.да асарнинг «бадиий вақт»и исталганча кенгайтирилиши мумкин: унда «параллел вақт»да кечеётган воқеаларни тасвирлаш, ретроспекция – замонда ортга қайтиш усулидан фойдаланиш имкониятлари анча кенг. Шунингдек, хроникали С.га курилган асарга С.дан ташқари унсурлар (ривоятлар, киритма эпизодлар ва б.), муаллиф мушоҳадалари, тафсилотларни табиий равишда киритиш, бадиий матнга сингдириб юбориш мумкин. Шу боис катта эпик асарларда (С.Айний. «Қуллар»; П.Қодиров. «Юлдузли тунлар») кўпроқ хроникали С. кўлланади. Концентрик С. эса воқеаларнинг битта асосий воқеа теграсида айланиши билан характерланади. С.нинг бу тури воқеаларнинг конфликт асосида шиддат билан ривожланиб, ечимга томон интилишини тақозо қиласи. Концентрик С. асарнинг шакл-композицион жиҳатдан мукаммал, ўқишли ва қизиқарли бўлишига имкон беради. Чунки бу нав С. ўқувчи дикқатини битта нуқтада тутиб туради, унинг ўқиш жараёнидаги фаоллигини оширади (мас., детектив асарлар). Концентрик С. нисбатан қисқа вақт ичida кечган воқеаларни қамраши, ёндош С. чизикларини

киритиш имконияттарынан да көрүп, салынган хүсүсиятларни О.Әкубовнинг «Муқаддас», «Билур қандиллар», «Улуғбек хазинаси» каби асарлари мисолида кузатыш мүмкін. Айтиш керакки, С.нинг бу икки турига хос хүсүсиятлар күпроқ аралаш ҳолда зухур қиласы. Зоро, хроникалы С. воқеалари орасыда сабаб-натижә (олдин юз берган воқеа кейин юз берган воқеага қисман сабаб бўлиб келади) муносабати, концентрик С. воқеалари орасыда эса вақт муносабати (натижә сабабдан кейин келади) кузатилиши табиий. Шунга кўра, конкрет асардаги С. типи мазкур муносабатларнинг қайси бири етакчи мавқега эгалигига қараб белгиланади. Баъзи асарларда С.нинг иккала типига хос хүсүсиятлар ҳам салмоқли ва уйғун ҳолда намоён бўлади, айни шу уйғунлик уларнинг жозибасини таъминлайди. Мас., А.Қодирийнинг «Ўткан кунлар», Чўлпоннинг «Кеча ва кундуз» романларида шу хил уйғунликни кўрамиз. Иккала романда ҳам хроникалилар етакчи бўлгани ҳолда, концентрик С. хүсүсиятларидан кенг фойдаланилганки, ҳар икки типга хос энг яхши жиҳатларнинг уйғунлашуви бадиий мукаммалликка хизмат қиласы.

СЮРРЕАЛИЗМ (фр. surrealisme – олий реализм, реализмдан юқори) – адабиёт ва санъатдаги XX асрнинг 20-йилларида майдонга келган авангардистик йўналиш. С.нинг пайдо бўлиши француз шоири А.Бретон (1896 – 1966) бошчилигидаги ёзувчи ва рассомлар гурухининг фаолияти билан боғлиқ. С.нинг илк намунаси сифатида А.Бретон билан Ф.Супо ҳаммуаллифлигига ёзилган «Магнит майдонлари» (1919) асари эътироф этилади, унинг адабий-бадиий ҳаракат сифатидаги фаолиятининг бошланиши 1924 йилга тўғри келади. Худди шу йили А.Бретоннинг «Сюрреализм манифести» (унинг яратилишида Л.Арагон ҳам қатнашган) эълон қилиниб, унда гурухнинг адабий-эстетик қарашлари дастурий тарзда ифодаланган. С. Биринчи жаҳон урушидан кейинги маънавий инқироз шароитида вужудга келган бўлиб, унинг назарий асосини Беркли, Кант, Ницше каби мутафаккирлар, шунингдек, Б.Кроче томонидан янгича идрок этилган Гегель таълимотлари ташкил қиласы. 20-йилларда ижодкор зиёлилар орасыда урф бўлган Фрейд таълимотининг С.га таъсирини алоҳида таъкидлаш лозим.

С. рационализмни, шу билан боғлиқ ҳолда реализмни инкор қиласи. Жумладан, «Сюрреализм манифести»да ёзилишича, инсоният «ҳамон мантиқзулми остида яшамоқда», ҳолбуки, ҳозирги вақтда мантиқ фақат иккинчи даражали масалаларни ҳал қилишгагина

яроқли, рационализм бевосита тажриба билан боғлиқ фактларни гина идрок эта олади, холос. Позитивизм пойдөвөрига қурилган реализм эса – инсондаги ҳар қандай ақлий ва рухий парвоз душмани, у тушунтириб бўлмайдиган нарсаларни тушунтиришга телбаларча берилган ва бу билан ақлларни мудроқ ҳолга солади, ундаги таҳлил истаги жонли сезимларни босиб кетади. Буларга қарши ўлароқ, С. тахайюл эркинлиги, инсонни цивилизация зугумидан озод қилиш шиорлари билан майдонга чиқди, объектив воқеликни тасвирлаш ва бадиий билиш эмас, балки ундан-да юқори турувчи реаликни яратиш, инсон онгининг чуқур пучмоқларини тасвирлаш, унинг онгости қатламларига таъсир қилиш орқали бадиий мулоқотни амалга оширишни мақсад қилди, «автоматик ёзиш»ни ижоднинг асосий усули деб билди. Ижоднинг мазкур усулига манифестда қуйидагича таъриф берилади: «Соф психик автоматизм кўзлайдиган мақсад – хоҳ оғзаки, хоҳ ёзма ва хоҳ исталган бошқа йўсинда фикрнинг реал яшашини ифодалашдир. Фикрни ақл назоратидан холи тарзда, ҳеч бир эстетик ёки маънавий андишаларсиз ўқиб бериш демакдир». «Магнит майдонлари», муаллифларининг таъкидлашларича, худди шу йўсинда, фикр ва ассоциацияларни бевосита, қандай тезлиқда тугилган бўлса, ўшандай тезлиқда қайд этиш натижасида дунёга келган. Яъни бунда, бир томондан, четда холис турган ижодкор гўё фикрларни қайд этувчи аппаратга айланади; иккинчи томондан, ижодкор ўзидан ўтказиб берилаётган олам, объектнинг бир қисми, тил эса восита эмас, балки субъект бўлиб қолади. Сюрреалистик образда воқелик деформацияланган (бу ҳол, айниқса, рассомликда яқол кўзга ташланади, тасвирланётган нарсаларнинг шакл-шамойили кучли ўзгаришга учрайди) ҳолда аксланади, унга эркин ассоциативлик (қ.), бир-бирига асло кўшилолмайдиган (мисоли ўт билан сувдек) нарсаларнинг бирлашиб кетиши хос. С.га хос образнинг табиати терминни илк бор ишлатган Аполлинернинг: «Инсон юришга тақлид қилмоқчи бўлганида ғилдиракни – оёққа ўхшамайдиган нарсани яратди. Бу ғайришуурый сюрреализм эди», – деганида ўзининг муҳтасар ифодасини топган. Сюрреалистик образда нарса гўё қисмларга ажратилади-да, кейин мантиқа тўгри келмайдиган тарзда қайта бирлаштирилади, натижада нарса реализмдаги каби аслига монанд аксини топмайди, у ҳақда ирреал таассурот ҳосил қилинади. Бу, умуман, С. эстетикасига хос бўлиб, ундаги гўзаллик тушунчаси «гўзаллик анатомик столда тикув машинаси билан ёмғирпўшнинг тасодифий учрашуви» дегувчи француз шоири Лотреамон (1846 –

1870) қарашларидан озиқланади. Реализм воқеаликдаги сабаб-натыка асосидағы ўзаро боғлиқликни дикқат марказига қўйса, С. унда «объектив тасодиф» (А.Бретон) устувор деб билади. С. эстетикасида «объектив тасодиф» билан бир қаторда «ғаройиблик»ка ҳам катта аҳамият берилади: «ғаройиб нарса ҳар вақт гўзал, барча ғаройиб нарсалар гўзал, фақат ғаройиб нарсаларгина гўзал», – дейилади «Сюрреализм манифести»да. Шунинг учун сюрреалистик асарларда ғайриоддий, фантастик элементлар кенг ўрин тутади, улар реалистик деталлар билан ғалати тарзда бирикади ва гё олий реализмни, аслидагидан ҳам ҳақиқиyroқ воқеаликни яратишга хизмат қилади. С. образни санъат доирасидан чиқаради, уни белги эмас, балки моддий мавжудлик деб билади. С.нинг йирик намояндаси рассом С.Дали ҳазилнамо йўсинда буни қуидагича ифодалайди: «Гўзаллик ё ейишли бўлади, ё умуман бўлмайди». Табиийки, бунда бадиий асарнинг эстетик объект эмас, балки мавжуд нарса сифатида қабул қилиниши, эстетик таъсири ҳам жисман (шаҳвоний лаззат, даҳшат, ташвиш ва ш.к. тарзда) ҳис этилиши кўзда тутилади. С. санъатни мифологик асосга эга деб билади, мифларга мурожаат қилиш билан бирга яқин ўтмиш адабиёти ва санъатидаги образлар, мотивлар асосида янги мифлар яратишга интилади; бадиий ижодда субъект ролини юқоридагича тушунгани боис ҳам санъатни кўпроқ колектив ижод маҳсулни деб ҳисоблашга мойил. Яна бадиий ижодга ўйин деб қараш ҳам хос бўлиб, С.нинг мавжуд воқеаликка муносабатида киноя, юмор устувор, бироқ у кўпроқ «қора юмор» қўринишида, мавжуд қадриятларни анархик инкор қилишга қаратилган бўлиб, моҳиятнан абсурдга яқин туради. Булардан қўринадики, байроғига «Севги, гўзаллик, исён» сўзларини битганча «дунёни қайта тузиш» (К.Маркс), «ҳаётни ўзгартириш» (А.Рембо) мақсадлари билан майдонга чиқкан С. ўзидан аввалги ва ўзига замондош исёнкор, авангардистик оқимларга хос жиҳатларни сингдирганди.

С.нинг адабий-бадиий мактаб сифатидаги фаолияти узоқ давом этмади, Иккинчи жаҳон уруши араfasида тарқалиб кетди. Шунга қарамай, у XX аср адабиёти ва санъатида чукур из қолдирди: унинг бағридан П.Элюар, Л.Арагон, Г.Лорка каби улкан шоирлар, С.Дали каби рассомлар, Ж.Кокто, А.Мишо, А.Хичкок каби кино арбоблари етишиб чиқди. С. вакилларининг назарий қарашлари эса ўзидан кейинги структур психоанализ, структурализм, постструктурализм каби қатор илмий йўналишларга сезиларли таъсир кўрсатди.

СҮЗБОШИ – адабий асар (китоб)га муаллиф, бошқа бир ижодкор ёки танқидчи, таржимон, таҳририят, ношир кабилар томонидан ёзилган, асосий матндан ажралиб турувчи адабий-танқидий характердаги мухтасар мақола, қайд ва ш.к.лар. Муаллиф томонидан ёзилган С.лар кўпинча ўқувчига бевосита мурожаат шаклида бўлиб, у асарнинг тушунилиши учун зарур деб билган кўшимча маълумотларни (ёзилиш сабаби, мақсад-муддаоси, муайян рецептив йўналишни таъкидлаш ва ш.к.) ўз ичига олади ва турли сарлавҳалар («Ёзувчидан», «Муаллифдан», «Ўқувчиларимга» ва б.) остида берилади. Ноширлик ишида асарга бошқа шахслар томонидан ёзил-ган С.ларни бўриш ҳам кенг тарқалган. Бундай С.лар ҳам, аввало, асарни тарғиб қилиш, унинг тушунилишига кўмаклашиш мақсадини кўзлайди ва шунга мос маълумотлар (муаллифнинг ҳаёти ва ижоди, асарнинг ёзилиш тарихи, ёзилган даври билан боғлиқ жиҳатлари, мухтасар танқидий мулҳазалар ва ш.к.) ни ўз ичига олади. Аксарият ҳолларда бу хил С.лар мутахассислар (танқидчи, адабиётшунос, матншунос ва ш.к.) томонидан ёзилади, улар муайян даражада ўзининг жанр хусусиятларини шакллантирган бўлиб, ҳақли тарзда адабий-танқидий жанрлар сирасида саналади. Мутахассислар томонидан ёзилган С.ларнинг алоҳида номланиши ҳам, бошқа турли умумий номлар («Сўзбоши», «Сўзбоши ўрнида», «Нашрга тайёрловчидан», «Таржимондан» ва б.) остида берилиши ҳам кузатилади. Шунингдек, вақтли матбуотда кенг оммалашган таникли ёзувчи-шоирлар томонидан ёш ижодкорларнинг илк асарларига ёзилган «оқ йўл»лар ҳам С.нинг кўринишларидан биридир.

СЎНГСЎЗ – адабий асар охирида берилувчи кўшимча. С. муаллиф ёки бошқа бирор (ёзувчи, танқидчи ва б.) томонидан ёзилиб, одатда, асарнинг тушунилиши учун зарур маълумотларни ўз ичига олади ва асосий матндан яққол ажралиб (ўзаро асосий матн – ёндош матн муносабати асосида) туради. Эпилог ва кейинги тарихдан фарқли равишда С. сюжетнинг бёвосита ёки билвосита давоми эмас, у бадиий матн таркибига тўлиқ сингиб кетмайди, яъни структуравий жиҳатдан мустақилдир. Муаллиф томонидан ёзилган С.лар услубига кўпроқ ўқувчига бевосита мурожаат этиш, у билан дўстона самимий мулқотга мойиллик, мазмун-мундарижаси жиҳатидан турличалик (асарни мухтасар лирик-фалсафий хулосалаш, айрим нуқталарга ўқувчи дикқатини қайта жалб этиш, миннатдорчилик ёки узроҳлик ва ш.к.) хосдир. Ноширлик амалиёти-

да асарга ўзгалар томонидан ёзилган С.ларни илова қилиш ҳам кенг оммалашган. Бундай С.лар ҳам мазмун-мундарижасига кўра турлича (ёзувчи ҳаёти ва ижоди билан таништириш, асар ҳақидаги мулоҳазалар, унинг яратилиши билан боғлиқ айрим тафсилотлар, муаллиф ҳақидаги хотиралар ва ш.к.) бўлиши мумкин. Асосийси, бундай С.ларнинг пировард мақсади битта – асарни тарғиб этиш, унинг тушунилиши, китобхонлар дилидан ўрин олишига кўмаклашиш бўлиб қолаверади.

Т

ТААЖЖУБ (ар. تاججۇب – ажабланиш) – мумтоз адабиётдаги шеърий санъат, бирор нарса-ходиса, ҳолат ва ш.к.лардан ҳайратда қолгандик, ажабланишни ифодалаш. Т. санъати қўлланган ўринларда шоир гўё ўзини ҳайратда қолгандай кўрсатиб, асл муддаосини баён қилиб олади, асл муддаоси ёрни васф этиш, ошиқ аҳволи руҳиясини тасвирлаш ва ш.к.лар бўлади. Мас., *Машраб ёрга хитобан «Малаксан ё башар, ё хуру ғилмонсан, билиб бўлмас»* дейа Т. изҳор қилади, асл муддаоси эса ёрнинг гўзапликда тенгизлигини таъкидлашдир. Ёки Навоийнинг байтларидан бирида куйидагича Т. изҳори бор:

*Гар қуёшқа эл назар қилса кўзига ёш тўлар,
Ул қуёш боргач назардин, кўзларимга тўлди ёш.*

Мазкур байтда шоир «аслида, одам қуёшга қараса, кўзи ёшланади, менинг кўзларим эса, қуёшим (ёrim) кетгач, ёшланмоқда» дейа ҳайратланади ва шу орқали ҳижронда қолаётган ошиқ аҳволини мохирона тасвирлашга эришади.

ТАБДИЛ (ар. تبدیل – алмаштириш, ўзгартириш) – қаранг: тарду акс

ТАБЛИФ (ар. تبلیغ – юқори даражага, меъёрига етказиш) – қаранг: муболага

ТАВЗЕЙ (ар. توزیع – тарқатмоқ, таксим қилмоқ, жойлаштирумок) – мумтоз адабиётдаги шеърий санъат, байтда бир хил товушларни такрорлаш. Т.га берилган таърифларда ихтилофлар мавжуд: айрим манбаларда Т.нинг юзага чиқиши учун фақат ундош товушлар такрорланиши шарт қилинади, бошқаларида эса бу шарт қўйилмайди, ундош ё унлилар такрорланаётганидан қатъи назар, Т. деб юритилаверади. Т.дан ҳосил бўлувчи поэтик самара шуки, бир неча бора

такрорланувчи товуш (ёки товушлар гурухи) байтга ўзига хос оҳанг, мусиқийлик бахш этади. Мас., Навоийнинг:

*Ошиқ ўлдум, билмадим ёр ўзгаларага ёр эмиш,
Оллоҳ-оллоҳ, ишқ аро мундоқ балолар бор эмиш, –*

байти ғоят хушоҳанг, чунки унинг таркибида «О» унлисининг ўн бир марта такрорлангани, яна бир жиҳати, биринчи ва иккинчи мисралардаги «О» товуши эгаллаган позицияларнинг бир-бирига мослиги мусиқийликни кучайтириб бермоқда. Мирзо Кенжабекнинг қўидаги байтида эса Т. санъати «с» ва «қ» ундошларининг бир неча марта такрорланиши натижасида воқе бўлган:

*Секин-секин сузардим сувдан сўраб саодат,
Қалқа-қалқа қайигум қолмиш сароб ичинда.*

Қайд этиш керакки, Т. товушларнинг механик тақрори ёки шаклбозликка мойиллик эмас, аксинча, унинг сара намуналарида такрорла-наётган товушлар ифода этилаётган мазмун билан уйғунлик касб этади, мазмун ифодасини ритмик-интонацион жиҳатдан кучайтиради. Жўмладан, мисолга олинган байтда сирғалувчи «с» товуши тақрори ҳосил қилаётган оҳанг секин-секин қалқиб бораётган қайиқ ҳолатига мос ва бу нарса унинг ўкувчи тасаввурнида жонланишига ёрдам беради.

ТАВИЛ (ар. طَوْل – узун) – аruz баҳрларидан бири, араб назмидаги энг узун вазни баҳр бўлгани учун шундай номланади. Фаулан (V –) ва мағоийлун (V – –) аслларининг кетма-кет тақороридан ҳосил бўлади. Т. араб шеъриятига хос баҳр бўлиб, форсий ва туркий шеъриятда деярли қўлланмаган. Навоийнинг «Мезон ул-авzon» асарида Т. баҳрининг биргина вазни, Бобурнинг «Мухтасар»ида эса олти вазни мисоллар билан келтирилган. Навоийнинг «Хазойин ул-маоний» девонидаги уч шеър *тавили мусаммани солим* (v – – / v – – / v – –) вазнида яратилган бўлиб, улардан бирининг матлаъси қўидагича:

*Юзунгдек қамар йўқтур, қадингдек шажар йўқтур,
Шажар бўлса ҳам анда, лабингдек самар йўқтур.*

ТАВСИФ (ар. توصیف – сифатлаш, мақташ) – ривоявий асар композициясининг узвий қисми, асар воқелиигига киритилаётган нарса-

ходиса, жой, портрет, интеръер, экстеръер ва ш.к.лар тасвири. Т.нинг статик ва динамик кўринишлари ажратилади: воқеа ривожи тўхтатилган ҳолда берилган Т.лар *статик*, воқеа ривожи давомида берилган Т.лар эса *динамик* деб юритилади (к. *пейзаж, портрет*). Воқеабанд сюжет асосидаги асарларда Т. қадимдан бор. Жумладан, халқ оғзаки ижодидаги достонларда Т. кенг ўрин тутади: қаҳрамон портрети, унинг оти, қурол-яроги ва ш.к.ларнинг бўртма Т.и асарнинг таъсир кучини оширади, воқеаларни асослайди, характерологик хусусиятлар касб этади. Замонавий адабиётда, хусусан, эпик асарларда статик Т. салмоғи бирмунча камайиб, кўпроқ динамик Т.лар берилаётгани кузатилади. Шунингдек, Т. бошқа турларга мансуб асарларда ҳам мавжуд бўлиб, у ҳар бир жанрнинг композицион-услубий хусусиятларидан келиб чиқсан ҳолда кўлланади. Мас., драматик асарлардаги ремаркаларда берилган Т.лар алоҳида муҳим деталлар қайдидангина иборат, улар ярим тайёр ҳолда бўлиб, саҳналаштириш вақтида конкретлаштирилиш ва тўлдирилишни кўзда тутади. Лирик асарлардаги Т. деталлари, умуман олганда, ҳис-туйғу объекти сифатида муҳим. Шу билан бирга, *тавсифий лирика*, жумладан, пейзаж лирикасида Т. жанр белгиловчилик хусусиятига эга бўлади.

ТАВТОЛОГИЯ (юн. *tauto* – айнан ўша, *logos* – сўз) – матнда битта сўзнинг такрорланиши; бу ҳодиса мумтоз адабиётшуносликда *такрир* (к.) деб аталган. Халқ оғзаки ижодида, поэтик нутқда Т.дан шеърий нутқ эмоционаллигини ошириш, ифодаланаётган фикр ёки туйғуга алоқадор муҳим сўзни таъкидлаш орқали таъсирни кучайтириш воситаси сифатида кенг фойдаланилади. Мас., И.Мирзо шеъридан олинган бир баандда «юмшоқ» сўзи тўрт бора айнан такрорланади:

Ушуқ урган кўсаклар юмшоқ,
 Пахта юмшоқ,
 гўдаклар юмшоқ –
 Домлага гап қайтармас эдик,
 Ер ҳам юмшоқ – ботарди этик...

Такрорланаётган «юмшоқ» сўзи шўро замонида пахтага қул қилинган халқ фожиасини «юмшоқлик» билан очиб беради, лекин бу «юмшоқлик»нинг таъсири анча-мунча инвектива руҳидаги хитоблардан таъсирлироқ. Бунинг бош омили Т.нинг ўринли, мақсадли

амалга оширилганидир. Гап тақрорланаётган сўзларнинг ўрнига тушганидагина ҳам эмас, муҳими, улар фикр-туйгуни таъкидлаб бўрттириб ифодалайтганида. Тақрорланаётган «юмшоқ» сўзи «осмон узок, ер қаттиқ» нақли билан пинҳон зид қўйилади ва шу асосда ҳолатнинг мантиққа сигмайдиган, чидаб бўлмайдиган эканлиги англашилади. Демак, бу ўринда Т. ўзини ҳар жиҳатдан оқлайди. Бироқ бадий нутқда биргина сўз тақрорланар экан, бунда мөъёрни унут-маслик, айни сўз ҳар гал тақрорланганида қўшимча тарзда муайян бадий-эстетик юк ташиши лозимлигини эътиборда тутиш зарур. Зеро, бадий усул сифатидаги Т. билан нуқсон саналувчи Т. орасидаги чегара деярли шаффоф бўлади. Матнда битта сўзни ўринисиз, муайян бадий-эстетик вазифа юкламаган ҳолда тақрорлаш салбий маънодаги Т.ни юзага келтиради. Амалда термин шу маънода фаолроқ ишлатилади.

ТАВШИХ (ар. توشیح – зийнатлаш) – мумтоз адабиётдаги шеърий санъат, мисра ёки байт бошидаги (баъзан эса тақтеълар чегарасидаги) ҳарфлар йигиндисидан бирор сўз (исм) келтириб чиқариш. Мазкур санъат асосида ёзилган шеър мувашшаҳ деб номланади. Т. санъати ғоят нозик, у шоирдан жуда катта маҳоратни талаб этади, чунки келтириб чиқариш кўзда тутилган сўз мисра (ёки байт) ни маълум бир ҳарф билан бошлишни талаб этади. Бу эса мисра (ёки байт)ни мазмун ифодаси учун энг мақбул сўз билан эмас, чиқариладиган исмга мос сўз билан бошлишни тақозо қиласди, на-тижада шакл мазмундан устуворроқ бўлиб қолади. Яъни Т. санъати юксак маҳорат ва дид билан кўллансанагина, шеърга зеб бўлади, акс ҳолда, у шеърнинг бадий савиясини тушириб юбориши ҳам мумкин. Мас., XX бошларида шоирлар даврларида «мувашшаҳбозлик» кенг русум бўлган: Муқимий, Фурқат, Ҳамза каби давр шоирларининг кўпгина шеърлари Т. санъати асосига қурилган, лекин уларнинг барини ҳам бадий жиҳатдан етук бўлолмаган. Албатта, адабиётимизда Т. санъати маҳорат ва дид билан кўлланган шеърлар ҳам талайгина. Шулардан бири сифатида Э.Воҳидовнинг «Исми не ул күшниким...» деб бошланувчи ғазалини келтириш мумкинки, унинг ҳар бир байти бошидаги ҳарфлар йигиндисидан «истак» сўзи келиб чиқади.

ТАГМАЬНО – матннинг бевосита мазмунига мувофиқ келмайдиган, контекст доирасида ва мулоқот субъектларига маълум бўлган муайян шарт асосидагина воқе бўлувчи маъно. Т. фикрнинг «коса тагида һимкоса» тарзида ифодаланиши натижасида воқе бўлади, шунинг учун бундай ҳоллар «тагдор қилиб гапирмоқ» дея таъриф-

ланади. Сўзлашув жараёнида Т.га турлича йўллар билан ишора қилиниши (баъзан эса, аксинча, нутқ ситуацияси билан боғлик ҳолда Т. яширилиши) мумкин. Мас., тасаввур қилингки, бир неча киши орасидаги сухбат асноси куйидагича иккита гап айтилди:

— Ҳаво совуб кетдими?

— Ҳа-а, бу йил ҳаво пастроқ, Аҳмаджон, қиш ҳам келиб қолди...

Агар биринчи сухбатдош қишида қайтариш шарти билан Аҳмаджондан қарз олган бўлса, унда кейинги гап Т. касб этади, яъни Аҳмаджон сухбатдошига қарзни қайтариш муддати яқинлашиб қолганини эслатган бўлиб чиқади. Бироқ бу маъно фақат уларнинг иккисига (шартдан хабардор бўлганлари учун) маълум, холос, бошқа сухбатдошлар гапнинг бевосита маъносини қабул қиласидилар. Т.нинг муҳим хусусияти ҳам шу, бунда матннинг зоҳирий (бевосита) маъноси билан ботиний маъноси мустақил ҳолда яшайди, бир-бира га халақит бермайди. Бадиий адабиётда Т. турли омиллар (мас., фикрни очик ифодалаш имкони йўқлиги; хослар учун ёзиш истаги ва ш.к.) таъсирида юзага келади ва турли ғоявий-бадиий мақсадларни кўзлайди. Мас., Чўлпоннинг «Мен қочмадим» (1921) номли шеъри нома жанрида ёзилган бўлиб, сарлавҳа остида адресат аниқ кўрсатиб кўйилган: «Тошкентдаги ўртоқлари» шоирнинг Бухорога жўнашини қайноқ ижтимоий ҳаётдан қочиш деб баҳолаганларига жавоб тарзида ёзилган. Эскидан алоқада бўлган кишилар орасида «мулоқот контексти» мавжуд, шунинг учун шеър адресатга ўзининг бевосита маъносидан кўпроқ маъноларни етказади:

*Мен янгилар ўлкасидан синмаган
Бир қанотни тақиб олиб қўзгалдим:
Шу йўлимда япроқлари сўлмаган
«Ёш ёғоч»нинг соясида тўхтадим.*

Шоирнинг ўртоқлари Чўлпон «янгилар ўлкаси» деганда қизил Туркистонни назарда тутаётгани, бу ерда унинг «бир қаноти синган»и, яъни озодликка бўлган умидлари чилпарчин бўлганини биладилар. Энди шоир синмаган қанотини тақиб, «йўл»га тушган, у ҳали ўз «йўл»идан («Шу йўлим», яъни кураш йўлидан), қайтган эмас. Яъни унда озодликка эришиш орзузи ҳали ҳам бор ва шу йўлдаги курашни давом эттириш учун янги ташкил топган Бухоро Жумҳурияти («Ёш ёғоч»)га борган. Чўлпон «ёш ёғоч»нинг

япроқлари сүлмаганлигини айрича таъкидлайдики (бунинг Т.си шоир ижоди контекстидагина очилади), контекстдан хабардор дўстлари унинг нима дәмоқилигини пайқаб олишларига ишонади. Чўлпон шеъриятида инқилоб фақат бир бора қуёшга ўхшатилган: «Мұҳабbat осмонида гўзал Чўлпон эдим, дўстлар, Куёшнинг нурига тоқат қилолмай ерга ботдим-ку». Худди шу асосда Чўлпонни «ерга ботирган» қуёш ҳали «ёш ёғоч»нинг япроқларини сўлдириб улгурмаган, шоир шу дарахт «сояси»да ундан омонлик топмоқчи деган Т. келиб чиқади. Бундан аён бўладики, шоир ижодида такрорланувчи поэтик мотивлар Т.га ишора қиласди (қ. мотив). Умуман, бадиий адабиётдаги Т. кўпроқ рамзий образлар (мас., Ойбек. «Наъматак»), нарса-ходисалар орасидаги аналогиялар (мас., тарих – замона), ассоциатив алоқалар (мас., табиат – жамият) асосида юзага чиқади.

ТАДРИЖ (ар. تدریج – саралаш) – мумтоз адабиётдаги шеърий санъат, шеърнинг бошланишида қўйилган мавзунинг охирига қадар изчил давом эттирилиши. Яъни Т. санъати матлаъда айтилган фикр (холат, тавсиф, таъриф ва ш.к.) кейинги байтларда муттасил кучайтириб борилишини тақозо этади. Мас., Сайфи Саройининг бир ғазали:

Топилмас ҳусн мулкинда сенга тенг бир қамар манзар,
На манзар? Манзари шоҳид. На шоҳид? Шоҳиди дилбар, –

матлаъси билан бошланиб, унда маъшуқанинг гўзал юзи таърифланади. Кейинги байтларда ҳам шоир ёр юзининг гўзаллиги таърифида давом этади, уни деталлаштириб, бўрттириб, рангларини бойитиб, хуллас, изчил ривожлантириб боради:

Бу кун Юсуф жамолини қилибтур ҳақ сенга баҳшиш,
На баҳшиш? Баҳшиши давлат. На давлат? Даевлати мафхар.

Сўзунг дурру жавоҳирдур, кўнгуллар ганжина лойиқ,
На лойиқ? Лойиқи хусрав. На хусрав? Хусрави кишвар.

Шакардин тотлидур хулқунг, карамда хотиринг матлаб,
На матлаб? Матлаби маъдан. На маъдан? Маъданни жавҳар.

Зиҳи давлатлу ошиқим, сенинг бирла қилур ишрат,
На ишрат? Ишрати жаннат. На жаннат? Жаннати кавсар.

*Бу ҳуснунг шавқу завқини күнгүл түтилари топти,
На топти? Топти хуш лаззат. На лаззат? Лаззати шаккар.*

Шоир ёрнинг юз гўзаллигини шу тариқа таърифлаб келади-да, мақтаъда асли мақсади шу бўлганини, ушбу ғазали «ёр жамоли шавқи»дан сўз воситасида тортилган сурат эканлигини таъкидлайди:

*Жамолинг шавқина Сайфи Саройи боғлади сурат,
На сурат? Сурати ҳусно. На ҳусно? Ҳусни жонпарвар.*

Айрим манбаларда Т. санъатига берилган таъриф бирмунча фарқланади. Унга кўра, Т. санъатининг воқе бўлиши учун биринчи байт қайси сўз билан тугаса, кейинги байтнинг шу сўз билан бошланиши ва бу тартиб шеърнинг бошидан-охиригача сакланиши талаб этилади. Гарчи бу таърифда шеърнинг шаклий томонига кўпроқ эътибор берилаётган бўлса-да, у юқоридаги таърифни инкор қилмайди. Чунки аввалги байт охиридаги сўзнинг кейинги байт бошида такрорланиши табиий равишда мазмун изчиллигини ҳам таъминлайди. Таърифлардаги фарқнинг асоси шуки, уларнинг бирида Т.га шеър санъати (яъни нутқ безаги), иккинчисида эса композицион усул сифатида қаралмоқда.

ТАЖЗИЯ (ар. تجزیه – бўлак-бўлак қилмоқ) – мумтоз адабиётдаги шеърий санъат, байт мисраларини икки бўлакка ажратиб, ҳар бир бўлакни ўзига муқобил бўлган иккинчи бўлак билан қофиядош қилиш. Яъни биринчи мисранинг биринчи бўлаги иккинчи мисранинг биринчи бўлаги билан, биринчи мисранинг иккинчи бўлаги эса иккинчи мисранинг иккинчи бўлаги билан қофияланади. Мисраларнинг бу кўринишида қофияланиши, асосан, фард, ғазал ёки қасиданинг матлаъси ҳамда маснавий шаклида қофияланувчи байтларда кузатилади. Мас., Машрабнинг машхур:

*Агар ошиклиғим айтсам, куйиб жону жаҳон ўртар,
Бу ишқ сиррин баён этсам, тақи ул хонумон ўртар, –*

байтида биринчи мисрадаги «айтсам» сўзи иккинчи мисрадаги «этсам» сўзи билан, биринчи мисрадаги «жаҳон» сўзи иккинчи мисрадаги «хонумон» сўзи билан ўзаро қофияланган. Т. мусажжаъга (к.) ўхшаб кўринса-да, ҳақиқатда ундан фарқлидир: мусажжаъда тўрт

бўлак қилингган байтнинг уч бўлаги қофияланса, Т.да фақат остин-устин бўлаклар ўзаро қофияланади.

ТАЖНИС (ар. *تجنس* – ҳамжинс, жинсдош) – мумтоз адабиётдаги шеърий санъат, шакли бир хил (омоним) ёки бир-бирига яқин (омограф, омофон, омоформа) бўлган сўзларни байтнинг турли ўринларида келтирган ҳолда, ҳар бир ўринда алоҳида маънони ифодалаш. Т. мумтоз шеъриятда энг фаол қўлланган санъатлардан бири саналади. Унинг асосида алоҳида шеърий жанр (*туюқ*) шакллангани, айрим санъатларнинг маҳсус навлари (тажнисли тарсеъ, радднинг айрим кўринишлари ва б.) воқе бўлиши ҳам ижодкорлар шаклдош сўзлар тақдим этувчи бадиий-эстетик имконларга алоҳида эътибор билан қараганларидан далолатдир. Mac., Навоийнинг машхур:

*Қаро қўзум, келу мардумлиғ эмди фан қилғил,
Кўзум қаросида мардум киби ватан қилғил, –*

матлаъсининг биринчи мисрасида «мардум» сўзи инсон маъносида (яъни мардумлиғ – одамийлик, одамгарчилик), иккинчи мисрасида эса «кўз қорачиги» маъносида қўлланган. Навоийнинг бошқа бир:

*Зулфи савдоси мени суду зиёндин қилди фард,
Мену ул савдо, ишум йўқтур зиёну суд ила, –*

байти биринчи мисрасида «савдо» сўзининг «шайдолик», «савдосотиқ» каби маънолари, иккинчи мисрасида эса «савдойилик», «эсҳушдан айрилганлик» маъноси назарда тутилган.

Илми бадиъга оид манбаларда Т.ни турларга ажратиш масаласида ихтилофлар мавжуд. Ушбу масалага маҳсус тўхталган адабиётшунос Ё.Исҳоқов Т.ни, аввало, иккига – *T.и том ва T.и ноқисга ажратиши*, сўнг эса Т.и ноқиснинг турларини фарқлашни таклиф қиласиди, бу назарий жиҳатдан тўғри йўлдир. Т.и том деганда тақрорланаётган сўзларнинг ёзув ва талаффузда айнан бир хил бўлгани ҳолда, турли маъно ифодалashi, Т.и ноқис деганда эса уларнинг ёзилиши ё талаффузида жузъий фарқлар бўлиши назарда тутилади. Юқоридаги иккала байт ҳам Т.и томга мисол бўла олади. Навоийнинг қуидаги туюғида эса Т.и ноқис кузатилади:

*Лаълидин жонимга ўтлар ёқилур,
Қоши қаддимни жафодин «ё» қилур,*

*Мен вафоси ваъдасидин шодмөн,
Ул вафо, билмонки, қилмас ё қилур.*

Бунда «ёқилур» сўзи биринчи мисрада «ёқмоқ, алангалатмоқ» маъносида, иккинчи мисрада «ё қилмоқ, эгмоқ» маъносида, тўртинчи мисрада эса «қилармикан ё қилмасмикан» маъносида қўлланган. Лекин биринчи ҳолда «ёқилур» битта сўз, иккинчисида кўшма феъл, учинчисида эса сўз кўшилмасининг бир қисми бўлиб, улар ёзилишда фарқланади. Шу фарқ ушбу Т.нинг нуқсони бўлиб, тажниси ноқис (нуқсонли тажнис) аталишига сабабdir. Манбаларда нуқсонли Т.нинг тажниси музайял, тажниси музориъ, тажниси поҳий, тажниси акс, тажниси муздаваж, тажниси мураккаб, тажниси хаттий, тажниси мушаеваш каби кўринишлари саналади. Шуни ҳам қайд этиш лозимки, уларнинг номланишида турличаликлар мавжуд.

ТАЖОХУЛ УЛ-ОРИФ (ар. – تجاهل العارف – билувчининг билмаган бўлиб кўриниши, ўзини билмасликка солиш) – мумтоз адабиётдаги шеърий санъат, шоирнинг аслида билган нарсасини билмагандек қилиб кўрсатиши, бунда шоирнинг асл муддаоси бирор нарсанинг асл ҳолатини билмагандек, уни бошқа бирор нарсага ўхшатиш, ё мадҳ этиш, ё муболага, ё ҳазил қилиш бўлади. Т.о. қўлланган байт риторик сўроқ гап тарзида шаклланади, яъни шоир бирор нарсани сўраш, ноаниқ нарса ёки белгига аниқлик киритишни эмас, риторик сўроқ орқали ёрнинг гўзаллиги, ошиқнинг ҳолати ёки бошқа шу каби бирор вазиятни ўхшатиш, қиёслаш орқали эътироф этишини мақсад қилади. Mac., Атойининг:

*Кўз учидин қиё-қиё шеев била боқишлиаринг
Жон тамурин қиёр учун тигму ё назармудур? –*

байтида ёрнинг «қиё-қиё» боқишлиарини «бу шунчаки бир назарми, ё жон томирини қийиш учун тигми?» тарзида ёр нигоҳларининг тигдек ўткир эканлигини эътироф этмоқчи. Ёки Навоийнинг:

*Юзни гуллардин безабму бизни курбон айладинг,
Ё юзингга төгди қонлар бизни қурбон айлагач? –*

байтида ҳам ёр юзидағи қизилликнинг асл сабабини билмагандек бўлиб, «юзингни гуллар билан безаганмисан ёки бизни курбон қилиш чоғида қон сачраганми?» тарзида ифода этмоқда. Шеъриятимизда

бошдан-охир Т.о. санъати асосида ёзилган ғазаллар ҳам учрайди. Мас., Атойининг:

*Эй пари пайкар санам, сен насли одамдинмусен,
Ё малак, ё ҳур, ё руҳи мужассамдинмусен? –*

матлаъли ғазали шу тарзда битилган.

ТАЗКИРА (ар. **ذکر** – зикр этиш, тилга олиш, эслаш) – Шарқ мумтоз адабиётида кенг тарқалган адабий-танқидий жанр. Т.ларда шоирларнинг ҳаёти ва ижоди ҳақидаги мухтасар маълумотлар зикр этилиб, уларнинг асарларидан намуналар (одатда, бир неча байт ҳажмида) келтирилади ва ижодига умумий тарзда баҳо берилади. Т.ларда ижодкорлар ҳақида маълумотлар бериш билангина чекланниб қолинмасдан, шеърият ва унинг назарий масалалари билан боғлиқ эътиборга лойик фикр-мулоҳазалар, маълум бир давр адабий ҳаёти ҳақидаги мухим маълумотлар ҳам ўрин олади. Адабиёт тарихида шоирларгина эмас, балки олимлар, авлиёлар ҳақидаги Т.лар ҳам яратилган (мас., А.Навоий. «Насойим ул-муҳаббат»; Сидқий. «Тазкираи Йомоми Аъзам»). Т. ёзиш анъанаси дастлаб араб ва форс адабиётларида шаклланган бўлиб, кейинроқ туркий адабиётда ҳам кенг оммалашган. Т.нинг энг қадимги намунаси сифатида Абу Мансур ас-Саолибининг «Ятимат ад-даҳр фи маҳосили аҳли аср» («Замона ахлининг фазилатлари ҳақида ягона дурдона», XI аср) асари эътироф этилади. Мазкур Т.дан ўша давр Араб, Ажам, Мовароуннахр, Хоразм ва Ҳурсон адабиёти ва санъати ҳақидаги қимматли маълумотлар ўрин олган. Туркий тилдаги илк Т. сифатида Навоийнинг «Мажолис ун-нафойис» асари кўрсатилади. Т.лар мумтоз адабиёт тарихи, алоҳида ижодкорлар асарларини, улар билан боғлиқ назарий масалаларни ўрганишда мухим манба саналади. Жумладан, Муҳаммад Авфий Бухорийнинг «Лубоб ул-албоб» («Билимлар мағзи», XIII аср), Давлатшоҳ Самарқандийнинг «Тазкират уш-шуаро» (XV), Малеҳо Самарқандийнинг «Музакир ул-асҳоб» (XIX аср), Раҳматулла Возеҳнинг «Тухфат ул-аҳбоб» (XIX аср), Фазлийнинг «Мажмуаи шоирон» (XIX аср), Аҳмад Табиийнинг «Мажмуаи шоирон» (XIX аср); XX аср бошлари адабиёти ҳақида маълумот берувчи Неъматулла Муҳтарам, Мирсиддиқ Ҳашмат ва Абдиларнинг бир хил – «Тазкират уш-шуаро» номли, шунингдек, П.Қаюмовнинг «Тазкирайи Қайюмий» асарлари шундай Т.лар сира сидандир.

ТАЗМИН (ар. تَضْمِين – ўз ичига олиш) – қаранг: назира

ТАЗОД (ар. تَضْلِيل – зид күйиш, қаршилантариш) – мумтоз адабиётдаги шеърий санъат, наср ё назмда бир-бирига қарама-қарши маъноли сўзларни ишлатиш. Илми бадиъга оид асарларда Т. санъати *тибок*, *табок*, *татбиқ*, *такофу*, *мутобақа*, *мутобиқа*, *тақобул*, мутазод каби номлар билан ҳам юритилган, номланиши турлича бўлса ҳам, улар можиятан деярли бир хил. Шоир лирик қаҳрамон кўнглидан кечачётган зиддиятли кечинмаларни баён этиш, бир-бирига зид манзаралар чизиш ё бошқа шу каби мақсадларни кўзлаб байт таркибида бир-бирига қарама-қарши маъноли сўзлар (антонимлар)дан фойдаланади. Т.ни юзага келтираётган қарама-қарши маъноли сўзлар англатувчи тушунчалар бир-бирига мутлақо зид (*ўт ва сув*) бўлиши, зидлик даражаси у қадар кескин бўлмаслиги (қора ва қизил), фөълнинг бўлишли-бўлишисиз шакллари орасидаги каби (келди-келмади) фақат шарт-ли равишдагина зидланиши ҳам мумкин. Мумтоз адабиётшу-нослиқда шу жиҳатлардан келиб чиқиб Т.нинг бир неча турлари фарқланган бўлса ҳам, ҳозирги адабиётшунослиқда зидликнинг қайси кўриниши бўлишидан қатъи назар, Т. атамаси билан юритилади. Mac., Лутфий ғазалларидан бирини:

Йўқтуурур ёлғиз бу Лутфий жонига жаври рақиб,
Қайда бир доно дуур, ул жаври нодон тортадур, –

мақтаси билан яқунларкан, «рақиб жабру жафосини тортаётган фақатгина Лутфий эмас, қаердаки бир доно бўлса, у нодон жабрини тортади», аслида, ҳаётнинг қонуни шундай деган чукур фалсафий хulosага келади. Байтда қўлланган Т., доно ва нодон сўзлари орасидаги зидлик мазкур фалсафий хulosага асос бўлиб, уни ёрқин ифодалашга хизмат қилган.

ТАКРИР (ар. تَكْرِير – такрор) – мумтоз адабиётдаги шеърий санъат, бир сўзни байтнинг турли ўринларида такрорлаш. Айрим манбаларда раддинг бир кўриниши сифатида таърифланса ҳам, Т.ни алоҳида санъат сифатида тушуниш, уни раддан фарқлаш мақсадга мувофиқдир. Чunksi, биринчидан, Т.да сўзнинг такрорланиш ўрни қатъий белгиланган эмас: битта сўз кетма-кет такрорланиши ҳам, байт ё шеърнинг турли ўринларида такрорланиши ҳам мумкин; иккинчидан, Т.нинг бадиий-эстетик функцияси фикрни таъкидлаш бўлиб, ушбу санъат қўлланган байт (ёки шеър) оҳангি ҳам шунга мосдир. Mac., Ферузнинг:

**Құлурман ютуб шаекү лаълингда қон
Фигону фигону фигону фигон, –**

байтида Т. маънени таъкидлаб кучайтиради ва шунга мос оҳанг билан ўқишни тақозо этади. Ёки Эркин Воҳидовнинг:

**Кечир, янглишмаган ким бор, менинг ҳам кўп гуноҳим бор,
Одамзод асли нокомил, кечир, ё раб, кечир, ё раб, –**

байтидаги «кечир» сўзининг такрори илтижо оҳангини кучайтириб, лирик қаҳрамон руҳий ҳолатини ёрқин ифодалашга хизмат қиласди.

ТАКРОР – матний, композицион ёки тематик бирликларнинг маълум бадиий-эстетик мақсадларни кўзлаган ҳолда такрорланиши, бадиий матн (ва асар композицион қурилиши)га хос шундай усулларнинг умумий номи. Т. бадиий асарнинг турли сатҳларида кузатилади. Жумладан: а) бадиий нутқда: фонетик (аллитерация, ассонанс, фонетик анафора, иштиқоқ), лексик (сўз Т.и, климакс, анафора, эпифора, анадиплосис ва б.), семантический (градация, маъно Т.и) синтактика (синтактика параллелизм, хиазм); б) ритмик бирликларнинг ўлчов асосида тартибли такрорланиши: туроқ (рун), мисра (ёки баҳр), банд; в) шеър композицияси даражасида: мисра Т.и (рефрен, тарже), банд Т.и (нақорат); г) образли-тематик Т.лар (тематик параллелизм, мотив).

ТАЛМЕХ (ар. شمیع – чақмоқ чақиши, кўз қирини ташлаш, назар солмок) – мумтоз адабиётдаги шеърий санъат, шеърда машҳур тарихий воқеа, шахслар, бадиий асарларга ишора қилиш. Т. шоирни кўзда тутилган фикрни батафсил айтиш, ҳолатни батафсил тасвирилаш заруратидан халос этиб, кўзланган самараага ўша фикр ёки ҳолатга мос келадиган бошқа бирор ҳаётий ёки бадиий фактга ишора қилиш биланоқ эришиш имконини беради. Натижада оз сўз билан кўп маъно ифода қилиш (қ. ийжоз) мумкин бўлади, зоро, Т. кўлланган байт мазмуни ишора қилинаётган тарихий воқеа ёки бадиий асар мазмуни билан бойийди. Т.даги ишора тарихий воқеа ёки бадиий асар номини келтириш, улар билан боғлиқ бирор лафзни тилга олиш орқали очиқ ёки яширин тарзда амалга оширилиши мумкин. Шу жиҳатдан Машрабнинг:

**Шайх Санъондин бўлуб тўрт юз мурид соҳибкамол,
Кўрди тарсозодани, хўқбону тарсо қилди ишқ, –**

байти билан Нодиранинг:

*Зоҳидо, ишқу муҳаббат аҳлини маъзур тут,
Ёр кўйида на бўлди шайх Санъон оқибат, –*

байтини қиёслаш мумкин. Иккала байтда ҳам машҳур «Шайх Санъон қиссаси»га ишора қилинган. Байтлардаги маънони теран англаш учун, аввало, ўкувчининг қисса воқеаларидан, Шайх Санъон тақдиридан хабардор бўлиши талаб этилади. Келтирилган байтларнинг биринчисида ишора иккинчи байтдагига нисбатан батафсил ифодаланган: унда мазкур қиссани ёдга солувчи «Шайх Санъон», «тўрт юз мурид», «тарсозода», «хўқбону тарсо» каби бир неча тушунчалар бўлиб, қиссага ишора ҳам, ундан мурод ҳам очиқ ифодаланган. Шундай бўлса ҳам, шоирнинг ишқ қудрати ва қудратли ишқа мубтало бўлган ошиқ аҳволи ҳақидаги фикр-тасаввурларини тўла англаш учун Шайх Санъон ҳолатини ёдга олиш, қисса руҳини байт руҳига кўчириш лозим бўлади. Иккинчи байтдаги ишора эса у қадар очиқ эмас: шоир шайх Санъонга нима бўлганини очиқ айтмайди, «шайх Санъоннинг ёр кўйида нима бўлганига қара» дея эслатиш билан чекланади, биринчи байтдаги каби қисса воқеаларини эслатувчи сўзларни ишлатмайди, хуллас, ишора ва ундан кўзланган муддаоб бирмунча яширин қолади. Шунинг учун А.Хусайнин Т.ни луғзга ўхшатади: «Билгилким, талмехнинг баъзиси луғзга ўхшар, ул жиҳатдинким, андин мақсад зоҳирий маъоний бўлмай, имо йўли била адо этилган маъно мақсад бўлур». Яъни Т.да шоир асл мақсадини гўё атайлаб яширгандай бўлади ва уни топиш учун худди топишмоқлардаги сингари асл мақсадга етакловчи белги-ишора-ларни келтиради, ўкувчи эса шу белгилар билан байтда айтилаётган фикрлар ўртасидаги ўхшашликлар асосида асл мақсадни англаб етади.

Т.да ишора қилинаётган тарихий ёки бадиий фактнинг машҳур, яъни кўпчиликка таниш бўлиши кўзда тутилади, шу шартнинг баъжарилиши Т.нинг тушунарли бўлиши гарови ҳисобланиб, ишора қилинаётган фактнинг машҳурлик даражаси нечоғлик юқори бўлса, Т. моҳиятини тушунувчилар доираси ҳам шунча кенг бўлади ва аксинча. Мас., Э.Воҳидовнинг:

*Минг Самарқанд, минг Бухоро ҳадя этгум ҳол учун,
Лек ниғоримда ҳавас йўқ мулку давлат, мол учун, –*

байтини ўқибоқ Ҳофиз Шерозийнинг машҳур матлаъсига ишора

қилинаётгани, шоир салафи билан ижодий мусобақага киришгани англашилади. Зеро, бундаги ошиқ муҳаббати Ҳофиз талқинидаги ошиқницидан кам эмас – ундан минг карра ортиқ ҳадяга тайёр; маъшуқа эса мол-мулк ҳавасидан фориғ, яъни шу томони билан у ҳам Ҳофиз талқинидаги маъшуқадан баланд туради. Бу жиҳатдан қаралса, бадиий асар ёки тарихий воқеага умумий тарзда қилинган ишорани тушунувчилар доираси улардаги конкрет эпизод, деталларга қилинган ишорани тушунувчилар доирасига қараганда тораяди. Мас.: Машраб ва Нодира байтларидаги каби Навоийнинг:

*Кўнглум ўтидин, не тонг, гар топса руҳсоринг фуруғ,
Шўх тарсо мусхаф ўртар шайх Санъон ўтиға, –*

байтида ҳам «Шайх Санъон қиссади»га ишора қилинган. Бироқ аввалги байтларда ишора, умуман, асарга (яъни ишқ кудрати шайхни динидан-да кечтирганига) қаратилган бўлса, бунда қиссадаги конкрет эпизод – тарсо маъшуқа шартига биноан мусхафнинг куидирилишига ишора қилинади. Яъни бу байтдаги Т. моҳиятини англаш учун қиссадан шунчаки хабардорлик кам, уни яқиндан билиш талаб этилади. Бундан ташқари, Э.Воҳидов байтида кузатилгани каби, Т.да ишора қилинаётган обьект номи аталмасдан, унинг мазмунига ишора қилинган ҳолларда ҳам тушуниш қийинлашади. Мас., Машрабнинг:

*Ризо мулкидаман ҳалқумни тутдим тиги Ақбарга,
Бу йўлда сийнаи поки Забеҳуллоға сигмамадур, –*

байтида Иброҳим алайҳиссаломнинг ўғли Исмоилни қурбонликка келтириши билан боғлиқ ривоятга ишора қилинади. Лекин байтда бу нарса ошкор айтилмайди-да, шоир ўз ҳолатини ризолик билан бўғзини пичоққа тутган пайғамбарзодага қиёсан ифода этиди. Байтдаги Т. моҳиятини англаш учун ўқувидан, аввало, ишора обьектини таниб олиш, шундан кейингина лирик қаҳрамон руҳий ҳолатини ривоятга қиёсан тасаввур этиш талаб қилинади. Хуллас, шеърда тасвирланаётган ҳолат, ифода этилаётган фикр билан тарихий ёки бадиий фактлар орасида муштарак нуқталар мавжудлиги Т. санъатининг замини бўлиб, у ҳамиша ўхшатиш асосида юзага келади. Яъни Т. матннинг мазмун доирасини кенгайтиради, байтдаги ва ишора қилинган фактлардаги фикр, ҳолат, воқеа ва ш.к.ни ана-

логиялар асосида қиёспаш, муқобил қўйиш, қаршилантириш орқали бадииятни кучайтиради, адабий асарларнинг диалогик алоқасини таъминлайди ва намоён этади.

ТАМАННИЙ (ар. تمنی – орзу қилиш) – иншо йўлларидан бири, фикрни ифодалаш усули, лирик қаҳрамон ўй-кечимнлари, ҳистойғуларининг орзу-истак изҳори тарзида ифодаланиши. Т.да зоҳиран лирик қаҳрамон орзусигина ифодаланса ҳам, ботинда бошқа мақсад (маъшуқа васфи, ўз ҳолининг баёни ва б.) кўзда тутилади. Мас., Огаҳийнинг:

Менинг мақсудим улдурким, сенинг бошингдин айлансанам,
Оёқингга бўлуб садқа, кўзу қошингдин айлансанам, –

байтида лирик қаҳрамоннинг «бошингдан, кўзу қошингдан айлансанам, оёғингга садқа бўлсан» тарзидаги орзуси, бир томондан, маъшуқанинг ҳар жиҳатдан етук ва гўзал эканлиги эътирофи бўлса, иккинчи томондан, ошиқнинг чексиз муҳаббати изҳоридир.

ТАМСИЛ (ар. تمثیل – мисол келтириш, далиллаш) – мумтоз адабиётдаги шеърий санъат, шеърда ифода этилган фикрни ҳаётий мисоллар ёрдамида далиллаш, тасдиқлаш, изоҳлаш. Моҳиятан Т. ирсолу масал (қ.) санъатига ўхшаш, фақат ундан фарқли ўлароқ фикр тасдиғи учун мисол ҳаётнинг ўзидан олинади. Яъни агар ирсолу масалда фикр тасдиғи учун халқнинг минг йилликлар давомидаги ҳаётий тажрибасини ўзидан мужассам этган мақолларга таянилса, Т.да кўпроқ шахсий тажриба, ҳаётий кузатишларга асоснилади. Т. ўхшатиш асосида воқе бўлади, чунки айтилаётган фикр (ёки тас-вирланаётган ҳолат) ва унинг тасдиғи (ёки иллюстрацияси) учун келтирилаётган ҳаётий мисол моҳиятида ўхшашлик бор. Бироқ ўхшатишдан фарқли равишда, Т.да ўхшатиш воситаларидан фойдаланилмайди, фикр (ёки ҳолат) параллел бериладида, улар орасидаги ўхшашлик, боғлиқлик, алоқадорликни англаб олиш ўқувчининг ўзига ҳавола этилади. Мас., Алишер Навоийнинг қўйидаги машҳур қитъасида фикрни далиллаш учун моҳирона Т. қилинган:

Нокасу ножинс авлодин киши бўлсин дебон,
Чекма меҳнатким, латиф ўлмас касофат олами
Ким, кучук бирла хўтукка неча қилсанг тарбият,
Ит бўлур, дого эшак, бўлмаслар асло одами.

Қитъанинг биринчи байтида шоир тарбияда насл ҳал қилувчи аҳамиятга эга, шунинг учун «нокасу ножинс»лар авлодини одам қиласман деб уриниш бефойда деган асосий фикрини айтади, сўнг уни асослаш учун кучук билан хўтикни қанча тарбияласанг ҳам, одам бўлиб қолмайди тарзидаги ҳаётий мисолни келтиради.

ТАНКА (японча «қисқа қўшиқ») – япон шеъриятидаги кўхна лирик жанрлардан бири, турғун шеърий шакл. Т. беш мисрадан таркиб топади, унинг биринчи ва учинчи мисралари беш бўғинли, қолган учта мисраси эса етти бўғинли ўлчовга эга ($5+7+5+7+7$), мисраларнинг қофияланиши талаб қилинмайди. Манбаларда бизгача етиб келган энг қадимги Т.лар VIII асрда ёзиб олинган. Жанрнинг гуркираб ривожланиши X – XIII асрларга тўғри келади, бунинг омиллари сифатида япон ҳукмдорлари саройларида муентазам ўtkазиб турилган мушоиралар, танканавислар мусобақалари, Т.лардан мамлакат миқёсида маҳсус тўпламлар тузиб борилгани кўрсатилади. Тематик жиҳатдан Т.лар чегараланмаган бўлса ҳам, анъанага кўра уларда кўпроқ севги-муҳаббат, ҳижрон, сафар, йил фасллари каби мавзулар қаламга олинган. Кейинча шакл томонларига эътиборнинг кучайиши жанр тараққиётида турғунликка сабаб бўлди. XIX аср охири – XX аср бошлирида ижтимоий мавзуларда яратилган Т.лар жанр тараққиётида янги саҳифа очди. Т. жанрининг бошқа ҳалқлар шеъриятига жадал кириб кела бошлиши ҳам шу даврга тўғри келади.

ТАНОСИБ (ар. تاسیب – даҳлдорлик, алоқадорлик) – мумтоз адабиётдаги шеърий санъат, фикрни бир-бирига алоқадор, маъно жиҳатидан яқин ва ўзаро мутаносиб тушунчаларни билдирувчи сўзлар орқали ифодалаш. Mac., Навоийнинг:

*Шаҳ ёнин фарзин киби кажлар мақом этса, не тонг,
Ростравлар арсадин гар тутсалар руҳдек қирок, –*

байтида шаҳ, фарзин, арса (шахмат таҳтаси), рух сўзлари бир-бирига узвий алоқадор ва мутаносиб сўзлар бўлиб, шоир улар воситасида ўзига хос образли лавҳа яратган.

ТАНСИҚ УС-СИФОТ (ар. تنسیق الصفات – сифатлар тизмаси, кетмакет, изма-из сифат келтириш) – мумтоз адабиётдаги шеърий санъат, нарса-тушунча ёки шахс таърифида бир неча сифатлашларни кетма-кет санаш. Изма-из келтирилаётган сифатлар

ёрдамида шоир ўша тушунча ёки шахсни васф этиш, тасвирлаш ёки салбий жиҳатларини эслатишни мақсад қилиб қўяди. Мас., Фурқатнинг:

*Узоринг барги гулдин нозигу, хушранг, хушбўйроқ,
Бу янглиғ тозау тар гулки, ё раб, қай чамандандур, –*

байтида сифатларни кетма-кет санашдан мурод тавсифланаётган нарсанинг белгига ортиқлигини таъкидлаб, муболагали таърифу тавсифни юзага келтиришдир. Т.с. санъати бир байт доирасида ҳам, бутун бошли шеър (рубоий, ғазал, қасида кабилар) доирасида ҳам юзага келиши мумкин.

ТАҢҚИД (ар. تقدیم – сайлаш, саралаш; муҳокама қилмок) – бадиий танқид; кенг маънода ҳозирги бадиий жараён муаммоларини ўрганиш, янги пайдо бўлган санъат асарларини муҳокама қилиш, уларнинг мазмун-моҳияти, ютуқ ва камчиликларини очиб бериш, бадиий тафаккур тараққиётининг жорий ҳолати ва ижтимоий дид нуқтаи назаридан баҳолаш билан шуғулланувчи соҳа. Санъат турларининг қайси бири билан шуғулланишига қараб Т. соҳалари ажратилади: кино Т.и, театр Т., мусиқа Т.и ва ҳ. Бадиий адабиёт билан шуғулланувчи Т. адабий танқид деб юритилади.

ТАҢҚИДИЙ РЕАЛИЗМ – XIX асрнинг ўрталарида майдонга келган адабий йўналиш, ижодий метод (к. реализм). Термин илк бор М.Горький томонидан қўлланган ва шўро даври адабиётшунослигига фаол истеъмолда бўлган. Дарҳақиқат, XIX аср ўрталаридан адабий жараёнда етакчилик мақомини эгаллай бошланган реалистик адабиётнинг кўплаб намуналарида мавжуд тузум теран бадиий таҳлил этилиб, унинг инсонийликка зид моҳияти очиб берилади (мас., О.Бальзак, Ф.Достоевский, Л.Толстой ва б.). Яъни реалист санъаткорлар ўз идеалларидан келиб чиқиб кўпинча воқеликка танқидий муносабатда бўладилар ва уни ғоявий-ҳиссий инкор қиласидилар. Ҳолбуки, биринчидан, давр адабиётида воқеликни инкор эмас, тасдиқ этувчи асарлар ҳам бўлган, демак, ушбу атама давр адабиётидаги ҳодисани тўлиқ қамрай олмайди; иккинчидан, конкрет бадиий асардаги ғоявий-ҳиссий инкор куннинг долзарб ижтимоий-сиёсий эҳтиёжлари билангина боғлиқ мазмун қатлами, холос, унда боқий умуминсоний қадриятлар ва мангу муаммолар талқинидан келиб чиқувчи умумбашарий мазмун қатлами ҳам бор, демак, бутун бошли адабий-бадиий ҳодиса

моҳиятини инкор руҳи билангина белгилаш унчалик тўғри бўлмайди. Ҳозирги адабиётшунослиқда Т.р. термини анъанавий равишда кўлланиб турган бўлса-да, унинг фаоллиги сезиларли даражада пасайган.

ТАРДУ АКС (ар. طرد عکس – қувмоқ; тескари қилмоқ, тескари қилиб тақорорлаш) – мумтоз адабиётдаги шеърий санъат, байт таркибидағи икки сўз ёки бирикмани аввал маълум бир тартибда келтириб, сўнг уларнинг ўрнини алмаштириб тақорорлаш. Бу ҳолнинг бир мисра доирасида воқе бўлиши маҳраж (тугалланмаган) Т.а. дейилади. Mac.:

Зулфи саёдоси, бу саёдои бошинда кўлтуур,

Бўлса савдо аҳли, тонг йўқ, аҳли савдо бирла дўст (Навоий).

Т.а. нинг байт доирасида воқе бўлган кўриниши мукаммалроқ ҳисобланади, шунинг учун у комил (тугалланган) Т.а. деб аталади:

Офатижон десам, кулиб роҳатижон ўзим деди,

Роҳатижонмисан десам, офатижон ўзим деди (Чустий).

Маъно нуқтаи назаридан ҳам Т.а.нинг икки кўриниши фарқланади. Агар ўрнини алмаштириб тақорлагандан сўз ёки бирикма маъноси ўзгармаса, акси мутахқодий дейилади. Mac., Э.Воҳидовнинг қуйидаги байтида «Зухрою Ой» бирикмасини «Ою Зухро» тарзида тақорорлаш билан маъно ўзгаришсиз қолади:

Мен сени Зухрою Ой деб илтижо қилдим ва лек

Сен йироқсан, гарчи мәнга Ою Зухро бир қадам.

Т.а.нинг маъно жиҳатидан фарқланувчи иккинчи кўриниши акси мужрий деб номланиб, бунда ўрин алмашиши натижасида, янги маъно ҳосил бўлиши назарда тутилади. Mac., Э.Воҳидовнинг қуйидаги:

Интілар борлиқни инсон баркамол этмоқ учун,

Не ажаб, инсонни борлиқ баркамол этган эмас, –

байтида «борлиқни инсон» бирикмасининг «инсонни борлиқ» тарзида қайтарилиши натижасида, эга-кесим муносабати ўзгаради ва на-тижада янги мазмун ҳосил бўлади.

Шунингдек, Т.а. санъатида байтда аксланиб, ўрни алмашиб келаётган сўз ёки бирикмалар сони бирдан ортиқ бўлиши ҳам мумкин. Mac., Навоийнинг:

*Дема раъно қад ила жилвасидин холингни,
Жилва жонимга бало, ул қади раъно офат, –*

байтида «раъно қад» бирикмаси ичида ҳам, бу бирикма билан «жилва» сўзи орасида ҳам ўрин алмашиб тақорланиш кузатилади.

ТАРЖИБАНД (ар. ترجیح – тақорлаш, айлантирмоқ, форс. ڦڻ – боғлаш) – мумтоз адабиётдаги ўзига хос композицион курилишга эга йирик ҳажмли лирик жанр. Т. бир неча байтдан ташкил топиб, унинг ҳар бир банди ғазал типида қофияланувчи (а-а, б-а, в-а, г-а...) бир неча байтдан таркибланади, ҳар бир банд охирида эса маснавий типида қофияланган бир байт айнан тақорланади. Т.лар, одатда, ҳар бири 8 – 11 байтдан таркибланувчи 7 – 8 банддан ташкил топади, бироқ бу борада қатъий меъёрлар белгиланган эмас. Т.лар кўпроқ фалсафий-ахлоқий мавзуда ёзилади, шеър давомида кўйилган мавзу кенг ва атрофлича ёритилади. Мавзу бирлиги, яъни шеър давомида битта мавзунинг изчил ривожлантирилиши, бандларнинг барини боғловчи таржеънинг мавжудлиги Т.нинг яхлитлигини таъминлайди. Бандларни ўзаро боғлагани учун тақорланувчи байт – таржеъ *восила байт* (боғловчи байт) деб аталади, унга Т.нинг энг муҳим композицион унсури сифатида қаралади, жанрнинг номланиши ҳам шу билан изохланади. Тақорланаётган байтнинг яна бир вазифаси лирик қаҳрамон кечинмаларини таъкидлаш, ўқувчи диққатини асосий фикрга (қ. лейтмотив) қайта-қайта жалб қилишдан иборат. Мазкур хусусиятлари билан Т. жиддий фалсафий-ахлоқий масалаларни лирик мушоҳада қилишга кенг имкон беради, шу боис Ҳофиз Хоразмий, Навоий, Фузулий, Юсуф Амирий, Равнақ, Миррий, Мунис, Оғаҳий, Увайсий, Нодира, Табибий каби мумтоз шоирлар ижодида кенг ўрин тутади.

ТАРЖИЪ (ар. ترجیح – тақорламоқ, айлантирмоқ) – мумтоз шеъриятдаги санъат, шеърнинг ҳар бир банди охирида мисра ёки байтни тақорлаш; тақорланиб келаётган мисра ёки байт ҳам таржиъ дейилади (қ. рөффрен). А.Хусайний ажам шоирлари Т.ни шундай тушунганини, араб шоирлари эса Т.ни тақрир турларидан бири, байт таркибида бир маънони қайта-қайта тақорлашга асосланган

санъат деб ҳисоблашларини айтади. Шеъриятимизда Т. санъати кўлланган шеърлар кўплаб учрайди. Мас., Фурқатнинг «Сайдинг қўя бер, сайёд» мусаддасининг ҳамма бандларидан сўнг қуидаги байт Т. сифатида тақорланади:

*Ҳижрон ўқидин жисми кўп ёра экан мендек,
Куйган жигари бағри садпора экан мендек.*

Машраб, Фузулий, Муқимий каби шоирларнинг мусамматларида Т. санъатидан моҳирона фойдаланилган. Шунингдек, мумтоз шеъриятда Т. асосида фарқланувчи таржибанд (қ.) жанри ҳам мавжуд.

ТАРИХИЙ-ФУНКЦИОНАЛ ЎРГАНИШ – бадий адабиётнинг ижтимоий тақдирини, бадий асарнинг ўкувчи омма онгидаги яшаш тарихи, турли тарихий босқичлардаги талқинларини ўрганиш. Бу хил ёндашув бадий адабиётга коммуникация жараёни сифатида қарашни тақозо этади. Модомики, коммуникация амалга ошган шарт-шароитлар ўзгариб туар экан, Т.-ф.ў. бадий асарнинг илгари амалга оширилган талқинларини ўша давр контекстидаги тадқик қилишни тақозо этади. Шунинг учун муайян асарнинг илгари (адабий танқид, олимлар, ўкувчи омма, режиссёрлар, актёrlар, китоб безакчилари ва ш.к. томонидан) амалга оширилган талқинлари Т.-ф.ў. учун материал бўлиб хизмат қиласди. Т.-ф.ў. адабий меросни тўғри баҳолаш, уларнинг ҳозирги кундаги аҳамиятини очиб бериш, ўтмишда яратилган асарларнинг илмий жиҳатдан тўғри, адекват талқин этилишида муҳим аҳамиятга эгадир. Аён бўладики, илгари яратилган асарларнинг ҳозирги ҳаётини ўрганиш Т.-ф.ў.нинг муҳим ва асосий масаласидир. Адабиёт тарихи конкрет асарга ўкувчи омманинг қизиқиши даражаси, талқинлари, унга берилаётган баҳолар ўзгариб туришига кўплаб мисолларни беради. Зоро, адабий асар мазмуни кўпқатламли бўлиб, муайян давр шарт-шароитлари (бадий диддаги ўзгаришлар, шу даврда туғилган маънавий-руҳий эҳтиёжлар) билан боғлик ҳолда улардан бири актуаллашаверди. Яъни бадий асарнинг турли даврларда турлича тушунилиши ва баҳоланиши қонуният мақомидадир. Мас., А.Қодирий «Ўткан кунлар» романида ўз даври ижтимоий муаммолари (миллат фожиаларининг илдизи, миллый озодлик масалалари)га муносабат билдириб, даври учун бениҳоя муҳим гояларни сингдиришга интилган эди. 60-йилларда асар мазмунининг бу қирраси тушиб қолади-да, унинг бошқа қатлами (ота-она орзуси, севги ва вафо) актуаллашди,

у кўпроқ «ишик майший, саргузашт» асар сифатида тушунилади. 80-йиллар охирида, жамиятда истиқлол ва эрк соғинчи кучайган бир шароитда, ижтимоий-тариҳий шароит асар яратилган даврдаги моҳиятнан яқин эди, бу эса яна асар яратилган даврдаги актуал мазмунни олдинги планга чиқарди. Ҳозирги кунда эса ўқувчини романдаги умуминсоний муаммолар талқини – ёзувчининг инсон эрки, қадри ва шаъни, адолат ва разолат, диёнат ва хиёнат, шахс ва жамият, шахсий манфаат билан ўзга шахслар манфаати муносабати каби қатор мураккаб масалалар ҳақидаги мулоҳазалари кўпроқ қизиқтиради. Истиқлол шароитида ўтмиш адабий мөросини қайта баҳолаш зарурати юзага келди, бу нарса адабиётимизни ўрганишда тариҳий-функционал ёндашувни долзарб этиб қўйди. Шу боис ўтган аср охирларидан бошлаб ўзбек адабиётини Т.-ф.ў. борасида дадил қадамлар қўйилди. Жумладан, А.Расулов, С.Содик, Р.Кўчкор, Б.Каримов каби олимларнинг А.Қодирий ва А.Қаҳҳор асарларини тариҳий-функционал аспектда ўрганишга багишланган тадқиқотлари бу борадаги жиддий ютуқлардан саналиши мумкин.

ТАРКИБАНД (ар. ترکیب – тузилиш, форс. ڈب – боғлаш) – мумтоз адабиётдаги ўзига хос композицион қурилишга эга йирик ҳажмли лирик жанр. Т.нинг ҳар бир банди ғазалтипида қофияланувчи бир неча байтдан таркибланиб, охирида маснавий типида қофияланувчи байт келтирилади. Қурилишидаги бу жиҳатлари билан Т. таржибандга ўхшаш, фақат унда бандлар охиридаги байт таржеъ эмас, ҳар бир банд охирида бутунлай янги байт келтирилади. Т.нинг бандлари ғазални эслатади, фақат унда тахаллус келтирилмайди. Т. бандларидаги байтлар сони қатъий белгиланган эмас, лекин ҳар бир Т.да бандлардаги байтлар сони бир хил бўлиши лозим (мас., Ҳофиз Хоразмий девонига киритилган Т. ҳар бири 8 тадан байтни ўз ичига олган 4 та банддан ташкил топган). Т.даги бандлар ғоя ва мавзу жиҳатидан бир-бирига узвий боғлиқ бўлиб, битта мавзунинг изчил ривожлантирилиши асар яхлитлигини таъминлайди: қўйилган мавзу талқини банддан-бандга ёрқинлашиб боради, ғазал кўринишидаги ҳар бир банд мавзунинг қайсиидир қиррасини атрофлича ёритишга хизмат қиласи. Шу жиҳатлари билан Т. жиддий фалсафий масалаларни лирик мушоҳада этиш учун қулай шакл бўлиб, унга Ҳофиз Хоразмий, Навоий, Фузулий каби мутафаккир шоирлар айрича эътибор қилганлари шундандир.

ТАРСЕЪ (ар. ترسیع – дурни, гавҳарни илга тизмоқ) – мумтоз

адабиётдаги шөөрий санъат, байтнинг биринчи мисрасидаги барча сўзларнинг кейинги мисрадаги муқобилларига қофиядош ва вазнда тенг бўлиши. Бироқ Т.нинг асосий шарти қофиядошлик бўлиб, «Агар қофия туфайли вазнда ихтилоф бўлса ҳам, зарари йўқдир» (А.Хусайнин). Яъни биринчи мисрадаги сўзлар иккинчи мисрадаги муқобиллари билан қофиядош бўлса, вазнда тенглик бузилган ҳолда ҳам, Т. санъати юзага келаверади. Айни пайтда, мисралардаги муқобил сўзларнинг ҳам қофиядош, ҳам вазндош бўлиши Т.нинг мукаммал кўриниши ҳисобланади. Шеърга ўзгача мусиқийлик бахш этиши сабаб шеъриятимизда Т. анча фаол қўлланган, унинг гўзал намуналарини турли жанрларга мансуб шеърларда кўплаб учратиш мумкин. Фақат қофияланиш тартиби ўзига хос бўлгани учун, ғазалдаги Т., одатда, матлаъда юзага келишини унутмаслик лозим. Бунинг сабаби шуки, Т. байт мисраларидағи барча сўзларнинг ўзаро қофиядош бўлишини тақозо этади. Ғазалда эса матлаъдан кейинги байтларнинг биринчи мисралари очик қолгани ҳолда, иккинчи мисраларининг матлаъга қофиядош бўлиши талаб этилади, шунингдек, аксар ҳолларда ғазал радифли бўлади – буларнинг бари матлаъдан бошқа байтларда Т.нинг юзага келишига халақит беради. Иккинчи томондан, матлаънинг Т. асосига курилиши ҳусни матлаъ (қ.) санъати талабларига мос бўлиб, илк байтнинг ўкувчи ёдида муҳрланиб қолишига хизмат қилади, шу тариқа Т. санъатини қўллашда ғазал жанри ҳусусиятларидан келиб чиқувчи чеклов охир-оқибат унинг фойдасига ишлайди. Мас., Навоийнинг қуйидаги матлаъсида Т. санъати қўлланган:

*Не хуш келгайки, келгай нозанинум,
Не хуш бўлгайки, бўлгай ҳамнишинум.*

Т. санъатининг қўлланиши, айниқса, бир байтдангина ташкил топувчи фардларда муҳим, чунки ҳикматли фикрнинг ўзига хос оҳанг билан жаранг топиши унинг ўкувчи ёдида сақланишида, оммалашиб кетишида катта аҳамият касб этади. Мас., Навоийнинг:

*Муруввам барча бермакдур, өмак йўқ,
Футуввам барча қилмакдур, демак йўқ, –*

фарди мисраларидағи қофияланаётган сўзлар равийда ҳам, ҳаракату сукун (унли ва ундошлар)да ҳам бир-бирига мувофиқ, у Т.нинг энг мукаммал кўринишига мисол бўла олади.

Маснавий шаклида ёзилган достонлар таркибидаги Т. санъати кўлланган байтлар матнда ритмик ўзига хослиги, мусиқийлиги билан алоҳида ёжралиб туради. Шу боис бундай байтлар кўпроқ воқеалар шиддати ортган, қаҳрамон руҳиятида драматизм кучли намоён бўлган ўринларда, муаллиф аввал билдирган фикрларини умумлаштириб ифодаламоқчи бўлган ҳолларда учрайди. Mac., «Лайли ва Мажнун»да фарзандини ишқ балосидан халос этиш ниятидаги ота Қайсни Каъбага олиб боради: у ўғлининг худога ишқдан халос этишни сўраб муножот қилишини истайди. Лекин Қайс ўзини ишқдан айро тасаввур қилолмайди, Навоий қаҳрамонининг бу ҳолатини унинг муножотидаги куйидаги байтларда ифода этади:

*Кўнглумга фазо ҳарими ишқ эт,
Жонимға гизо насими ишқ эт!*

*Ишқ исидин эт дамимни мушкин,
Ишқ ўтидин эт юзумни рангин!*

*Лайли ишқин танимда жон қил,
Лайли шавқин рагимда қон қил!
Дардини нажотим эт, илоҳи,
Ёдини қаётим эт, илоҳи!*

*Кун юзини айладинг мушаккал,
Тун кўзини айладинг мукаҳҳал.*

Келтирилган байтлардаги айрим жуфтликлар (кўнгил-жон, ис-ўт, дам-юз, тан-раг)да равийнинг йўқлиги мумтоз қоғия қоидаларига мувофиқ бўлмаса-да, улардаги кўшимчалар ҳисобига юзага келаётган оҳангдошлиқ байтларда Т. санъати мавжуд дейишга имкон беради. Шунингдек, байтлардаги барча сўзларда вазндошлиқ кузатилгани учун, уларни мувозана (қ.) санъатига ҳам мисол қилиш мумкин.

ТАСБЕЙ (ар. **تصبيع** – бармоқ билан кўрсатиш) – мумтоз адабиётдаги шеърий санъат, байтнинг биринчи мисраси қайси сўз билан тугаса, кейинги мисрани шу сўз билан бошлаш, тақрор турларидан бири. Биринчи мисра охирида ва иккинчи мисра бошида тақрорла наётган сўз шоир фикрини таъкидлаш, маънони кучайтириш вазифаларини ўтайди. Mac., Навоийнинг:

*Йўқ демаким, ул қуёш ёдида фарёд айламон,
Айламон фарёдким, гардунни барбод айламон, –*

байтида такрорланаётган «айламон» сўзи Т.ни юзага келтирмоқда.

ТАСВИР (ар. *صورة* – тасвирлаш, бирор нарсанинг суратини солиш) – бадий воситалар ёрдамида воқеликдаги нарса-ҳодисаларни ўқувчи (томушабин) бевосита ва яхлит ҳолда, уларга хос индивидуал-бетакрор хусусиятлар билан бирликда конкрет ҳис эта оладиган тарзда акс эттириш. Гарчи моҳиятан Т. термини *тасвирий санъатга* хос бўлса-да, уни бошқа санъат турларига нисбатан, хусусан, бадий адабиётга татбиқан қўллаш ҳам ўринлидир. Бадий адабиётда Т. сўз воситасида амалга-оширилади, шунга кўра, *тасвирий санъатдан* фарқли ўлароқ, адабий асарда тасвирланган нарса-ҳодиса «ички кўз» билан кўрилади: сўз воситасида ўша нарса-ҳодиса чизгилари муайян кетма-кетлиқда қайд этилади ва охир-оқибатда тасаввурда унинг Т.и – сурати жонланади. Тасвирий санъатнинг, айниқса, адабиёт сингари динамик тасвирий санъат саналувчи кинонинг ривожланиши, санъат турлариaro алоқа ва таъсир жараёнининг мавжудлиги, ўқувчиларда эстетик объектни кўриш орқали қабул/қилиш имконларининг кенгайгани бадий адабиётдаги Т.ни сифат жиҳатидан ўзгартириб, имкониятларни кенгайтирди. Замонавий адабиётнинг Т. имкониятлари кенгайгани ҳозирда адабий асар таҳлилида *нуқтаи назар, перспектива, ракурс, йирик план, умумий план* каби терминлар тобора кенг қўлланаётганида ҳам кўринади. Бу эса ҳозирда *тасифнинг* ичida ва унинг бир сифат кўриниши деб тушуниладиган Т.га вақти келиб алоҳида композицион унсур сифатида қаралиши мумкинлигини кўрсатади.

ТАТАББУЬ (ар. *طبع* – бирор нарсанинг кетидан тушиш, изидан бориб текшириш) – қаранг: назира

ТАФРЕЙ (ар. *طبع* – тармоқланиш, шохлаш) – мумтоз адабиётдаги шеърий санъат, реал нарса-ҳодиса, ҳолат кабиларни инкор қилган ҳолда бошқа нарса-ҳодиса, ҳолатга ўхшатиш. Моҳиятан Т. ҳусни таълил (қ.) санъатига жуда яқин туради. Уларнинг фарқи шундан иборатки, ҳусни таълилда шоир табиий ҳолатга нотабий, шоирона сабаб кўрсатишга ҳаракат қиласи, Т.да эса бир нарсани бошқа бир нарса сифатида кўрсатиб, шу ҳолатни исботлашга уринади, бошқача айтсак, шоир ўз фикрида қатъий туриб олади. Мас., Навоий машхур:

*Лолазор эрмаски, охимдин жаҳонга тушди ўт,
Йўқ шафақким, бир қироқдин осмонга тушди ўт, –*

байтида худди шундай йўл тутади: кенг лолазор ва қизарип турган уфқни «қўриниб турган кенглик лолазор эмас, менинг охимдан жаҳонга ўт тушди ва шунинг учун у қип-қизил олов ичидаги қолди, кўкда қизарип кўринаётган нарса ҳам шафақ эмас, ўша охимдан жаҳонга тушган ўт энди бир тарафдан кўкка ўрламоқда» дейди.

ТАФРИТ (ар. تفریط – ўтказиб юбориш, сусткашлик қилиш) – қаранг: **муболага**

ТАФСИР (ар. تفسیر – шарҳ, изоҳ) – мумтоз адабиётдаги шеърий санъат, байт аввалида мавхумроқ тарзда айтилган фикрни байт давомида батағсил тушунтириб бериш; илми бадиъга оид манбаларда табийин деб ҳам юритилади. Яъни шоир гўё ўзи айтган фикр қандайдир ноаниқ, тушунарсиз эканини ҳис қиласи ва уни изоҳлаш, шарҳлашга эҳтиёж сезади, гўё ўкувчига мавхум бўлиб қолаётган ма-салса тушунтирилиб, тафсир қилинади. Мас., Навоийнинг:

*Равзада кавсар қирогинда хаёл эттим Билол,
Юз аро лаб, лаб уза шабранг холингни кўруб, –*

байти биринчи мисрасида шоир хаёлига кавсар қирғогида ўтирган Билол келганини айтиб, кейинги мисрада бунинг сабабини изоҳлади, яъни ёрнинг юзи жаннатни, лаби кавсарни, холи эса Билолни хаёлига көлтирганини айтади. Э.Воҳидовнинг:

*Уч балодан сақласин, чархи балокаш бўлмасин,
Дўст меҳрсиз, дардсиз улфат, ёр жафокаш бўлмасин, –*

байтида эса аввал «уч балодан сақласин» деган истак ифода этилади, кейин «уч бало» деганда нималар назарда тутилаётгани шарҳланади. Аввалида мавхум ифодаланган «уч бало» «меҳрсиз дўст», «дардсиз улфат» ва «жафокаш ёр» тарзида конкретлаштирилади. Айрим манбаларда Т. доираси бир байт билан чегараланмасдан, бир байтдаги мавхумлик кейинги байтда изоҳланиши мумкинлиги ҳам эътироф этилади.

ТАХМИС (ар. نحیص – бешлик қилиш) – қаранг: **мухаммас**

ТАШБЕҲ (ар. تشبیه – ўхшатиш) – мумтоз адабиётдаги шеърий

санъат, икки нарса ва тушунча, ҳаракат ёки ҳолат ва ш.к.ларни бир-бирига ўхшатиш, қиёслаш. Адабиётда, хусусан, шеъриятда энг кенг тарқалган ва қадимий санъатлардан бири. Т.нинг юзага келишида икки нарса-тушунча, икки ҳаракат ва ҳолат орасидаги ўхшашилик асос бўлади. Ўхшатиш учун ҳақиқий, реал ҳаётий нарса-буюмлар танланган бўлса, ҳақиқий Т., ноаниқ, мавҳум нарсалар танланган бўлса, мажозий Т. юзага келади. Т. санъати тўрт жузв орқали юзага келади: *мушаббиҳ, мушаббиҳун бих, важҳи шабиҳ, воситай ташбиҳ.*

Мушаббиҳ (ёки мушаббаҳ) – ўхшатилаётган нарса. Тушунтириш учун «ой каби гўзал юз» Т.и мисол қилиб олинса, унда «юз» мушаббиҳдир. Мушаббиҳун бих (ёки мушаббаҳ бих) эса ўхшаётган нарса, мисолимизда «ой» мушаббиҳун бих бўлади. Важҳи шабиҳ (ёки важҳи шибҳ) – ўхшатилиш сабаби, яъни икки нарса-тушунчани бир-бирига ўхшатиш асоси, «ой каби гўзал юз»да юз билан ой гўзалик важидан ўхшатилаёттир. Воситай ташбиҳ (ёки одоти ташбиҳ) – ўхшатицли конструкциядаги грамматик восита, мисолимизда «каби» кўмакчиси ўхшатиш воситасидир.

Т.нинг юзага келишида мазкур унсурларнинг барчаси иштирок этиши ҳам, улардан айримлари иштирок этмаслиги ҳам мумкин. Mac. Бобурнинг:

Ё қошинг янглиғ эгилган жисми зоримниму дей?
Ё сочингдек тийра бўлған рўзгоримниму дей? –

байти ҳар иккала мисрасида ҳам барча унсурлари мавжуд бўлган Т. кўлланган: биринчи мисрада «қош» – мушаббиҳ, «янглиғ» – воситай ташбиҳ, «эгилган» – важҳи шабиҳ, «жисм» – мушаббиҳун бих; иккинчи мисрада «соч» – мушаббиҳ, -дек – воситай ташбиҳ, «тийра» – важҳи шабиҳ, «рўзгор» – мушаббиҳун бих. Т.нинг бу тури, яъни тўртала унсур ҳам қатнашган кўриниши *ташбехи муфассал* дейилади.

Илми бадиъга оид адабиётларда Т. тузилиши (юқоридаги унсурларнинг иштироки), қиёсланаётган нарса-тушунчалар орасидаги ўхшашилик даражасига кўра, яна бир қанча турларга бўлиниади. Уларда тасниф билан боғлиқ турличаликлар бўлса ҳам, Т.нинг кўпчилик томонидан эътироф этилган турлари сифатида куйидагиларни санаш мумкин: *T.и мужмал* (қ.), *T.и мояққад* (қ.), *T.и мутлақ* (қ.), *T.и киноят* (қ.), *T.и машрут* (қ.), *T.и тасвият* (қ.).

T.и акс (к.), T.и измор (к.), T.и тафзил (к.), T.и мусалсал (к.), T.и мўъқад (к.)

ТАШБЕХИ АКС (ар. **تشبيه عکس** – тескари ўхшатиш) – ташбех турларидан бири, аввал бир нарса иккинчи бир нарсага ўхшатилади, сўнг бунинг акси амалга оширилади, яъни иккинчи нарса биринчи нарсага ўхшатилади. Бошқача айтилса, Т.а.да аввал мушаббих бўлган сўз кейин мушаббиҳун биҳ, мушаббиҳун биҳ бўлгани эса мушаббиҳга айланади. Мас., Навоийнинг қуидаги:

*Юзунг қуёшли экин ё қуёш юзунгми экин
Ки, қайси, қайси экан фарқ эмас, нечукки эгиз, –*

байтида аввал юз қуёшга, кейин эса қуёш юзга ўхшатилади, яъни «юз» биринчи ҳолда мушаббих бўлса, кейингисида мушаббиҳун биҳга айланади.

ТАШБЕХИ ИЗМОР (ар. **تضليل اضمار** – яширин ўхшатиш) – ташбех турларидан бири бўлиб, бунда, зоҳиран қаралса, шоир ўхшатишни мақсад қилмагандек туюлади, ҳақиқатда эса унинг мақсади ўхшатиш бўлади. Бошқача айтсан, Т.и. *ташбехи мутлақ-нинг* (к.) тамом зиддидир, унда бир нарсанинг иккинчи нарсага ўхшатилаётгани ҳақида ҳеч бир ишора бўлмайди; *ташбехи мояққаддан* (к.) фарқли равища, Т.и.да мушаббих ва мушаббиҳун биҳ синтактик бирлик (гул юз, сарв қад каби) ҳосил қилмайди; ниҳоят, Т.и. ҳамиша ифодадаги бошқа бир мақсад билан гўё пардаланади. Шулардан келиб чиқиб мумтоз шеъриятдаги *таажжуб, тажоҳул ул-ориф, ҳусни таълил* каби санъатлар ўхшатиш асосида воқе бўлган ҳолларнинг барида Т.и. мавжуд бўлади дейиш мумкин. Мас., *тажоҳул ул-ориф санъати қўлланган* қуидаги:

*Тун яримда кун туғурди ёки бөпарво чиқиб,
Зулф аросидин юзини ойга кўрсатганмукин, –*

байтида, зоҳиран қараганда, шоирнинг муддаоси ўзини ҳайрону бехабар қилиб кўрсатишдек кўринса ҳам, аслида, мақсади ёр зулфини тунга, юзини кунга ўхшатишдир.

ТАШБЕХИ КИНОЯТ (ар. **تضليل کنایہ** – кўчимли ўхшатиш) – ташбех турларидан бири, тўрт унсурдан фақат мушаббиҳун биҳ иштирок этувчи ташбех. Яъни Т.к.да мушаббих, *воситаи ташбих* ва важҳи

шабих тушириб қолдирилади, мушаббихун биҳ эса мушаббих маъносида, яъни кўчма маънода ишлатилади. Моҳиятан, Т.к. истиорадан фарқланмайди. Mac., Навоийнинг:

Оташин лаълидурким, анда музмар бўлди жон,
Оташин гулбаргидан хилъатки жононимдадур, –

байтида «лаъл» сўзи кўчма маънода қўлланиб, «лаб» маъносини билдиради.

ТАШБЕХИ МАШРУТ (ар. شبيه مشروط – шартланган ўхшатиш) – ташбех турларидан бири, нарса-ҳодисани бошқа нарса-ҳодисага маълум бир шарт билан ўхшатиш. Яъни Т.м.нинг юзага чиқиши учун аввал ўша шарт бажарилиши лозим бўлади. Mac.:

Эй Навоий, дурри назминг хутбадек топқай шараф,
Лутф ила қилса назар байрам куни султон анга, –

мақтасида Навоий ўзининг шеърлари хутбадек шараф топишини айтади, бироқ бунинг учун султоннинг уларга «лутф ила» назар солиши шарт қилиб қўйилади. Ёки бошқа бир байтда Навоий:

Ҳалол она сутидекдур гар ўзбаким тутса,
Тобук қилиб юкунуб тўстагон ичинда қимиз, –

дейдики, қимиз «она сутидек» ҳалол бўлиши учун уни «ўзбаким тутиши» шарт қилиб қўйилмоқда.

ТАШБЕХИ МУЖМАЛ (ар. شبيه مجمل – ноаниқ ўхшатиш, ўхшатилиш сабаби номаълум) – ташбех турларидан бири, ёажҳи шабих тушириб қолдирилган ташбех. Mac., Навоийнинг:

Кўрди то сарв қаду гулдек юзунгни боғбон,
Гулшан ичра қилмади шамшод ила сунбул ҳавас, –

байтидаги «гулдек юз» ташбехида тўрт унсурдан учтаси бор: «гул» – мушаббихун биҳ, «юз» – мушаббих, -дек – воситаи ташбих, лекин «гул» билан «юз»нинг ўхшатилиш сабаби айтилмаган, важҳи шабих тушириб қолдирилган.

ТАШБЕХИ МУСАЛСАЛ (ар. شبيه مسلسل – кетма-кет ўхшатиш) –

ташбек турларидан бири, бир нарсаны бир нәча нарсага кетма-кет ўхшатиш. Яъни бунда шоир бир нарса (мушаббих)ни бир пайтнинг ўзида кетма-кет бир нәча нарса (мушаббихун биҳ)га ўхшатади. Мас., Сайфи Саройнинг:

*Сўзунг дурру жавоҳирдур кўнгуллар ганжина лойиқ,
На лойиқ? Лойиқи хисрав. На хисрав? Хисрави кишвар, –*

байтида сўз аввал дурга, кейин жавоҳирга, Атойининг:

*Эй лаблари шаҳду шакару Миср наботи,
Юсуф киби ширин ҳаракату саканоти, –*

байтида ёр лаблари асал (шаҳд), шакар ва Миср новвотига кетма-кет ўхшатилмоқда. Т.м. кўпинча тажоҳул ул-ориф санъати билан қоришиқ ҳолда учрайди, зеро, мазкур санъат аксар ҳолларда Т.м. асосида юзага чиқади. Буни Атойининг куйидаги байтида кўриш мумкин:

*Сочму ё сунбулму ё ганж устида ётур илон,
Ё келибдур Рум элига Чину Мочин лашкари?*

ТАШБЕХИ МУТЛАҚ (ар. تشبیه مطلق – очиқ ўхшатиш) – ташбех турларидан бири. Т.м. манбаларда *ташбехи сарих* деб ҳам юритиладики, аслида, шу ном моҳиятни аниқроқ ифода этади. Зеро, сарих сўзи луғатда «очик, ошкор, равшан, аниқ» маъноларини ифодалайди. Т.м.да мушаббих ва мушаббихун биҳ орасидаги муносабатни белгиловчи воситай ташбек (каби, сингари, худди, янглиг, гўё, -дек, -дай ва б.)нинг бўлиши шарт ва худди шу ҳол икки нарса-тушунчанинг бир-бирига ўхшатилаётганини аниқ билдириб туради. Мас., Лутфийнинг:

*Пистадек оғзинга шакар дөдилар,
Ғайб сирин не муҳтасар дөдилар, –*

байтида -дек қўшимчаси оғизнинг пистага ўхшатилаётганини ошкор билдириб туради.

ТАШБЕХИ МУФАССАЛ (ар. تشبیه مفصل – тўлиқ ўхшатиш) – қаранг: **ташбек**

ТАШБЕХИ МУЯҚҚАД (ар. شبيه موكد – ноаник ўхшатиш) – ташбех турларидан бири, таркибида фақат мушаббих ва мушаббиҳун биҳ иштирок этган ташбех. Mac., Бобурнинг:

Ҳазон япроғи янглиғ гул юзинг ҳажрида сарғардим,
Кўриб раҳм айлагил, эй лоларух, бу чөхраи зардим, –

байтидаги «гул юзинг» ташбехида тўрт унсурдан иккитаси («гул» – мушаббиҳун биҳ, «юз» – мушаббих) бор, лекин унда *воситаи ташбиҳ* билан важҳи шабиҳ тушириб қолдирилган: ўхшатиш грамматик воситаларсиз амалган оширилган, ўхшатиш асоси кўрсатилган эмас.

ТАШБЕХИ МЎЪКАД (ар. شبيه موکد – таъкидли ўхшатиш) – ташбех турларидан бири. Т.м. тузилишига кўра *ташбехи мояққадга* яқин: унда ҳам фақат мушаббих ва мушаббиҳун биҳ иштирок этади, фақат фарқи шуки, бунда мушаббих эга, мушаббиҳун биҳ эса от кесим вазифасида бўлади. Яъни кесим вазифасидаги мушаббиҳун биҳ мушаббих ҳакидаги ҳукмни таъкидлайди. Т.м. таркибидаги мушаббих ҳам, мушаббиҳун биҳ ҳам биргина сўз ёки сўз бирикмаси билан ифодаланиши мумкин. Mac., Навоийнинг:

Чуғз бўлмиш ганжи васлинг шавқидин кўнглум қуши,
Заҳми кўп кўнглум уйи ул чуғзнинг вайронидур, –

байтида «кўнглум уйи» – мушаббих эга бўлса, «чуғз вайронаси» – мушаббиҳун биҳ кесим вазифасидадир.

ТАШБЕХИ ТАФЗИЛ (ар. شبيه تفضیل – чекиниш йўли билан ўхшатиш) – мумтоз адабиётдаги шеърий санъат, ташбех турларидан бири. Шоир бир нарсани иккинчи бир нарсага ўхшатиб, сўнг бу фикридан қайтади-да, ўхшатилмиш (мушаббих)ни ўхшаётган нарса (мушаббиҳун биҳ)дан устун қўяди. Яъни «юзингни қуёшга ўхшатай десам, қуёшнинг заволи бор, юзинг эса безаволдир» каби. Mac., Бобурнинг:

Такаллуф ҳар неча суратда бўлса андин ортуқсен,
Сени жон дерлар, аммо бетакаллуф жондин ортуқсен, –

байтида аввал ёрнинг ўзгалар томонидан жонга ўхшатилиши эътироф этилиб, сўнг ёрнинг жондан-да ортиқлиги таъкидланади.

ТАШХИС (ар. شاشقىش – шахслантириш) – мумтоз адабиётдаги шеърий санъат, шахсга хос хусусиятларнинг ҳайвонлар, қушлар, жонсиз нарса-предметларга нисбат берилиши. Яъни Т.да инсонларга хос бўлган ҳис-туйғу, хатти-ҳаракатлар бошқа мавжудотларга ёки жонсиз нарсаларга кўчирилади. Бироқ бу кўчириш механик тарзда ёки шунчаки ўйлаб топилган бўлмай, муайян мантикий асосга эгадир. Бошқача айтсан, кўчирилаётган инсонга хос хусусиятлар билан ҳайвонлар, қушлар, ўсимликлар ёки бошқа жонсиз нарсаларнинг айрим жихатлари орасида ўхшашик, муштаракликлар кузатилади. Мас., «ёмғир ёғиши» инсоннинг кўзёш қилишига монанд, шунинг учун метафорик асосда «булутлар кўзёш тўқди» дейиш маълум мантикий асосга эга бўлади. Жалолиддин Румийнинг куйидаги рубоийсида Т. санъати маҳорат билан қўлланган:

Рухсорингдан рангин ўғирлабди гул,
Йўлтўсардек дорга осилмиш кокил.
Қанча нола қилди фойда бўлмади,
Фарахбахш бўйингдан жон олди булбул.

Рубоийдаги гулнинг ёр рухсоридан ранг ўғирлаши, кокилнинг дорга осилиши, булбулнинг нола қилишию жон олиши – булар бари инсонга хос хусусиятларнинг гул, кокил ва булбулга кўчирилиши на-тижасида воқе бўлган Т.дир. Бунда гул ранги билан ёр рухсорининг ранги, кокилнинг осилиб туриши билан дорда йўлтўсарнинг осилиб туриши, булбулнинг сайраши билан инсоннинг нола қилиши ўртасида ўхшашик борлиги Т. нинг юзага келишига мантикий асос бўлган.

ТАЪДИЛ (ар. تۈرىپلىك – тўғриламок) – мумтоз адабиётдаги шеърий санъат, бир байт таркибида бир неча содда отларнинг маълум тартибда саналиши. Мас., Машрабнинг:

*Малаксан ё башар, ё ҳуру ғилмонсан, билиб бўлмас,
Бу лутфу, бу назокат бирла сөндин айрилиб бўлмас, –*

байти Т.га яхши мисол бўла олади.

ТАЪРИЗ (ар. تۈرىپچىك – киноя билан сўзлаш, эътиroz билдириш) – мумтоз адабиётдаги шеърий санъат, бирор кишини олқиши сўзлар, дабдабали мақтов орқали ҳажв қилиш. Яъни зоҳирлан шоир бировни мақтаётгандай кўринса-да, асл муддао унинг кирдикорларини фош қилиш, кесатиш, киноя бўлади. Мас., Завқийнинг:

**Хўқандлик, андижонлик, Ўротепа мардумин
Бир қурашда ийқитти, полвон экан Бектурбой, –**

байтида Бектурбой (Виктор) бир қурашда полвон сифати билан мақталаётгандай қўринса-да, аслида, хўқандлик, андижонлик, ўратепалик савдогарларни боплаб алдаб кетган фирибгар сифатида таърифланади.

ТАЪРИХ ёки ТАРИХ (ар. حَدِيثٌ – ўтмиш) – муҳим тарихий саналар (улуг кишиларнинг таваллуд ва вафот йиллари, мӯҳим ижтимоий-сиёсий воқеаларнинг юз бериш, асарнинг ёзилиш, бинонинг қурилиш вақти ва ш.к.)ни абжад ҳисоби (к.) ёрдамида қайд этиш. Шарқ мумтоз шеъриятида Т., одатда, шеърий йўл билан, кўпроқ байт ичидаги қайд қилинган. Байт таркибида керакли санага ишора қилаётган ҳарф, сўз ёки сўз бирикмаси «Т. моддаси» деб юритилади. Мумтоз адабиётшуносликка оид манбаларда Т. гоҳ бадиий санъат, гоҳ эса жанр сифатида кўрсатиб келинадики, бу хил турличалик муайян асосга эга. Чунки Т. мумтоз жанрлар (достон, қасида, марсия, рубойи, қитъа ва б.) таркибидаги байтларда берилиши ҳам, маълум бир санани қайд этиш учун алоҳида байт (мас., бирор бино пештоқига битиш учун) сифатида маҳсус ёзилиши ҳам мумкин. Иккинчи томондан, айрим Т.лардан кўзланган муддао муайян санани қайд этиш билан чекланса, бошқаларида буни санъаткорона маҳорат билан амалга оширишга интилиш кузатилади. Мас., «Юсуф ва Зулайхонаги»даги:

*Зод эди тарих тақи ҳею дол,
Муддати ҳимратдин ўтиб моҳи сол, –*

байтида Т. ҳарфларни оддийгина қайд этиш билан чекланади. Бунда зод (800), ҳе (8) ва дол (4) ҳарфлари ифодаловчи рақамлар йигиндисидан достон ҳижрий 812 йилда ёзилгани аён бўлади. Албатта, бу байтдаги Т.ни санъат аталса, бироз зўракилик бўлади. Лекин Т.нинг шундай намуналари борки, уларни санъат ҳисоблаш жоиз. Мас., Навоий золим амалдорлардан бири, Мозандаронда қатл этилиб, калласи Ҳиротга олиб келинган Мұхаммад Амин вафоти Т.ни қуйидагича ифодалайди:

*Золимero кушта сўйи шаҳр овардан дар,
Ончи овардан д қатлашро ҳамон таърих буд.*

Таржимаси: Золимни ўлдириб, бошини шаҳарга олиб келдилар, нимаики олиб келган бўлсалар, ўша унинг тарихидир. Байтда воқеа тарихига «шашарга золимнинг бошини олиб келдилар» жумласи орқали ишора қилинмоқда. Бундан мурод эса «золим» (ظلم) нинг боши, яъни «зе» (ڦ) ҳарфидир. У абжад ҳисоби бўйича 900 га тенг. Демак, Муҳаммад Аминнинг қатл этилиши ҳижрий 900, ми-лодий 1495 йилга тўғри келади. Т.ни бу каби санъаткорлик билан ифодалаш учун катта маҳорат талаб этилади. Зеро, бу ўринда шоир байт таркибиға киритаётган сўз ёки жумла мазмунга мос бўлиши билан бирга абжад ҳисоби бўйича керакли рақамга тенг келиши ҳам зарур. Шунингдек, бу йўсун битилган Т.ларда ишора қилинаётган рақамни аниқлаш учун ўкувчидан худди муаммода яширган сўзни топишдаги каби ўткир зеҳн, топқирлик талаб этилади.

ТАЪСИС (ар. تاسیس – асослаш) – қаранг: **муқайяд қофия**

ТАҚЛИД (ар. تقلید – эргаштириш, ўхшатиш) – адабиётда ўзигача мавжуд бўлган асар хусусиятларини қайта яратиш, ижод амалиётида у ёки бу санъаткорга эргашиб тарзида намоён бўлувчи ҳодиса. Адабиётшуносликда Т. ва *тақлидчилликка* нисбатан кўпроқ салбий муносабат кузатилса-да, булар адабий жараёнда табиий равища мавжуд ҳодиса бўлиб, турли омиллар (ворисийлик қонунияти, адабий-эстетик қарашлар муштараклиги, ижодий ўрганиш) натижаси ўлароқ юзага келади. Ворисийлик қонунияти асосидаги Т. адабиёт тараққиётининг анъана таъсири устувор бўлган босқичларида (традиционализм босқичи, Ғарб адабиётида XVIII асрларга) кенг кузатилади: бунда анъанавий тарзда этalon деб қабул қилинган асарларга Т. қилиш одатий ҳолгина эмас, маълум даражада ижодкорга қўйилувчи талаблардан бири (қ. *классицизм*) бўлиб, маълум сюжетлар, образларга қайта-қайта мурожаат қилиниши одатий эди. Худди шунга ўхшаш ҳол Шарқ адабиётида ҳам кузатилади (мас., ҳамсачилик анъанаси, ғазалчиликдаги поэтик образ, лирик ҳолатлар ва б.). Бироқ буни Т. объектига, гарчи унинг кўплаб хусусиятлари сақлаб қолинсада, кўр-кўрона эргашиб деб тушунмаслик керак, зеро, у аввалдан мавжуд образ, сюжет мотивларининг анъана доирасида янгиланган бадий талқинини тақозо этади. Бадий ижодда индивидуалликнинг аҳамияти ортиб бориши баробарида, Т. қилинаётган асар билан унинг асосида яратилган асар орасидаги фарқ очиқ кўзга ташланмайдиган, мос равища Т.га муносабат ҳам салбийлашиб бориши кузатилади. Мас., ҳозирги ўзбек насрода кузатилувчи Ғарб модерн ада-

биётига эргашиш ҳолларига аксарият мутахассислар хушламайрек қарайдилар. Ҳолбуки, бу Т. адабий-эстетик қараашлар муштараклиги маҳсули бўлиб, Ғарб адабиётида қарийб бир асрдан зиёд муқаддам бошланган изланишлар бизда энди-энди кузатилмоқда, зоро, шундай адабий-эстетик қараашларнинг шаклланишига замин бўла оладиган, шундай асарларга эҳтиёж түғдирадиган шароит бизда бирмунча көчроқ етилди. Яъни бунда Т. унсурлари бўлган чокда ҳам кўр-кўрона эмас, аксинча, ижодий ўзлаштириш бўлиб, ёш адилларнинг миллий ҳаётимизни ғарблик ҳамкаслари тажрибасини ижодий ўзлаштирган ҳолда идрок этишга интилишидир. Шу билан бирга, бу ҳодисага умумий баҳо бўлиб, унинг ичидаги салбий баҳога лойик, кўр-кўрона Т. унсурлари мутлақо йўқ дегани эмас. Ҳар қандай ижодкор фаолиятининг илк босқичи Т.дан холи эмас, бунинг омили ўрганиш истагидир. Ҳатто улкан истеъоддлар ҳам ижодининг аввалида салафларидан ўрганиади, уларнинг тажрибаларини ўзига сингдириб, онгию қалбидагайта ишлаб, ўзиникига айлантириши ва шу асно ўз ижодий индивидуаллигини шакллантириши учун маълум вақт керак. Мас., улуғ адабимиз А. Қаҳҳор ҳикояларида Чехов, Гоголь асарларига, илк романи «Сароб»да Ж. Лондонга; А. Ориповнинг илк ижодида эса Пушкин, Лермонтов, Ғ. Ғуломларга Т. унсурлари сезилиб турди. Муҳими, уларнинг ўрганиш босқичида ёки ижодий ёндашув, ўз йўлини топиш ва ўз сўзини айтишга интилиш кузатиладики, шу нарса уларнинг салафлардан самарали сабоқ олиши ва кейинчалик бетакрор индивидуаллик касб этишларига асос бўлди. Сираси, истеъодд кучи ўрганиш босқичини ижодий ёндашган ҳолда ва нечоғлик тез, самарали босиб ўта олишда намоён бўладики, сабоқни қурук «ёд олган»лар юксак чўққиларни асло забт этолмайди. Ижодий ёндашувдан мосуво Т. эса асло истеъодддан эмас, графоманлик (к.) дардига йўлиқканликдан, элигонликдангина (к.) дарак беради.

ТАҚСИР (ар. تڪسِير – камчилик кўрсатиш) – мумтоз адабиётдаги шеърий санъат, фахрияning акси. Яъни фахриядаги шоир ўзини юксак баҳоласа, Т.да кусурларини (осий, оми, укувсиз, девона ва ш.к.) эътироф этган ҳолда ўзини паст олади. Мас., Ҳувайдонинг:

*Девона Ҳувайдосан, помоли халойиқ бўл,
Кўп төпмагунча бу лой, чинни бўлори йўқтур, –*

байтида Т. санъати тамсил санъати билан қоришиқ ҳолда юзага чиқади: шоирнинг ўзини «девона», «помоли халойиқ» дейиши

Т. бўлса, ишлатилган тамсил (лой кўп тепкиланиб чинни бўлиши) камтар, хокисор бўлишнинг афзаллигини таъкидлашга хизмат қиласи.

ТАҚТИЙ (ар. تقطیع – кесиш) – арузда ёзилган байтни ритмик бўлакларга, руқнга тенг қисмларга бўлиш, мисралардаги маълум тартибда жойлашган мутаҳаррик ва сокин ҳарфларни гурухлаш. Т. қилиш орқали байтнинг баҳри аниқланади. Ҳозирги арузшуносликда мисраларни чўзиқ ва қисқа ҳижоларга ажратиш орқали гурухлаш усули кенг тарқалган. Байтдаги ҳар бир мисранинг бир руқнга тенг қисми, яъни Т.си алоҳида ном билан юритилади: биринчи мисранинг биринчи Т.си садр, охирги Т.си аruz (ёки ажуз), иккинчи мисранинг биринчи Т.си ибтидо, охирги Т.си зарб, садр ва ажуз, ибтидо ва зарблар орасидаги Т.лар ҳашв деб аталади. Мас., Навоийнинг қўйидаги байтида Т.лар мазкур кўринишида жойлашган:

садр ҳашв ҳашв ажуз

Хилъатин то / айламиш жо / нон қизил, со / риғ, яшил,
– V – – / – V – – / – V – – / – V –

фоилотун фоилотун фоилотун фоилун
ибтидо ҳашв ҳашв зарб

Шульай о / ҳим чиқар ҳар / ён қизил, со / риғ, яшил.
– V – – / – V – – / – V – – / – V –

фоилотун фоилотун фоилотун фоилун

Байт Т.ларга ажратилгач, унданги руқнлар сони, зихофга учраган ёки учрамаганига қараб турлича номланади. Юқоридаги байт фоилотун руқнининг саккиз марта тақрорланиши ва мисралар сўнгида руқнининг ҳазф зихофиға учраши кўринишида шакланган, шундан келиб чиқиб байт вазни *рамали мусаммани маҳзуф* деб номланади. Агар байтда руқн олти марта тақрорланса, унданги ҳашвлар сони иккита бўлади, тўрт марта тақрорланса, байтда ҳашв иштирок этмайди. Мас., Навоийнинг қўйидаги байтида руқн олти марта тақрорланган:

садр ҳашв ажуз

Бизинг шайдо / кўнгул бечо / ра бўлмиш,
V – – – / V – – – / V – –

мафоийлун мафоийлун фаулун
ибтидо ҳашв зарб

Малолат даш / тида ово / ра бўлмиш.

V --- / V --- / V --

мафоийлун мафоийлун фаулун

Байтда мафоийлун руқни олти марта тақоррланмоқда ва мисра охиридаги руқни ҳазғұрынан анықталған. Шундан келиб чиқиб байт вазни ҳазажи мусаддаси маңзұф деб номланади.

ТЕКСТ (лат. *textus* – мато, түкима, матн) – 1) ёзувда қайд этиб қүйилған нутқ, термин бу маңносиде оғзаки нутққа қарши қүйилади; 2) нутқий асар, жумладан, адабий асарнинг ёзма (харфлар) ёки оғзаки (товушлар) белгилар воситасида қайд этилған конкрет-хиссий (қүриш ё эшитиш) қабул қылышадиган томони. Бу маңнодаги Т. матншуносликнинг обьекти саналади; 3) нутқий коммуникация-нинг нисбий бутунлик, яхлитлик касб эттан ва нисбий автономлик, алоқидалил хүсусиятига зәғәрәткіштік көрсеткіштік болады. Бу маңнодаги Т.нинг мазмуну уни ташкил қилаётгандын нутқ бир-ликтары, уларнинг ўзаро алоқалари билангина чекланиб қолмайды. Бутун сифатида у муаллиф томонидан муайян нутқий ситуация-да яратылған, унинг бутун сифатидаги мазмун-моҳияти ўзидан ташқаридаги реаллик билан боғлиқ ҳолда воқе бўлади.

ТЕКСТОЛОГИЯ – қаранг: матншунослик

ТЕМА (юн. *thema* – асосга қўйилған) – қаранг: мавзу

ТЕМАТИКА – тор маңнода муайян асарга қўйилған катта-ки-чик тема (мавзу)лар жами бўлиб, бу ўринда тема (мавзу) ўз ичига «проблема» маңносини ҳам сингдирган бўлади (қ. мавзу). Ҳаётни кенг кўламда акс эттирувчи йирик ҳажмли асарларда бош мавзудан ташқари у билан боғлиқ бўлган бошқа бир қатор тема (мавзу)лар ҳам қўйилади. Одатда, бу мавзулар ўзаро интегратив алоқада бўлиб, улар бир-бирини тўлдиради, бири иккинчисини очишига хизмат қиласади. Мас., «Ўткан кунлар»нинг бош мавзуси *юрт* (*миллат*) *тақдидири* бўлса, уни қўламли тасвирилаш ва теран бадиий идрок этиш учун муҳаббат, шахс эрки, оталар ва болалар *муаммоси*, эскилил *ва янгилик* кураши, *манфаати шахсия* ва *манфаати миллия* му-носабати каби қатор мавзулар ҳам ишланадики, уларнинг жами роман Т.сини ташкил қиласади. Бундан ташқари, Т. термини муайян адиб ижоди, адабий авлод, адабий оқим кабиларга нисбатан ҳам қўлланилиб, уларнинг ижодий фаолиятида асосий ўринни тутган мавзулар жами тушунилади. Мас., жадид адабиётининг Т.си *мил-лат тақдидири*, *маърифат*, *тараққий*, *миллий истиқлол* (пардалан-ған ҳолда) каби мавзуларни ўз ичига олади.

ТЕНДЕНЦИЯ (пот. *tendere* – йўналтириш, интилиш) – тасвирла-наётган воқеа-ҳодисаларга муаллифнинг ғоявий-ҳиссий муносабати, образлар системаси орқали акс этувчи асар проблематикасининг бадиий идрок этилиши ва баҳоланиши. Т. асар проблематикасидан келиб чиқиб танланган ҳаёт материалини муайян мақсадга мос умумлаштирган ва йўналтирган ҳолда бадиий ғояни юзага чиқаради. Аслида, Т. яратилажак асарнинг ғоявий-тематик томонларига ижод жараёнининг илк босқичидан бошлаб фаол таъсир қиласди. Зеро, муаллиф ўзини қийнаётган муаммолар ҳақида маълум даражада шаклланган хуносага эга, шунга кўра, Т. қайси материалнинг танланнишини ҳам муайян даражада белгилайди. Иккинчи томондан, ижодкор ўзи тасвирлаётган нарса-ҳодисаларга мутлақ бетараф мавқеда туриши мумкин эмас. Ижод жараёни учун табиий ва қонуний сана-лувчи бу ҳол Т.нинг ҳамиша мавжуд бўлишини кўрсатади. Шунга қарамай, Т.нинг очиқ-ошкор ифодаланиши *тенденциозликка олиб келиши*, бу эса ғоявий-бадиий жиҳатдан жиддий нуқсонларни келтириб чиқаришини унутмаслик лозим.

ТЕРЦЕТ (итал. *terzetto* – учинчи) – уч мисрали банд шакли бўлиб, унинг учта кўриниши бор: 1) банднинг учала мисраси ҳам ўзаро қофияланади; 2) банднинг 1- ва 2-мисралари ўзаро қофияланаби, учинчиси очиқ қолади; 3) банддаги икки мисра қофияланади, учинчи мисра *терцинадаги* (қ.) каби кейинги банддаги мисралардан бири билан қофияланади. Тор маънода Т. термини сонет таркибидаги уч мисрали бандларни билдиради.

ТЕРЦИНА (итал. *terza rima* – учинчи қофия) – итальян шеъриятидаги уч мисрали бандлардан таркибланган шеър шакли. Т. банд шаклида ёзилган шеър *aba bcb cdc ded...* шаклида, яъни банднинг 1- ва 3-мисралари ўзаро, 2-мисраси эса кейинги банднинг 1- ва 3-мисралари билан қофияланади. Т. шаклида ёзилган шеър (ёки достоннинг боби) битта алоҳида мисра билан якунланиб, у охирги банднинг 2-мисраси билан қофияланади: шу тариқа шеър ритмик-интонацион жиҳатдан тугаллик касб этади. Данте Алигъерининг машхур «Илоҳий комедияси» Т. шаклида яратилган бўлиб, бу асар мазкур банд шаклининг эталонига айланиб қолди.

ТИП (юн. *typos* – нусха, намуна) – бадиий образнинг умумлаштириш даражасига кўра турларидан бири, инсоннинг муайян тарихий давр ва ундаги конкрет ижтимоий мұхитга хос умумий хусусиятларни ўзида жам этган умумлашма образи. Термин адабиётшуносликда икки хил маънода қўлланади. Биринчиси – Т. сўзининг лексик маъ-

носига мос, бунда ўзида инсонга хос муқим феъл-хусусиятни мужас-сам этган образ назарда тутилади. Яъни моҳият зътибори билан бундай образ эмблемага яқинлашади (мас., Шарқ мумтоз адабиётидаги Хотами Тойи; Фарб адабиётида Дон Жуан), бундай образлар, маълум бир феъл-хусусият (саҳийлик, ҳасислик, очкӯзлик, иккиюз-ламачилик ва ш.к.)нинг бөлгисига айланади, уларда шахс индивидуаллиги муҳим эмас. Иккинчи маъносида эса Т. муайян ижтимоий-тарихий шароит, давр ва муҳитга хос муҳим характерли хусусиятларни ўзида намоён этган инсон образини англатади. Реалистик адабиёт инсонни бутун мураккаблиги билан, унда ўз даври ва муҳитига хос умумий ҳамда индивидуал хусусиятларни (қ. *характер*) жам этган ҳолда тасвирлашни кўзда тутади. Шу билан бирга, конкрет асардаги барча образлар бадиий характер даражасига етмайди, қатор образлар характерлар (етакчи персонажлар) учун фон вазифасини ўтайди. Мас., Чўлпоннинг «Кеч» романидаги Мирёкуб, Акбарали, Раззок сўфи ва қисман Зеби образлари бадиий характер даражасида яратилган бўлса, Курвонбиби, Эшонбобо, Нойиб тўра, Пошшахон, Марям кабилар кўпроқ Т., яъни давр ва муҳитга хос умумий хусусиятларни жам этган образлар сифатида кўзга ташланади. Шу жиҳатдан қаралса, шўро даври адабиётшунослигида мавжуд бўлган Т.га характерлиликнинг олий даражаси сифатида қараш, уни характердан юқори қўйишга интилиш тўғри эмас. Бундай қараш адабий Т.ни бироз ўзгача тушуниш натижасида юзага келди. Унга қўра, инсонда унинг ўзигагина хос бетакрор характер хусусиятлари билан бирга ўз даври ва муҳити кишилари учун умумийлик касб этган хусусиятлар ҳам мавжуд, Т.да шу икки жиҳат уйғун акс этиши лозим, бунда индивидуаллик типикликни намоён этиш шакли бўлиб қолиши талаб этилади. Яъни бу-хил қарашда бадиий характер билан Т. орасида фарқ қолмайди, шунинг учун Т.га характерлиликнинг юқори даражаси деб қараш ва шундан келиб чиқиб Павел Власов, Павел Корчагин, Гофир, Йўлчи каби образларни бошқалардан устун қўйиш имкони туғилади. Иккинчи томони, воқеилиқдаги инсон типларини тўғридан-тўғри адабиётта киритиш натижасида, инсон образи жонлиликдан маҳрум бўлиб, схематиклик касб этади ва муайян гояни ифодалаш воситасигина бўлиб қолди. Шўро даври ўзбек адабиётида, айниқса, 30 – 50-йилларда яратилган асарларда ҳаракатланган «бой», «камбағал», «диндор», «большевик», «босмачи», «колхоз фаоли», «кулок» ва ҳ. Т.ларнинг аксариятида шу ҳол кузатиладики, бу нарса ўша асарларнинг ўткинчи ҳодисага айланниб қолишига сабаб бўлди.

ТИПИК – конкрет давр воқалигидаги шарт-шароитлар (тузум, ижтимоий ҳаёт, ижтимоий муносабат шакллари, маданий-маърифий савия, муайян ижтимоий мухит ва ш.к.) билан бөглиқ ҳолда энг күп учрайдиган, муайян даражада нормага айланган воқеа-ходисалар, ҳаёттый ҳолатлар, характер ва ш.к.лар.

ТИПИКЛАШТИРИШ – умумийликнинг индивидуаллаштириш орқали ифода этилиши, конкрет бадиий образ (воқеа-ходиса, ҳаёттый ҳолат, характер ва ш.к.)да муайян даврга хос умумий (типик), характерли хусусиятларни мужассамлаган ҳолда акс эттириш, адабиёт ва санъатдаги воқеликни бадиий идрок этиш принципларидан бири. Агар антик адабиётда воқеликнинг бадиий идроки «табиатга тақлид қилиш» (мимесис), ўрта асрларда символлар воситасида амалга ошган бўлса, реализм босқичига келиб Т. етакчи принципга айланди. Т. адабиётнинг билиш имкониятларини кенгайтирди, чунки у ўзигача мавжуд бўлган тамойилларга хос кучли томонларни бирлаштириш, яъни агар мимесис воқеликдаги хусусий ҳолларга, символлаштириш эса хусусийга кўз юмган ҳолда умумийга ургу берган бўлса, Т. бу иккисини уйғун бирлиқда олишни тақозо этади. Адабиётнинг билиш функциясини устувор билган реализм босқичига келиб Т. олдинги планга чиқди, энди «Типиклаштириш ижоднинг қонунларидан бири, усиз ижоднинг ўзи мавжуд эмас» (В.Г.Белинский) деб қарала бошланди, хуллас, Т. реализмнинг назарий асоси бўлиб қолди. Шўро даври адабиётида, гарчи сўзда ушбу принципнинг етакчилиги зътироф этилса ҳам, ижод амалиётида воқеликнинг ҳақиқатда эмас, балки социалистик реализм талабидан келиб чиқсан ҳолда, мафкура нуқтаи назаридан характерли саналган хусусиятлари умумлаштирилди, бадиий асарлар шу нуқтаи назардан баҳоланди. Бунинг натижасида схематизм Т. деб тушунила бошланди. Таъқидлаш керакки, шўро даври адабиёти социалистик реализм адабиётигина бўлиб қолмади, чунки ҳақиқий санъаткорлар схематизм билан Т.ни фарқлай билдилар, шу принципга таянган ҳолда воқеликни бадиий идрок этишга интилдилар. Хуллас, ҳозирги адабиётшуносликда Т. масаласи бирмунча зътибордан қолгандек кўринса-да, у реализмнинг асосий принципи бўлиб қолаверади.

ТРАГЕДИЯ (юн. tragoidia – эчки қўшиғи) – драматик турнинг учта асосий жанридан бири, жанр сифатида антик даврда шаклланган бўлиб, унинг асосий эстетик белгиси трагикликдир. Т. генетик жиҳатдан маъбуд Диониснинг ўлими ва қайта тирилиши муносабати билан ижро этилган маросим қўшиқларига бориб тақалади. Т.нинг

жанр хусусиятлари трагик конфликт, трагик ҳолат ва трагик қаҳрамон тушунчалари билан белгиланади. Трагик конфликт деганда мөхияттан ечими йўқ, мавжуд шароитда ҳал қилиб бўлмайдиган зиддият тушуниладики, у ҳар вакт қаҳрамон онгидаги кечади. Қадимги Т.ларда конфликт шахс ва тақдири азал ўртасида (мас., «Шоҳ Эдип») кечган бўлса, кейинроқ бу конфликтнинг иккинчи томони ўзгарди: тақдири азал ўрнини энди шахсадан юкори турувчи олий маънавий кучлар (бунда ёзилмаган, бироқ инсон ҳайтини муайян тартибга солувчи маънавий қонун-коидалар, мас., бурч ҳисси кабилар назарда тутипади) эгаллайди. Трагик конфликт асосида юзага келувчи трагик ҳолатнинг мөхияти шундаки, қаҳрамон ташки кучлар билан эмас, ўзи билан ўзи олишади, мана шу олишув оқибати ўлароқ чукур маънавий изтироб, руҳий қийноқларга дучор бўлади. Ўзининг фоже ҳолатида ҳам мақсад сари интилиштик, руҳий изтироблару қийноқларга қобиллик трагик қаҳрамонга хос хусусиятдир. Трагик қаҳрамон қаршисида эркин танлов имконияти мавжуд – у мақсаддан воз кечиши, осон йўлни танлаши мумкин, бироқ у бундай қилмайди, ўзининг жисман ёки маънан ҳалокатга учраши мумкинлигини билган ҳолда ҳам мақсадидан, эътиқодидан қайтмайди. Худди шу асосда трагик қаҳрамоннинг характер кучи, унинг фавқулодда шахслиги намоён бўлади. Мас., «Шоҳ Эдип»даги Эдип юрт бошига келган оғнатнинг сабабчиси ўзи бўлиши мумкинлигини сезганидаёқ тафтишни тўхтатиши, «ёпиклиқ қозон ёпиклигича» қолавериши мумкин эди. Бироқ у – трагик қаҳрамон, чекига тушган изтиробу қийноқлар қадаҳини тубигача сипкоради. Реализм босқичигача яратилган Т.ларда трагик қаҳрамон сифатида кўпроқ мифологик персонажлар, шоҳлар, шаҳзодалар, маликалару саркардаларнинг олингани бежиз эмас, зеро, ўзининг фоже ҳолатини идрок эта олиш, қалбию онгидаги маънавий-руҳий изтиробларни кечира билиш, шунда ҳам руҳан синмай мақсад томон юришга ўртамиёна одамларнинг чоғи келмайди. Шу сабабли адабиётимизда XX аср ўрталарида яратилган Т.нинг жанр талабларига тўла жавоб беришга яроқли «Мирзо Улуғбек», «Жалолиддин Мангуберди» асарларидан бирининг марказига шоҳ, иккинчисининг марказига саркарда чиқарилган. Т.лар жанр проблематикаси нуқтаи назаридан турлича: уларда маънавий-ахлоқий («Шоҳ Эдип», «Қирол Лир»), миллатнинг тарихий тақдири («Жалолиддин Мангуберди») ёки романий проблематика («Мирзо Улуғбек») бадиий талқин қилиниши мумкин. Т. жанри фаоллигини йўқотган, замонавий драматургияда бу жанр деярли ишланмайди,

бироқ трагиклик бадиий адабиётда эстетик белги (қ. бадиийлик модуслари, пафос) сифатида сақланиб қолған.

ТРАГИКЛИК, ТРАГИЗМ (русчадан калька: «трагическое») – воқеликка муносабат тури; бадиийлик модуси. Т. сатира каби, қаҳрамонлик модусининг кейинги даврларда транформацияга учраши натижасида, юзага келган бўлиб, бу жиҳатдан трагизм қаҳрамонликка нисбатан вёртикал, сатирага нисбатан горизонтал параллел қўйилади. Трагик модус қаҳрамони ўз ичидан белгилаган чегаралар унинг учун ташқаридан белгиланган чегаралардан анча кенг бўлиши билан қаҳрамонлик ва сатирик модуслардан фарқланади. Трагизмга хос «мен-оламда» концепциясига кўра, трагик қаҳрамон оламдаги ўзи учун белгиланган ўринга сифмайди, қаҳрамоннинг оламда ўз мавжудлигини тасдиқлашга интилиши олам тартиботига зид-келади, бу эса ташки олам унинг учун белгилаган чегараларни бузиш (трагик хато, трагик айб) билан тенгдир. Шунинг учун трагик конфликт мавжуд шароитда ечими йўқ, көлиштириб бўлмас зиддият дёя таърифланади. Трагик қаҳрамон учун иккита йўл бор: ё ўзлигидан воз кечиш, ё хато ва айб орқали бўлса-да ўзлигини тасдиқлаш. Натижада қаҳрамон ҳатто ҳаётдан кетиш орқали бўлса-да ўз мавжудлигини, ўз тақдирини ўзи белгилаш, ўзига белгиланган чегараларни кенгайтириш истагини намойиш қиласи (Эдипнинг маъбуллар ҳукмини кутиб ўтирмай ўз-ўзига жазо бериши, Анна Каренинанинг ўлими). Трагик қаҳрамон учун ўз-ўзини тасдиқлаш факат ўзи учунгина мухим бўлиб қолмай, ташки олам унга белгилаган чегараларни ўзгартириш, ўзини ташки олам учун тасдиқлатиб олиш ҳам бирдек заруратга айланади. Шунинг учун трагик қаҳрамон (унинг истаклари, интилишлари) ва унга қарама-қарши турган кучлар (олий дараҗадаги кучлар, умуминсоний қадриятлар, мавжуд шароитда ўзгартиришнинг иложи йўқ бўлган шароит ва б.) ўртасидаги зиддият аксар қаҳрамоннинг ўз ички зиддияти сифатида бўй кўрсатади. Яъни қаҳрамоннинг ўзини борича тасдиқлатиб олиш истаги (ички чегараларига мос мавжудлиги) билан олам тартиботининг бунга имкон бермаслигига иқрорлик қаҳрамон қалбida, руҳиятида тўқнашади (Эдип, Ҳамлет, Анна Каренина). Шунга кўра, трагик қаҳрамоннинг «оламдаги мен»и бартараф қилиб бўлмайдиган иккиланганлик хусусиятига эга бўлиб (Достоевскийнинг «Ака-ука Карамазовлар»ида: Иван Карамазов – Иблис; Н.Отахоновнинг «Оқ бино оқшомлари» хикоясида Ҳафиза – хаёлий дугона), иккинчи томон биринчисини инкор қиласи. Шу жиҳатдан қаҳралса, мавжудликнинг трагик кўринини

ши – сатиранинг зидди: сатирада қаҳрамон ўз-ўзини тасдиқлаш йўлидан боргани ҳолда, пировардида ўзини инкор этишга келса, Т.да ўз-ўзини инкор қилиш моҳиятган ўзини тасдиқлаш демакдир.

ТРАДИЦИЯ (лат. *traditio* – бериб юбормоқ, ўтказмоқ) – қаранг: адабий анъаналар

ТРИЛОГИЯ (юн. *tri* – қўшма сўзлар таркибида уч ва *logos* – сўз, ҳикоя, ривоят) – сюжет-композицион қурилиши жиҳатидан нисбий мустақилликка эга бўлган учта асарнинг умумий персонажларга эгалиги, сюжет чизикларининг давомийлиги, муаллиф ниятининг ягоналиги ва шулардан келиб чиқувчи яхлит концепция туфайли бутунликка бирикувидан ташкил топган асар. Антик адабиётда учта трагедиядан таркиб топувчи туркумлар Т. деб юритилган. Жаҳон адабиёти тарихида драматик асарларни бирлаштирувчи Т.лар ҳам, эпик асарларни бирлаштирувчи Т.лар ҳам кўплаб яратилган. Жумладан, П.Бомарше ижодида комедиялардан («Севильялик сартарош», «Фигаронинг уйланиши», «Айбдор она»), Л.Н.Толстой меросида автобиографик қиссалардан («Болалик», «Ўсмирлик», «Ёшлик») таркиб топган Т.лар мавжуд. Т.нинг ўзбек адабиётидаги намунаси сифатида С.Аҳмаднинг «Уфқ» («Кирқ беш кун», «Хижрон кунларида», «Уфқ бўсағасида») асарини кўрсатиш мумкин.

ТРОП (юн. *tropos* – кўчим) – қаранг: кўчим

ТУГУН (русчадан калька: «завязка») – эпик ва драматик асарлардаги воқеабанд сюжетнинг муҳим унсури, воқеаларнинг бошланишига туртки бўлган воқеа, асар конфликти қўйилган жой. Т. сюжетнинг зарурий элементи саналади, яъни у сюжетда ҳар вақт ҳозирдир. Факат айрим ҳолларда, хусусан, баъзи хроникали сюжетларда, шунингдек, «ички харакат» динамикаси асосидаги сюжетларда у етарлича бўртиб кўринмаслиги мумкин. Т., одатда, асарнинг бошланишида, экспозициядан (агар у бўлса) кейиноқ берилади. Муайян бадиий-эстетик мақсадни кўзда тутган ҳолда Т.нинг ўрни ўзгартирилиши ҳам мумкин. Мас., «Ўткан кунлар» романида Отабек билан Кумушнинг дәфъатан учрашиб қолиши – биринчи бўлим Т.и, бироқ бу воқеа шу бўлим ниҳоясида баён қилинади. Яна бир жиҳати, «Ўткан кунлар»нинг учала бўлими ҳам ўз Т.га эга: биринчи бўлимдаги сюжет ёчими – Отабек билан Кумушнинг тўйи иккинчи бўлим воқеаларига туртки берган Т. бўлса, иккинчи бўлимдаги сюжет ёчими – Отабекнинг ўчини олгач Тошкентга кетиб қолиши учинчи бўлим воқеаларига туртки берувчи Т.дир. Ўзгачароқ ҳол «Кеча ва кундуз»да ҳам кузатилади: Акбаралининг Зебига сов-

чи күйиши битта Т. бўлса, Мирёкубнинг Марямга ишқи тушгани иккинчи Т.ни ташкил қиласди. Демак, йирик ҳажмли асарлар сюжетида бир эмас, бир нечта Т. бўлиши, асарнинг нисбий тугалликка эга қисмлари ёки ҳар бир мустақил сюжет линияси ўз Т.ига эга бўлиши мумкин экан.

ТҮЮҚ (туркий *تۈۈق* – туймоқ, ҳис қылмоқ) – туркий халқлар шеъриятидаги тўрт мисралик, тажнисли қофияга асосланган, рамали мусаддаси мақсур (камдан-кам ҳолларда рамали мусаддаси маҳзуф) вазнида ёзилувчи лирик жанр. Т.лар кўпроқ а-а-б-а тарзида қофияланади, шунингдек, а-а-а-а ёки а-б-в-б тарзида қофияланган кўринишлари ҳам мавжуд. Дастрлаб ҳалиқ оғзаки ижодида пайдо бўлган Т. жанри кейинчалик кўплаб мумтоз шоирлар эътиборини тортган: Лутфий, Навоий, Бобур, Юсуф Амирий, Убайдий, Оғаҳий сўз санъаткорлари жанр такомилига катта хисса қўшганлар. Айрим манбаларда Т.нинг тажнисли қофияга зга бўлиши шарт ҳисобланмайди (мас., Бобур. «Мухтасар»). Шунга қарамай, тажнисли қофияга зга бўлган Т.лар кенгроқ тарқалган, тажнисли қофияни жанрни белгиловчи хусусият сифатида тушуниш кўпроқ оммалашган. Жумладан, А.Навоий ҳам «туюғдирким, икки байтиқа муқаррардур ва саъй қилурларким, тажнис айтилгай ва ул өазн рамали мусаддаси мақсурдир...» деб ҳисоблайди, яъни тажнисли қофия масаласида қатъий талаб қўймаса-да, «тажнис айтиш»га ҳаракат қилиш лозимлигини уқтиради. Ҳақиқатан ҳам тажнисли қофия Т. жанрига ўзига хос жозиба баҳш этади, ўкувчига бетакрор завқ беради. Мас.:

Кўз ёшим тупрок ила гәр қотила,
Келмагайман жавридин, ҳаққо, тила.
Ғамзаси ўлтирди-ю, ул бехабар,
Мен агар ўлсам, не ғам ул қотила.

Лутфийнинг мазкур Т.ида тажнисли қофия орқали қўйидаги маънолар ифодаланмоқда: биринчи мисрада «агар кўз ёшим тупрок билан қотилса, аралашса», иккинчи мисрада «жабридан, эй худо, тилга келмайман», тўртинчи мисрада «мен ўлиб кетсам, у қотилга нима ғам». Яъни Т.да шаклдош сўзлар мўъжазгина матн доирасида турли маъноларда ва ўринли кўлланиши даркор, бу эса шоирдан юксак бадиий маҳоратни талаб қиласдики, бунга жавоб бера оладиган Т. она тилининг гўзаллигидан завқланиш, унинг бекиёс имкониятлари билан фахрланишга асос бўлади.

ТЎРТЛИК – 1) тўрт мисралик банд тури; катрен, мураббаъ. Т.

шеъриятда энг кўп тарқалган банд турларидан саналади. Т. бандда қоғияланиш тартибининг ҳесишиган (*aba'b*), ўрама (*abba*), жуфтлик (*aabb*) шакллари кўпроқ тарқалган. Шунингдек, Т.нинг мурабба шаклидаги қоғияланиш тартиби (*aaab cccb*) ҳам бўлиб, бу шакл нисбатан кам тарқалган. «Девону лугатит турк»да мисол қилиб көлтирилган халқ қўшиқлари, асосан, Т. бандлардан таркиб топгани унинг туркий халқлар адабиётида қадимдан мавжуд бўлганини кўрсатади. Мумтоз шеъриятимиизда Т. банд мураббаъ жанрида сақланган бўлса, XX асрда у янада фаоллашди. Ҳозирги ўзбек шеъриятидаги лирик шеърларнинг аксарияти Т. бандлардан таркиб топган; 2) тўрт мисрадан таркиб топувчи шеър, халқ оғзаки ижоди ва мумтоз шарқ шеъриятидаги рубоийнавислик анъаналарининг давоми сифатида ҳозирги ўзбек шеъриятида анча кенг тарқалган шеър шакли; шакл жиҳатидан таснифланувчи лирик жанр. Мумтоз лирикадаги рубоий ва туюқдан фарқли ўлароқ, Т. жанрига киритиш учун шеърнинг тўрт мисрадан иборат бўлиши кифоя: унга рубоий ёки туюққа қўйилган каби вазн, композиция билан боғлиқ қатъий талаблар қўйилмайди. Маълумки, арузда ёзилган ҳар қандай тўрт мисрали шеър ҳам рубоий бўлолмайди, бунинг учун шеър ҳазаж баҳрининг 24 тармоғидан бирида ёзилиши шарт. Демак, мантиқан қаралса, Т. арузда ҳам, бармоқда ҳам ёзилиши мумкин. Мас., Чўлпоннинг «XX аср», «Парча» номли ҳамда «Лола гулнинг догидур...» деб бошланувчи Т.лари рабал баҳрида ёзилган. Шунга қарамай, янги ўзбек шеъриятида Т.лар, асосан, бармоқда ёзилмоқда. Мавзу жиҳатидан чегараланмагани, воқеликдан олинган таассуротлар, ҳаёт ҳақидаги фикр-хулосаларни ихчам, лўнда ифодалаш имконини бергани учун Т. жанри янги давр шеъриятида ҳам кенг оммалашди. Ўзбек адабиётида Ойбек, Ҳ.Олимжон, М.Шайхзода, Уйғун, Шухрат, Рамз Бобоҷон, Т.Йўлдош, А.Орипов, Э.Воҳидов, Р.Парфи, О.Матжон, Ҳ.Худойбердиева жаби шоирлар ижодида Т. жанрининг яхши намуналарини учратиш мумкин.

Ү

УРЖУЗА (ар. ارجوزه – раЖазда ёзилған) – маснавий типа да қоғияланиб, «ражази мусаддас» вазнида ёзилувчи илмий шеър. Арабларда дастлаб яратылған барча шеърлар раЖаз баҳрида бўлган, шу боис раЖаз атамаси, умуман, шеър маъносида ишлатылған. XI асрда яратылған «Девону луготит турк» муаллифи М. Кошғарий ҳам атамани шеър маъносида кўллади, унинг: «Мен бу китобни маҳсус алифбे тартибида ҳикматли сўзлар, сажълар, мақоллар, раЖаз ва наср деб аталған адабий парчалар билан безадим», – деб ёзиши шуни кўрсатади. Аруз имкониятлари кенгайиб, баҳрлар кўпайгач, энди раЖаз атамаси, умуман, шеър эмас, баҳрлардан бири маъносида кўллана бошланди. Этимологик жиҳатдан раЖаз атамаси билан боғлиқ У. термини эса юқорида зикр этилған шакл хусусиятларига эга илмий мавзудаги шеърни англата бошлади. Терминнинг бу маъноси У. шаклидаги илмий шеърларнинг илгари раЖазда битилған қасидалардан келиб чиққани билан изоҳланади. Мак., Ибн Синонинг «Тиббий уржузас» достони, «Тиббий ўғитлар ҳақида уржуза», «Анатомияга доир уржузас» каби табобатга оид жами саккизта асари, XIII асрда яшаган араб тилшуноси Мұхаммад ибн Моликнинг араб грамматикаси ҳақидаги «Алфийя» («Минг байт») асари, XV асрнинг иккинчи ярмида яшаган араб денгизчиси Аҳмад ибн Можиднинг сувда сузиш қоидаларига оид учта асари шундай У.лардандир. Таъкидлаш жоизки, У. бўлиши учун асар раЖаз баҳрида бўлиши ва, албатта, а-а, б-б, в-в тарзида қоғияланиши шарт ҳисобланган. Мак., Ибн Синонинг «Тиббий уржузас» достонидан келтирилған қуйидаги байтлар шу кўринишда қоғияланган:

Танада гар пайдо бўлса қандай мараз,
 Тибдан топар давосини ҳар бир араз.
 Илмий, амалийга бўлинди тиб аввал,
 Бўлди уч нарсадан илмийси мукаммал.

*У нарсанинг бири етті табиатдир,
Андін сүнгра көлган олты заруратдир.*

УСЛУБ (ар. ۋەلىت – тартиб, усул, йўсин, тарз) – поэтиканың муҳим категорияларидан бири; бадий асарнинг у ёки бу тарздаги шаклий қурилишини белгиловчи умумий принцип. У. антропологик, яъни ижодкор шахси билан боғлиқ категория саналиб, унинг ижодий индивидуалликини белгилайди. Уда намоён бўлувчи ижодий индивидуаллик бадий асарнинг барча сатҳларида (бадий матннинг тузилиши – риторика, бадий воқеликни яратиш принциплари – поэтика) бирдек кўзга ташланади. Яъни У. бадий шаклнинг унсури эмас, балки унга хос хусусиятдир. У. асардаги шакл унсурларининг ўз ҳолича эмас, балки муайян қонуният асосида яхлитликка бирикишини таъминлайди, ҳар бир унсурнинг бутун таркибидаги моҳияти ва функциясини белгилайди. Илмий музомалада «Услуб – одам» (Ж.Бюффон) деган қарашнинг оммалашиб бежиз эмас: асар ўзида ижодкор шахсини ифодалар экан, буни Уда намоён этади. Айтайлик, А.Қаҳҳорга хос жумла тузиш, А.Қаҳҳорга хос ривоя, А.Қаҳҳорга хос бадий деталлар функционаллиги, А.Қаҳҳорга хос сюжет қурилиши дейилишининг боиси шундаки, буларнинг бари А.Қаҳҳор услуги билан, унинг ижодий ўзига хослиги билан изоҳланади. Шу билан бирга, адабиётшуносликда У. термини индивидуал услубдан кенгроқ доирада ҳам тушунилади. Маълумки, ижодкор фаолияти муайян бир даврда, адабий-эстетик принциплари жиҳатидан яқин бўлган гурӯхлар доирасида кечади, демак, унга хос бадий асар шаклини белгиловчи принциплар билан бошқа ижодкорлар таянган принципларда муштарак жиҳатлар кузатилиши табиий. Бу эса муайян адабий давр У.и (мас., уйғониш даври У.и), адабий йўналиш У. (мас., классицизм У.и, романтизм У.и) ҳақида гапириш имконини беради. Демак, У. факат ижод жараёни, конкрет ижодкор билангина эмас, мъълум даражада адабий жараён билан ҳам боғлиқ категория экан. Ҳар икки ҳолда ҳам У. қатор муҳим вазифаларни бажаради. Жумладан, ижод жараёнида У. санъаткорни воқеликни яхлит идрок қилиш, ҳаёт материалини (диспозиция) яхлит бадий системага (композиция) айлантиришга йўналтиради. Адабий жараёнга нисбатан олинса, У. бадийнинг ривожланиш ўзанидаги ижодкорни адабий анъана билан боғлайди ва шу тариқа, бир томондан, ўзида адабий-бадий анъанани ташувчи, иккинчи томондан, уни янгиловчи ҳодиса сифатида намоён бўлади. Шунингдек, бадий асарнинг қейинги ҳаёти, ижтимоий мав-

жудлиги (онтологияси) ҳам У. билан белгиланади. Зеро, У. асарни конкрет ўқувчига мўлжаллайди, бадий шакл ўқувчининг тафаккур даражаси ва эстетик дидига мос бўлишини таъминлади. Буларнинг бари У. ҳаёт материалы ва адабий анъаналарга сайлаб муносабатда бўладиган, жамиятнинг бадий-эстетик талаб-эҳтиёjlари, умуммаърифий ва маданий савияси, эстетик дид даражаси билан боғлик ҳодиса эканлигини кўрсатади.



ФАБУЛА (лот. *fabula* – ҳикоя, масал) – сюжетшунослик категорияси. Адабиётшунослиқда Ф. терминини қўллашда турличаликлар мавжуд: у *сюжет* төрмининг синоним сифатида ҳам, ундан фарқлаб ҳам ишлатилади. Гап шундаки, асарда ҳикоя қилинаётган воқеаларни Арасту «миф» ёки «тарих», антик римликлар эса «фабула» деб юритган бўлсалар, XVII асрга келиб француз классицизми назариётчилари худди шу нарсани французча «сюжет» термин билан аташган. Шунга кўра, Ф. ва сюжет терминларини синоним сифатида қўллашга ҳам асос бор. Шу билан бирга, бу икки термин билан бошқа-бошқа тушунчаларни аташга интилиш ҳам мавжуд. Жумладан, ўтган асрнинг 20-йилларида рус формал мактаби вакиллари бошлаб берган анъанага мувофиқ, Ф. деганда асарда тасвирланган воқеаларнинг ҳаётда юз бериш тартибини, сюжет деганда эса уларнинг асарда ҳикоя қилиниш (жойлаштирилиш) тартибини тушуниш ҳозирда кенгроқ оммалашган. Худди шуни тескари тартибда, яъни воқеаларнинг ҳақиқатда юз бериш тартибини сюжет, улар ҳақида ҳикоя қилиш тартибини Ф. деб аташ эса илгарироқ, XIX аср ўрталаридан, А.Н.Веселовский ва унинг издошлари ишларида кузатилади. Шунингдек, адабиётшунослиқда Ф. төрмини ортиқча, у бериши мумкин бўлган маънони сюжет, сюжет схемаси, сюжет композицияси терминлари тўла ифодалайди деган қараш ҳам мавжуд.

ФАНТАСТИКА (юн. *phantastike* – таҳайюл санъати) – ҳақиқатда мавжуд бўлмаган, таҳайюл кучи билан тасаввурдагина яратилган нарса-ҳодисалар тасвири, шунга асосланувчи адабий асарлар жами. Фантастик асар юқори даражадаги шартлилик касб этувчи фантастик образлилликка таянади; у муаллифдан ҳам, ўкувчидан ҳам ижодий фантазияни тўла кувват билан ишлатишни талаб этади. Айни чоғда, Ф. фақат хаёлот маҳсули эмас, унинг замирида мавжуд воқеликнинг излари сезилиб туради, зоро, хаёл шу мавжудликдан куч олган ҳолда парвоз қиласади. Бадий тафаккур ривожи давоми-

да Ф.нинг ўрни ва аҳамияти, функциялари ўзгариб боради. Қадим аждодларимиз хаёлотининг маҳсули бўлган фантастик образлар уларнинг ўзлари томонидан шартли образ эмас, балки айни ҳақиқат деб тушунилган. Бу хил тушуниш аждодлар онгида узоқ вақтлар сақланган бўлса-да, унинг муттасил сусайиб боргани кузатилади. Халқ оғзаки ижодидаётқ, мас., қаҳрамонлик эпосида Ф. энди ёрдамчи унсур сифатида намоён бўлади: моҳияттан реал шароитда ҳаракатланаётган қаҳрамон мақсадга, асосан, ўз кучи, ақл-заковати билан эришади, ғайриоддий кучларнинг аралашуви эса ёрдамчилик мақомида қола бошлайди (мас., «Алномиш»). Албатта, бунда ҳам ҳали ғайритабиий, илоҳий кучларга, уларнинг ҳаётда юз берауви воқеаларга бевосита аралashiшига ишонч сақланиб қолган, лекин Ф. элементлари маълум даражада шартлилик касб этгани ҳам сезилади. Инсон табиат сир-синоатларини чуқур англаб бориши баробарида, Ф.ни шартли образлилик, бадиий восита сифатида тушуниш барқарорлашиб боради. Энди унга кўлроқ муаллиф бадиий ниятини амалга ошириш, муайян бадиий-эстетик мақсадга эришиш воситаси сифатида қарала бошлайди. Жумладан, жаҳон адабиётининг «Гулливернинг саёҳатлари» (Ж.Свифт), «Дориан Грей портрети» (О. Уайлд), «Сагри тери тилсими» (Бальзак), «Портрет» (Н.Гоголь) каби нодир намуналарида Ф. асарнинг композицион қурилишини белгилаган, бадиий концепцияни шакллантириш ва ифодалашда етакчи аҳамиятга эга бўлган унсурга айланади. Илм-фан тараққиёти Ф.нинг алоҳида бир кўриниши – илмий Ф.ни юзага келтирди. Жаҳон адабиётида илмий Ф.нинг асосчилари сифатида Ж.Верн, Г.Уэллс зътироф этилади. Анъанавий Ф.дан фарқли ўлароқ, илмий Ф. реал воқеепикни тасвирлайди, фақат бу воқеелик илм-фан ва техника тараққиёти натижаси ўлароқ муайян даражада ўзгарган; ундаги Ф. ғайритабиий ё илоҳий кучлар эмас, балки инсон тафаккур кучи туфайли воқе бўлади. Мас., турли халқлар оғзаки ижодида «кўринмас одам» мотиви мавжуд бўлиб, кўринмасликка турли сехрли буюлар (таёқча, узук, қалпоқ ва б.) ёрдамида эришиллади. Г.Уэллснинг «Кўринмас одам» асарида эса «кўринмаслик» қаҳрамон ўз кўли билан синтез қилиб олган модда воситасида амалга ошади.

Янги ўзбек адабиётида Ф. унсурларидан самарали фойдаланиш Фитрат («Қиёмат», «Абулфайзхон»), А.Қаҳҳор («Қабрдан товуш» ҳикояси), О.Мухтор («Тўрт томон қиблა»), Х.Дўстмуҳаммад («Жажман») каби адиблар ижодида кузатилади. Шунингдек, XX асрда ўзбек саргузашт-фантастик адабиёти (Х.Тўхтабоев, Т.Малик

ва б.) ва илмий-фантастик адабиётти (Х.Шайхов) ҳам шаклланди ва муайян ютуқларга эришди.

ФАРД (ар. فرد – якка, ёлғиз) – ўзаро қофияланган икки мисра – ёлғиз байтдан иборат, тугал мазмунга эга шеър, мумтоз адабиётдаги энг кичик мустақил лирик жанр. Ф. бир байтдангина иборат бўлса ҳам, унда муҳим фалсафий-ахлоқий масала қаламга олиниб, ихчам поэтик хуласа ифодаланади. Шу боис Ф.лар аксар афористик характерда бўлиб, уларнинг кўплари ҳикматлар, ҳалқ мақоллари даражасига кўтарилиган. Mac.:

Аблаҳ ани билки, оламдан бақо қилғай тамаъ,
Аҳмоқ улким, олам аҳлидин вафо қилғай тамаъ (Навоий).

Бироқ бу Ф.га мазмун жиҳатидан қўйилувчи қатъий талаб эмас, Ф.лар мазмунига кўра турлича (лирик қаҳрамон ҳолати, оний кечинма, ёр васфи ва б.) бўлиши мумкин. Mac.:

Истарам – шўхе чиқиб, жонимни бевдоқ айлагай,
Сабру хушу ақлу имонимни барбод айлагай (Навоий).

Белоғиздан, дедиларким, дөғил афсонае,
Бошладим филҳолким, «бир бор эди, бир йўқ эди» (Навоий).

Ўзбек шеъриятида Навоийга қадар мисралари қофияланмаган Ф.лар ҳам кўп учрайди. Навоий эса мисралари қофияланган Ф.ни маъқул кўрган: унинг туркийда ёзилган 86 та Ф.идан 82 тасида мисралар ўзаро қофияланган. Навоийдан кейинги шеъриятимизда Ф.нинг шу кўриниши кенгроқ оммалашган. Мисолга олинган Ф.ларнинг дастлабки иккитасида мисралар ўзаро қофияланган бўлса, учинчи-си қофияланмаган мисралардан таркиб топган.

ФАХРИЯ (ар. فخریه – мақтаниш) – шоирнинг ўзи эришган ижодий муваффақиятлардан фахр-ифтихор туйғуларини изҳор қилиши. Ф. айрим манбаларда жанр, бошқаларида эса шеърий санъат сифатида таърифланади. Агар Ф. турли жанрдаги шеърлар ичida воқе бўлиши мумкинлиги эътиборга олинса, уни қусни ибтидо, ҳусни матлаб (қ.) каби маънавий санъатлар қаторига қўшиш тўғрироқ бўлади. Ф.ни оддийгина мақтанчоқлик деб тушунмаслик керак, зоро, унинг яхши намуналарида фахр туйғуси шарқона одоб доирасида ифодаланади. Одатда, шоир ифтихори устозларга миннатдорлик ҳислари

билан қоришиб кетади, улардан ўрганибгина юксак натижаларга эришгани эътироф этилади. Мас., А.Навоийнинг:

*Олибмен таҳти фармонимга осон
Черик чекмай Хитодин то Хуросон, –*

байти Ф. бўлиб, у матннинг бир қисми, холос: матнда бу байтга қадар шоир устозларини эслайди, уларга юксак баҳо беради. Бу ҳам Ф. жанр эмас, балки санъат деб қараш тўғрироқ эканига далолат қиласдики, шеъриятимизда ўз ютуқларидан фахр-ифтихорни ифодалаш учунгина маҳсус ёзилган асарни топиш маҳол. Яна бир жиҳати, Ф. шоирнинг ўз тилидан, салафлари тилидан ёки бошқа шахслар тилидан ҳам ифодаланиши мумкин. Мас., Машрабнинг:

*Ҳама айтурки: Машраб, мунча илмни кимдин ўргандинг?
Худо лутф айлади, ман барчани Мавлодин ўргандим, –*

байтида шоирга ўзгалар тилидан баҳо («мунча илмни кимдин ўргандинг?») берилади, у эса буни камтарлик билан «худонинг лутфи» деб изоҳлайди. Баъзи ҳолларда Ф. да шоир ижодининг камолот дараҷасию аҳамиятини кўрсатиш мақсадида ўзи билан бошқа шоирлар орасида қиёс ўтказади. Табиийки, бунда шарқона одоб меъёрларига риоя қилиш, таққослананаётган шоирларга хурмат билан қараш, уларни камситмаслик, баҳода холисликни сақлаш талаби янада кучаяди.

ФЕЛЬЕТОН (фр. feuilleton – варақ, саҳифа) – бадиий-публицистик жанр, долзарб мавзуда ёзилган танқидий руҳдаги, кўпинча ҳажвий-сатирик йўналишдаги асар. Ф. атамаси публицистиканинг ижтимоий-сиёсий танқид руҳидаги алоҳида жанрини англата бошлиши XIX аср охирларига тўғри келади. Унга қадар Ф. сўзи бошқа маънода ишлатилган. «Журналь де деба» номли Париж газетаси 1800 йил 28 январь сонига қўшимча варақ илова қиласди, кейинча бу газетанинг «Фельетон» номли доимий рубрикаси бўлиб қолади. Шу номли рубрика Европа матбуотида тез оммалашиб, бу рубрика остида носиёсий, норасмий материаллар: эълонлар, мода янгиликлари, театр тақризлари, ҳикоя ва ҳатто романлар эълон қилинади. Жадид матбуотида ҳам шу номда рубрика ташкил этилган бўлиб, мас., Чўлпоннинг «Қурбони жаҳолат», «Дўхтур Мұҳамадиёр» ҳикоялари «Садои Туркистон»нинг Ф. рубрикаси остида чоп этилган. Бу ҳол адабиётшунослигимизда Чўлпон ушбу ҳикоялари жанрини Ф.

тарзида белгилаган деган янглиш қарашнинг пайдо бўлишига олиб келган. XX асрнинг 20 – 30-йилларидан бошлаб ўзбек матбуотида куннинг долзарб муаммоларига бағишлиланган Ф.лар кенг ўрин эгаллайди, жумладан, А.Қодирий, F.Гулом, А.Қаҳҳор, С.Аҳмад сингари машҳур адиларимизнинг қатор асарлари ўзбек Ф.чилиги ривожига салмоқли ҳисса бўлиб қўшилган.

ФИГУРА (лот. *figura* – шамойил, ташқи кўриниш) – нутқ курилишида, фикр ифодасида кузатилувчи жонли сўзлашув учун одатий, табиий нормалардан чекинишиларнинг умумий номи; *стилистик фигура*, *риторик фигура*, нутқ фигуралари каби кўринишиларда ҳам ишлатилади. Мас., шеърий нутқда гап бўлаклари тартибининг ўзгартирилиши – *инвөрсия* одатий нормадан чекиниш бўлиб, у муайян бадиий-эстетик мақсадларга хизмат қиласди. Ф.ларни ўрганиш, таснифлаш ишларини антик риторика бошлаб берган. Жумладан, антик риторикада Ф.лар дастлаб иккига – фикр Ф.лари ва сўз Ф.ларига ажратилган, уларнинг ҳар бири ўз ичидаги бир нечтадан турларга бўлинган. Ўз вақтида муҳим масалалардан бири сифатида ўрганилган нутқ Ф.ларига эътибор XVIII асрлардан сусайган. Ўтган асрнинг иккичи ярмига келиб структурал адабиётшунослик намояндлари (Р.Якобсон, Т.Тодоров ва б.) ўтмишда яратилган Ф. ҳақидаги таълимотни ҳозирги тилшунослик нуқтаи назаридан қайта кўриб чиқиши йўлида муайян ишларни амалга оширидилар. Ф.лар масаласини ўрганиш, бу борада антик даврлардан бошлаб амалга оширилган ишлар ва сўнгги тадқиқотлар билан танишиш ўзбек адабиётшунослиги учун ҳам жуда муҳим. Мас., Шарқдаги илми бадиъ (қ.) антик риторика анъаналарининг бевосита давомидир.

ФОРМАЛИЗМ (лот. *forma* – ташқи кўриниш) – бадиий шакл ва мазмуннинг ўйғун бирлиги талабидан чекиниб, шаклнинг нисбий мустақиллигини мутлақлаштирган ҳолда унга бадииятнинг бош мезони сифатида қарашда намоён бўлувчи эстетик тенденция. Ф. тамойиллари XIX аср охири – XX аср бошларида қатор адабий оқимларда намоён бўлади. Хусусан, адабиёт тарихидаги футуризм, имажинизм, дадаизм, авангардизм каби оқимлар бадииятни кўпроқ шаклда кўриб, турли-туман янги шаклларни ихтиро қилишга интилдилар. Бироқ уларнинг изланишлари аксар «шакл – шакл учун» шиори остида кечиб, мазмундан кўпинча айро тушгани боис ҳам, ўзлари кутган самарани бёролмади. Шунингдек, ўз вақтида айни шу хил қарашларни ёқлаган, уларни назарий жиҳатдан асосламоқчи бўлган адабиётшунослярнинг ишлари ҳам бадиий асар табиатига

номувоғиқ бўлгани сабабли бир ёқламалигича қолди. Айни чоғда, формалистларнинг бадиий асар шаклини ўрганишга айрича эътибор қилганлари адабиётшуносликда изсиз кетди дейиш ҳам тўғри эмас (к. *формал метод*). Адабиётшуносликда Ф. термини баъзан кенг маънода ҳам кўлланади, бунда кескин ва ошкор намоён бўлган юқоридаги давргина эмас, умуман, адабиётда кузатилувчи ҳодиса кўзда тутилади. Зоро, шаклга айрича эътибор бериш, бадиийлик услугбий-шаклий хусусиятларда (сўзни турфа кўйларда ўйнатиш, услугбий воситалардан фойдаланиш, вазн, қофия ва ш.к.ларда воқе бўлувчи маҳорат), шуларнинг ўзи ўз ҳолича бадиий қиммат касб этади деб билиш адабиёт тарихида илгаридан бор нарса. Жумладан, Европа адабиётидаги «эстетизм» хусусиятларини касб этган барокко, маринизм, гонгоризм каби йўналишларга ҳам бу ҳол ёт эмас. Шунингдек, Ф. тамойиллари Шарқ адабиётида ҳам бўй кўрсатмай қолмаган: мувашшаҳбозлик, назирабозлик, турли сўз ўйинларию жимжимадор ифодаларга мазмун қурбон берилган ҳоллар бунга ёрқин мисол бўла олади.

ФОРМАЛ МЕТОД – адабиётшуносликдаги бадиий шаклни адабиётнинг моҳиятини белгиловчи категория сифатида тушунган наزارий йўналиш. XIX аср охири – XX аср бўшларида импрессионистик танқид ва адабиётга позитивистик ёндашувларга қарши ўлароқ майдонга келган, кейинчалик бадиий асарнинг ички тузилиши қонуниятларини ўрганишга қаратилган методика сифатида қарор топган. Шунга кўра, ўзининг илк босқичларида Ф.м. адабий асарни ўрганишда матндан ташқарида қолувчи барча омилларни, адабиётни ўрганишга генетик, социологик ёндашувларни инкор қиласи; шакл унсурларини белгилаш ва таснифлаш билан чекланувчи тавсифий ўрганиш йўлидан боради. Ф.м. вакиллари қарашларида бир-биридан фарқли нуқталар бўлса-да, уларни асосий принцип – эътиборни бадиий шаклга қаратишлари бирлаштиради. Яна бир жиҳати, қарашлар такомили охир-оқибат уларнинг кўпчилигини оралиқ мавқени эгаллашга, яъни мазмунни буткул эътибордан соқит қилиш тўғри эмаслигини англашга олиб келган. Ф.м. тарафдорлари бадиий асар шаклига хос кўп жиҳатларни: бадиий тил, услуг, шеър тузилиши, шеър композицияси, ритм, метр, сюжет қурилиши, бадиий асар композицияси каби муҳим масалаларни маҳсус ва чуқур тадқиқ этдилар. Хусусан, рус формал мактабининг В.Шқловский, В.Жирмунский, Ю.Тинянов, Г.Винокур, Б.Эйхенбаум каби намояндалари амалга оширган тадқиқотлар адабиётшунослик ривожида

муҳим аҳамиятга молиқдир. Уларнинг изланишлари кейинчалик структур адабиётшунослик, семиотика каби йўналишлар учун асос, ривожланиш омили бўлиб хизмат қилди.

ФОСИЛА (ар. *فصـلـة* – намат; ажратувчи, оралиқ) – сокин ва мутаҳаррик ҳарфларнинг муайян тартибда бирикишидан ҳосил бўлувчи ритмик бирлик, жуз (қ.). Ҳарфларнинг қай тартибда бирикишидан келиб чиқиб Ф.нинг икки тури фарқланади: Ф.и суро (кичик Ф.) ва Ф.и кубро (катта Ф.). Кетма-кет келган учта мутаҳаррикка битта сокин ҳарфнинг кўшилишидан Ф.и суро ҳосил бўлади: «ке-ламан», «капалак», «хапалак» каби сўзлар шу вазнга мос. Mac., «капалак»: мутаҳаррик (ка) + мутаҳаррик (па) + мутаҳаррик (ла) + сокин (к). Ф.и кубро эса кетма-кет келган тўртта мутаҳаррикка битта сокин ҳарф қўшилишидан ҳосил бўлади: «чиdamадим», «яша-мадим», «қарамадинг» каби сўз шакллари шу вазнга мос. Mac., «қарамадинг»: мутаҳаррик (қа) + мутаҳаррик (ра) + мутаҳаррик (ма) + мутаҳаррик (ди) + сокин (нг). Қайд этиш керакки, арузшуносликка оид айрим манбаларда Ф. алоҳида жуз сифатида эътироф этилмайди. Жумладан, Бобур бу масалада Насриддин Тусийнинг фикрини кувватлаб, Ф.и кубро битта сабаби сақийл ва битта ватади мажмӯъ кўшилишидан, Ф.и суро эса битта сабаби сақийл ва битта сабаби ҳафиғ қўшилишидан ҳосил бўлади деб ҳисоблайди.

ФУТУРИЗМ (лот. *futurum* – келажак) – XX аср бошларида майдонга келган авангардистик оқим, санъатнинг деярли барча турларида кузатилган, айниқса, тасвирий санъат ва ҳайкалтарошлиқда таъсири кучли бўлган, бадиий адабиётда ҳам сезиларли из қолдирган. Ф.нинг ўз ватани Италияда, шунингдек, Россияда кенгроқ оммалашди. Ф.нинг адабий-эстетик ва ғоявий қарашлари Ф.Маринеттининг «Футуризм манифести» (1909) асарида ўз ифодасини топган. Ф. адабий-маданий анъаналар билан алоқани тўла узиш, янги замон (келажак)нинг янги адабиёт ва санъатини яратиш даъвоси билан майдонга чиқди. Қисқача айтилса, Ф. намояндалари жамиятдаги тараққиёт тенденцияларидан келиб чиқкан ҳолда унинг эртасини, эртанги инсон ва инсоний муносабатларни ўзларича тасаввур қиладилар ва шунга мос адабиётни яратиш даъвоси билан майдонга чиқдилар. Яъни Ф. асрлар давомида шаклланган анъанавий маданиятга илмий-техник тараққиёт ва урбанизациялашув даври маданиятини қарши кўяди. Келажак ҳақидаги тасаввур эса мазкур жараёнлар билан боғлиқ ҳолда кишилар дунёқарashi, ахлоқи, турмуш тарзи ва ш.к.ларда юз берадиган ўзгаришларни (ҳаёт ритмининг тезлашуви,

ҳолат ва таассуротларнинг кескин ўзгариши, маънавий-ахлоқий та-наззул, шахснинг гемирилиши ва оломоннинг қисмига айланиши ва б.) мутлақлаштириш асосида амалга ошади. Бу ўзгаришларни табиий ва қонуний билгани учун Ф. адабиёти, реализмдан фарқ қиласор, уни ғоявий-ҳиссий тасдиқлаш йўлидан боради. Жумладан, итальян Ф.и жамиятда қарор топган «одам одамга бўри», «кучли одам ҳамиша ҳақ» қабилидаги ақидаларни ҳақиқатда мавжуд деб ҳисоблайди ва уларга нормал ҳодисадек қарайди. Шундай мавқени тутғанлари учун ҳам итальян футуристларининг бир қисми кейинроқ Муссолини бошлигидаги фашистик ҳаракатга қўшилиб кетган. Россия воқелигига пайдо бўлган рус Ф.и итальян Ф.и билан муштарак жиҳатларга эга бўлгани ҳолда, дунёқараш бобида жиддий фарқланади: унда гуманистик асос сақланган. Адабий-эстетик қаражаларда муштараклик кўпроқ кузатилади. Рус Ф.и эскиликтининг муқаррар тугашига ишонган ҳолда санъат воситасида келажакни, туғилажак «янги инсоният»ни идрок қилишга интилади, санъатнинг вазифаси шунда деб билади. Унинг учун бадиий ижод табиатга тақлид эмас, балки унинг давоми бўлиб, у тамом янги дунёни яратади. Рус Ф.и намояндлари учун «Академия ва Пушкин иероглифлардан кўра ҳам тушунарсизроқ», шунинг учун уларни «замона кемаси»дан улоқтироқ лозим. Улар учун нафақат ўтмиш адабиёти, балки анъаналар йўлидан бораётган замондошлар ижоди ҳам мутлақо қимматга эга эмас, «космонўпар бинолар юксаклигидан» назар соглан Ф. намояндларига улар нияҳоятда ҳақир ва тубан кўринади. Албатта, «космонўпар бинолар» урбанизация жараёнлари кучайған шароитда келажакни билдиради, яъни футуристлар наздида бу гўё келажак хукмидир. Ўзларини «янги дунёнинг янги одамлари» деб билган футуристлар келажак адабиёти поэтикасини ҳам буткул янгилашга интиладилар. Айтиш керакки, киритилган поэтик янгиликларнинг аксарияти анъаналарни инкор қилиши, уларга диаметрал зидлиги билан характерланади. Жумладан, тил соҳасида улар грамматика ва имло қоидаларини тан олмайдилар, сўзларнинг аҳамиятини туширади дея тиниш белгиларини инкор қиладилар, синтактик конструкцияларни истаганча ўзгартирадилар. Футуристларга кўра, ижодкорнинг янги сўз ихтиро қилиш ҳуқуқи чекланмаган, ҳатто ҳар бир ижодкор ўз шевасини яратиши мумкин; сўзнинг ёзувдаги шакли ва фонетик жарангига ўз ҳолича мазмундор, шу боис шеърлари ёзувда турфа шакллар топади, то-вушларга тақлид ёки уларнинг маънисиз такроридан иборат шеърлар яратишади ва ҳ. Умуман, анъанавий қоидаларни онгли равишда

(мас., шеърий ритмни жонли нутқдан фарқланмайдиган қилишга интилиш, битта асарда турли эстетик белгилар, жанр ёки услубий хусусиятларни қоришириб юбориш каби) бузиш Ф.нинг тоявий-эстетик табиатидан келиб чиқувчи хусусиятдир. Ф. адабий жараёнда узоқ яшаб қола билмади: 20-йилларга келиб унинг фаолияти, асосан, барҳам топди. Албатта, бу адабий ҳодиса изсиз кетмади: ижодий фаолиятини рус Ф.ининг «Гиляя» (кубофутуристлар: В.Маяковский, В.Хлебников), «Эгофутуристлар ассоциацияси» (И.Северянин), «Поэзия равоги» (В.Шершеневич), «Центрифуга» (Б.Пастернак, Н.Асеев) каби турли уюшмаларида бошлаган ижодкорлар кейинча рус шеърияти ривожига сезиларли ҳисса қўщдилар.

X

ХАРАКТЕР (юн. charakter – из, белги, фарқловчи хусусият) – бадий характер; муайян давр ва мұхит кишиларига хос эңғ мұхим умумий хусусиятлар билан алоқида шахсга хос индивидуал хусусиятларни үзіда үйгүн мужассам этган инсон образы. Бадий X. үзіда объектив ва субъектив жиҳатларни бирлаштиради. Инсон ҳәётининг ижтимоий-психологик реаллиги (бу үринде X.нинг реал асоси, яъни унинг ҳәёттій кузатишлар ёки муайян прототип асосида яратилгани назарда тутилади) бадий X.нинг объектив томони бўлса, унинг ижодкор томонидан ҳиссий идрок этилиши ва ғоявий-ҳиссий баҳоланиши субъектив томонидир. Бадий X.нинг субъектив жиҳати, бир томондан, унинг ижодкор томонидан яратилган янги мавжудлик, бадиият ҳодисаси бўлишини; иккинчи томондан, унинг концептуал функцияга хосланишини таъмин этади. Бошқача айтсак, адабиётнинг бадий концептуал функцияси X. орқали амалга ошади, яъни жамиятнинг жорий ҳолати X.(лар) воситасида бадий тадқиқ этилади ва яхлит бадий концепция ишлаб чиқилади. Айтиш керакки, X.нинг бу қадар катта аҳамият касб этиши кўпроқ адабиёт тараққиётининг сўнгги даврларида кузатилади. Хусусан, антик адабиётда бадий концепцияни ифодалашда X. эмас, тасвирланган воқеанинг үзи ҳал қилувчи роль йўнаган. Негаки антик ижодкорлар учун X.нинг муайян турғун типлари (золим, мушфиқ ва б.) мавжуд бўлиб, улар асар сюжетида шу типга мос ҳаракатлантирилган. Уйғониш даврига келиб эса қаҳрамон бу турғун хусусиятларни ўзгартириш, турли ниқобларда ҳаракат қилиш имконига эга бўлган, яъни антик адабиётга нисбатан бунда X. индивидуал чизгилар ҳам касб этган. Хуллас, жамиятда шахс мақомининг ўзгариб бориши баробарида, бадий X.да индивидуаллик салмоғи ортиб, инсон X.и унга табиатан ато этилган турғун хусусиятлар жамигина эмас, айни чоғда, давр ва мұхитнинг маҳсули экани ҳам англаниб борган ва шу тариқа реализм босқичига яқинлашган сари, адабиётда бадий

Х.нинг роли ва аҳамияти ҳам ортган. Реализм адабиётида бадиий Х. ҳаётни кўламли ва төран бадиий идрок этиш учун кенг имкониятлар яратади. Зоро, бадиий Х.ларнинг шаклланиши ва ривожланиши, ҳаётий амаллари, ўзаро курашлари, руҳияти ва ш.к.ларни тасвирлаш орқали воқеаликни атрофлича чукур бадиий идрок этиш, унга ғоявий-ҳиссий баҳо бериш – бадиий концепцияни шакллантириш ва ифодалаш мумкин бўлади.

ХАФИФ (ар. خفيف – енгил) – аруз баҳрларидан бири, айтилиши ва тақтиъси енгил бўлгани учун шундай номланган. Фоилотун (–v--) ва мустафъилун (– – v –) аслларининг кетма-кет тақороридан ҳосил бўлади. Ўзбек шеъриятида фаол қўлланадиган баҳрлардан бири. Навоийнинг «Мезон ул-авzon» асарида Х. баҳрининг беш вазни, Бобурнинг «Мухтасар»ида эса йигирма икки вазни мисоллар билан кўрсатиб берилган. Шеъриятимизда мазкур баҳрнинг олти рукнли саккиз вазнидан кенг фойдаланилади. Х. баҳри дастлаб Атойи ва Лутфий шеъриятида учрайди. Бундан ташқари, Ҳофиз Хоразмий шеърларининг каттагина қисми, Навоийнинг «Сабъаи сайёр» достони ва яна олтмиш иккита турли жанрлардаги лирик шеърлари Х. баҳрида ёзилган. Чунончи, «Сабъаи сайёр»даги қуйидаги байт хафифи мусаддаси солими мақтуъ (–v-- \ v - v - \ --) вазнида:

Бир нёча заврақ асрабон тайёр,
Янги ой заврақи киби сайёр.

ХИАЗМ (юн. chiasmos – юнон алифбосидаги Х ҳарфидан, яъни шу ҳарф шаклида жойлашган) – тескари тартиbdаги синтактик параллелизм, мисрадаги сўз (бўлак)ларни тескари тартибда тақорорлашга асосланган стилистик фигура. Х. моҳиятан мумтоз шеъриятдаги тарду акс (қ.) санъатига яқин туради. Аксарият ҳолларда Х. шеърнинг кетма-кет келувчи мисраларида намоён бўлади. Mac.:

Гилослар лабингиз акси бўлгандек,
Лабингиз аксидир бу боғда гилос (F.Ғулом)

ёки

Созим – менинг овозим,
Овозим – менинг созим (F.Ғулом).

Шунингдек, Х. баъзан шеърнинг дастлабки мисраларидан биридаги сўз (бўлак)ларни тескари тартибда жойлаштирган ҳолда

такрорлаш асосида ҳам юзага чиқиши мумкин. Мас., М.Юсуфнинг «Осмон чўкиб қолди бу оқшом» сатри билан бошланувчи шеърида биринчи банд «Яшаш керак, севиш шарт эмас» мисраси билан якунланса, охирги банд «Севиш керак, яшаш шарт эмас» мисраси билан якун топади. Бунда Х. шеър тоясини юзага чиқарувчи муҳим композицион унсур вазифасини ўтайди.

ХОККУ, ХАЙКУ (японча «илк мисралар») – япон шеъриятидаги анъанавий қатъий шеърий шакл, лирик жанр. X. уч мисрадан ташкил топиб, биринчи ва учинчи мисраси беш бўғинлик, иккинчи мисраси эса етти бўғинлик ўлчовда бўлади ва бу жиҳатдан у танканинг (қ.) дастлабки уч мисраси билан бир хил бўлиб, шеърнинг асосий фикри акс этган «илк мисралар» X. номли қатъий шеър шакли сифатида қарор топган. Жанрнинг асосчиси сифатида XVII аср япон шоири М.Басё эътироф этилади, у жанрнинг гўзал намуналарини яратиш билан бирга унга қўйилувчи шаклий ва мазмуний талаблар, эстетик принципларни ишлаб чиқкан.

ХРИЯ (юн. chrao – маълум қилмоқ, нақл қилмоқ) – афористиканинг жанр кўринишларидан бири, улуғ зотнинг конкрет шароит билан боғлиқ ҳолда айтган ибратли гапи ёки амали ҳақидаги жажожи ҳикоя. Антик риторикада Х.ларга нотиқ фикрини далиллаш учун ишлатилган восита деб қаралган. Афоризмдан фарқи шуки, Х.да ибратли гап айтилган конкрет шароит ҳам баён этилади. Мас., «Кексайган чоғида хасталаниб қолган Сукротдан кимдир ҳол сўраб, ишлари қандай кетаётганини сўради. Файласуф айтдики: «Ҳар жиҳатдан яхши: мабодо соғайиб кетсан, ҳасадгўйларим кўпаяди, ўлсам – дўстларим».

Ц

ЦИКЛ (юн. *kyklos* – айлана, түндірек) – муаллиф томонидан бир неча мустақил асарнинг жанр, мавзу, персонажлар, ҳикоячи ва ш.к. жиҳатлардан умумийлиги асосида битта гурухға бирлаштирилиши, туркум. Адабиётшунослиқда Ц. масаласида яқдил фикрга келингган эмас. Айрим мутахассислар Ц.га алоҳида жанр сифатида қарайдилар. Бироқ бу ҳолда, биринчидан, Ц.ни ташкил қилаётган ҳар бири мустақил ва муайян жанр шаклига эга асарларни бутуннинг қисми (худди асарнинг битта боби каби) ҳисоблаш керак бўладики, ҳақиқатда уларнинг ҳар бири том маънода мустақилдир. Шунга кўра, иккинчидан, Ц. адабий асарга хос бир бутунлик хусусиятига эга эмас. Яна бир жиҳати, мавжуд Ц.лар барчаси учун хос жанр хусусиятларини намоён қилмайди: мас., жанр жиҳатидан туркумланган Ц.да тематик ранг-барамглик, тематик жиҳатдан туркумланган Ц.ларда эса жанрий ранг-барамглик кузатилаверади; муаллиф томонидан таркибланган Ц.лар ҳам, ноширлар томонидан туркумланган Ц.лар ҳам мавжуд ва ҳ. Ц.нинг кўринишлари сифатида қаралувчи дилогия, трилогия, тетралогия ёки ҳамса типидаги туркумлар таркибидаги асарлар қатор муштарак белгиларга эга бўлса-да, ҳамма ҳолда ҳам битта асар деб бўлмайди – улардаги қисмлар орасидаги алоқадорлик турли даражада намоён бўлади. Мас., «Кеча ва кундуз» дилогиясининг биринчи қисми – «Кечада»нинг қандай талқин қилиниши кўп ҳолларда иккинчи қисм – «Кундуз»нинг қандай тасаввур этилишига боғлиқ бўлиб қоладики, дилогияни битта асар санаш ўринли. Бироқ худди шу гапни «Кутлуғ қон» ва «Улуғ йўл» романларига нисбатан айтиш қийин, чунки биринчиси иккинчисининг мантиқий давоми бўлса-да, муаллиф аввалдан дилогия ёзишни режалаштирган эмас. Бундан дилогия, трилогия тарзида номланувчи асарлар ҳам турлича бўлиши, уларнинг айримлари битта асар (жанрнинг, яъни роман, қисса ва ш.к. сифат кўриниши), бошқалари муайян умумий белгилар асосида жамланган асарлар туркуми экани кўринади. Шу

билин бирга, айрим лирик Ц.ларда бутунлик бордек (мас., С.Есенин «Форс тароналари»; Миртемир. «Қорақалпоқ дафтари» ва б.), чунки уларни мавзуу, жой, лирик қаҳрамонга хос нисбатан яхлит кайфият бирлаштиради. Шунга қарамай, улардаги шеърлар орасида ҳам бутун-қисм алоқаси мавжуд эмас, уларнинг ҳар бири мустақил асардир. Шунга кўра, Ц.ни ҳозирча жанр деб эмас, муайян умумий белгилар асосида жамланган мустақил асарлар мажмуи сифатида тушуниш тўғрироқ бўлади.

ЦИТАТА (лот. *cito* – чақираман, келтираман) – асарда бирор га тегишли асар (матн)дан олинган сўзма-сўз кўчирма келтириш. Матн ичида Ц.лар, одатда, кўштироқка олинади, эпиграф сифатида келтирилганида эса график жиҳатдан (саҳифанинг ўнг томонида жойлашади, асосий матнга қараганда кичик ўлчамли ҳарфлар билан ёзилади) ажратилади ва остида манбаси кўрсатиб кўйилади. Мумтоз шарқ шеъриятидаги назиралар, татаббуларда Ц.лар (ўзга шоир мисраси ёки байти) ёзувда ажратилган эмас. Муайян маънода тахмис ҳам Ц. асосига қурилувчи асар саналиши мумкин. Тахмис сарлавҳасида мухаммас кимнинг ғазалига боғлангани кўрсатилади, мақтаъсида эса ғазал муаллифи билан тахмис боғловчининг тахаллуси келтирилади, шулар асосида Ц.ларни фарқлаб олиш мумкин бўлади. Ҳозирги ўзбек шеъриятида ўзга шоирдан олинган парчани (кўпроқ мисра, баъзан бир неча мисра) қўштироқсиз келтириб, саҳифа ости изоҳида муаллифини кўрсатиб қўйиш усули ҳам кенг оммалашди. Адабиётшуносликда Ц. термини баъзан кенг маънода ҳам қўлланиб, бунда асар матnidаги ўзга матндан (қай тарзда киритилганидан қатъи назар) кириб қолган ҳар қандай унсур тушунилади, фақат ўзга матн қай даражада аниқликда киритилишидан қатъи назар, ўкувчи уни таниб оладиган бўлиши шарт. Мазкур маънодаги Ц. аллюзия ва рөминисценцияларни ҳам қамраб олади.

Ч

ЧИСТОН (форс. جست آن – у нима?) – қаранг: **ЛУҒЗ**
ЧҮЗИҚ ХИЖО – қаранг: **ХИЖО**

III

ШАКЛ – қаранг: бадий шакл

ШАХДУ ШИРУ ШАКАР (ар. شد – асал, форс. شیر – сут, ар. شکر – шира) – қаранг: **муламмаъ**

ШЕЪР – 1) муайян ўлчов асосидаги ритмга эга нутқ шакли, назм; 2) шеърий йўлда ёзилган кичик ҳажмли асар, лирик шеър. Бу маънода Ш. термини кенг қўлланиб, жанридан қатъи назар, ҳар қандай лирик асарни билдиради ва уларни шеърий йўлда ёзилган бошқа асарлар (достон, шеърий драма, шеърий роман ва х.)дан фарқлайди. Умуман олганда, терминнинг мазкур маънода қўлланиши Ш. сўйининг этиологик (*лирика, поэзия*) маъносига кўпроқ мос келади.

ШЕЪРИЙ НУТҚ – поэтик нутқ, назм; муайян бир ўлчов (вазн) асосидаги ритмга эга, ўзининг мусиқий жарангига, эмоционал-ҳиссий тўйинтирилганлиги билан фарқланувчи нутқ шакли. Ш.н.даги ўзига хос интонация, мусиқийлик ритмик бўлаклар ва ритмик воситалар, ўзига хос фонетик ва синтактик ташкилланиш орқали вужудга келади. Шеърий йўлда ёзилган лирик асардаги кайфиятнинг ҳосил қилиниши, кечинманинг ўқувчига «юқтирилиши»да унинг ритмик-интонацион томони муҳим аҳамият касб этади. Яъни шеърнинг ритмик-интонацион хусусиятлари унинг мазмуни билан белгиланади, мазмун билан уйғунлик касб этади. Ўзининг келиб чиқиши жиҳатидан Ш.н. бадий нутқининг насрый шаклидан қадимийроқ, аникроғи, ўз вақтида у бадий нутқнинг ягона шакли бўлган. Миллий адабиётлар тарихининг илк босқичларида адабий асарлар шеърий йўлда ёзилган, насрда ёзилган бадий асарларнинг пайдо бўлиши, насрнинг бадий нутқ кўриниши сифатида шаклланиши эса нисбатан кейинги даврларга тўғри келади. Сабаби, шеърий нутқдаги ўзига хос ташкилланиш уни одатдаги нутқдан кескин фарқлайди ва шунинг ўзиёқ етказилаётган информация санъатга алоқадор эканини таъкидлаб туради. Зоро, насрый нутқ ўзининг қурилиши жиҳатидан кундалик

мұлоқотда күлланилувчи нұтқа яқин, шеърий нұтқ сўз санъатига хос махсус ҳодисадир.

ШЕЪР ТИЗИМИ – маълум ўлчов принципиға асосланган шеърий вазн (ўлчов)лар тизими, мажмуи. Ш.т. шеър тузилишининг асосини, унинг асосий қонуниятларини белгилаб беради. Ҳар бир ҳалқ шеъриятидағи Ш.т. ўша ҳалқ тилининг ўзига хос хусусиятларидан келиб чиқади. Мавжуд Ш.т.ларининг ҳаммасида асосий ўлчов бирлиги сифатида бўғин олинган. Бўғин эса, маълумки, турли тилларда турлича сифатий ва миқдорий кўрсаткичларга эга. Шунга кўра, жаҳон ҳалқлари шеъриятида мавжуд Ш.т.лари бўғиннинг миқдори (силлабик Ш.т.), ургули ёки ургусизлиги (тоник Ш.т.), чўзиқ ёки қисқалиги (метрик Ш.т.), баланд ёки паст талаффуз қилиниши (мелодик Ш.т.) каби жиҳатларни ўлчов асоси қилиб олади. Шунингдек, бир йўла икки жиҳатни асос қилиб олган Ш.т.лари ҳам мавжуд (силлабо-тоник Ш.т., ўзбек арузи). **Маълумки**, илмий термин муайян фан тармоғи доирасида фақат битта тушунчани англатиши мақсадда мувофиқ, бироқ амалиётда бундан кўп чекинилади. Шундай ҳол Ш.т. ва вазн терминларини ишлатишда тез-тез кузатилади. **Мас..**, биз аниқ бир ғазал ҳақида «аруз вазнида ёзилган», адабиёт тарихи ҳақида гапиратуриб эса «аруз вазни мусулмон шарқ шеъриятида етакчи мавқени эгаллаган» деяверамиз. Ҳақиқатда эса конкрет ғазал «аруз вазни»да эмас, аруznинг «фалон вазнида» (рамали мусаммани мақсур, ҳазажи мусаммани маҳзуф ва ҳ.) ёзилган бўлади, яъни вазн конкрет шеърда намоён бўладиган ҳодиса, у конкрет шеърнинг ўлчовини билдиради. Шунга биноан, иккинчи ҳолда «аруз вазни мусулмон шарқи шеъриятида етакчи мавқени эгаллаган» дейилганда «вазн» эмас, балки вазнлар системаси – Ш.т. назарда тутилган. Демак, «вазн» термини ҳам конкрет шеърнинг ўлчови (метр) маъносида, ҳам Ш.т. маъносида ишлатилмоқда ва шу боис терминологик чалкашлик юзага келмоқда. Ҳолбуки, Ш.т. муайян ўлчов тамойилига асосланган вазнлар мажмуи бўлиб, мас., «аруз тизими» дейилганда мисраларда чўзиқ ва қисқа ҳижоларнинг маълум тартибда тақорланиб келишига асосланган Ш.т. тушуниладики, бу тизим юзлаб конкрет вазнларни ўз ичига олади.

ШИБХИ ИШТИҚОҚ (ар. شبه اشتقاق – иштиқоққа ўхшаш, ўзакдошга ўхшаш) – мұмтоз адабиётдаги шеърий санъат, шеърда асли ўзакдош эмас, бироқ талаффуз ёки имло жиҳатидан бир-бирига яқинлиги боис бир қараашда ўзакдош бўлса керак деган шубҳа уйғотовувчи сўзларни ишлатиш. Илми бадиъга оид манбаларда Ш.и. алоҳида

шөърий санъат сифатида ҳам, иштиқоқнинг бир кўриниши сифатида ҳам таърифланади. Лутфийнинг куйидаги байтида иштиқоқ санъати ҳам, Ш.и. санъати ҳам кўлланган:

*Ҳар кимки шаҳид ўлмади дилбар қиличидин,
Бечора бориб топмади ул шаҳди шаҳодат.*

Бу ўринда шеърий санъатлар, «шаҳид», «шахд» ва «шаходат» сўзларининг кўлланиши туфайли, юзага келмоқда. Байтда «шаходат» сўзи «гувоҳлик» эмас, балки «шахидлик» маъносида қўлланган, яъни шоир «дилбар қиличидан шаҳид бўлмаган одам шахидлик лаззатини топмайди» демоқчи. Демак, байтдаги «шахид» ва «шаходат» сўzlари ўзакдош, уларнинг кўлланиши иштиқоқ санъатини юзага чиқармоқда. Бироқ «шахд» сўзи уларга ўзакдош бўлмагани ҳолда, талаффузи ва ёзилиши жиҳатидан яқин, шу туфайли ҳам ўзакдошдай туюлади (ўзакдош деган шубҳа туғдиради) ва шу асосда Ш.и. санъати юзага чиқади.

ШИРУ ШАКАР (форс. شیر – сут, ар. شیرا – қаранг: муламмаъ

Э

ЭВФОНИЯ (юн. euphonia – хушоҳанглик) – бадиий нутқнинг хушоҳанглиги, оҳангдорлик. Нутқда Э., асосан, фонетик воситалар ёрдамида юзага келади; нутқнинг хушоҳанглиги кўп жиҳатдан унинг фонетик ташкилланишига боғлиқдир. Э. шеърий нутқда, айниқса, катта аҳамият касб этадики, шунинг учун шеърнинг фонетик ташкилланишига алоҳида эътибор берилади. Шеърий нутқнинг ритмиклиги, унда турли сатҳдаги тақорорларнинг (қ.) қўлланиши Э.га асос бўлади. Mac., Э.Шукурнинг:

*Мен сени боладай сўйсам, нетайин,
Кўйингда бевадай куйсам, нетайин.
Сўйгунчигим менинг, сўйгунчигим-ай... –*

мисраларида «уй» товуш бирикмаси билан «ай» товуш бирикмаси беш мартадан, «ен» товуш бирикмаси «не» тарзида тескари тартибда икки мартадан тақорорланади; биринчи мисрадаги «боладай сўйсам» бирикмаси билан иккинчи мисрадаги «бевадай куйсам» бирикмаси вазндош ва оҳангдош; «нетайин» ва «сўйгунчигим» сўзлари айнан тақорорланади. Буларнинг бари бирлиқда шеърнинг хушоҳанг бўлишини таъминлайди. Ёки шу шоирнинг тўртта уч мисралик банддан иборат шеърининг график шакли ўзгартириб кўрилса, Э.нинг юзага келиши ҳақида етарли тасаввур ҳосил бўлади:

*Алласин юлдуз айтсин, Тун айтсин, кундуз айтсин,
Эна қиз ухласин, эна киз...
Кемадай чайқалар беланчак, Шамоллар солади ҳалинчак,
Эна қиз ухласин, эна киз...
Очилиб-сочиладар кечадар, Эркалар нордон еб чечадар,
Эна қиз ухласин, эна киз...
Қадамларга кулсин эшиклар, Гўдакларга тўлсин бешиклар,
Эна қиз ухласин, эна киз...*

ЭЗОП ТИЛИ – муайян сабабларга кўра айтилмоқчи бўлган фикрни очик-ошкор ифодалаш мумкин бўлмайдиган ҳолларда пайдо бўлувчи ифода йўсини; фикрнинг пардалаб, «коса тагида нимкоса» тарзида, турли ишоралар орқали ифодаланиши. Э.т. ижод эркинлиги, сўз эркинлиги бўғилган ҳар қандай шароитда санъаткорнинг воқеаликка муносабат билдириш эҳтиёжининг маҳсулни ўлароқ воқе бўлади, шу боис бу хил ифода йўсини адабиёт тарихининг деярли барча босқичларида учрайди. Жумладан, ўз даврида Гулханий «Зарбулмасал»ида мажозий образлар орқали, Фитрат «Чин севиш» ва «Ҳинд ихтидолчилари» пьесаларида ўзга юртда кечган воқеалар тасвири орқали, Чўлпон турли поэтик рамзлар ёрдамида ўзларини қийнаган муаммоларга муносабатларини ифода этганлар. XX аср ўзбек адабиётида яратилган тарихий мавзудаги асарларда кузатилувчи ўтмиш манзараларининг тасвири орқали замонага ишора қилишни ҳам Э.т.нинг бир кўриниши ҳисоблаш мумкин. Мас., «Навоий» романида Ойбекни ўз даврида қийнаган муаммолар (мас., Мажидиддиннинг сўроқ қилиниши, Султоналига тазииклар уюстирилиши) акс этган, Х.Давроннинг «Абулхай сўзи» шеърида «социалистик реализм» санъати ва адабиётига муносабат «йўли билан» ифода этилган.

ЭКСПОЗИЦИЯ (лот. *expositio* – баён, тушунтириш) – сюжет компоненти, персонажларнинг бевосита тугун юзага келиши вақтида кечган ҳаёти, асосий конфликт етилган шарт-шароитлар тасвири. Э. ўкувчини асар воқеалари кечадиган жой, воқеа иштирокчилари бўлмиш персонажлар, конфликтни юзага келтирган шарт-шароитлар билан таништиради, уни сюжет воқеаларини идрок қилишга тайёрлайди. Э. ҳажм эътибори билан турлича бўлиши, асарнинг турли ўринларида келиши, баъзан умуман тушириб қолдирилиши мумкин. Мас., «Мехробдан чаён»да Э. жуда катта ўринни – хондан совчилар келгунга қадар бўлган эпизодларни ўз ичига олиб, персонажларнинг олдинги тарихи билан аралаш тарз-да берилади. «Кутлуг қон»да у жуда қисқа ва тугундан кейин берилади, «Қўшчинор чироқлари»да эса экспозиция умуман тушириб қолдирилади. Э. персонажларнинг ўтмиш ҳаёти ҳақида маълумот берувчи олдинги тарихдан бевосита асар бадиий вақтига алоқадорлиги билан, прологдан матннинг алоҳида композицион бўлаги сифатида ажратилмаслиги билан фарқ қиласди.

ЭКСПРЕССИОНИЗМ (фр. *expression* – ифодалаш) – XX аср бошларида немис адабиётида шаклланиб, бошқа миллий адабиётларга ҳам ёйилган адабий йўналиш. Э. фақат адабиёт доираси билан

чекланмайди, у санъатнинг бошқа турларида ҳам кузатилган ва шу боис адабий-эстетик йўналиш ҳисобланади. Э. дастлаб Дрездендаги «Кўприк», Мюнхендаги «Мовий чавандоз» номлари билан фоалият олиб борган мусаввир ва ҳайкалтарошлар уюшмалари ҳамда «Штурм» (1910 – 1932) журнали теварагига уюшган ижодкорлар доирасида пайдо бўлган. Э.нинг майдонга чиқиши ўтган аср биринчи чораги Фарб мамлакатлари ижтимоий ҳаётининг барча жабҳаларида кузатилган инқироз билан боғлиқ бўлиб, уни ижодкорларнинг мавжуд ҳолатга нисбатан норозилиги, ўзига хос исёни сифатида тушунилади. Э. намояндлари ижодида ўткир ижтимоий-танқидий пафоснинг устуворлиги, бу пафоснинг инсониятга беадад кулфатлар келтирган жаҳон урушига, ижтимоий адолатсизликка, мавжуд ижтимоий тартиботлар шахсни топташи, унинг эркини бўғишию ёлғизлатиб қўйишига, жамиятда маънавий инқироз кучайиб бораётгани ва ш.к.ларга қаратилгани бунинг ёрқин далилидир. Бошқа модернистик йўналишлар сингари Э. ҳам ўтмиш маданияти, хусусан, натурализм билан алоқасини узганини эълон қилди. Шундай бўлса-да, мутахассислар Э. сиртдан нечоғлик ғаройиб бўлмасин, адабий-маданий анъанадан буткул узилиб кетмагани, хусусан, унда Маърифатчилик даври комедиясига, диний театр драмаларига хос образлар тизими, ифода йўсими мавжудлигини таъкидлайдилар. Албатта, бу бежиз эмас, чунки мазкур жанрларга хос даъват, умумлашма образлар орқали муайян ғояларни сингдиришга интилиш Э. исёнини ифодалаш учун қулай эди. Зоро, давр руҳига мос ҳолда Э., айниқса, унинг сўл қаноти дунёни ўзгартириш зарурлигини эътироф этади, образлар орқали қалб «қичқириғи»ни оммага етказишга интилади. Э. адабиёт ва санъатда объектив воқелик эмас, балки муаллиф қалби, унинг ички «мен»и устувор бўлиши лозим деган ақидани илгари сурди. Яъни объектив воқеликни *тасвирлаш* эмас, ижодкор қалбини *ифодалаш* (айни шу нарса йўналишга ном берган) мухим, ифодалаш тасвирлашдан, интуиция мантиқдан устун бўлмоғи лозим деб билди. Воқеликни тўлақонли тасвирламай унинг субъектив талқинини беришга интилиш туфайли Э.да образ конкретлилик хусусиятини йўқотади, унда тушунча, ғоя, маънавий-ахлоқий принциплар ўрнини абстракциялар эгаллайди. Шу боис бадиий концепция ифодасида умумлашма образлар (конкрет инсон эмас – умуман Одам, умуман Ишчи, умуман Зиёли ва ҳ.), рамзлар, фантастика, гротескнинг аҳамияти ортади. Э. вакиллари яратган бадиий воқелик марказида бешафқат дунё зиддиятларидан пора бўлган «қалб» туради, бадиий

воқелик эса воқеликнинг деформацияланган ва ғоят кучли эмоционалликка йўғрилган аксиdir. Мазкур фонда «қалб»нинг ижтимоий шарт-шароитларга боғланиб қолган инсон фожиасидан норозилиги, жамиятнинг эртасидан огоҳ этаётган «қичқириғи» баралла янграйди. Э. ҳаётнинг мураккаб муаммою зиддиятларини бадиий идрок этишга интилмайди, улардан келган таассурот, изтиробу аламларни – муаллиф учун мухим бўлган ғояни шартли йўсинда, муболағали кучайтириб ифодалаш билан чекланади.

Э.га хос исёнкор руҳ фашистлар ҳокимиётга келган Германияда қувғин қилинди, тушкунликни тарғиб этадиган, нацизм мағкурасига мос келмайдиган, унга хизмат қилмайдиган ҳодиса сифатида тақиқ остига олинди. Э.нинг ижодий тажрибалари кўплаб адиллар, жумладан, Ф. Кафка (айрим мутахассислар уни Э. вакили санайдилар), И. Бехер, Г. Гессе каби улкан истеъдодлар ижодига самарали таъсир кўрсатди. Э.га хос кайфият, руҳ, унинг тажрибасидан ўтган усул ва воситалар бошқа миллий адабиётлар томонидан ҳам ижодий ўзлаштирилди ва турли адабий-эстетик тизимлар доирасида қўлланди. Э. анъаналарининг излари ҳозирги адабиётда ҳам сезилиб турадики, бу унинг жаҳон бадиий тафаккурига сингиб кетгани, уни маълум даражада бойитганидан далолатdir.

ЭКСПРОМТ (лот. *expromtus* – тайёр) – ижодий импровизациянинг бир кўриниши, бирон нарса-ҳодиса ҳақида ҳеч бир тайёргарликсиз, шу пайтнинг ўзидаёқ айтилган ёки ёзилган шеър (қ. бадиҳа).

ЭЛЕГИЯ (фригияликлар тилида «*elegēn*» – қамишдан ясалган най) – ҳозирги маъносида кўпроқ фалсафий мазмундаги, қайгули ўйларни ифодаловчи шеър; мазмун жиҳатидан таснифланувчи лирик жанр. Адабиёт тараққиёти давомида Э. термини маъною ўзгаришларига учраган. Жумладан, антик юонон адабиётида, мазмунидан қатъи назар, ҳар қандай иккилик лирик шеър Э. деб юритилган. Антик Рим адабиётидаги Э.ларда эса, асосан, муҳаббат мавзуси қаламга олинган. Ҳозирги тушунчадаги Э.нинг мазмуний белгиси Овидийнинг «Қайгули элегиялар»идан кейин қарор топди ва у энди «ғамгин қўшиқ» маъносига эга бўлди. Худди шу маънодаги Э. XVIII асрнинг иккинчи ярмидан Европа адабиётида, Э.ни сарой қасидаларига қарши қўйган сентименталистлар орасида, айниқса, кенг оммалашди. Шу тариқа Э. жанрга хос шакл қатъийлигини йўқотди ва мазмун аниқлигига эришиб, кўпроқ фалсафий қарашлар, қайгули ўй-изтиробларни акс эттирадиган шеър маъносига тушунила бошлади.

ЭЛЕГИЯВИЙЛИК (русчадан калька: «элегическое», «элегичность») – бадийлик модуси. Э. идиплиявийлик ва драматизм билан биргалиқда қаҳрамонлик, сатира ва трагизмдан фарқланувчи модуслар гүрухини ташкил этади. Агар қаҳрамонлик модусидаги асар архитектоникасини белгиловчи асосий мотив жасорат, сатира да мунофиқлик, трагизмда айбдорлик (хато ёки жиноят) бўлса, Э. учун энг муҳим мотив йўқотишdir. Бироқ йўқотишнинг ўзи Э. модусини белгилай олмайди (йўқотиш мотиви трагизм ёки драматизмда ҳам бўлиши мумкин). Э. учун муҳими йўқотишдан келадиган изтироб, айни шу нарса Э. модусидаги асар қаҳрамони учун ўз «мен»ини намоён қилиш усулига айланади. Элегиявий қаҳрамонга макон ёки замонда атрофдагилардан четлашиш – узлатнишинлик ёки бир жойда қўним топмай, жаҳонгашта бўлиб яшаш хос, шунинг ўзида қаҳрамоннинг атроф-муҳитга қарши сокин исёни ботинdir (мас., X. Султоновнинг «Ёзинг ёлғиз ёдгори» қиссасидаги Адаш Карвон ва Саттор образлари).

ЭЛЛИПСИС (юн. *elleipsis* – тушириш, тушиб қолиш) – стилистик фигуралардан бири, нутқда жумла таркибидаги сўз (бўлак)ни атанин тушириб қолдириш. Яъни Э. муайян бадий-эстетик мақсадни кўзлаган ҳолда амалга ошади, иккинчидан, сўз (бўлак) тушириб қолдирилса-да, унинг борлиги назарда тутилади ва англашилиб туради. Ўзбек шеъриятида кўпроқ бош бўлаклардан бирининг тушириб қолдирилиши ҳисобига воқе бўлувчи Э.лар кузатилади. Мас.:

*Булбулларми?! Етар!
Гулларми?! Бўлди!
Сўз наебати – юракка...*

Келтирилган парчада кесим (*берилади*) тушириб қолдирилган, натижада «юракка» сўзи мантиқий ургу олади, шеърнинг дастлабки мисраларида оҳанг шиддатининг сақланишига эришилади.

ЭПИГОНЛИК (юн. *epigonei* – кейин тугилган) – адабиётдаги ўзлаштириш кўринишларидан бири, ўзигача мавжуд бўлган асарларга, муайян адабий йўналиш, оқим ёки алоҳида сўз санъаткорига хос услуб, тасвир манераси кабиларга кўр-кўрана эргашиш. Э. ижодий ёндашувдан маҳрум бўлиб, унда адабий ҳодиса (муайян асар, йўналиш ё ижодкор услуби ва ш.к.)нинг у ёки бу даражада муваффакият топган ва муқим қарор топиб улгурган жиҳатлари механик қайта яратилади. Шу маънода, Э. иқтидори етарли бўлмаган ижодкор-

нинг ўқувчи омма диди, талаб-эҳтиёжларига мослашишга интилиши маҳсулидир. Бироқ ноижодий ёндашув, эргашилаётган намунанинг ташки жиҳатларинигина механик қайта яратилиши сабаб, Э. ҳамиша муваффакиятсизликка маҳкум, зеро, жонсиз схема, қуруқ услубий воситалару композицион усуллар мажмуи бадиият ҳодисасига айланолмайди. Э.нинг кўринишларидан бири сифатида *автоэпигонлик* ҳам кўрсатилади. Бунда ижодкорнинг ўз-ўзини тақорлаши (мавзу, оҳанг, сюжет курилиши, образлар, ҳаётти ҳолатлар тасвири ва ш.к.) назарда тутиладики, бу ижодий ўсищдаги оқсащдан дарак беради. Табиийки, Э. каби автоэпигонлик ҳам салбий ҳодиса, зеро, чинакам ижод муттасил изланишни, «ортдаги кўприкларни бузиб бориш»ни тақозо этади.

ЭПИГРАФ (юн. *epigraphe* – битик, сарлавҳа) – асарнинг бошланишида сарлавҳадан кейин оқ ёки унинг бўлим (боб, фасл)лари бошида келтирилувчи қисқа, одатда, эътиборяни манбалардан (халқ ижоди, машҳур кишиларнинг пурҳикмат сўзлари ва ш.к.) олинган кўчирма, цитатанинг бир кўриниши. Кўп ҳолларда Э. ўзининг афористик мазмуни билан асар моҳиятини очиб беради. Мас., А.Қаҳҳор «Ўғри» ҳикоясига Э. қилиб олган «Отнинг ўлими – итнинг байрами» мақоли ҳикоя моҳиятини, ундаги воқеага ғоявий-эмоционал мұносадатни ифода этади. Бироқ Э.нинг бадиий-эстетик функциялари шу билангина чекланмайди. Баъзан Э. экспозиция вазифасини ўташи, ўқувчини асар воқеалигига олиб кириб, унга илк маълумотларни бериши мүмкин. Мас., Х.Султоновнинг «Бунчалар ширинсан, аччиқ ҳаёт» ҳикоясига Э. қилинган F.Гуломнинг Қурбонжон доддоҳ ҳақида айтган сўзлари шундай вазифани бажаради. А.Ориповнинг «Тунислик бола» шеърига Римда тунислик бола миллатчи-иркчилар томонидан ёқиб юборилгани ҳақидаги газета хабари Э. қилиб олинганки, бу асарнинг ёзилиш сабабини изоҳлаш билан бирга лирик қаҳрамон кечинмаларини асослашга ҳам хизмат қиласди. Чўлпоннинг «Кеча» романига эпиграф қилиб олинган М.Горький сўзлари эса полуфункционаллик касб этади: у ҳам турли айбловлардан ҳимоя воситаси, ҳам адебнинг асарни ёзишдан мақсадини (муҳими, ҳам очиқ ифодаланаётган, ҳам пардалаб айтилаётган мақсадни) ифодалайди. Э.нинг пародиядаги вазифаси эса жанр табиатига мос: пародияга объект бўлган асардан келтирилган парча, бир томондан, ўқувчини ҳажв қилинаётган асарга йўналтиради, иккинчи томондан, пародия-нависнинг услубий «ўйин»лари учун асос бўлади.

ЭПИЗОД (юн. *episodes* – киритма) – эпик, лиро-эпик ва драматик асарларда тасвирланаётган воқеанинг макон ва замонда кечиши

жихатидан ажралувчи, маконий ва замоний жиҳатдан аниқ чегара-ланганлик асосида нисбий мустақиллик касб этувчи бўлаги. Агар шу жиҳатдангина қаралса, драматик асарларнинг ҳар бир пардасини Э.га тенг санаш мумкин. Лекин саҳнанинг ўз ичидаги кўринишларга бўлиниши, кўриниш вақт ва жой бирлигидан ташқари умумий иштирокчилар билан ҳам ажралиши эътиборга олинса, унда Э.ни кўринишга тенг дейиш тўғри бўлади. Эпик турнинг кичик жанрлари (латифа, масал; айрим эртаклар, кичик ҳикоялар) аксар ҳолларда битта Э.дан ташкил топади. Айни чоғда, кичик эпик жанрлар мазмуни кўпинча икки (баъзан ундан ортиқ) Э.ни бир-бирига зидлаш, қиёслаш ёки тадрижий (градуал) муносабатда кўйиш орқали ҳам юзага чиқади. Одатда, битта воқеа қаламга олинадиган ҳикоя (новеллалар)ларда шу воқеанинг ўзи бир неча Э.дан таркиб топади. Шунга ўхшаб юқоридагича тамойил асосида катта ҳажмли эпик асарлар сюжетидаги воқеалар ҳам ўз ичидаги Э.ларга ажратилиши мумкин.

ЭПИК ТУР – қаранг: эпос

ЭПИЛОГ (юн. *epiēlogos* – сўнгсўз) – асарда тасвирланган асосий воқеалардан алоҳида ажралиб турувчи якун, хотима. Антик даврлардан шаклланган анъанага кўра, саҳна воқеалари якун топгач, Э. қисми берилиб, улар мундарижаси (саҳнада ўйналган томоша мазмунини тушунтириш, қиссадан ҳисса чиқариш, томошибинларга миннатдорчилик билдириш, камчиликлар учун узроҳлик қилиш ва ш.к.) ва шакли (хор қўшиғи, рақс, актёрларнинг залга бевосита мурожаати ва б.) жиҳатидан турлича бўлган. Кейинчалик Э. эпик асарларда ҳам қўллана бошланди. Эпик асарларда ҳам Э. турли шаклларда (воқеа, бирон-бир ривоят, табиат манзараси ва б.) берилиши мумкин. Э.нинг кўп ҳолларда алоҳида бир воқеа шаклида берилиши сабаб бўлса керак, баъзан Э. ҳам сюжет элементи сифатида кўрсатиладики, бу тўғри эмас. Чунки бу ҳолда ҳам Э. асосий сюжетнинг бевосита давоми эмас, балки асосий воқеалар якунига етгач юз берган воқеа бўлиб, у асар мазмунини, муайян ғояни ойдинлаштириш, конкретлаштиришга хизмат қиласи (мас., «Ўткан кунлар»да Отабекнинг қабристонда Зайнаб билан тўқнаш келиши), бу эса, қандай шаклда берилишидан қатъи назар, барча Э.ларга хосдир. Шу маънода, Э.ни персонажларнинг кейинги тақдирни ҳақида маълумот берувчи кейинги тарих (мас., «Ўткан кунлар»даги Отабекнинг ўлимни ҳақидаги хабар; «Ёзгувчидан» деб номланган Отабекнинг авлодлари тақдирни ҳақидаги маълумотлар) дан ҳам фарқлаш керак.

ЭПИСТОЛЯР АДАБИЁТ (юн. epistole – мактуб, нома) – бирорга мактуб шаклида ёзилган адабий ёки публицистик асарлар. Ижодкор мактублари аввалдан (бадиий ниятда) кўпчиликнинг ўқишига мўлжалланган бадиий ёки публицистик асар сифатида режалаштирилган бўлиши ҳам, унинг бирор билан ёзишмалари кейинча ўкувчилар томонидан шундай деб қабул қилиниши ҳам мумкин. Масофадан мулоқот қилишнинг ягона шакли бўлгани учун антик даврларда мактуб ёзишга жиддий қаралган, улар риторика қоидаларига риоя қилган ҳолда битилган. Шу боис Эпикур, Цицерон, Сенека кабиларнинг мактублари Э.а.нинг нодир намуналарига айланган. Ўрта асрларга көлиб Фотий, Августин, Лютер каби диний арбоблар мактубнинг дидактик имкониятларидан кенг фойдаланиб ўз қавмларига турли масалаларни тушунтирганлар. Э.а.нинг ўзбек мумтоз адабиётидаги намунаси сифатида А.Навоийнинг «Муншаот» асарини келтириш мумкин. Адабиёт тараққиётининг кейинги даврларида шахслараро бевосита ёзишмалар ҳам аҳамиятини йўқотмагани ҳолда, адабий асарларни мактуб шаклида ёзиш кенг оммалашди. Мас., «Форс хатлари» (Монтескье), «Юлия ёки янги Элоиза» (Ж.Ж.Руссо), «Ёш Вөртернинг изтироблари» (Гёте), «Камбағал кишилар» (Ф.М.Достоевский) каби қатор асарлар мактуб шаклида ёзилган. Янги ўзбек адабиётида ҳам мактуб шаклидан самарали фойдаланилган асарлар талайгина: «Сөвгим, сөвгилим» (Ў.Умарбеков), «Чўл ҳавоси» (Ў.Хошимов).

ЭПИТАФИЯ (юн. epitaphos – қабртошдаги ёзув) – қабртошга ёзилган битик; ҳақиқатда қабртошга битилган ёки қабртошга битилмаса-да, тўпламдан жой олган мўъжаз шеър. Одатда, Э.лар ё мархумга мурожаат шаклида, ё мархумнинг тириклар (қабр ёнига келувчи ёки қабр ёнидан ўтувчи)га мурожаати шаклида бўлади. Ушбу анъанавий шаклдан ташқари Э.нинг ҳажвий шакли ҳам бўлиб, у мазмун-моҳиятига кўра эпиграммага яқин туради. Генетик жиҳатдан антик адабиётдаги эпиграммаларнинг бир кўриниши бўлган Э.лар Европада ўрта асрлар ва Ўйғониш даврида кенг оммалашган. Ўзбек шеъриятида Э. жанри оммалашган эмас, лекин, сийрак бўлса-да, учраб туради. Жумладан, айрим эпик асарларда (мас., А.Қодирий. «Ўткан кунлар»; А.Мухтор. «Чинор»; У.Ҳамдам. «Сабо ва Самандар») келтирилган қабртошлардаги назмий битикларни Э. намунаси санаш мумкин. Шунингдек, Э.нинг қабртошга битилмаган кўринишига мисол сифатида Х.Давроннинг «Менинг сочим оққа кўмилгай, Сочингга оқ тушмай кетдинг, хайр» мисралари билан

бошланувчи шеърини келтириш мумкинки, муаллифнинг ўзи унинг жанрини Э. деб бөлгилаган.

ЭПИТЕТ (юн. epitheton – илова этилган, изоҳловчи) – бадиий сифатлаш; нарса-ходисанинг бөлгисини образли ифодалайдиган бадиий аниқловчи. Тил нуқтаи назаридан қаралса, Э. ҳамиша аниқловчи вазифасида келади, лекин оддий аниқловчидан фарқли равишда, бадиий функцияни ўтайди: агар оддий аниқловчи нарса-ходисани бир турдаги бошқа предметлардан ажратса (ёлғиз аёл), Э. унга хос муайян белгини ажратиб-таъкидлаб («Ёбондаги ёлғиз дараҳт...») кўрсатади. Кўп ҳолларда Э. белгини кўчма маъно орқали ифодалайди ва бу ҳолда метафорик эпитет (қиёсланг: хира ойна – хира кўнгил) деб юритилади. Айрим Э.лар ҳалқ оғзаки ижодида, шунингдек, ёзма адабиётда анъанавий тарзда кенг қўллангани сабабли муайян турғунлик касб этган бўлиб, улар доимий, барқарор Э.лар деб юритилади (аллкелбат пахлавон, сунбул соч, қундуз қош, ой юз, лаъл лаб, сарв қомат). Адабиётда ижодий индивидуалликнинг кучайиши баробарида, бетакрор, нарса-ходисани кутилмаган жиҳатлардан тавсифловчи Э.ларнинг салмоги ва қиммати ортиб боради. Бундай Э.лар ифоданинг ёрқин, тасвирнинг жонли бўлишига хизмат қилиб, эстетик таъсир кучини оширади (мас., «Шойи шафақларга ўранар юрак»; «О, уятчан намозшомгуллар»; «Маъсум майсаларни тирилтгувчи сен, Музлаган ҳисларни илитгувчи сен»; «Дастурхонда фақат кемтилган юрак» – Э.Шукров.)

ЭПИФОРА (юн. epiphora – қўшимча) – такрорнинг хусусий кўринишларидан бири, шеърдаги бир неча мисра охирида битта сўз ёки сўз бирикмасининг такрорланиши. Мумтоз шаъриятимиздаги радиф муайян маънода Э.нинг кўриниши саналиши мумкин, фақат радифнинг қофиядан кейин ўрин олиши шарт, Э.га эса бундай шарт кўйилмайди. Шунга қарамай, мумтоз шеърият анъаналарининг давомчиси бўлган ҳозирги ўзбек шеъриятида Э. қофиядан сўнг келувчи сўз (бирикма) такори сифатида кенгроқ тарқалган. Mac.:

Олтин ойга олма отар Ойбодом,
Ойботарда йиглаб ётар Ойбодом.
Ойқизларнинг ойпариси Ойбодом,
Кунботардан куйиб ўтар Ойбодом (Э.Шукур).

Ушбу парчада қофиядан кейин Ойбодом сўзининг такрорланиши Э. бўлиб, у жойлашиш ўрни жиҳатидан радифга ўхшайди. Бирок

радиф бутун шеър давомида тақрорланса, бу шеърда тақрор бир банд давомидагина кузатилади. Шунга кўра, уни радиф эмас, Э. ҳисоблаш тўғрироқдир.

ЭПОПЕЯ (юн. еророїа, яъни eros – ривоя, ҳикоя ва роіео – яратмок, ижод қилмок) – ҳажман йирик, асосига умумхалқ аҳамиятига молик проблематика қўйилган эпик асар. Э.нинг илк намуналари сифатида қаҳрамонлик эпоси (к. эпос) кўрсатилади. Кейинроқ ўрта асрлар ва Уйғониш даврларидан қаҳрамонлик эпоси анъаналарининг давоми, уларга тақлид тарзида дунёга келган Э.лар ёзма адабиётда ҳам қарор топди (Вергилий. «Энеида»; Тассо. «Озод қилинган Иерусалим»; Вольтер. «Генриада»). Бадий насрнинг, хусусан, романчиликнинг тараққий этиши баробарида, миллат ҳаётнинг муҳим тарихий босқичини қаламига олиб, умумхалқ аҳамиятига молик муаммоларни бадий идрок этишга қаратилган роман-Э.лар пайдо бўлди (Бальзак. «Инсон комедияси»; Л.Толстой. «Уруш ва тинчлик»; М.Горький. «Клим Самгиннинг ҳаёти»; М.Шолохов. «Тинч Дон» ва б.). Асосига қўйилган проблематикаси ва тасвир кўлами жиҳатидан ўзбек адабиётидаги «Қуллар» (С.Айний), тугалланмаган «Кеча ва кундуз» дилогияси (Чўлпон), «Навоий» (Ойбек) романларида ҳам Э.га хос айрим хусусиятлар кузатилади.

ЭПОС (юн. eros – ривоя, ҳикоя) – 1) бадий адабиётнинг учта асосий туридан бири. Э.нинг специфик хусусияти – воқеаబандлик, эпик асарда макон ва замонда кечувчи воқеа-ҳодисалар тасвирланади, сўз воситасида ўкувчи тасаввурнида реаллик картиналарига монанд жонлана оладиган тўлақонли бадий воқеелик яратилади. Тасаввурда реалликдагига монанд, ўзининг ташки шакли билан жонлангани учун ҳам Э.даги бадий воқеелик «пластика» тасвирланган деб айтилади. Э.да пластик элементлар билан бир қаторда нопластик элементлар (муаллиф мушоҳадалари, фикрлари, тасвир предметига ҳиссий муносабати ва ш.к.) ҳам мавжуд бўлиб, бу элементлар муаллиф образини тасаввур қилишда муҳим аҳамият касб этади. Улар, пластик унсурлардан фарқли ўлароқ, асарни ўқиш давомида ўкувчи тасаввурнида жонланмайди. Э.да объектив ва субъектив ибтидоларнинг уйғун бирикиши кузатилади: асардаги бадий воқеелик объектив ибтидони, асарнинг ҳар бир нуктасига сингдириб юборилган муаллиф шахси субъектив ибтидони ташкил этади. Бадий воқееликнинг «объектив ибтидо» дейилишида шартлилик бор, чунки у реалликдан олинган оддийгина нусха эмас, балки воқееликнинг ижодкор кўзи билан кўрилган, идеал асосида идрок этилган, баҳоланган ва ижодий

қайта ишланган аксидир. Шундай экан, ҳатто «объектив тасвир» йўлидан борилиб, муаллиф имкон қадар ўзини четга олган асарларда ҳам муаллиф образи мавжуд бўлади. Демак, эпик асарларда бадий воқеалик билан бир қаторда нопластик муаллиф образи ҳам ҳар вақт мавжуддир.

Э.да макон ва замонда кечувчи воқеалар ровий (муаллиф, ҳикоячи-персонаж) томонидан ҳикоя қилинади. Шунга кўра, Э.да ривоя анъанавий равишда етакчи ўринни эгаллайди, унинг воситасида асарга диалог ҳамда тафсилотлар (пейзаж, портрет, нарса-буюмлар ва ҳ.) олиб кирилади. Ривоя бу унсурларнинг барини яхлит бутунликка бирлаширади. Э.нинг такомили жараёнида ривоя салмоғининг камайиб бориши кузатилади. Ривожланиш жараёнида Э.да диалог ҳамда тафсилотларнинг салмоғи ва аҳамияти ортиб боради. Бу бадий адабиётнинг бошқа санъат турлари билан алоқаси, уларга хос усул ва воситаларни ўзига сингдириши натижаси сифатида тушунилиши мумкин. Мас., театрнинг ривожи натижасида инсон характеристики яратишнинг драматургик усуллари ишлаб чиқилди, сайқалланди; ўкувчи омма драматургик усулда яратилган инсон характеристикинди англашга, диалоглар воситасида яратилаётган бадий воқеликнинг моҳиятини тушунишга тайёрланди, яъни бадий дид ривожланди. Шу асосда Э.га драматик унсурлар кириб келди. Айни пайтда, Э.даги диалог драмадаги диалогдан ўзининг ҳаётйлиги, маъно кўламининг кенглиги билан ажralиб туради. Чунки Э.да диалог амалга ошаётган конкрет ҳаётй ситуация, унда қатнашаётган персонажларнинг руҳий ҳолати, характер хусусиятлари ҳақида кенроқ тасаввур бериш имкониятлари мавжуд, персонаж диалогда айтиётган ҳар бир гап асар бутунлиги контекстида тушунилиши мумкин.

Э.да насрый (сочма) нутқ шакли етакчилик қиласи. Шу билан бирга, шеърий йўлда ёзилган эпик асарлар ҳам анча кенг тарқалган. Мас., Б.Бойқобиловнинг «Кун ва тун» шеърий қиссаси, Ҳ.Шариповнинг «Бир савол», Муҳаммад Алининг «Боқий дунё» шеърий романлари шеърий йўлда битилган эпик асарлардир. Демак, насрый йўлда ёзилганининг ўзи асарни Э.га мансуб этмайди, «насрый асар» ва «эпик асар» тушунчалари битта маънони англатмайди. Э.да «утмишда бўлиб ўтган» воқеалар қаламга олинади, зеро, замонда кечиб бўлган воқеаларгина ҳикоя қилиниши мумкин. Ҳатто олис келажак қаламга олинган фантастик асарларда ҳам муаллиф бўлиб ўтган воқеаларни ҳикоя қиласи, ўкувчи гўё бўлиб ўтган воқеалар билан танишади. Демак, эпик асарда ёзувчи билан у тасвирлаётган

бадиий воқелик, ўкувчи билан у тасаввурида қайта тиклаётган бадиий воқелик орасида ҳамиша «мен – ўтмиш» тарзидаги вақт ҳисси мавжуддир. Агар драматик асарларда характерлараро конфликт, лирик асарларда ички конфликт (асардаги акси жиҳатидан) етакчилек қылса, Э.да конфликтнинг учала тури қоришик ҳолда намоён бўла олади.

Э.ни жанрларга ажратиш принциплари масаласида адабиётшунослиқда турличалик мавжуд. Бунда бир қатор хусусиятларни эътиборга олиш зарур бўлади. Аввало, эпик асарлар ҳаётни қамраб олиш кўламига кўра фарқланади. Мас., эпик асар қаҳрамон ҳаётидан биргина эпизодни (ҳикоя), бутун бир этапни (қисса) ёхуд қаҳрамон ҳаётининг катта бир даврини (роман) қаламга олади. Шунга кўра, адабиётшунослиқда катта, ўтра ва кичик эпик жанрлар ажратилади. Бироқ Э.га драманинг кириб келиши ва сюжет вақтининг қисқара бориши баробарида, бу тамойилнинг ожизлиги аён бўлиб қолмоқда. Ҳозирги адабиётда қаҳрамон ҳаётининг катта бир даври эмас, атиги бир босқичи қаламга олинган романлар ҳам яратилмоқда (мас., «Кеча ва кундуз», «Улуғбек хазинаси»). Табиийки, бундай ҳолатда эпик асарларни жанрларга ажратишида уларнинг бошқа жиҳатларига ҳам эътибор қаратиш зарур бўлади. Жумладан, асарда қўйилган муаммолар кўлами жанр хусусиятларини белгиловчи унсур сифатида олиниши мумкин. Бу жиҳатдан роман дунёю даврни билиш мақсадига қаратилган бўлса, қисса марказида қаҳрамон характеристери, ҳикояда эса конкрет ҳаётий воқеа туради. Кўринадики, роман, қисса, ҳикоя жанрларига мансуб асар қаҳрамонлари асарда тутган мавқеи, аҳамияти, вазифаси жиҳатидан фарқланади. Роман муаллифи учун қаҳрамон – восита, дунёни англаш (буниси мақсад) воситаси, қиссанавис учун қаҳрамоннинг ўзи мақсад (воқеа-ходисалар восита), ҳикоянавис учун воқеанинг ўзи мақсад бўлиб қолади. Э.ни жанрларга ажратишида ҳажм ҳам мезон бўлолмайди. Зоро, айрим ҳикоя ёки романлар ҳажман қиссаларга яқин бўлиши ва аксинча ҳолатлар кузатилиши мумкин. Бироқ, одатан, ҳикоя, қисса ва романлар ҳажми саноқдаги тартибга мос тарзда каттариб бориши ҳам инкор қилиб бўлмайдиган ҳақиқатдир. Э. жанрлари бадиий шакл хусусиятлари билан ҳам фарқланади. Мас., сюжет нуқтаи назаридан олинса, роман кўп чизиқли мураккаб сюжетга эгалиги, қисса сюжети, асосан, боз қаҳрамон теварагида уюшиши, ҳикоя сюжети, одатда, битта ёки бир-бирига узвий боғлиқ бир неча воқеа асосига қурилиши кузатилади.

Ҳикоя, қисса ва роман Э.нинг асосий жанрлари саналади. Шу билан бирга, эпик турнинг асосий бўлмаган қатор жанрлари ҳам мавжуд. Уларни ҳаётни бадиий қамраш кўлами жиҳатидан қуйидаги тартибда таснифлаш мумкин: а) кичик эпик шакллар: латифа, масал, ҳикоят, ривоят, эртак, афсона, бадиа, этюд, очерк, эссе; б) ўрта эпик шакллар: қисса (повесть); в) халқ эпоси, эпик достон, роман, эпопея.

Мазкур таснифга айрим изоҳларни киритиб ўтиш зарур. Мас., бадиа, этюд, очерк кабилар соф бадиий проза намунаси бўлмай, бадиий-публицистик жанрлардир. Ҳозирги адабиётда оммалашиб бораётган эссе жанри, биринчидан, бадиий-публицистик характерга эгалиги, иккинчидан, ҳажм эътибори билан турлича кўринишларга (кичик ҳикоя шаклидан то катта роман шаклигача) эгалиги билан характерланади. Мас., Х.Давроннинг «Бибихоним қиссаси ёхуд тугамаган достон», Б.Аҳмедовнинг «Мирзо Улуғбек» асарлари моҳиятан эссе, бироқ улар ҳажм эътибори билан кескин фарқланади. Ёки айрим тадқиқотчилар масални лиро-эпик жанрга мансуб ҳисоблаб, бунда қиссадан чиқарилган ҳиссани лирик ибтидо сифатида қабул қиласидар. Ҳолбуки, ҳар қандай масалда воқеа (жуда қисқа бўлса ҳам) ҳикоя қилиниши эътиборга олинса, уни эпик асар санаш керак. Акс ҳолда, воқеабанд шеърларни ҳам, чиқарилаётган хulosса очиқроқ ифодаланган эпик асарларни ҳам лиро-эпик турга мансуб этишга тўғри келар эди. Шунга ўхшаш ҳолат «достон» жанри лирикага ҳам, Э.га ҳам тааллуқли бўла олади, шу сабаб «лирик достон», «эпик достон», «лиро-эпик достон» сингари жанр атамалари кўлланилади, бунда конкрет достонни у ёки бу турга мансуб этиш учун ундаги эпик ва лирик унсурлар салмоғи асосга олинади; 2)-тор маъносида халқ оғзаки ижодидаги шеърий ёки насрый йўлда яратилган воқеабанд асар; халқ Э.и, қаҳрамонлик Э.и терминлари билан ҳам юритилади. Гарчи қаҳрамонлик Э.и ва халқ Э.и терминлари синоним сифатида ишлатилса ҳам, назарда тутилаётган маънога халқ Э.и термини мувофиқроқ. Чунки бу ҳолда халқ Э.и термини қаҳрамонлик Э.и, романик Э., тарихий Э., жангнома ва ҳ. жанр кўринишларини ҳам қамраб олади. Халқ Э.и таркибидаги мазкур жанр кўринишларининг ҳар бири ўзига хос специфик белгиларга эга. Халқ Э. уни яратган халқнинг қаҳрамонона ўтмиши, юрт тақдиридаги муҳим воқеалар, қаҳрамонларнинг эл-юрти учун фидокорона кураши ҳақида ҳикоя қиласиди, халқ (маданияти, майший турмуши, ижтимоий-сиёсий ҳаёти, эътиқоди, урф-одатлари ва ҳ.) ҳаётининг муайян даврдаги яхлит манзарасини тасвирлайди. Халқ Э.ининг илдизлари

жуда қадим замонларга бориб тақалади: «Гильгамеш», «Илиада» «Одиссея», «Рамаяна», «Маҳабхорат», «Алпомиш», «Манас» сингари Э.ларнинг ёши мингийиллікклар билан ўлчанади. Саналганлар каби йирик ҳажмли асарлар билан бир қаторда халқ Э.и нисбатан кичик ҳажмли шаклларда (тарихий қүшиқ, балладалар, билина, дoston) ҳам мавжуд бўлиб, улар муайян туркумга бирлашади ва бу нарса эпик кўламдорликни таъминлайди. Мас., «Гўрўғли» туркум достонлари, Илья Муромец ҳақидаги билиналар, Роланд ҳақидаги қўшиқлар ва х.

ЭРКИН ШЕҮР (русчадан калька: «вольный стих») – рус шеъриятидаги силлабо-тоник шеър тизими асосида пайдо бўлган, мисраларидаги стопалар сони бир хил бўлмаган шеър шакли. Э.ш.да барча стопалар бир хил (ямб) бўлгани ҳолда, уларнинг мисралардаги сони бир хил эмас, яъни шеър бошидан-охирига қадар битта ўлчовда ёзилмаган, унда изометрия ҳодисаси кузатилмайди. Кейинча аналогия асосида мисралардаги хорей ёки аналест стопалари (қ. *стопа*) сони турлича бўлган шеърлар ҳам Э.ш. деб аталган. Рус шеършунослигида бир-биридан фарқланувчи шеър шаклини билдирувчи «вольный стих» ва «свободный стих» бирикмаларидаги «вольный» ва «свободный» аниқловчилари ўзбек тилига бир хил – «эркин» сўзи билан таржима қилиниши сабаблидир, манбаларда ва амалиётда Э.ш. термини кўпинча *верлибр* ва *сарбастга* синоним тарзида ишлатилади. Бироқ бу тўғри эмас (қиёсланг: *верлибр*, *сарбаст*). Ўзбек шеъриятида Э.ш. бармоқ асосида шаклланган бўлиб, XX асрнинг 20 – 30-йилларидан оммалашди. Э.ш.га хос хусусият шуки, унда мисралардаги бўғинлар сони, уларнинг ўзаро қофияланиши қатъий тартибда эмас, бироқ шеър давомида ўлчовда teng ва ўзаро қофиядош мисралар эркин тарзда такрорланади. Худди шу жиҳати уни бармоққа яқинлаштиради. Яъни рус силлабо-тоник шеърияти негизида пайдо бўлган Э.ш. («вольный стих») ўзида силлабо-тоник шеърга хос белгилар (стопалар)ни сақлаб қолгани каби, ўзбек Э.ш.и ҳам ўзида бармоққа хос айрим хусусиятларни сақлайди. Мас.,

Алкоғоль		а
бизнинг қонларга	3+5	б
ва рўзгорларга,	5	б
дин аҳкомлари,	5	в
феодал арконлари,	7	в
капитал қонунлари-ла,	3+5	б
урф-одатларга		б

үйланиб,	5+3	г
ичкуёв,	3	д
яьни ёв		д
бўлиб	3+2	г
кирмишдир.	3	е
 Алкоголь –	3	a
бизлар кул,	4	
руҳан тушкун,	4	ж
узван тутқун,	4	з
ризқимиз жигархун,	6	з
ҳаёт хумори – банг	6	и
бўлганда,	3	б
нозли бир бузук,	5	
созли бир сатанг,	5	и
инжиқ бир келин		з
сингари,	5+3	в
ўз ҳукмин ўтказиб,	6	г
майшат – чимилдиқقا	7	б
кирмишдир.	3	е

F.Гуломнинг «Алкоголь» шеъридан олинган бу парчада 3, 4, 5 ва 6 бўғинли туроқлар қатъий эмас, эркин тарзда такрорланади, шундай эркинлик мисраларнинг қофияланишида ҳам кузатилади.

ЭРТАК – халқ оғзаки ижодидаги эпик жанр, чўпчак. Э. барча халқлар оғзаки ижодида қадимдан шаклланган ва фаол жанрлардан саналади. Э.лар, асосан, насрда яратилиб, сюжети асосида сеҳрли-фантастик, саргузашт ёки майший характердаги воқеалар ётади, воқеалар баёни ва талқинда ижодий фантазия, тўқима салмоқли ўрин тутади. Шунинг учун эртакчилар томонидан ҳикоя қилинган Э. тингловчилар томонидан, аввало, эртак деб, ижодий фантазия маҳсули деб қабул қилинади. Бироқ бу Э.лар воқелик билан алоқасини тамомила узган дегани эмас, Э.ларда (айниқса, майший Э.ларда) реаллик билан алоқа яққол кўзга ташланади. Қадимийлиги туфайли Э.ларда аждодларимизга хос мифологик тафаккур элементлари, тотемизм, анимизм қолдиқлари сакланиб қолган. Мазкур ҳол сеҳрли Э.лар билан ҳайвонлар ҳақидаги Э.ларда кўпроқ сезиладики, бу уларнинг нисбатан қадимийроқ эканлигининг далолатидир. Кишилик жамияти тараққиёти баробарида Э.лар ҳам сифат жиҳатидан ўзгариб боради: ҳаётий тажриба ва кузатишларга

асосланган майиши мавзудаги Э.лар кенгрөк ўрин эгаллай бошлайди, сехр-жодудан деярли фориғ саргузашт-авантюр сюжетли Э.лар яратилади, ҳайвонлар ҳақидаги Э.ларнинг *потемистик* ва *анимистик* мазмун йўналиши мажозийлик билан алмашади ва ҳ. Хуллас, Э. жанри тараққиётида ҳаётга яқинлашиб бориш тенденцияси кузатилади: уларда ижтимоий ҳаётнинг турли қирралари, мураккаб ижтимоий муносабатлар, ота-боболарнинг ижтимоий идеаллари акс этади. Фаол ва кенг оммалашган жанр сифатида Э.лар кишилик жамиятида улкан тарбиявий миссияни ўтагани шубҳасиздир. Кўплаб ижодкорлар (мас., А.Пушкин, Ҳ.Олимжон) дилларида сўз санъатига меҳр болалиқда эшитган Э.лар туфайли туғилганини эътироф этадиларки, ёзма адабиётда жанрга хос унсурлардан кенг фойдаланилиши, адабий Э.нинг турли кўринишлари мавжудлиги шундан. Ҳ.Андерсен, Ш.Перро, aka-ука Гrimmlar, А.Пушкин каби ёзувчилар яратган адабий Э.лар жаҳон миқёсида шухрат топган. Ўзбек адабиётида F.Гулом, Ҳ.Олимжон, А.Мухтор ижодида адабий Э.нинг яхши намуналари бор.

ЭССЕ (фр. *essai* – тажриба, синааб кўриш) – муаллифнинг у ёки бу масала (муайян воқеа-ҳодиса, ҳаётий ҳолат ва ш.к.) бўйича шахсий мулоҳазалари баён қилинувчи насрый асар; адабий жанр. Э.нинг композицион қурилишига ҳам, тематик томонига ҳам чекловлар кўйилган эмас, у муаллифга ўз фикр-мулоҳазалари, кечинмаларини том маънода эркин ифодалаш имконини беради. Тематик жиҳатдан тарихий, биографик, адабий-танқидий, илмий-оммабоп ва ш.к. кўринишларга эга бўлган Э.га хос яна бир хусусият шуки, у кўйилган масаланинг тугал ечимини тақдим этиш даъвосини қилмайди, масала муаллиф ҳаётий тажрибасидан келиб чиқсан ҳолда, унинг онгию қалбидан ўтказиб ёритилади. Шу боис Э. марказида муаллиф шахси турлади, баён кўзга яқол ташланувчи субъектив бўёқдорликка эга бўлади. Мутахассислар Э.нинг мустакил адабий жанр сифатида шаклланиши XVI асрга тўғри келади деб ҳисоблайдилар ва буни француз адаби M.Монтень (1533 – 1592) фаолияти билан, жанрнинг номини эса унинг 1580 йили чоп этилган «Essays» (Тажрибалар) асари билан боғлайдилар. Айни чоғда, Э.га хос элементлар бунга қадар ҳам бўлгани, жумладан, уларни антик давр адаби Лукиан нуткларида кузатиш мумкинлигини таъкидлайдилар. Э.га хос хусусиятлар Шарқ адабиётида, хусусан, ўзбек адабиётида ҳам қадимдан мавжуд (мас., Навоий. «Махбуб ул-кулуб»). Шуни ҳам қайд этиш жоизки, Э. табиатига хос эркинлик унинг ривожига нафақат профессонал ёзувчилар,

балки бошқа соҳа кишилари (олимлар, файласуфлар ва б.)нинг ҳам сезиларли ҳисса қўшишига имкон берди. Э.га хос хусусиятлар сўнгги давр адабиётидаги бошқа жанрлар структурасига ҳам сезиларли таъсир этди, айрим йўналишларнинг эса (мас., *постмодернизм*) устувор белгиларидан бирига айланди. Ҳозирги ўзбек адабиётида Ш.Холмирзаев, О.Мухтор, Х.Даврон, Х.Султонов каби ижодкорлар, шунингдек, М.Қўшжонов, О.Шарафиддинов, У.Норматов, Н.Каримов каби адабиётшуносларнинг Э. жанридаги асарлари китобхонлар орасида машҳур.

ЮМОР (ингл. *humour* – кайфият, мойиллик) – 1) комиклик турла-ридан бири. Бадиий асарда кишилар, воқеа-ходисалар устидан енгил, дўстона, бегараз кулиш. Ю.да кулгилилик очик-ошкора намоён бўлади, аммо ошкор кулги остида енгил-елпи ҳазил, кўнгилхўшлик мақсади эмас, жиддийлик мавжуд. Ю. ўз обьектида қисман бўлса-да идеалга мувофиқ жиҳатларни кўради, уни мукаммаллаштириш, нуқсонларини бартараф қилиш, ундаги умуминсоний қимматга молик жиҳатларни юзага чиқариш мақсадини кўзлайди. Шунинг учун Ю.да танқид руҳи, нуқсонлар устидан кулиш билан бирга хайриҳоҳлик, ачи-ниш ҳам мавжуд. Ю.нинг қатъий чегараларини белгилаш ниҳоятда мушкул, шу боис у кўпинча комикликнинг сатира, киноя, сарказм (к.) каби кўринишлари билан қиёсан тушунтирилади. Жумладан, манба-ларда Ю.нинг, сатирадан фарқли ўлароқ, обьектни тўла эмас, балки унинг айрим жиҳатларинигина инкор қилиши таъкидланади. Ю.да кулги ниқоби остида жиддийлик, кинояда эса жиддийлик ниқоби остида кулги яширган бўлади. Шу қарашлардан келиб чиқиб баъ-зан обьектга нисбатан хайриҳоҳ муносабатни Ю.нинг белгиловчи хусусияти сифатида кўрсатиш ҳоллари ҳам бор. Бироқ бу қарашга тўла қўшилиб бўлмайди, чунки Ю.нинг эмоционал диапазони ғоятда кенг бўлиб, у шафқат ва ҳамдардликдан (F.Улом. «Менинг ўгригина болам») тортиб шафқатсиз (А.Қахҳор. «Бошсиз одам»), ҳатто «қора юмор»гача қамраб олади. Сарказм, закийлик, карикатура каби ко-миклик кўринишларидан фарқли равишда, Ю. ва сатира асар па-фоси даражасига кўтарилиши мумкин. Ю.га пафос кўриниши си-фатида қаралганда унинг идеалга бутунлай зид бўлмаган обьектга қаратилган бўлиши (Г.Поспелов) назарда тутилади. Агар юмористик пафос обьектга маънавий-ахлоқий мавқедан ёндашса, сатирик пафос обьектнинг ижтимоий мавқедан туриб инкор қилинишини кўзда тутади. XX аср жаҳон адабиётида Ю.даги хайриҳоҳлик, асо-сан, сақланиб қолгани ҳолда, ачиниш туйғуси сусайиб боргани ку-

затилади. Мазкур ҳол, айниқса, модернистик ва постмодернистик адабиётларда яққол кўзга ташланадики, уларда «қора юмор» устуворроқ мавқе тутади. Бу эса уларнинг дунёқарашидан келиб чикувчи обьектни ўзгартириш, тузатиш имконларига ишонмаслик, бунга умидсиз қараш натижасидир; 2) бадийлик модуси. Ю.га хос «мен – оламда» концепциясига кўра, қаҳрамон ижро этаётган роль унинг тақдери ёки бурчи эмас, балки бир ниқоб, холос. Юмористик модусдаги энг олий қадрият – индивидуаллик, фақат бу индивидуаллик қаҳрамон муттасил алмаштириб турувчи ниқоб ортида қолиб кетади. Юморист ўз вазифасини ниқоб ортидаги моҳиятни, индивидуалликни кўриш ва кўрсатишда деб билади. Муҳими, бошқа модуслардаги каби қаҳрамон юморист учун ҳам ўзини англаш обьекти, яъни муаллиф қаҳрамон (унинг ўз ниқобига мос далли-девона қилик-ҳаракатлари) орқали ниқобдан халос бўлиш йўлини «яшаб ўтади». Худди шу йўлни асарни қабул қилиш жараёнида ўкувчи ҳам босиб ўтадики, шу жиҳатдан субъект – обьект – ўкувчи бирлиги ҳақида, демак, бадийлик модуси ҳақида гапириш мумкин бўлади. Mac., Э.Воҳидовнинг «Донишқишлоқ латифалари» туркумига кирган шеърларнинг ҳар бири – Матмусанинг турли ҳаётий ҳолатлардаги «ниқоб»лари. Бу воқеалар – Матмусанинг ўзини намоён этиш, никомаларга қодирлигини кўрсатиб кўйиш, мавжудлигини тасдиқлаш ўйлидаги хатти-ҳаракатлари. Лекин мазкур хатти-ҳаракатларда кўп номувофиқликлар (мақсад билан имкон, мақсад билан восита, даъво билан реаллик ва х.) кузатиладики, қачонки қаҳрамон шуни англаса, ниқобдан халос бўлиши ва ўзлигига қайтиши мумкин. Э.Воҳидов латифаларида Матмуса доим ҳам ниқобдан халос бўлмайди. Лекин шоир ниқобдан халос бўлиш заруратини англатади, яъни Матмуса эплай олмаган ишни китобхон уддалашига умид қиласиди. Шу асосда туркумни ўқиш жараёнида субъект – обьект – ўкувчи бирлиги таъминланади, «Донишқишлоқ латифалари» яхлит ҳолда юмористик бадийлик модусига тааллуқли бўлади.



«ЯНГИ РОМАН» – XX асрнинг 50-йилларида майдонга чиққан бир қатор француз ёзувчилари (Н.Саррот, А.Роб Грийе ва б.)нинг роман бобидаги экспериментал изланишларига хос хусусиятларни англатувчи шартли термин. Я.р. тарафдорлари анъанавий проза ўз имкониятларини тўла сарф этиб бўлган деб ҳисоблаб, янгича ривоя йўсунини ишлаб чиқишига ҳаракат қилганлар. Я.р. намояндадарининг қарашлари «кансон ўлеми» фалсафасига (А.Фуко) ҳамоҳанг: улар шахс тушунчасининг ўзи эскирган, шунинг учун уни анъанавий про-задаги каби марказга қўйиб тасвирлаш, анъанавий тарзда бадиий талқин қилишни ноўрин билиб, қаҳрамонсиз ва воқеабанд сюжетсиз романлар яратишни тажриба қиладилар. Анъанавий роман, умуман, эпосга хос мазкур энг муҳим унсурлар Я.р. намояндадари тажрибалирида ташки дунёдаги нарсаларнинг ҳолис ва бўртиқ тасвири, он-гости қатламларидаги сирли эврилишлар, мозаика қонунияти асосида бутунликка бирикувчи фикр-кечинмалар билан алмаштирилади, ривоя кўпроқ эссега хос хусусиятлар касб этади.

Ў

ЎЗЛАШТИРИШ – адабий алоқанинг кўринишларидан бири, адабий таъсирнинг натижаси; ижодкорнинг адабиётда ўзига қадар мавжуд бўлган сюжет, образ, форма ва ш.к.ларни истифода этиши. Адабий жараёнда Ў. англанган ё англанмаган тарзда воқе бўлиши мумкин. Биринчи ҳолда ижодкор аввал яратилган асардан Ў.га чоғланаркан, салафи билан ижодий мусобақага киришади, натижада ўзлаштирилган сюжет, образ ва ш.к.ларнинг янгича ва ўзига хос бадиий талқини вужудга келади. Мас., А.Навоий онгли равишда «Низомий панжасига панжа урган»и, ҳазратнинг Низомий билан ижодий мусобақага киришиш нияти, асарининг устози яратган достондан қайси жиҳатлари билан фарқ қилиши «Фарҳод ва Ширин» достони дебочасида аниқ-равshan ифодаланган.. Айтиш керакки, А.Навоий амал қилган ижодий ёндашувгина Ў.нинг адабий жараёнда ижобий ҳодиса бўлишини, пировард натижада бадиий тафаккур ривожига самарали таъсир кўрсатишини таъминлайди. Бадиий ижод амалиётида анча кенг учрайдиган англанмаган тарзда воқе бўлувчи Ў.нинг омиллари турлича бўлиб, асосийларидан бири сифатида таъсирланиш кўрсатилиши мумкин. Ижодкор қачондир ўқиган асардаги воқеа, ҳолат, ифода ва ш.к.лардан кучли таъсирланиши мумкинки, вақт ўтиб ўша воқеа, ҳолат, ифода ва ш.к.ларнинг ўзи унутилса-да, таассурот унинг онгости қатламларида чукур из қолдирган, бас, у вақти келиб ижод жараёнида онг ости қатламларидан қалқиб чиқиши ва беихтиёр асарда акс этиши ҳам мумкин. Шу йўсин воқе бўлган Ў.лар, мас., Навоий шеърларидаги оҳанг, рух, ташбеху тамсиллар, лирик ҳолатлар Бобурдан тортиб ҳозирги ғазалчиликка қадар кузатилиши мумкин. Мазкур ҳол, умуман, Ў.лар адабий ҳодисаларнинг, қайси замон ва маконга мансублигидан қатъи назар, бир-бири билан диалогик алоқада мавжуд эканини ёрқин намоён этади.

Ў. қамрови ниҳоятда кенг тушунча бўлиб, у турлича кўриниш ва турли даражада намоён бўлади: *тақлид* (қ.), *стилизация* (қ.), *пародия* (қ.), *реминисценция* (қ.), *парафраза* (қ.) каби. Умуман олганда, Ў. адабий жараёнда қонуният мақомида мавжуд бўлган ижобий ҳодиса ва шу маънода уни кўр-кўёна тақлиддан, *плағиат* (қ.), *эпигонлик* (қ.) кабилардан фарқламоқ зарурдир. Шунингдек, Ў. билан миллий адабиётлар орасидаги типологик ўхшашликларни фарқлаш керак. Мас., Европа маърифатчилик адабиёти билан жадид адабиёти орасида мавзу, ғоя, образ, бадиий шакл кабиларда кузатилувчи ўхшашликлар адабий алоқа ва таъсир (гарчи буни тўла инкор қилиб бўлмаса ҳам) натижаси эмас, балки уларни келтириб чиқарган ижтимоий-тариҳий, маданий-маърифий омилларнинг ўхшашлиги билан изоҳланади. Ёки 80-йиллар ўзбек насрода бўй кўрсатган «ортиқча одам», «кичкина одам» каби персонаж типларини ҳам XIX аср рус адабиётидан Ў. дейиш унчалик тўғри эмас, чунки давр ижтимоий воқелигининг ўзида шундай шахс типлари бўлган ва адабиёт уларни акс эттирган.

ЎХШАТИШ – тасвир объектини бошқа нарса-ҳодисага ўхшатиш орқали ёрқин ва бўрттириб тасвирлашга асосланган бадиий тасвир воситаси бўлиб, бунда ўхшатилаётган нарса-ҳодисалар учун умумий белги-хусусиятларга таянилади. Айрим адабиётларда Ў. кўчимнинг содда тури деб ҳам юритилади. Бироқ бу унчалик тўғри эмас. Чунки Ў.да маъно кўчиши кузатилмайди, унда, маъно кўчишининг ўхшатиш асосидаги тури бўлмиш метафорадан фарқли ўлароқ, ўхшатилаёттан нарса ҳам, ўхшаёттан нарса ҳам матнда сўз билан ифода этилади. Мас., қиёсланг: «Камондек қошлари киприклирида ўқ отар доим» – «Бағрим нишон айлар икки камонинг». Иккала мисрада ҳам қош камон (ёй)га ўхшатилмоқда, бироқ биринчи мисолда ўхшатилаёттан нарса (қош) ҳам, ўхшаёттан нарса (камон) ҳам матнда бор, иккинчи мисолда ўхшатилаётган нарса тушириб қолдирилган ва у ўхшаётган нарса номи билан аталган. Яъни биринчи мисол ўхшатиш бўлса, иккинчиси метафора (истиора)дир. Аксарият ҳолларда Ў. турли грамматик воситалар: -дек (-дай) кўшимчаси ёки «гўё», «каби», «худди», «мисли», «мисоли», «янглиғ», «бамисоли» каби кўмакчилар воситасида амалга ошади. Шу билан бирга, Ў. грамматик воситаларсиз амалга ошган ҳоллар ҳам тез-тез кузатилади. Мас., «Мұхаббат – чиройли капалак...», «Умр – күмсоат ҳам яримлаб қолди» (Ш.Раҳмон). Мумтоз адабиётшуносликда Ў. *ташбех* деб юритилади ва у шеъриятда жуда кенг қўллангани боис, илми бадиъда муфассал ишланган санъатлардан саналади (қ. *ташбех*).

ЎТА ЧЎЗИҚ ҲИЖО – қаранг: ҳижо

K

ҚАЙД (ар. قید – банд, боғланган) – қаранг: муқаййад қофия

ҚАЛБ (ар. قلب – тескари қилмоқ, ағдармок) – мумтоз адабиётдаги шеърий санъат, сўзни чаппасига ўқиса ҳам маъно чиқадиган тарзда кўллаш, жумлага шу тарзда тартиб бериш; Ғарб адабиётшунослигига *латиндром* (к.) деб юритилади. Қ.нинг бир қатор кўринишлари фарқланади: 1) мақлуб-и кулл – бунда байтдаги сўз (ёки жумла)нинг ҳарфлари, уларнинг тартиби ва микдорини ўзгартирганинг ҳолда чаппасига ўқилса, бошқа бир сўз келиб чиқади: роз – зор, кўй – йўқ, лўқ қилғай – ёғлиқ қўл; 2) мақлуб-и баъз – сўз (ёки жумла) таркибидаги ҳарфлар ўрнини қисман ўзгартириб чаппа ўқилса, бошқа бир сўз келиб чиқади: қарам – камар, қамар – рақам; 3) мақлуб-и мужаннаҳ – бунда мақлуб-и кулл талабларига жавоб берадиган сўзлардан бири мисра (ёки байт) бошида, иккинчиси мисра (ёки байт)нинг охирида жойлашади; 4) мақлуб-и муставий – бунда бутун бошли ибора чаппасига ўқилганда, шу иборанинг ўзи ҳосил бўлади. Қ.нинг ушбу нави турли даражада (мисранинг бир қисми, мисра ёки байт доирасида) воқе бўлиши мумкин.

Бу ўринда Қ. санъати араб имлоси қоидалари асосида амалга ошгани, ҳозирги ёзувода мазкур санъат кўлланган ўринларни илғаб олиш қийинлигини ҳам ёдда тутиш лозим.

ҚАРИБ (ар. قریب – яқин) – аруз баҳрларидан бири, музориъ баҳрига яқин бўлгани учун шундай номланган. Манбаларда бу баҳрни Юсуф Нишопурий кашф этгани айтилади. 2 та *мафоийлун* (v – – / v – –) ва 1 та *фоилотун* (– v – –) аслларининг такоридан ҳосил бўлади. Қ. баҳри араб шеъриятига хос бўлиб, ўзбек шеъриятида кўлланмаган. Навоийнинг «Мезон ул-авzon» асарида ҳам, Бобурнийнг «Мухтасар»ида ҳам қариби мусаддаси солим (v – – / v – – / –v – –) вазнига:

Жамолингдин қуёш асру бор ўётлиқ,
Сочингга банда боя ичра сунбул отлик, –

байти мисол сифатида келтирилган. Бундан ташқари, Бобур мазкур баҳрнинг яна ўн уч вазнига маҳсус мисол сифатида байтлар битган. Mac.:

*Қаро қўзум, берига кел қарам этгил,
Мени висол бирла муҳтарам этгил, –*

байти қариби мусаддаси мақбузи маҳбун (v – v – / v – v – / v v – –) вазнида ёзилган.

ҚАСИДА (ар. قصيدة – мақсад, ният қилиш) – мумтоз лирикадаги жанр; бирор шахс (шоҳ, арбоб, қаҳрамон), бирор муҳим воқеа, табиат ва ш.к.ларни мадҳ этиш, уларнинг юксак фазилат ва хусусиятларини эътироф этиш мақсадида ёзиладиган шеър. Қ. ғазал типида (а-а, б-а, в-а...) қофияланади, лекин ундан фарқли ўлароқ ҳажм жиҳатидан чекланмаган бўлиб, унда тахаллус келтириш шарт ҳисобланмайди. Кимнидир ёки ниманидир мадҳ этиш мақсади устувор бўлгани учун, Қ., одатда, кўтаринки, тантанавор услубда, баланд пардаларда ёзилади. Мумтоз шеъриятда Қ.нинг композициясига қўйилувчи талаблар ишлаб чиқилган. Унга кўра, Қ. кириш (насиб ёки ташбиг), таъриф жойи, объектининг баёни (гузиргоҳ), мадҳ ва мамдуҳ (мақталувчи) ҳақига дуо ва шоир нияти (қасд) каби қисмлардан иборат бўлади. Агар Қ.да кириш қисми бўлмаса, маҳдуд деб аталади. Шарқ мумтоз шеъриятида Носир Хисрав, Унсурий, Анварий, Хоқоний, Дақиқий, Рудакий, Саккокий, Лутфий, Жомий, Гадоий, Навоий, Мунис, Комил каби шоирлар ижодида Қ. жанрининг яхши намуналари бор. Мумтоз адабиётда Қ.лар, асосан, ўша давр хукмдорлари, подшоҳларнинг мадҳига бағишлиланған. Шоир бирор шахсни ёки жойни мадҳ этар экан, ўзига хос муболағали ташбехлар кўллашга уринади. Mac., Навоийнинг Ҳусайн Бойқаро мадҳига бағишлиланған «Хилолия» қасидасида шундай мисралар бор:

*Шоҳлар шоҳи демай, ул шоҳларнинг шоҳиким,
Ҳар бири юз шоҳлар шоҳича тутқай мукнатин.*

Яъни «Уни (яъни Ҳусайн Бойқарони) шоҳлар шоҳи демайман, чунки (у) ҳар бири юз шоҳларнинг шоҳи бўлган шоҳларнинг шоҳидир. (Унинг) юксаклиги шу даражадаки, ҳар бири юз шоҳга шоҳ бўлган шоҳларнинг ҳар бири (унга) ўз мукнати, яъни бор давлатини, бойлигини тутади, оёғининг остига келтириб ташлайди». Қ.ни даст-

лаб икки турга бўлишган: 1) ортиқча мақтов, дабдабалардан холи бўлган фалсафий мазмундаги Қ.лар. Қ.нинг бу тури дастлаб араб адабиётида пайдо бўлган; 2) Қ.и маснуъ – ўзига хос безакларга эга бўлган, санъат даражасидаги Қ.лар. Шунингдек, айrim манбаларда Қ.лар мазмунига кўра Қ.и баҳория, Қ.и мадҳия, Қ.и фахрия, Қ.и хазония, Қ.и ҳажвия, Қ.и ҳолия, Қ.и ишқия, Қ.и хамрия каби турларга ҳам ажратилган. Янги давр шеъриятида ҳам, жумладан, Чархий, Чустий, Ҳабибий, Улфат, Э.Воҳидов каби шоирлар ижодида Қ. жанрида ёзилган асарлар учрайди. Хусусан, Эркин Воҳидовнинг машхур «Ўзбегим», «Инсон», «Кўллар» каби Қ.лари катта шуҳрат қозонган.

ҚАҲРАМОН, АДАБИЙ ҚАҲРАМОН – 1) асар персонажлари тизимида етакчи мавқе тутиб, гоявий-бадиий концепцияни шакллантириш ва ифодалашда муҳим роль ўйновчи шахс образи. Терминни бу маънода тушуниш эпик ёки драматик асар персонажларини дарожалашни кўзда тутади: сюжет воқеалари Қ. атрофида уюстирилиб, бошқа персонажлар у билан боғлиқ ҳолда асар воқелигига киритилади; улар Қ. билан интегратив алоқада (ҳоким-тобе) бўлиб, унга нисбатан ёрдамчи функцияларни бажаради. Кўп чизиқли мураккаб сюжет қурилишига эга йирик ҳажмли асарларда бир эмас, бир нечта Қ. ҳаракатланиши ҳам мумкин. Бу ҳолда персонажлар системаси ўз ичидаги микросистемаларга ажralиб, уларнинг марказида Қ.лардан бири туради. Мас., «Кеч» романининг бошланишида шундай микросистемалар иккита: бирининг марказида Зеби, иккинчисининг марказида Акбарали туради. Воқеалар ривожи давомида Зеби микросистемаси емирилиб, унинг ўзи Акбарали микросистемасининг элементига айланади, Мирёкуб ва Рассоқ сўфилар эса янги микросистемани ташкил қиласди. Бундан аён бўладики, «Кеч»да тўртта Қ. бор: Зеби, Акбарали, Мирёкуб ва Рассоқ сўфи. Ўз навбатида, бу Қ.лар ҳам асар сюжет-композицион қурилишидаги ўрни ва муаллиф концепциясини ифодалашдаги аҳамияти нуқтаи назаридан даражаланиши, боз ва иккинчи даражали Қ.ларга ажратилиши мумкин: романнинг сюжет-композицион қурилиши нуқтаи назаридан Зеби бош Қ. бўлса, бадиий концепциясини бутлаш ва ифодалашдаги роли нуқтаи назаридан Мирёкуб бош Қ.дир. Кичик ҳажмли эпик асарларда (ҳикоя ва асарият қиссаларда), одатда, битта Қ. ҳаракатланади. Бироқ бунга қатъий қоида деб қарамаслик керак, ундан чекинилган ҳолатлар ҳам кўплаб учрайди. Мас., тасвиirlанаётган ҳаётий ҳолатнинг ўзи етакчи эстетик аҳамият касб этган «Анор» (А.Қаҳҳор) ҳикоясида Туробжон ҳам, унинг хотини ҳам бирдек Қ. саналиши мумкин.

Қ. фақат эстетик категориягина бўлмай, этик категория ҳамдир. Шунинг учун адабиётшуносликда ижобий Қ., салбий Қ. тушунчалари ҳам фарқланади. Гарчи сўнгги йилларда адабий Қ.ларни бу тарзда таснифлаш танқид остига олиниб, унга адабиётни жўнлаштириш деб қаралаётган бўлса ҳам, тасвир предметига муаллиф муносабати мавжуд экан, бу қонуний ҳодиса бўлиб қолаверади. Фақат бу ўринда битта муҳим шарт бор: ижобий ёки салбий Қ.га аввалдан шаклланған симпатия ёки антипатия асосида муносабатда бўлмай, унга, аввало, эстетик ҳодиса сифатида ёндашиш зарур. Бу шарт ба-жарилмаган ҳолда ўқувчи бадиий воқеликни Қ.лардан бири ёки нари борса ровий нигоҳи билангина кўрадики, натижада ўқиш жараёни ижодийликдан мосуво бўлади. Адабиётшуносликда аксилқаҳрамон (қ) тушунчасининг мавжудлиги Қ. эстетик категориягина бўлмай, этик категория ҳам эканлигининг яна бир далилидир; 2) мумомала амалиётида, баязан илмда Қ. термини адабий асарда ҳаракатланувчи ҳар қандай шахс образи маъносида ҳам қўлланади. Бу ҳолда у персонаж терминига синоним бўлиб, ҳеч қандай даражаланишни кўзда тутмайди.

ҚАҲРАМОНЛИК (русчадан калька: «героическое») – бадиийлик модуси. Қ. бадиийлик модустлари ичida энг қадимиёси саналади. Кишилик жамияти тараққиётининг илк босқичларида яратилган асарлар марказида ғайриоддий куч-кудрат, матонатга эга қаҳрамонлар ҳаракатланади. Ҳалқ даҳоси уларни илоҳийлаштиради ва шунга яраша чексиз эҳтиром билан муносабатда бўлади (мас., Геракл, Ахиллес; Алломиш, Гўрўғли ва б.). Буни қаҳрамон атамасининг этимологияси ҳам ошкор қилиб туради: «*heros* – яримхудо, илоҳий одам». Қ. модусидаги асар марказига чиқарилган шахс учун умуминсоний қадриятларга асосланган олий мақсадни амалга ошириш мавжудлигини тасдиқлашнинг ягона усулига айланади. У ўзини ана шу олий мақсадни амалга оширувчи сифатида англайди, адолат, ҳақиқат йўлида фидойилик билан курашади; фавқулодда ақт-заковат ва куч-кудрати билан атрофдагилардан яқол ажралиб туради. Энг муҳими, бундай шахс тақдир ўзига белгилаган роль билан шахсий манфаатлари, майллари, имкониятлари орасида қарама-қаршилик кўрмайди. Аникроғи, у ўзининг шахсий манфаатларию брзу-истакларини шу мақсадга бўйсундиради, зарур бўлса, мақсад йўлида улардан иккиланмай воз кечади. Манбаларда Қ. модус сифатида фақат «қаҳрамонлар асри» учунгина хос (Гегель) тарзидаги қарашлар ҳам мавжуд. Бироқ бунга қўшилиш қийин. Чунки миллий давлатчилик

ни шакплантириш, миллий озодлик ва мустақилликни ҳимоя қилиш жамият олдидағи энг муҳим ва долзарб вазифага айланған даврларда уларни үддалаш айрим кучли шахслар зиммасига тушади. Яъни мамлакат мустақиллиги учун жиддий хавф туғилған паллаларда, жамият тараққиетидаги инқироз ҳолатларыда ёки таназзулдан кейинги қайта тикланиш даврларыда кишиларнинг қаҳрамонона хатти-харакатлари учун имкон ва әхтиёж туғилади. Ана шу әхтиёжни англаш, ўз навбатида, адабиётда Қ. модусини заруриятга айлантирадиқи, натижада мөҳияттан шунга мос күплаб образлар яратилади. Мас., уруш йилларыда яратилған «Муқанна» (Ҳ.Олимжон), «Маҳмуд Торобий» (Ойбек), «Жалолиддин» (М.Шайхзода) каби күплаб асарларда, шунингдек, истиқбол арағаларыда яратилған айрим асарларда (мас., Ҳ.Султонов. «Бунчалар ширинсан, аччик ҳаёт»; А.Ибодинов. «Қуёш ҳам олов») Қ. модуси етакчилик қилади.

ҚИЁСИЙ МЕТОД – фаннинг турли соҳаларида, жумладан, адабиётшунослиқда ҳам кенг қўлланувчи тадқиқот усули. Ушбу усул мөҳияти икки ёки ундан ортиқ нарса-ҳодисаларни ўзаро қиёслаб, уларнинг ўхшаш ҳамда фарқли томонлари, буларни келтириб чиқарган омилларни аниқлаш орқали муайян илмий хулоса ва умумлашмалар чиқаришдан иборатdir. Адабиётшунослиқда Қ.м.-ни қўллаш имконлари жуда катта, чунки қиёслаб ўрганилиши илмий жиҳатдан аҳамиятли бўла оладиган обьектлар доираси бениҳоя кенг: асар билан бошқа бир асар (бир адабнинг ёки бир неча адабнинг асари; бир жанрда яратилған асарлар, турли даврларда яратилған асарлар ва х.); бир адабий ҳодиса билан бошқа бир адабий ҳодиса (бир даврдаги адабий ҳодисалар; турли даврлардаги адабий ҳодисалар ва х.), бир давр адабиёти билан бошқа бир давр адабиёти, бир миллий адабиёт билан бошқа бир миллий адабиёт ва х. Қ.м. асосидаги тадқиқотлар кенг қўламли назарий умумлашмалар чиқариш, адабиётнинг яшаши ва тараққиетига оид умумий қонуниятларни аниқлаш имконини беради. Адабиётшунослиқда Қ.м. XIX асрдан, айниқса, кенг қўлланила бошлади, адабий ҳодисаларни тарихий аспектда қиёслаб ўрганишга эътибор кучайди: тарихий-қиёсий адабиётшунослик (қ. компаративизм) майдонга келди. Ҳозирги адабиётшунослиқда ҳам Қ.м.дан, жумладан, тарихий-қиёсий, қиёсий-типологик тадқиқ усулларидан кенг фойдаланилади.

ҚИССА (ар. *قصة* – ҳикоят, саргузашт) – 1) ҳалқ оғзаки ижодида кенг тарқалган воқеабанд ҳарактердаги, қаҳрамон ҳаёти ва саргузаштларини ҳикоя қилувчи ривоявий асар. Ҳалқ ижодидаги Қ.лар оғзаки

иқро қилингандар, фольклорнинг бошқа жанрлари каби вариантилилек хусусиятига эга бўлган. Кейинча кўплаб халқ Қ.лари иқтидорли кишилар томонидан (кўп ҳолларда уларнинг исми номаълумлигича қолган) адабий қайта ишланиб, ёзма шаклда – халқ китоблари сифатида яшай бошлаган (мас., «Қиссаи Машраб», «Иброҳим Адҳам қиссаси», «Зуфунун қиссаси»). Ўзбек адабиётида пайғамбарлар ва авлиёлар ҳаётидан ҳикоя қилувчи ривоявий асарлар ҳам Қ. деб аталган (мас., Рабғузий. «Қисас ул-анбиё»; А.Навоий. «Тарихи анбиё ва ҳукамо»); 2) эпик турнинг ҳикоя ва роман қаторидаги учта асосий жанридан бири, повесть. Ўзининг жанр хусусиятлари билан Қ. ҳикоя ва роман оралиғидаги ҳодисадир: ҳикояда қаҳрамон ҳаётидан биргина воқеа, романда қаҳрамон ҳаётининг мураккаб ижтимоий муносабатлар тизимидағи катта бир даври, Қ.да қаҳрамон ҳаётининг бир босқичи қаламга олинади. Ҳикоянинг дикқат марказида воқеа, романнинг дикқат марказида қаҳрамон воситасида идрок этилаётган олам (жамиятнинг жорий ҳолати) турса, Қ.нинг марказида ҳамиша қаҳрамон турди. Яъни роман учун қаҳрамон восита, Қ. учун эса мақсаддир. Шунга кўра, Қ.даги барча воқеалар қаҳрамон атрофида уюштирилади, унинг сюжети романники каби кўп тармоқли бўлмайди. Адабиётшуносликда Қ. билан повесть төрминларининг қўлланиши турлича: улар синоним сифатида ҳам, бошқа-бошқа жанр номлари сифатида ҳам ишлатилади. Қ. билан ловестни бошқа-бошқа жанрлар деб тушуниш етарли асосга эга эмас, шунинг учун уларни синоним сифатида тушуниш кенгроқ оммалашган. Ҳозирги ўзбек адабиётида Қ. фаол эпик жанрлардан саналиб, XX аср давомида ўзбек қиссачилиги жиддий муваффақиятларга эришди. Бунда, жумладан, жанрнинг яхши намуналарини яратган Ф.Гулом, А.Қаҳҳор, О.Ёқубов, П.Қодиров, Ш.Холмирзаев, Ў.Ҳошимов, М.Мұҳаммад Дўст, Э.Аъзамов, Х.Султонов каби адилларнинг изланышлари, айниқса, самарали бўлди.

ҚИСҚА ҲИЖО – қаранг: ҳижо

ҚИТЪА (ар. قطعه – парча, бўлак, қисм, бир кесим) – Шарқ мумтоз шеъриятида кенг тарқалган, икки байтдан бир неча ўн байтгача (айрим манбаларда 19 байтгача деб белгиланган) ҳажмдаги, жуфт мисралари ўзаро қофияланиб, тоқ мисралари очиқ қолувчи (б-а, в-а, г-а тарзида) шеър шакли; лирик жанр. Гарчи кўпроқ ижтимоий-сиёсий, ахлоқий-тарбиявий, фалсафий мавзуларда яратилса-да, Қ. мазмун жиҳатидан ҳам, вазн жиҳатидан ҳам чегараланган эмас. Шарқ адабиётида насрый (дидактик, фалсафий, адабий-танқидий,

илмий ва б. характердаги) асарларда фикрни далиллаш, хуласалаш, изохлаш каби мақсадларда Қ.лар келтирилган бўлиб, улар бошқа ижодкорлар асарларидан олинган фалсафий жиҳатдан тे-ран, дидактик характерга эга бўлган байтлар – парчалардир. Яъни бу асарларнинг муаллифлари ўз мақсадларига мос байтларни келтиракан, аввал «қитъа» сўзини қайд этишган. Шунга кўра, айrim манбаларда билдирилувчи Қ. мустақил асар сифатида яратилиши ҳам, қасида ёки ғазал ичидан бир неча байтни ажратиб олиш натижасида пайдо бўлиши ҳам мумкин қабилидаги фикрларга кўшилиб бўлмайди. Бу ҳолда Қ. сўзининг луғавий ва истилоҳий маънолари фарқланмаган бўлади. Ҳолбуки, истилоҳий маънода Қ. муайян шакл хусусиятларига эга бўлган мустақил шеърий жанрни англатади, иккинчи томондан, муайян жанрга мансуб асар (ғазал ёки қасида)дан ажратиб олинган бир неча байт (ҳатто мазмунан ғоят бой бўлса-да) янги ва мустақил асар бўлиб қолмайди, парча парчалигича қолади. Модомики, насрый асарлардаги парчалар кўпроқ қасида ва ғазаллар таркибидан ажратиб олинган экан, уларда кейинча пайдо бўлган Қ. жанри белгилари (мас., қофияланиши) бўлиши табиий. Демак, бу ўринда Қ.нинг икки хил йўл билан яратилиши ҳақида эмас, жанрнинг генезиси ҳақида гапириш ўринли бўлади. Яъни насрый асарлардаги парчалар айни шундай (қофияланиши бирмунча эркин, ҳажми кичик, мазмун ва вазн жиҳатидан чекланмаган) шакл тақдим этувчи имконларни кўрсатганки, шу асосда мустақил Қ. жанри пайдо бўлган. Ўзбек адабиётида Қ.нинг илк намуналари А.Яссавийда учраса, кейин юқоридагича кулайликлари сабаб бўлса керак, деярли барча мумтоз шоирларимиз лирик меросида салмоқли ўрин эгаллади. Ўзбек адабиётида Қ. жанрининг қарор топиши ва такомилида А.Навоийнинг ўрни беқиёс (ҳатто баъзан Навоийни шеъриятимиздаги Қ. жанри асосчиси сифатида зътироф этадилар), «Хазойин улмаоний»га 210 та, «Девони Фоний»га 72 та, шунингдек, «Муншаот», «Ҳолоти Паҳлавон Муҳаммад», «Ҳамсат ул-мутахайирин» каби қатор бошқа асарларига яна ўнлаб Қ.лар киритилган. Шуни ҳам қайд этиш лозимки, Навоий меросида Қ.нинг ғазал типида эмас, маснавий типида қофияланувчи хиллари ҳам учрайди. Мас.:

Нукта асносида Ҳабибуллоҳ
 Деди, алкасибу ҳабибуллоҳ.
 Маъни айтур бу сўзга пири комил
 Ки, сўзи эрди ҳақ сари шомил.

*Ғараз эрмас бу касбдин дунё,
Бал эзур касбдин мурод фано.*

ҚОЛИПЛАШ – воқеабанд асарларга хос композицион усул, ривояни «ҳикоя ичида ҳикоя» тарзида бериш. Яъни бунда битта қолипловчи ҳикоя бўлади ва шу ҳикоя ичида бир неча (ўнлаб, юзлаб) ҳикоялар берилади. Қ. усули жуда қадим замонлардан бошлилаб қўлланган. Жумладан, ҳиндларнинг «Панчататра»си шу усулда қурилган энг кўхна асарлардан саналади. Шарқда машҳур «Минг бир кеч» эртаклари ҳам шу усулда қурилган бўлиб, уни Қ. усули нинг бетакрор намунаси дейиш мумкин. Кейинчалик ёзма адабиётда ҳам Қ. усули кенг оммалашди (Ж.Боккаччо. «Декамерон»; А.Навоий. «Лисон ут-тайр»; Гулханий. «Зарбулмасал» ва б.).

ҚОФИЯ (ар. قافية – мисра охиридаги сўзларнинг бир-бирига мос бўлиши) – шеърий мисралар охиридаги қўшимча, сўз, баъзан сўз бирикмаларининг еҳангдош бўлиб келиши, аниқроғи, уларнинг таркибидаги товушлар гуруҳининг оҳангдошлиги. Қ. ритмик жиҳатдан мисрани таъкидлаш билан шеър ритмининг ҳис қилинишида муҳим аҳамият касб этади. Шеърни ўқиш давомида (бу нарса, айниқса, ёддан ўқилганда ёки шеър тингланганда яққол сезилади) Қ. мисранинг тугаганидан дарак беради, пауза бажараётган ажратиш функциясини таъкидлайди. Шеъриятда Қ.нинг бир қатор кўринишлари (тўлиқ ва тўлиқсиз Қ.; унтилар оҳангдошлигигагина асосланган ассонанс Қ.; ундош товушлар оҳангдошлигигагина асосланган диссонанс Қ.; рус шеъриятида очиқ ёки ёпиқ бўғин билан тугашига қараб очиқ – «женская рифма», ёпиқ – «мужская рифма» ва б.) мавжуд. Жумладан, ҳозирги ўзбек шеъриятида қофиядаги товушларнинг қай даражада мослиги жиҳатидан оч (тўлиқсиз) ва тўқ (тўлиқ) Қ.лар ажратилади. Тўқ Қ.да қофиядош сўзларнинг товуш тарқиби тўла (мас., «бузуб – узуб», «лўкиллаганда – лопиллаганда», «излардан – юзлардан») мос келса, оч Қ.ларда қисмангина («дахрий – қаҳридан», «тутун – Аловуддин», «титраб – гулдурак») мос келади. Қ. шеърий нутқнинг оҳангдорлиги, мусикийлиги ва таъсирдорлигини таъминловчи муҳим унсурлардан бири саналади. Шеърда аҳамияти катталаги боис, мумтоз адабиётшунослиқда Қ.ни ўрганувчи маҳсус соҳа – *илми қофия* (қ.) шаклланган бўлиб, унда Қ., унинг унсурлари, турлари, эстетик вазифалари, Қ. билан боғлиқ санъатлар чуқур ўрганилган. Жумладан, мумтоз шеършунослиқда Қ.нинг унсурлари (*равий, ридф, ноира* ва б.), турлари (мутлақ Қ., муқайийяд Қ.) мукаммал таърифланган.

ҚҮШИҚ – халқ оғзаки ижодида шаклланған лирик жанр. Қ.нинг муҳим белгиси – ижро учун мүлжалланғанлық. Қ.лар бирор мусиқа жүрлигіда (лапар, ёр-ёр), муайян иш-харакат ритми (күш күшиқлари, чархчи қүшиқлари ва б.) ёки маълум бир руҳий ҳолат моҳиятига (йўқловлар) мос тарзда ижро қилинганды. Ёзма адабиёт, хусусан, XX аср ўзбек адабиётида фольклор анъаналарининг давоми сифатида Қ. жанри фаоллашди. Айрим манбаларда куйга солиб ижро этилган шеърни Қ. деб айтадиларки, бу фикрда ноаниқлик бор. Mac., Фурқатнинг «Сайдинг құябер, сайёд» мусаддаси ёки Ҳазинийнинг «Фарғона тонг отгунча» ғазалини куйга солиб ижро этиш билан, улар Қ. бўлиб қолмайди, биринчиси мусаддас, иккинчиси ғазаллигича қолаверади. Яъни уларни қўшиқчилек санъати нуқтаи назаридангина Қ. дейиш мумкин, адабиётшунослик нуқтаи назаридан эмас. Адабий жанр сифатидаги Қ., юқорида айтилганидек, халқ оғзаки ижоди анъаналари заминида шаклланған бўлиб, у бир қатор жанр хусусиятларига эга. Аввало, Қ. ижро учун мүлжалланади, унда ижро имкониятлари ҳамиша кўзда тутилади. Шунинг учун: 1) аксар Қ.лар мавжуд халқ куйларига мослаб ёзилади (мас., Ҳамзанинг «Миллий ашулалар учун миллий шеърлар» тўпламига киритилган «Йигла, Туркистон» шеъри халқда машҳур «Лўм-лўм Мамажон» ашуласи оҳангига мосланған); 2) мавжуд куйларга мосланмасдан, янги куй басталаш кўзда тутилган ҳолда ҳам Қ.нинг ритмик-интонацион, композицион қурилиши жиҳатидан шунга мос (енгил, ўйноқи оҳанг, товушлар уйғунлиги, мисра такрорлари ва б.) бўлиши талаб қилинади. Ҳозирги шеъриятдаги халқ оғзаки ижодига стилизация (к.) тарзida ёзилган шеърлар (мас., М.Юсуф. «Ёр-ёр»; С.Сайд. «Хоразмча», И.Мирзо. «Фарғонача» ва б.)нинг аксарияти Қ. жанрига мансуб. Таъкидлаш керакки, адабий жанр сифатидаги Қ. ижро учун мүлжалланған, куйи билан бирга туғилган бўлса ҳам, ҳофизлар томонидан куйланиши ё куйланмаслигидан қатъи назар, Қ. бўлиб қолаверади.

ҚҰШМА ВАЗН – бармоқ шеър тизимидағи вазн кўринишларидан бири, мисраларида бўғинлар сони бир хил бўлмаган, бироқ мисралар муайян тартибда қўшилганда изосиллабизм (бўғинлар сонининг тенглиги) тикланадиган ўлчов. Mac., У.Азимнинг куйидаги шеъри Қ.в.да ёзилган:

Қоқилади / ҳорғин отлар, 8 (4 + 4)

ғижирлайди / арава. 7 (4 + 3)

*Гилдираклар / изи йўлда 8 (4 + 4)
тўзғиётган / калава. 7 (4 + 3)*

Ушбу шеър вазнининг Қ.в. дейилишига сабаб шуки, агар унинг иккита мисрасини бирлаштиrsак, гўё мисралардаги бўғинлар сонининг тенглиги тикланади:

*Қоқилади / ҳорғин отлар, / тижирлайди / арава. 15 (4+4+4+3)
Гилдираклар / изи йўлда / тўзғиётган / калава. 15 (4+4+4+3)*

F'

ФАЗАЛ (ар. فَزْل – аёлларга хушомад қилиш, аёлларни мадх этиш) – Шарқ мумтоз шеъриятида энг кўп тарқалган лирик жанр, 3 – 4 байтдан 19 байтгача бўлган ҳажмда ёзилиб, а-а, б-а, в-а, г-а... тарзида қофияланувчи шеър. Гарчи манбаларда F. ҳажми 19 байтгача деб кўрсатилса ҳам, адабиёт тарихида 23 байтгача бўлган F.лар ҳам учрайди. F. VII аср араб шеъриятида пайдо бўлган, форс-тожик адабиётидаги илк F.лар муаллифи сифатида «одам уш-шуаро» Абу Абдулло Рудакий (тажминан 860 – 941) эътироф этилади. F.нинг ўзбек адабиётидаги илк намуналари эса Рабғузийнинг «Қисаси Рабғузий», Хоразмийнинг «Мұхаббатнома», Сайд Аҳмаднинг «Таашшуқнома» асарлари таркибида учрайди. Кейинги даврларда яшаб ижод қилган деярли барча шоирлар ижодида F. етакчи жанр бўлиб қолди. Айтиш мумкинки, ўзбек мумтоз адабиётида мазкур жанрда ижод қилмаган шоир деярли топилмайди. Жумладан, Сайфи Саройи, Атойи, Саккокий, Лутфий, Навоий, Бобур, Машраб, Ҳувайдо, Сўфи Оллоёр, Огаҳий, Увайсий, Нодира каби мумтоз шоирлар ўзбек адабиётида F. жанри тараққиётiga сезиларли ҳисса қўшганлар. Адабиётимизда F. жанри ривожига қўшган тенгсиз ҳиссаси учун Алишер Навоий ҳақли равишда «ғазал мулкининг сultonни» деган юксак эътирофга сазовор бўлган. Янги давр шеъриятида ғазалчилик анъаналари Ҳабибий, Чархий, Чустий, Э.Воҳидов, Ж.Камол каби ўнлаб шоирларимиз томонидан муваффакиятли давом эттирилди, F.ни ҳозирги шеъриятда ҳам нисбатан фаол бўлган жанрлардан санаш учун етарли асос бор.

Дастлабки F.лар, асосан, ишқ-муҳаббат мавзусида яратилган бўлса-да, кейинчалик унинг мавзу доираси муттасил кенгайиб борган ва пировардида мавзу жиҳатидан чекловлардан буткул фориг бўлган. Шунинг учун Шарқ шеъриятида F. мавзусига кўра ғоят ранг-бараң бўлиб, бу жиҳатдан уни ошиқона, орифона, риндана, ҳажеий, публицистик, ахлоқий-таълимий каби турларга бўлиш мумкин.

Мумтоз шеъриятда жуда кенг ўрин тутгани сабабли, адабиётшуносликда F.нинг бундан бошқа қатор кўринишлари ҳам фарқланади. Жумладан, қофияланиш тартиби ёки қофия санъатларининг қўлланишига кўра F.и ҳусни матлаъ (а-а, а-а, б-а, в-а...), F.и қитъа (б-а, в-а, г-а...); F.и мусажжаъ (барча байтларида ички қофия бор), F.и зебқофия (а-а, а-а, а-а, а-а...), F.и зулқофиятайн (а-а, б-б, в-в, г-г...); бирор шеър санъати асосига курилгани ёки яратилиш тарзига кўра F.-мувашишах, F.-чистон, F.-назира, F.-му-шоира ва б. F. байтлари, одатда, нисбий мустақилликка эга, айни чоғда, улар бир-бири билан узвий боғлиқ бўлади. Байтларнинг ўзаро муносабати нуқтаи назаридан ҳам F.нинг бир қатор кўринишлари таснифланади: якпора F. – унинг барча байтларида бир мавзудан сўз юритилади; пароканда F.нинг байтларида турли мавзуларда сўз юритилади, унинг бутунлиги вазн, қофия, радиф бирлиги ҳисобига таъминланади; мусалсал F.нинг байтлари ўзаро занжирли боғланиш ҳосил қилиб, матлаъда қўйилган мавзу силсилавий тарзда ривожлантириб борилади. Буларнинг қаторига кейинги давр адабиётшунослиги кўшган воқеабанд F.да кечинма бирон-бир воқеанинг мўъжаз баёни орқали ифодаланади.

F.нинг ўзаро қофияланган мисралардан иборат биринчи байти матлаъ ёки мабдаъ (бошланма, бошланиш), охирги байти эса мақтаъ (тугалланма, хотима) деб юритилади. Мумтоз шеърият анъанасида F.ни номлаш, унга сарлавҳа қўйиш одат қилинмаган. Шунинг учун адабиётшунослиқда ёки шеърхонлар орасида конкрет F. турлича, кўпинча матлаъси (Навоийнинг «Кеча келгумдур дебон ул сарви гулрў келмади, Кўзларимга кеча тонг отқунча уйқу келмади» матлаъли F.и), илк мисраси (Навоийнинг «Эй сабо, ҳолим бориб сарви хиромонимға айт» мисраси билан бошланувчи F.и), радифи (Навоийнинг «Топмадим» радифли F.и), баъзан эса матлаъдаги илк сўзлар (Навоийнинг «Қаро кўзим» F.и) билан номланаверади.

ФАРИБ (ар. فاریب – четдан келган) – аruz баҳрларидан бири, четдан янги қўшилгани учун шундай номланган. У янги деган маънода жадид баҳри деб ҳам номланади. 2 та фоилотун (– v – / – v –) ва 1 та мустафъилун (– – v –) аспларининг такороридан ҳосил бўлади. Асосан, араб шеъриятига хос бўлиб, ўзбек шеъриятида қўлланмаган. Навоий «Мезон ул-авзон»да:

Ики рухсоринг эрур гул чаман аро,
Арақинг юз уза шабнам суман аро, –

байтини *ғаріб* (жадид) и мусаддаси маҳбун вазнига мисол сифатида келтирган. Бобурнинг «Мұхтасар»ида F. баҳрининг ўн бир вазни саналиб, уларнинг ҳар бирига туркий тилда битилган маҳсус байтлар мисол қилинганд.

ФОЯ – бадий ғоя, бадий мазмуннинг муҳим компоненти, асардан келиб чиқадиган образли, умумлашма фикр. Асарда тасвиirlанаётган воқеа-ҳодисаларга муаллифнинг ғоявий-ҳиссий муносабати, образлар системаси воситасида қўйилган проблематиканинг бадий идрок этилиши ва баҳоланиши (қ. тенденция) натижасида намоён бўлувчи бадий ҳукм. Мазмуннинг ўзак компоненти сифатида F. ҳар қандай асарда мавжуд, лекин мазмун-моҳияти, кўлами, ифодалиниш йўсими каби жиҳатларидан фарқланади. Бадий F.нинг мазмун-моҳияти, йўналиши бевосита ижодкор дунёқараши билан боғлиқ. Зоро, ижодкорни воқеликдаги қайси жиҳатлар қизиқтириши, уларга қандай ғоявий-ҳиссий муносабатда бўлишини дунёқараш белгилайди. Ҳар бир ижодкор дунёни ўзича кўради, уни ўзича идрок қиласи ва ўзича баҳолайди. Шунга кўра, ижодкор томонидан кўрилган воқелик реал воқелик эмас, балки унинг ижодкор кўролган ва идрок этолган акси – индивидуал воқеликдир. Шунинг учун воқеликнинг бир жойда, бир даврда яшаб турган икки ижодкор онгидаги акси айни бир хил бўлолмайди. Мас., «Кечা» билан «Қутлуғ қон» романлари муаллифлари бир даврда яшагани, бир даврни қаламга олганлари ҳолда, иккала романда акс этган бадий воқелик бир-биридан тубдан фарқ қиласи. Сабаби, ҳар икки адебнинг асарида ҳам индивидуал борлиқ-уларнинг онгига аксланган воқеликнинг бадий модели яратилган. Модомики, воқеликнинг ижодкор онгига қай тарзда аксланиши унинг дунёқарашига боғлиқ экан, бадий F. ижодий ниятдаётқ муайян даражада шакпланган, унинг умумий чизгилари тортилган бўлади. Фараз қилинг, Иккинчи жаҳон уруши воқеаларини икки қарама-қарши томон вакиллари бўлган адиллар қаламга олди. Улардан бири, мас., Берлинда ўз жонини хавфга қўйиб, танк остидан немис қизалогини кутқарган шўро аскарини, иккинчиси эса вужуди интиком оловида ёнган ва ёвузликка ёвузлик билан жавоб беришга жазм қилган шўро аскарини бўрттириб тасвиirlashi мумкин. Ҳолбуки, урушда униси ҳам, буниси ҳам содир бўлиши мумкинлигини инкор қилиш ноўрин. Демак, воқеликнинг қайси жиҳатларини кўриш, қайсиларини унинг моҳияти сифатида бўрттириб тасвиirlash ва уларга қандай ғоявий-ҳиссий муносабатда бўлиш ижодкор дунёқараши билан боғлиқ экан. Бироқ бу бадий F. том маънода индивидуал ҳодиса, ҳар бир ижод-

кор ўз дунёқарашидан келиб чиқиб исталган F.ни ифодалаши мүмкін дегани эмас. Ҳақиқий санъаткор қайси ижтимоий гурұхға мансублиги, қандай ижтимоий мақсадларни күзлашидан қатын назар, у яратған бадиий асарда умуминсоний қадриятлар устуворлик қилиши шарт. Чинакам бадиият ижодкорнинг эзгулик, гүзаплик, адолат, инсонийлик каби мангу қадриятлар томонида туришини тақозо этади, умуминсоний қадриятларга зид F.ларни ўзига сингдирған асар чинакам бадиий қимматта эга бўлолмайди.

Бадиий асар проблематикаси, унда тасвирланган ҳаёт материали кўламидан келиб чиқиб F.нинг кўлами ҳақида гапириш мүмкин. Mac., A.Навоийнинг «Ғурбатда ғариб шодмон бўлмас эмиш» мисраси билан бошланувчи рубойсидаги бадиий F. бир неча сўз билан ифода этилиши мүмкин. Ҳолбуки, воқелик кенг кўламда тасвирланган, бадиий идрок учун даврининг долзарб проблемалари билан бирга қатор мангу муаммолар қўйилган «Ўткан кунлар»даги бадиий F. ҳақида бундай деб бўлмайди. Бу ўринда асарда қўйилган проблемалар талқинидан көлиб чиқувчи F.лар тизими – бадиий концепция ҳақида гапириш мүмкин. Үнутмаслик керакки, кўлами ё мазмунмоҳияти бадиий F.нинг қиммати, аҳамиятини белгиловчи мезон эмас. Бунинг асосий мезонлари, бир томондан, миллний ва умуминсоний қадриятларга мувофиқлик бўлса, иккинчи томондан, образли тарзда, гўзал ва таъсирли ифодаланганлиқдир.

Х

ҲАЖВ (ар. حجہ – устидан кулмок) – бирор шахсни танқид қилиш, аёвсиз қоралаш, камчиликларини санаб, айблаш мақсадида яратилувчи асар, адабий жанр. Аввал араб шеъриятида кенг тарқалган Ҳ.ларда рақибни қоралаш, шарманда қилиш учун ёлғон уйдирмалар түкиш, жисмоний нұқсонларни юзга солиш, ҳатто уятсиз сүзларни ишлатиш ҳам одатий бўлиб, баъзан Ҳ.нинг ҳақорат ва туҳматга айланниб кетиш ҳоллари ҳам учраган. Мутахассислар Ҳ.нинг сатирадан фарқи сифатида конкрет шахсга қаратилғанликни кўрсатадилар, яъни ҳажвчининг мақсади ижтимоий ҳаётдаги муайян ҳолатни бадиий умумлаштириб, ғоявий инкор қилиш эмас. Бироқ бу фикрни мутлақлаштириш ҳам тўғри бўлмайди. Аникроғи, бу Ҳ. жанрининг илк босқичларига хос бўлиб, кейинги давр шеъриятида унда сатирага хос хусусиятлар, хусусан, ижтимоий йўналтирилғанлик ҳам кўзга ташланна боради. Ҳ.нинг конкрет шахсга йўналтирилғанлиги унда субъективликнинг кучайишига замин яратади, яъни муаллифнинг ўша шахсга муносабати ҳал қилувчи аҳамият касб этиб қолиши мумкин бўлади. Шу боис Ҳ.нинг қадимги намуналарида, айниқса, араб шеъриятида аёвсиз танқид ортида шоирнинг шахсий мағнатлари туриб қолиши кўп кузатилади. Лекин ҳақиқий шоирлар Ҳ.га ҳамма вақт умум манфаатини кўзлаган ҳолда қўл урганлар, танқид қилинаётган шахсда ижобий хисплатларни шакллантириш, ҳалқа фойдаси тегадиган инсонга айлантиришни мақсад қилғанлар. Мас., манбаларда араб шоири Абул Фатҳ ал-Бустий бир Ҳ.ида Маҳмуд Фазнавий отаси каби ҳалқа зулмни ошириб юборганини айтаркан, «отанг қайсар эшакка ўхшаб қолган эди» дейишга журъат қилгани ёки Сомоний вазирларидан бирортаси Мовароуннахр шоирлари Ҳ.идан омон қолмагани, мансабдорларни танқид қилишда улар энг ҳақоратли сўзларни ишлатишдан ҳам кўрқмаганлиги қайд этилади. Ўзбек мумтоз шеъриятида шоҳлар ёки мансабдорларга танқидий муносабат билдирилған ўринлар кўплаб учраса-да, Ҳ. жанри XVIII

асрдан бошлабгина оммалашдикى, бу айни шу даврдан шеърияти-мизда ижтимоийлашув жараёни бошлангани билан изоҳланади. XVIII асрнинг иккинчи ярми – XIX аср бошларида яшаган Мужрим Обид ижодида «оғзига ҳар на келса деб, олдига ҳар на келса еб» юрадиган, камбағални туртқилаб, бойларга лаганбардорлик қиласиган шахслар танқид қилинган Ҳ.лар учрайди. Араб шеъриятидаги Ҳ.ларда бўлгани каби, ўзбек Ҳ.ларида ҳам аниқ бир шахс обьект қилиб олинган. Мас., Муқимиининг «Ҳажви Викторбой», «Ҳажви Виктор», «Воқеаи Виктор»; Муҳийининг «Дар мазаммати Вектур» Ҳ.ларида бир қатор ўзбек савдогарлариничув туширган Кўқондаги ака-ука Каменскийлар савдо идорасининг иш бошқарувчиси Виктор Ахматов обьект қилиб олинган (Муҳий Виктордан кўра кўпроқ унга алданган лақма ўзбекларни танқид қилишни кўзлаган). Муқимиий ўз даврида ҳажвчи шоир сифатида шуҳрат қозонган. Унинг 1910 йили босилган тўпламини «Девони Муқимиий маа ҳажвиёт» деб номлаши ҳам шундан далолат. Шоирнинг юқорида саналганлардан ташқари «Тўйи иқонбачча», «Московчи бой таърифида», «Сайлөв», «Дар шикояти Лахтин», «Воқеаи кўр Ашурбой ҳожи» асарлари ҳам аниқ шахслар танқид қилинган Ҳ.лардир. Умуман олгандা, XIX аср охири – XX аср бошларида Ҳ. шеъриятимиздаги энг фаол жанрлардан бирига айланган, Муқимиий, Завқий, Абдулқодир Савдо (Бепул таҳаллуси билан), Тавалло (Мағзава таҳаллуси билан) каби шоирлар ёзган Ҳ.лар машҳур бўлган. Юқорида айтилганидек, бу Ҳ.лар энди ўзида сатирага хос хусусиятларни ҳам мужассам этган, гарчи конкрет шахс обьект қилиб олинса-да, улар ижтимоий ҳаётдаги ҳолатларни умумлаштириб танқид қилишга қаратилгандир. Буни Завқийнинг машҳур «Аҳли раста ҳажви»да яққол кўриш мумкин. Шоир Завқий 1905 – 1906 йилларда 47 байтли «Аҳли раста ҳажви»ни ёзиб, 46 кишини номма-ном санаб, ҳар бирини аёвсиз танқид қиларкан, умуман, «растада аҳли»га хос кирдикорларни фош қилиш максадини кўзлади. Яъни асар, бир томондан, мумтоз ҳажвчилик анъаналарини давом эттирса, иккинчи томондан, замонавий сатира хусусиятларини намоён этади. Мумтоз Ҳ. анъаналари, мас.,

*Шоқир қора тарзи одам эрмиш,
Минг лаънат ўшал қора эшакка, –*

каби сатрларда кўзга ташланади. Табиатан мутойибага мойил бўлган Завқийнинг саёҳатномаси ҳам «Обид мингбоши ҳақида ҳажв» номи билан шуҳрат қозонган.

ҲАЗАЖ (ар. حازج – замзама қилиш, бир хил овозни тақрорлаш, овозни ёқимли қилиш, куйлаш) – аруз баҳрларидан бири, мағоий-лун асли (v – –) тақроридан ҳосил бўлади. Бундай номланишига сабаб сифатида айрим манбаларда **мағоийлун аслининг охирида ватад** (v –)дан кейин иккита сабаб (–) тақрорланиши, бошқаларида эса ушбу баҳрнинг вазнлари замзамага ўхшаши кўрсатилади. Ҳ. ўзбек мумтоз шеъриятида энг фаол қўлланган баҳрлардан бири саналади. Жумладан, «Ҳазойин ул-маоний» қуллиётига киритилган ғазалларнинг 669 таси (тахминан 22 фоизи) Ҳ.да ёзилган; мумтоз шеъриятда көнг тарқалган рубоийлар Ҳ. баҳрининг ахраб ва аҳрам шажараларида битилиши шарт бўлган. Шунингдек, Ҳ.да қатор йирик ҳажмли достонлар ҳам яратилган (мас., А.Навоий. «Фарҳод ва Ширин», «Лайли ва Мажнун»). Навоийнинг «Мезон ул-авzon» асарида Ҳ.нинг 46 вазни, Бобурнинг «Мухтасар» асарида эса 105 вазни кўрсатилиб, уларнинг ҳар бирига туркий ва форсий шеъриятдан мисоллар келтирилган. Ўзбек шеъриятида Ҳ. баҳрининг, асосан, саккиз ва олти рукнли ўттиздан ортиқ вазнидан көнг фойдаланилади. Мас., Навоийнинг:

Ғамидин гарчи жон йўқ эрди танда,
Тирилдим лаълидин ўлдум деганда, –
V – – – V – – – V – –

матлаъси билан бошланувчи ғазали ҳазажи мусаддаси маҳзуф вазнида, Бобурнинг машхур

Баҳор айёмидур даги йигитликнинг авонидур,
Кетур, соқий, шароби нобким, ишрат замонидур, –
V – – – V – – – V – – – V – – –

матлаъли ғазали эса ҳазажи мусаммани солим вазнида ёзилган.

ҲАЗВ (ар. حذف – орқасидан бормок, ўхшамок) – қаранг: **муқай-йад қофия**

ҲАРФ (ар. حرف – товушнинг ёзувдаги шакли, белги, нишона, қирра) – араб арузшунослигида энг кичик ритмик бўлак. Ҳ. икки турли бўлади: мутаҳаррик (чўзғили) ва сокин (чўзғисиз). Чўзғи деганда унли товуш тушунилиб, «мутаҳаррик Ҳ.» (ҳаракатли) ва «сокин Ҳ.» (ҳаракатсиз) атамаларининг маъноси шу билан боғлиқ англашилади. Мас., «кўз» сўзи иккита Ҳ.: бир мутаҳаррик («кўз») ва бир со-

киндан («з»); «нола» сўзи икки мутаҳаррик Ҳ.: «но» ва «ла»; «вой-жиб» сўзи эса икки мутаҳаррик («во», «жи») ва бир сокин («б») Ҳ.дан таркиб топади. Мутаҳаррик ва сокин ҳарфларнинг муайян тартибда қўшилишидан жузвлар (қ.) юзага келади.

ҲАСБИҲОЛ (ар. حسب حال – ўз ҳолини билдириш) – шеърда муаллифнинг ахвол-руҳияси, ҳаётига оид маълумотларнинг акс этиши, автобиографиклик; мазмунига кўра таснифланувчи шеърий жанр. Аслида, ҳар қандай асарга муаллиф «мен»и, кўрган-кечиргандари, ҳис-кечинмалари, ўй-фикрлари, орзу-армонлари у ёки бу даражада сингади. Адабиётимиз тарихида шундай шеърлар борки, уларда шоирнинг ҳаёти (ҳаётидаги муайян босқич) ўзининг ёрқин ифодасини топади. Жумладан, Бобур рубоийларини айрим манбаларда «ҳасбиҳол рубоийлар» тарзида таснифланадики, уларнинг аксариятида шоирнинг мураккаб ва машақатли ҳаёт йўли, ижтимоий-сиёсий фаолияти, руҳий олами, кайфияти кабилар «лирик мен»нинг иқрори тарзида баён этилади. Рубоийларидан бирида Бобур:

*Бу олам аро ажаб аламлар кўрдум,
Оlam элидин турфа ситамлар кўрдум.
Ҳар ким бу «Вақоєъ»ни ўкур – билгайким,
Не ранжу не меҳнату не гамлар кўрдум, –*

дейди. Дарҳақиқат, унинг кўплаб рубоийлари, айрим ғазаллари «Бобурнома»дан келиб чиқиб тушунилса, уларнинг бўртиқ автобиографик характерда эканлигига иқорор бўлиш мумкин. XVIII асрдан Ҳ. шеърлар битиш оммалашгани, алоҳида жанр сифатидаги Ҳ., яъни маснавий шаклида автобиографиялар ёзиш анъанаси шаклана бошлагани кузатилади. Ҳ. характеридаги шеърлар (рубоий, ғазал ва б.) ҳам, шу жанрда яратилган Ҳ. маснавийлар ҳам адабиёт тарихчилиги учун мухим аҳамиятта эга. Жумладан, Комил, Махмур, Мужрим Обид, Муқимий, Анбар Отин, Дилшод Барно сингари қатор шоирларнинг Ҳ. асарлари уларнинг ҳаёт йўли билан боғлиқ қимматли маълумотлар беради. Мас., Комилнинг «Ҳасбиҳол» маснавийсида шоирнинг нотекис ҳаёт йўли, хон билан муносабати, бир форсий асарни таржима қилиш унга топширилгани ва топшириқнинг вақтида бажарилмагани сабаб, хоннинг барча инъом-эҳсонлари ўша асарни таржима қилган шоир Рожийга насиб қилгани воқеаси баён этилади.

ҲАШВ (ар. شو – түлдирмок) – қаранг: тақтиъ

ХИЖО (ар. حجا – түгри ўқимок) – туркий (ўзбек) арузда энг кичик ритмик бирлик, бир ҳаво зарби билан айтиладиган товушлар гурухи. Туркий арузда ритм шеър мисраларида бир хил микдордаги, бир хил тартибда гурухланган қисқа, чўзиқ ва ўта чўзиқ Ҳ.ларнинг такрорланиши асосида ҳосил бўлади. Арузшунослиқда Ҳ.ларнинг сифат жиҳатидан учта кўриниши фарқланади: 1) қисқа Ҳ. – биргина қисқа унлидан иборат бўлган ёки қисқа унли билан тугайдиган бўғин, унинг чизмадаги шартли белгиси: V; 2) чўзиқ Ҳ. – ундош билан тугайдиган ёпиқ ёки чўзиқ унли билан тугайдиган очиқ бўғин, унинг чизмадаги шартли белгиси: – ; 3) ўта чўзиқ Ҳ. – таркибida чўзиқ унлиси бўлган ёки кўш ундош билан тугайдиган ёпиқ бўғин. Ўта чўзиқ Ҳ.нинг чизмадаги белгиси жойлашиш ўрнига қараб икки хил бўлади: мисра ичида келса, – V белгиси, мисра охирида келса, ~ белгиси қўйилади.

Аруздаги Ҳ.ни тилшунослиқдаги бўғин билан бир хил тушуниш тўғри эмас, бу иккиси ўртасида сезиларли фарқ бор. Жумладан, тилшунослик нуқтаи назаридан қаралса, ўзбек тилида унлисиз бўғин бўлмайди, яъни бўгинлар миқдори сўздаги унлилар сони билан ҳамиша тенг бўлади. Арузда эса бир сокин (яъни мустақил ундош) ҳарфнинг ўзи мустақил ҳолда ҳам, ўзидан кейин келаётган сўзнинг биринчи қисқа унлиси ёки биринчи бўғини билан қўшилиб ҳам бир Ҳ.га тенг келиши мумкин. Мас., «сабр қил» жумласи Ҳ.ларга ажратилса, қуйидаги кўриниш ҳосил бўлади: «саб-р-қил», унинг чизмаси эса қуйидагича: – V – . Ёки уни «сабр айла» шаклига келтириб, Ҳ.ларга ажратсак, «саб-рай-ла» кўриниши ҳосил бўлади, унинг чизмаси: – – – шаклини олади, яъни сабр сўзининг охирги «р» ундоши кейинги сўзнинг биринчи бўғини («ай») билан бирга бир Ҳ.га тенг. Баъзан вазн талабига кўра асли қисқа бўлиши керак бўлган Ҳ. чўзиқ Ҳ.га ёки, аксинча, чўзиқ Ҳ. қисқа Ҳ.га айланиши мумкин. Мас., Низомийнинг:

Мен ошиқман гўзал юзга юзи ойга солур ғавғо,

V --- V --- V --- V ---

Не юздур? Юзлари дилбар. Не дилбар? Дилбари зебо, –

V --- V --- V --- V ---

байти чизмасидан кўриниб турибдики, биринчи мисрадаги «мен» сўзи тилшунослик нуқтаи назаридан битта ёпиқ бўғин бўлиб, аруз қоидасига кўра чўзиқ Ҳ. бўлиши керак. Бироқ вазн талаби билан

аруздаги **васл** (қ.) қоидаси асосида ундағи «н» товуши кейинги сүз-нинг биринчи бўғинига қўшиб талаффуз этилади (ме-но-шиқ-ман) ва шу ҳисобга мафоийлун рукни ҳосил бўлади – вазн бузилмайди.

ҲИКОЯ – эпик турнинг кичик шакли. Ҳ., одатда, қаҳрамон ҳаётидан битта (баъзан бир-бирига узвий боғлик, қисқа муддат давомида кечган бир неча) воқеани қаламга олади. Тасвиrlанаётган воқеаларнинг қисқа вақт давомида кечиши Ҳ.нинг ҳажман кичик, сюжети содда, иштирок этувчи персонажлар сони кам бўлишини тақозо этади. Ҳар қандай воқеа ҳам ҳикоябоп эмас. Ҳ. асосида ётган воқеанинг яхлит, тугал бўлиши талаб этилади, бунинг учун у ўзининг бошланиши ва якунига эга бўлиши (масал, латифадаги каби) лозим. Яхлит воқеани тасвиrlаш асносида ҳикоянавис ё шу воқеанинг, ё унинг воситасида характернинг моҳиятини очиб беради. Ҳ.нинг икки типи бўлиб, биринчисида очерклилик (тавсифий-ривоявий), иккинчисида новеллистиклик (конфликтли-ривоявий) хусусияти устундир. Адабиётшунослиқда буларнинг биринчисини Ҳ., иккинчисини **новелла** (қ.) деб фарқлаш амалиёти ҳам мавжуд.

ҲОЖИБ (ар. حَجِب – парда, ёпувчи, беркитувчи) – байт мисраларидан қофиядан олдин сўз ёки сўз бирикмасини айнан тақрорлаш. Тақрорланаётган сўз ёки оўз бирикмаси қофиядан олдин жойлашиб, уни пардалаб тургандек бўлгани учун шундай номланади. Ҳ. кўпроқ ғазал ёки қасиданинг матлаъсида ёхуд маснавий шаклида қофияланган байтларда кўлланади. Мас., Ҳўжандийнинг «Латофатнома» асаридаги куйидаги байтда «этти» сўзи Ҳ. ҳисобланади:

Кўнгул мулкин ҳароб этти фироқинг,
Қамуғ оламни сайд этти қароқинг.

Байтда радиф (қ.) ҳам Ҳ. ҳам кўлланса, унинг оҳангдорлиги яна-да ошади. Мас., Хоразмийнинг «Мұҳаббатнома»сидаги қуйидаги байтда «хур – нур» қофияларидан олдин тақрорланаётган «минг» сўзи Ҳ., кейин тақрорланаётган «етмас» сўзи радифdir:

Сочинг бир торина минг ҳур өтмас,
Юзунгнунг нурина минг нур өтмас.

ҲУРУЖ (ар. حُرْج – чиқиш) – қаранг: мутлақ қофия

ХУСНИ ИБТИДО (ар. حسن ابتدأ – гўзал, чиройли бошлаш) – қаранг:
хусни матлаъ

ХУСНИ МАТЛАБ (ар. حسن مطلب – мақсадни чиройли баён қилиш) – мумтоз адабиётдаги шеърий санъат, илми бадиъга оид манбаларда *хусни талаб*, *бароати талаб*, *хусни суол* каби номлар билан ҳам аталади. Ҳ.м.нинг моҳияти шундан иборатки, шоир шоҳ ёки маъшуқадан ўзи учун бирор нарса талаб қиласи, бироқ бу талаб нозик лутф, нафис ва ёқимли сўзлар ёрдамида баён этилади. Маълумки, аксар мумтоз шоирларимиз шоҳлару йирик амалдор, бою боёнлар ҳомийлигида ижод қилганлар, уларнинг хизматларида бўлганлар. Шу боис, табиийки, бот-бот ўзлари ёки ҳалқнинг моддий ё бошқа эҳтиёжларини қондириш учун ҳомийлардан нимадир сўрашларига тўғри келган. Бироқ сўрашда ҳам сўраш бор: таъма илинжини яширмай сўраш ҳам, валинеъматни ийдириш мақсадида ҳамду сано ўқиш ҳам, ҳеч бир андишасиз талаб қилиш ҳам, ўз инсонлик шаънини ерга урмай сўраш ҳам мумкин. Мас., «Мұхаббатнома»да ҳомийси Мұхаммадхўжабекни «Масиҳ анфослиқ», «Юсуф лиқо», «Саховатидан базм ичра Ҳотам уяладиган» дәя таърифлагач, Хоразмий ўз талабини очиқ баён этади:

Айитсун банда Хоразмий дуолар,
Карамдин ҳар замон қилғил атолар.

Мазкур байт билан Огаҳийнинг:

Эй шаҳ, карам алар чоғи төңг тут ямону яхшини
Ким, меҳр нури төңг томур вайрону обод устина, –

байти мазмунан бир-бирига яқин, иккисида ҳам сўров бор. Факат Огаҳийнинг талаби назокат билан, санъат даражасида ифода этилган. Огаҳийнинг шоҳга таърифи Хоразмий мадхидан кам эмас: у «шоҳ бамисоли қуёш» тарзидаги қиёсни ўтказади, қуёшнинг нури барчага баравар тушишини эслатиб, ўзини шоҳона саховатдан бебахра қўймасликни сўрайди. Талаб санъаткорона ифодалангани учун ҳам, шоир оддийгина маддоҳ ё таъмагир бўлиб суратланмайди, балки тасаввуримизда шарқона андиша эгаси ва хокисор бир киши, инсонлик шаънини юксак тутган зот сифатида гавдаланади.

Ишқий мавзудаги шеърларда ҳам Ҳ.м. кўплаб учрайди. Уларда маъшуқага хитоб этаётган ошиқ дилидаги висол талаби назокат би-

лан, турли сўз ўйинлари ва ҳаётий тамсиллар орқали шундай ифода этиладики, бундайин латиф изҳор ўқувчини беихтиёр ҳайратга солади. Мас., Навоийнинг:

Садақа, чунки балоларни рад айлагай, ё раб,
Жон анга садқа қиласай, манга багишла они, –

байтида ошиқ ўз жонини маъшуқига садқа қилишга тайёргилю уни (ёрни) ўзига багишлишини Оллоҳдан ўзига хос тарзда чиройли йўл билан сўрамоқда.

ХУСНИ МАТЛАЬ (ар. حسن مطلع – матлаънинг безаги, хусни) – мумтоз адабиётдаги шеърий санъат, илми бадиъга оид манбаларда хусни ибтидо деб ҳам юритилади. Ҳ.м. санъати ғазал ёки қасидани ўқувчи дикқатини беихтиёр ўзига жалб этадиган, унда шеърнинг давомини ўқишига рағбат, қизиқиш пайдо қиладиган тарзда бошлашни тақозо этади. Яъни бундай матлаъ имкон қадар ёқимли, чиройли сўзлардан таркиб топиши, улар воситасида яратилган гўзал поэтик образ шунга яраша чуқур мазмунни ифодалаши керак. Хуллас, шеърнинг бошланиши ўқувчини ҳайратга солиши, завқлантириши лозим. Шунинг учун Ҳ.м. шеър бошланишида ўқувчи таъбини хира қиладиган, кайфиятига салбий таъсир ўтказадиган сўзлар ишлатилмаслигини, фикрни ортиқча дабдабали, жимжимадор ёки саёз ва мантиқиз сўзлар билан ифодаламасликни, яъни лафз ва маъни орасида уйғун мувофиқлик бўлишини талаб қилади. Мумтоз шоирларимиз шеърни Ҳ.м. талабларига мос тарзда яратишга жиддий эътибор қаратгандар, зоро, матлаъ ғазалнинг илк тақдимоти экани, асарга муносабат илк мисралар қолдирган таассурот асосига қурилишини яхши билгандар. Бунинг ёрқин далили сифатида Рашидиддин Вотвот «Ҳадойик ус-сехр» асарида келтирган бир ҳикоят мазмунини эслаш кифоя. Унда айтилишича, бир шоир қасида битиб, шоҳ ҳузурига келтирибди. Шоир қасидани ўқий бошлаганида, шоҳ матлаъни эшитибоқ: «Қасиданинг қолганини ўқищдан тўхта!» – деб хитоб қилибди ва хизматкорига минг динор келтириб, шоирга беришни амр қилибди. Ўзи эса шоир истеъдодига таҳсинлар айтиб: «Агар қасиданинг қолган байтлари ҳам матлаъ каби бўлса, унинг ҳар бир байти баҳоси минг динор. Менинг хазинамда эса бунча маблағ йўқ», – деган экан. Шеър ибтидосига бу қадар катта эътибор берган мумтоз шоирларимиз ижодда юқорида мазкур талабларга риоя қилганлар, шу боис уларнинг аксар ғазаллари матлаъси билан номланади, эсланади.

ХУСНИ МАҚТАЬ (ар. حسن مقطع – чиройли якунлаш) – мумтоз адабиётдаги шеърий санъат, шеър ёки бошқа асарни тингловчига хуш келадиган ёқимли сўзлар, эзгу ниятлар изҳори ёки дуолар билан якунлаш; *хусни интиҳо, хусни хотима, бароати мақтаъ* деб ҳам юритилади. Манбаларда Ҳ.м.дан кўзланувчи мақсадлар ёритиладики, улар мумтоз шоирларимиз асарнинг ўқилиш жараёни, ўқувчи психологиясини ҳамиша эътиборда тутганларини кўрсатади. Жумладан, Ҳ.м., аввало, шеърнинг ўқувчи хотирасида мухрланиб қолишига, иккинчидан, шеърда йўл қўйилган саҳву хатоларни хуш калом билан ювив юборишга хизмат қилади. Шунинг учун Атоуллоҳ Ҳусайний Ҳ.м.ни «таомларнинг охиринда ейилган лазизу ширин таом»га ўхшатади. Шунингдек, манбаларда асарнинг тугалланганига ишора қилиш ҳам Ҳ.м.нинг бадиий-эстетик функцияларидан бири сифатида кўрсатилади. Мас., Сайд Аҳмаднинг «Таашшуқнома» асари шундай мисралар билан тугайди:

Билурсен барчанинг ҳолини, эй шоҳ,
 Иноят чогидур валлоҳу биллоҳ.
 «Таашшуқнома»ни ҳиммат бўлуб ёр,
 Тугаттим етти кунда бемададкор.
 Секиз юз ўттизу тўқизда эрди
 Ки, сўз поёна элтмак даст берди,
 Сўзумни ким ўқиб қилса дуойи,
 Илоҳи кўрмасун ҳаргиз балойи.

ХУСНИ ТАЪЛИЛ (ар. حسن تعليل – чиройли далиллаш) – мумтоз адабиётдаги шеърий санъат, чиройли далиллаш. Ҳ.т.да шоир ўзи айтаётган фикр (тасвир, ҳолат ва ш.к.) далили учун шундай асос келтирадики, аслида, у ҳақиқий далил бўлолмайди, у факат бадиий жиҳатдангина далил сифатида қабул қилинади. Мас., Лутфийнинг:

Юзингдин лола ранг элтиб, уёлиб шаҳрга кирмас,
 Аниң бўйинин киши боғлаб кетурмагунча саҳродин, –

байтида айтилишича, лола рангини ёрдан ўғирлаган, шу сабабли уялиб шаҳарга киролмайди. Яъни лола ҳақиқатан чўлда, кенгликларда ўсади, бунинг сабаби юқоридагича чиройли тарзда бадиий далилланади, аслида эса бу ҳақиқий сабаб эмас. Лутфийнинг бошқа бир байти:

*Кун тушта кўргали сени тушти заволға,
Ой тонгға қолди кечи боқиб ул жамолга.*

Айтилишича, қуёшнинг ботиш сабаби шуки, у ёрни туш кўриш учун уйкуга кетади; ой тонг отгач ҳам ботмади, сабаби ёр юзини узоқроқ кўриб олмоқчи ёхуд ёр гўзаллигига маҳлиё бўлганидан қотиб қолган. Албатта, ушбу табиий жараёнларнинг ҳақиқий сабаби буткул бошқа, шоир келтирган далиллар эса ёр гўзаллиги васфига хизмат қилувчи бадиий восита, холос. Ҳ.т. санъати ташбеҳ асосида юзага чиқади, аксар ҳолларда *тажоҳули ориф*, *тамсил*, муболага каби санъатлар билан қоришиқ ҳолда воқе бўлади.

Илмий нашр

Д.ҚУРОНОВ, З.МАМАЖОНОВ, М.ШЕРАЛИЕВА

АДАБИЁТШУНОСЛИК ЛУГАТИ

Мұхаррир: Абдулла ШАРОПОВ

Мусаххих: Марҳабо ЖҮРАЕВА

Бадий мұхаррир: Феруза НАЗАРОВА

Техник мұхаррир: Хуршид ИБРОҲИМОВ

Нашриёт лицензияси: АI № 134, 27.04.2009

Теришга берилди:08.08.2012 й.

Босишига рухсат этилди: 04.03.2013 й.

Газета қоғози. Қоғоз бичими 60x84 1/₁₆.

Arial гарнитураси. Офсет усулида босилди.

Хисоб-нашириёт т: 20,98. Шартли б.т.: 23,72.

Адади: 2000 нусха.

Буюртма № 070

«AKADEMNASHR» нашриётида тайёрланди.

100156, Тошкент шаҳри Чилонзор тумани 20^А-мавзе 42-уй.

Тел.: (+99871)217-16-77

e-mail: akademnashr@mail.ru

web-site: www.akademnashr.uz

«КО'HI-NUR» МЧЖ босмахонасида чоп этилди.

100097, Тошкент шаҳри Бунёдкор кўчаси 44-уй.

Д.КУРОНОВ
З.МАМАЖОНОВ
М.ШЕРАПИЕВА

АДАБИЙГҮЛШУНОСЛИК ЛУҒАТИ

ISBN 978-9943-389-57-1



682 ГАСТИКА КОМПАРАТИВИЗМ
СИЦИЗМ РЕМАРКА САЕХАТН
ТАЛЛИЛ ХАФИФ ФЕЛЬЕТОН ИРСОЛ УЛ
ШЕЪР ПОСТМОДЕРНИЗМ ЮМОР ЕЧ
АЖАЗ МАЖОЗ ДРАМА
СВАТ БАЙТ ДРАМА
ЛАКОНИЗМ ЭПОПЕЯ ҲАРД
АЖАК БАДИЙЛИК ЭЗОП ТИПИ ФАЗ
ЭРТАК

Д.ҚУРОНОВ, З.МАМАЖНОВ, М.ШЕРАЛИЕВА

АДАБИЁТШУНОСЛИК ЛУФАТИ

